

近代中國史料叢刊續編第二十一輯
沈雲龍主編

湘潭袁氏家集

袁榮法編

袁樹勳著：①新政條例②抑戒齋奏牘輯存

文海出版社
有限公司
印行

新 政 條 議
抑 戒 齋 奏 牘 輯 存



像造歲九十六人老戒抑

新
政
條
議

新政條議卷首

清故署兩廣總督山東巡撫袁公神道碑

義甯陳三立撰

公諱樹勳。字海觀。晚自號抑戒老人。姓袁氏。其先有官茶陵衛者。自壽州移家湘潭。遂占籍爲湘潭人。十二傳至曾祖士辰。祖定國。考瑞麟。以公貴。皆贈光祿大夫。曾祖妣以下皆贈一品夫人。公幼而神宇凝重。以貧廢讀。從里中兒牧牛採薪。一日。邨人大集社。有善相人路。嫗襟坐。公適戶外。弛擔遮嫗前。嫗起立熟視。驚曰。奇貴。非常人也。毋忘我言。粵寇既犯湘潭界。父老稍糾鄉團禦寇。公列伍中。忠武公塔齊布名大捷。而潰寇四掠猶盛。鄉團械杖窳敗。懼不敵。公爲設策。躋羣阜。虛張旗幟。鳴金鼓。伏精壯要隘。果敗寇。獲僞將軍一。銀印一。衆服公智畧。復憶嫗言。始爭奇公矣。久之。從世父治田蘭陵。又去業。鹺淮浙間。又爲權釐小吏。有推公於征捻軍帥者。佐轉餉。累功保知縣。留江南委用。公逾折節爲學。究討吏政。慨然有經世之志。歷權高淳銅山上海補南匯。咸有名績。於銅山治盜尤著。盜魁張三百里者。用驍捷。被此名。連輩羣數千。橫於江北。縣中大猾胥吏。與根結相首尾。名捕三十年。瞠目相向而已。公始至。陽縱不問。偵窟穴所在。驟起擒治之。駢戮其徒數十人。而岳二者。亞於

張亦劇盜。并旁弋置之法。總兵猶子戕於盜。盜莫知誰何。總兵責購益急。某裨將強就戕所取。二人榜掠誣服。置縣獄。卜日設公子主。灑血薦二尸爲公子仇復。公陰引訊察其寃。具語總兵。必求他盜。脫枉濫肆戮。污名累盛德奈何。總兵恚曰。若文吏枝梧至此。既而曰。誠有術致他盜者。盡一月爲之。不則併劾若屬矣。會鄉民環總兵廨。持炷香訟寃逾千人。總兵亦稍悟。旬日竟縛獻真盜。左驗畢具一縣頌爲神明。及代去。爲之立生祠。知上海一歲。丁父憂去官。歲甲午。中東構釁。劉忠誠公督師山海關。公從劉公軍次。復丁母憂。服闋。以知府分發江西。司權景德鎮。時有貴谿仇法教士之獄。鄰縣教堂同被燬七十餘所。焚劫教民至七八百戶。法人要挾無等。巡撫惶急。方遣兵壓其地。公過調。歷陳持平防後患狀。巡撫以爲然。立止前所遣兵。檄公馳往按問。廉得司鐸麥立儒所爲犯衆怒者。乃走上海列訴所識總主教。總主教感悟。戒所屬便宜寢其事。後僅償金數萬。懲首犯二三人。而斥麥立儒還其國。是時公聲稱籍甚。江西巡撫旣贖陳公治教案有效。劉忠誠公復列公堪使才任方面。於是授公天津府將之官。畿輔亂作。兩宮西狩。公間關隨援師抵行在。召對訖。愈益嚮用。公遂簡荆宜施道。未幾。特調蘇松太道。朝廷蓋以蘇松太道駐上海。中外交涉輻湊。亂後和議就。得人與否。尤繫大局安危。故以命公。既受任。值國勢益弱。無可措手。公殫慮據誠。根據約章。折衝忠允。終爲外國人所敬服。償款逾數萬萬。法當用銀爲抵。視算金幣差虧贏甚鉅。公往復爭持詰辨。諸國使者窮於

辭。幾可徇我。卒格部議。擲大利不顧。公扼腕太息。以爲國無人焉。外人規展租界地。或陰肆蠶食。公時時防止未然。竟不得逞。又強與改訂濬黃浦成約。絕侵冒。全扼海形勝。粵人黎黃氏之獄興。市民憤怒挺起。幾釀大變。公躬爲排難。不以關政府事定。釋黎黃氏。而女犯拘於西人獄。亦革其例。官滬五歲。威惠彰聞。授江蘇按察使。總督奏留任。旋入爲順天府尹。擢民政部左侍郎。署山東巡撫。除爲眞。其時當預備立憲。類襲條教塗耳目。詭以自名。公則汰冗員。矯浮議。以勤庶政。恤民隱。嘗行部。儉從數輩自隨。不煩供張。羣吏不敢蔽欺。苟自便。歲餘。調署兩廣總督。所駐地海岸別爲一州。民物浩穰。其俗狎賭而走盜。賭愈熾盜愈不可止。論治者患之久矣。顧公家頗取給賭。納羨餘曰賭餉。承賭者曰賭商。勢積而爲奸隱。故迭禁無效。公欲塞其源。懸良法。規久遠。毅然讓變鹽稅。買賭餉。賭商鹽商交不便。走賂京師親貴。敗公策。抗疏辯爭。莫能得。初軍警交鬪。倚公指揮立解。反因緣媒孽。中傷公。至公審大勢所在。願請開國會。鑿時望。銷禍萌。益爲用事者所忌。于是權量身世。乞骸骨罷歸。逾歲。公居滬濱。革命軍起。而君國不可復問矣。乙卯三月七日。以疾薨。享年六十有九。其年十二月。歸葬於衡山大旗嶺金盆山之陽。公起令守。秉節鉞。爲治精能持大體。新舊學說。襍糅觀其通。不輕爲抑揚進退。於外交時。其柔剛而盡其情僞。往往彌縫挽救。爲功於國甚衆。自湘軍定亂。佐中興。殊猷偉烈。焜耀區宙。將相名臣。接踵不絕。然號爲通習海國之務。顯其專長。厥推郭侍郎嵩燾。曾惠敏紀

澤。鄉里後起。惟公差與之埒云。生平以少失學。在官不廢文史。所草章奏。曲達事理。多爲時所稱。尤務興學。長養人才。斥金累鉅萬。他善義事亦如之。孝友之行。至性過絕人。傳其逸事。有未易及者。配唐夫人。側室龔氏。男子子六人。思亮。有學行。唐夫人出。體乾。增文。思喜。沛崑。思彥。皆龔氏出。增文出。爲弟某後。女子子三人。長適同里唐文鼎。次適長沙汪景玉。皆唐夫人出。三龔氏出。未字。孫二人。公葬之。越二歲。公子思亮。狀公治行。責文其墓道之碑。人亡國殄。泫然次列。系之銘曰。

火維峨峨。旁絡瀟蒸。含精散氣。人傑以興。萬靈翊運。不匱爾能。公奮草莽。前列繼繩。始廉劇縣。枕肱讀律。巖巒結蟠。羣盜所窟。鉏拔酋豪。莫我毒齟。摩瘡掖廷。光風嘘拂。曰翔南州。屬目健吏。遭燔祆廟。禍覺狎至。爲折其萌。爲庇其良。導窳弭害。爰輯一方。彼昏射天。召侮列國。兩官蒙塵。喋血京闕。搶攘排幹。孰才而賢。公聲播聞。側席待焉。建牙通都。江海交會。棟居華戎。委公控馭。長蛟巨鯨。出沒怪醜。敗殘餘喘。攀攬何有。公與折衝。禿豪瘡口。陰陽闔開。中懸霆吼。卒頗化悔。惡尸功首。延頸內外。宵爛箕斗。遂擁節旆。式是魯邦。翦猥飭紀。巷息吠兇。有盜滋張。移公嶺海。矢恢墟畧。雄風無改。淵淵大謀。貪夫敗之。謗謗匪躬。讒舌玷之。公不煖席。皇極用隳。天耶人耶。一木敢支。溝亂化離。接語海屋。偉貌疏髯。隱痛在腹。斯世曷戀。與造物遊。錢銘詔後。永顯鴻猷。

升任順天府府尹蘇松太道湘潭袁公去思碑

光緒乙巳。蘇松太道湘潭袁公。奉朝命升授江蘇按察使。紳商士民。思公之政。感公之惠。爭挽留之。既得旨允行。丙午春。將移節以去。又奉朝命升授順天府尹。勢不可復留。乃相與旁皇累獻。聚而計謀。以爲如公之服官行政。利澤及民。去思之碑。不可無作。自古神明之稱。循良之頌。必實有愛民之忱。宜民之政。俾民陰受其賜。相與留連歌思而後得之。夫民之所厚自圖者。曰身家安甯。利益公溥。顧安民利民之道。非尋常成法之所能限。知時之變而因之。見必然之理而循之。寬之以格。假之以權。俾得合羣策羣力。以自致其安甯。自溥其利益。則民之嚮結感慕。馨香而尸祝。亦固其宜。公初以知縣官上海。推仁廣惠。布公止辟。民已稱之。洎奉命分巡是邦。適在庚子後。商旅散歸者未復其所。公撫輯懷柔。不期年而視昔爲倍。辛丑。和約既定。上海一埠。交涉愈繁。遜順則權夷。激烈則事債。公一以和平商理。不亢不卑。日俄事起。嚴守中立。不撓於兩領事之責言。公堂之闕。罷市之變。賴公推誠宣導。而民氣馴。據理執爭。而外人服。雖在淺夫纖豎。莫不知公之保衛是邦。而被和平之幸福也。比年以來。新政推行。學堂踵設。上海得風氣先。建置尤多。然經營之始。皆以局於資費。趨起不前。而公分俸捐廉。掖之成立。若敬業。若養正。若強恕。諸學堂各有補助。復特改龍門書院爲師範學校。三屬人士。既獲師資。外省外府。亦聞風而集。異日教育普及。皆公之賜矣。淞滬之濱。人稠類雜。多窮而失教之民。或丐乞而叫號。或游手而很暴。於是邑人議設勤生院。欲羅而居之。施以教養。公嘉其

事。慨捐巨資。其成也可立而待。凡清節保節同仁輔元普育各善堂之蒙公澤者。猶其瑣瑣者也。往歲之秋。風潮爲害。崇寶川南諸境。田廬漂沒。民嗟其魚。公親往察視。據以上聞。發帑施賑。全活無算。警察之設。自甲辰年始。公實倡之。公又念列強之淳興。以地方自治爲基礎。由是博采羣議。詳請大府。設立總工程局。舉南市馬路電燈。及城廂內外警察事宜。一委諸紳。官紳商民。團體益固。向之沉墨幽滯。積數十年而不得行者。一旦豁然坦然。無所阻步。方將賴公之力以維持督勸於上。奈何不獲久留公也。公之於吾民。維之護之。瞻之恤之。贊之助之。罔不如其所欲而止。美政厚惠。其何能忘。是用陳其政績。勒之豐碑。以寄其長言永思之情。而系之以頌。其辭曰。

猗歟袁公。治適厥中。因時敷化。教育道隆。內政既備。外交尤洽。宏此遠謨。有功不伐。監司重寄。蒞治五年。惟帝念功。迺用超遷。惓惓民懷。眷思靡極。勒頌茲碑。永昭千億。

光緒三十二年 月 日。上海紳商士民公立楊逸謹書。

是碑原刻石高八尺。廣二尺五寸。當時昇送道署。時局迭更。今不知留存何所。而我自治機關。風雨飄搖。嗷而復起。吾儕重葺

效區。不勝懷舊之感。總重李公平書。屬將是碑。縮寫一紙。鑲成銅板。張諸市公所。以誌不忘。新紀元十三年甲子仲冬楊逸並識。

先府君行述

嗚呼傷哉。遭時之多艱也。先府君以乙卯歲三月七日。棄其不孝之孤。閱九月。至於季冬。始克卜葬。

於衡山大旗嶺金盆山之陽。時湘邊用兵。道路訛言洶洶。乃以其月十有五日。視窆封窆。蓋欲求一納壙之言弗得待也。嗚呼。府君幼遭髮難。長歷憂患。垂暮之年。復躬覩辛亥之奇變。一人之身。數十寒暑。而喪亂之來。幾相爲終始。迨乎歸正首邱。猶不獲從容乞言於當代鉅人長德。以銘諸幽。而永其傳。而思亮等薄德不文。復不克如歐陽公之表瀟岡之阡。世變彌劇。是非日淆。誠懼先德勿耀。以爲大痛。謹詮次所聞於長老及躬所睹記者。爲先府君行述。世有蓄道德能文章者。倘哀而賜之一言。以文於墓道之碑。死且不朽。府君諱樹勳。字海觀。晚自號抑戒老人。湖南之湘潭人也。袁氏舊籍安徽之壽州。明季有官茶陵衛者。曰扶桑公。始家於湘潭。遂占籍爲湘潭人。十一傳至客山公諱士辰。先高王父也。曾王父建伯公諱定國。王父向亭公諱瑞麟。歷世隱曜。服其先疇。孝友忠信。式於閭里。及府君貴。自高王父以下。皆贈光祿大夫。高王母以下。皆贈一品夫人。府君生而明敏。爲童子時。出語有斷制。先曾王母嚴太夫人。性嚴整。於諸孫不少假詞色。獨喜府君。往往憑怒。得府君一言。輒解。嘗語人曰。大吾門者。必此兒也。幼以貧廢讀。從里中兒牧牛採薪。羣兒皆敬憚。莫敢侮。有老嫗善相人。會里中社。村人咸集。召老嫗來。各使相其子弟。府君方自外馳擔入。遽前曰。嫗相我。嫗大驚起立。曰。貴人也。吾相人多矣。無如子者。好爲之。他日當致八座。人以此稍稍奇府君。時粵寇起。湘人多練團自衛。府君亦在伍中。塔忠武湘潭之捷。潰賊奔竄。四出劫掠。鄉團新創。未與賊遇。又器械朽窳。

聞賊來。皆大懼。府君號於衆曰。賊新敗無鬪志。若聯鄰團爲守望。於高阜張旂幟。鳴金鼓。銃礮以壯聲勢。賊知我有備。必不敢深入。而別選精壯。挾利器。設伏於要隘。殲賊必矣。從之。賊果大創。獲僞將軍一。銀印一人。以此益奇府君矣。既從先伯祖藻亭公治田於蘭陵。復去業。嵯淮浙間。又嘗爲權釐小吏。以綜覈稱。時髮亂粗定。而捻匪尙猖獗。有薦府君於督師者。被檄司後路糧臺。積轉餉功。累保至知縣。留江蘇。授高淳令。甫一稔。大吏以爲能。檄權銅山。銅山古彭城地。民俗强悍。多大俠劇盜。號難治。前之爲令者。倚捕捕役辦賊。捕役多與賊通。賈緣爲奸。誣良陷仇。民益困。盜益熾。府君初蒞官。不急治盜。盜相慶不爲備。有盜魁張三百里者。一晝夜能馳三百里。故名。其徒以萬數。朝旨名捕。三十年勿能得。府君密遣人偵之。久。盡得其窟穴隱伏之所。一日。自率練勇。直入其巢。張與其徒方劇飲大醉。倉猝錯愕。悉伏地就縛。一訊具服。與其徒數十人駢戮之。又有岳二者。名與張埒。亦設計捕之。置於法。羣盜大震。乃集父老子弟。爲講守衛之法。興農桑之利。富者得安其居。貧者有所資以爲生。盜稍稍戢矣。鎮軍某之猶子。爲盜所殺。鎮軍痛之甚。日鞭笞所部。懸重賞購盜急。中軍某欲邀功。賄諜者。就被盜所左右。擒二人來。鎮軍自鞫之。畧辯訴。則三木具下。乃誣服。鎮軍命寄縣獄。將卜日爲位。殺而祭之。府君慮其枉。復訊之。則號泣具言狀。察其貌。恂恂善民。且不得賊。乃破械縱之。而請於鎮軍曰。某治邑無狀。盜殺公子。又不能卽得盜。重以勞麾下。誠愧荷。願治盜按獄。縣令

責也。某察二人非真盜。又按驗無左證。不足以復公子仇。而使公蒙殺無辜名。萬一真盜得。公將何辭自解。某不才。必得盜以報。鎮軍怒曰。爾文吏。怯殺人。期爾一月得盜。否且劾爾。會鄉民持香訟冤者數千人。環鎮署。鎮軍召府君往諭之。皆泣拜曰。吾儕必得盜以自效。無累吾令君也。不旬日而鄉人縛盜來獻。贓物具在。一邑稱神明。其時江西臨川桂君中行守徐州。清明正直。治獄多所平反。觀察某則以嚴酷著。每獲盜。不卽殺。以釘釘其手足於城門。叫號數日不得死。過者不忍觀。府君與桂公力請罷之。時人爲之語曰。道紅磚。府青天。愛民如子。銅山縣。其得民心多類此。及受代。留鞭截鏡。相屬於道。建生祠於潛園。歲時致敬不衰。旋調甘泉。未之官。補南匯令。海疆巖邑也。邑民健訟。每受狀日。必百數十起。積案有十餘年不結者。府君終日坐堂皇。耳聽手批。裁判明決。曲直悉中。未及三月。案無留者。豪紳劣衿。奸胥蠹吏。望風屏息。獄訟大減。風氣丕變。邑濱海多雨。常苦水患。府君爲周視原隰。規畫溝洫。疎河洩潦。築隄捍潮。灌溉有資。泛濫無恐。治邑四載。年豐民和。上海爲春申故都。互市以來。中外雜處。輪舶輻輳。冠蓋紛集。衝繁甲於他邑。大吏選牧。恆難其人。檄府君往權篆。華洋訟案。以及民教之爭。不激不隨。無偏無倚。甫及一稔。以丁先王父憂去官。甲午。劉忠誠公方駐師山海關。檄充行營隨員。未幾復丁先王母憂。服闋。以知府候官江西。江西貴谿教案之起也。鄰邑教堂同時被燬者七十餘所。教民被焚劫者八百餘戶。法人索賠款數百萬。要求殺縣令。指索兇犯。

數百人。請敕建天主堂。司鐸出入得用地方官儀仗。橫肆無理。民情益洶憤。連村數百里。相勾結抗捕者。案懸年餘不結。府君時方權釐景德鎮。以事來南昌。聞大吏將派兵赴贛。府君遽入白巡撫曰。民教之閔。民必有積不能平者。兵往且激變。就令屈服。民教隙益深。後患滋大。巡撫然其言。罷前所遣者。檄府君往按其事。府君至。盡得其司鐸麥立儒所爲不法事。及與府縣官干涉詞訟文書。乃走上海謁總主教。總主教固官上海時所舊識也。具告以狀。且爲言法人以教會爲犧牲。蒙惡名。受實禍。而彼陰收其利。主教意大動。遂與府君書。爲介於九江分主教。令其和平議款。府君既得書。馳歸九江。凡所要索悉不許。僅賠款數萬圓。懲首要二三人。而逐麥立儒回國。其所干涉諸訟事不平者爲之平反。往返匝月而讞以定。巡撫松忠節公大奇之。先是朝旨令疆臣舉使才。及可任方面者。江督劉忠誠公舉數人。府君其一也。得旨記名。至是簡天津府。將之官而拳匪亂作。巡撫奏留治江防。未幾。承旨派援師入都。營務處凡三易人。無敢往者。府君慷慨請行。抵清河而兩宮已西狩。遂由河南入陝西廬驛。兼程並進。至潼關迎駕。召見於行在。奏對稱旨。旋奉旨駐軍衛輝。時各省援師大集。沿途需索供億。民不堪擾。忠敏公端方護陝撫。奉命查辦。獨江西軍絲毫無所犯。九月。簡湖北荆宜施道。不數日。調蘇松太道。故事。各行省監司缺員。軍機大臣彙存記及資深知府應陞者各銜名以進。是時樞臣之值行在者。僅仁和王文勤公一人。又倉皇出走。檔冊未及收載。無可開列。湖北巡

撫于蔭霖劾荆宜施道爽良疏。與松忠節公薦府君可大用。疏適同時至。兩宮垂詢王相。遂以府君名應。命下二日。而劉忠誠公復以蘇松太道程儀洛才力不及。奏請另簡。兩宮諭樞臣曰。袁某劉坤一所保。松壽亦稱其長於交涉。又嘗官上海知縣。有政聲。可調任。蓋出自特簡。而嚮用之殷。亦基於此矣。蘇松太道治上海。距前爲令時已十年。和議初成。國勢日弱。外交益棘手。府君根據約章。不稍屈撓。賠款用銀。義正詞確。往復詰難。積牘盈尺。各國辯論。幾窮於詞。卒爲部議所沮。府君爲之扼腕太息。濬浦載入和約。意在攫我水上警權。力爭改約自辦。吳淞門戶。賴以保全。擴界之謀。外人蓄之已久。往往於壤地相錯處。越界築路。府君輒飭所屬。拔其標識。而拘其工人。終府君任。無敢嘗試者。日俄戰爭。烟臺俄艦被捕。西國噴有煩言。府君從容措置。悉當公法。黎黃氏一案。民情憤激。幾釀巨變。外部恇怯。莫知所措。府君力持大體。以一身當其衝。卒之不劾一官。不殺一人。不償一錢。而黎黃氏以釋。女犯押西牢之例。以革。府君嘗語人曰。國弱極矣。條約已失敗。若並此條約而不能守。則焉用外交官爲。府君覩國步艱難。非改革政治。不足以圖存。於是於滬南創設自治局。以爲他邑模範。吾國之有地方自治。此其權輿也。任滬道五稔。內政具舉。外交大和。聲譽隆起。中外無間。已拜陳臬江蘇之命。江督猶徇紳民之請。爲之奏留。迄授任京兆。始得受代。蒞京供職。不一稔。而擢民政部左侍郎。署魯撫。旋即眞焉。時朝廷方以預備立憲詔天下。各省以新政爲名。務爲鋪張。府君蒞魯。大事

裁汰。而事無不舉。整飭吏治。不遺餘力。各屬稟牘。皆親加批覽。來謁者恆舉其所報各案。若者可。若者否。若者虛。若者實。罔不洞中肯綮。聞者折服。莫敢欺蔽。嘗出巡。儉從才十餘人。一切皆自備。不以供應勞地方。京察。被旨以實心任事考。上考。府君令南匯及任蘇松大道時。皆學卓異。而以巡撫膺上計。尤爲異數。言者榮之。年餘。調任粵督。粵俗嗜賭而多盜。府君以賭爲盜媒。下車卽嚴申賭禁。而賭稅爲粵中餉源所自出。乃欲改革鹽政以代賭餉。賭商鹽商皆大震恐。爭輦巨金至都下。賂親貴之有力者以泥之。府君抗疏力爭。議卒不行。兵警交闕。事起倉卒。文武惶惑。罔知爲謀。府君雍容指揮。不一日而事定。羣小媒孽。轉以此獲咎。又嘗奏請早開國會以鑿民望。益爲親貴所不喜。遂引疾罷歸。逾年而革命之事起矣。府君資稟穎異。未嘗入塾受經。比業。鯉江淮。始從人讀書。有授以古文者。期年而通其大意。執筆作札。動累數百言。詞旨條鬯。自官監司。以至督撫。特疏要牘。皆親自草創。而幕僚潤飾之。幕僚又皆一時知名士。故文移章奏。多爲世所稱誦。尤注意於教育。官瀘道日。時議廢科舉。府君提倡學堂。獎勵補助。無所不至。一稔之內。公私學校林立。各屬聞風興起。嘗捐巨資於湘中明德學校。又選送邑人子之俊秀者資之留學。辛亥國變以後。復捐資創神州大學於上海。其他如湘潭之育嬰保節各善堂。以及各省災賑。前後所捐。不下十萬金。生平不喜爲煦煦子子。遇義所當爲者。毅然任之。無所辭。苟以爲不可。雖威脅利誘。不爲動也。事先王父母。以孝聞。官縣令時。

兩迎養至署。官書旁午。定省無缺。鮮甘輕肥。先王父母之未嘗未御者。勿嘗弗御也。居先王父母喪。哀毀逾恒人。喪終服除。每遇忌日。或歲時伏臘。莫不悲號哀慕。如新喪時。又嘗以先王父母不及親見貴盛。備隆孝養。言及未嘗不嗚咽流涕。不能自己。友于兄弟。先三叔早世。遺孤子女六人。皆撫之成立。以教以誨。以嫁以娶。先二叔屢以賈敗幾破產。府君方駐軍衛輝。馳書慰之曰。勿憂。吾爲爾舉責。復遣書責家曰。逋若干。惟吾之求。勿苦吾弟。然實不名一錢。比改官。始悉償如約。性儉樸。有以爲言者。輒曰。吾不忘微時。且不欲示子孫以奢也。府君官滬道時。嘗受知於項城袁公。項城罷官家居。府君訪之於彰德。留數日甚歡。辛亥。項城再起。以書招府君。將任以直督。府君知事不可爲。謝勿往。國變後。項城復虛參政以待。亦以疾辭不赴。公私之誼。出處之節。蓋亦審矣。嗚呼。府君仕宦雖達。而陋於時會。不克竟其所施。爲縣令時。政蹟多可稱述。而思亮等所習聞者只此。其聞焉而弗詳者弗敢箸於篇也。子六。長思亮。母唐夫人出。次體乾。次增文。出爲先四叔後。次思聲。次沛崑。次思彥。庶母龔出。女子子三。長純宜。適同邑唐文鼎。次蘭宜。適長沙汪景玉。母唐夫人出。三萱宜。庶母龔出。孫榮法。榮棟。府君生以丁未五月初十日午時。歿以乙卯三月初七日巳時。葬以乙卯十二月十五日寅時。不孝男思亮泣血謹述。

袁樹勳。字海觀。晚號抑戒老人。湘潭人。光緒十七年。由南匯縣調任邑令。二十六年。任蘇松太道。有政績。士民戴之。官至兩廣總督。精鑑賞。收羅甚富。書法氣局開展。在蘇米之間。宣統辛亥後四年卒。

在任時。屬吏之能書畫者。待遇特異。尤深契於高壘公。脫畧形跡。不以僚屬相待。卒後。壘公檢其書札遺墨。裝成尺牘。自題一詩云。讀書無用將成巧。上帥憐才不論官。留有數行遺跡在。恩波湧出墨光寒。蓋亦一時知遇之感也。

新政條議

湘潭袁樹勳海觀

官保尙書閣下。敬稟者。本年某月某日。奉憲臺札。開光緒二十六年十二月初十日諭旨。以欲求振作。當議更張。舉凡朝章國故。吏治民生。學校科舉。軍政財政。當因當革。飭下臣工。各抒所見等因。欽此。欽遵。恭錄行知。飭令條議具復等因。奉此。聯道一再紬繹。竊謂皇天眷佑中國民。膺啓皇太后皇上。懲前毖後。渙汗其大號。毅然欲造舊邦而一新之。不禁額手以慶。諭中言及母子一心。則又伏讀涕零。仰見皇太后皇上。以列聖之付託爲重。以天下之存亡爲亟。慈孝之隆。上足慰三祖七宗之靈。下足慰四海五洲之望。以此圖功。何功不成。以此革弊。何弊不革。職道思之。弊亦非一朝夕之故矣。自周秦以來三千年。一姓之興。必有一二良法。迨其亡而法無不弊。踵其後者。防一弊。增一法。增一法。生一弊。汙元明而玩弊極矣。國朝定鼎。撫其民不易其俗。乃適當潰決之衝。且所用之人。求自帖括。進自捐輸。得自保舉。襍流並進。非惟法弊也。又有人弊焉。其自愛者。束縛於法之中。其不肖者。橫軼於法之外。重以頻年多故。元氣夷傷。即使鎖港閉關。一無外侮。勢亦有不得不變者。而況以一羊處羣虎之間乎。皇太后皇上。既值千古未有之變局。當集千古未有之大勛。瘡痍之天下。須以朝氣

蘇植之。守成之天下。當如草昧經營之。所有策士之橫議。學究之迂語。低聲細步之人材。竹頭木屑之算計。一切無所於用。必廩廩焉握蛇尾而騎虎背。決萬幾於公論。求智識於實區。而後天可回。日可返。昔有一成再造。未聞千里畏人。唐臣陸贄之言曰。宣暢鬱壘。不可不洞開襟抱。洗刷疵垢。不可不盪去癩痕。特患不變。不患不富強。特患不富強。不患無復讐雪恥之一日。岌岌時局。懷懷愚誠。謹分條以上。用備憲臺采擇。首請定議法之人。宜設議政。以資總理。變法事體大。哢襍而議之。築舍者無成。枝節而爲之。疑衆則召敗。責有以挈乎其總者矣。而或者曰。雍正設軍機處。本舉政之重大者而言。所以破內閣之科臼也。乃未幾而軍機又成爲內閣矣。名雖三四人。實止首列之一人。上取進止。且有獻可。無替否也。今將興一利。剔一弊。固求一時可行之效。要立萬年不拔之基。如僅定議於片時。取決於立談。不懼其有闕遺乎。周官分職。並立冢宰。日本維新。有總裁局。議政局。同治中興。援順治例而設議政王大臣。合房杜之謀斷。定蕭曹之規隨。削平髮捻。率歲全功。前事可師。柯則不遠。此不必曾經出洋。亦不必素嫻西學者。始能勝厥任也。但得公忠體國。大雅宏達者。卽堪其選。如聖意一時無所專屬。請飭下王公及內外大臣。會推三四人。恭候枚卜。其次卽爲參議。秩視尙書。更推二三品內外官之閎識孤懷。資望茂美者各數人。爲副參議。秩視侍郎。以次推閣部院科員司之素行修潔。洞達政體者十人。外官道府直州之治行卓著。練習國故者十人。爲議郎。內以資國聞之益。

外以收謀野之獲。秩視四五品卿。其直房毗連軍機處。遇大政事大沿革。由軍機處請旨交議政所。副參議率議郎議之。參議卽副參議。議郎所議而駁勘之。議政更卽參議所議而反復之。然後取旨交軍機處施行。其管勾檔案繕寫文札。皆議郎兼之。繕寫有不給者。仿日本傭雇相當之人。亦準官等以給俸。事已卽去。書吏斥不用。不去此輩。不足言治。各署之吏。方將芟減例案。鈔列表目。引入仕途。以次拔司員。進委員。用士人易之。斷不宜爲之多增窟穴。此議法之人。所謂綱中之綱也。其軍機處閣部以及院科。則司法者也。外而督撫。下至州縣。則行法者也。次請言吏政。一裁冗員以節糜費。然宜止裁其大而冗者。中國治民之官少。而治官之官多。其微末之京秩。佐雜之閒員。但能顧名思義。無不各有考成。爲節用計。此亦無幾。徒使聞者寒心。因此朋生沮力。所謂大而冗者。如穹然中堂。卽在冗列。各寺皆併於部。不建儲貳。則詹事府爲虛設。此京員之大較也。外官則新疆已設行省。似伊犁等處參贊領隊可以裁。烏里雅蘇臺庫倫科布多西寧青海等處幫辦辦事各大臣。名爲防戍。實則坐食。豈竟一無可裁者乎。奉天之有五部侍郎。仿故明留都之制也。旣改行省。儘可裁去。受其成於將軍府尹。以免掣肘。不第歲節七千五百兩之養廉。一萬兩之公費已也。康熙六年。以王熙言。裁關差歸併地方官。今閩海之兼由將軍者無論矣。粵海淮安等關監督。不可以已乎。三織造歲銷二百餘萬兩。大典傳辦。猶未在内。京師百物殷賑。萬商輻湊。津沽輪舶梭織。由殷商遵照色樣。往南

包辦。則三織造可裁。如以商辦非體。獨不可裁。二留一乎。福建巡撫已併於總督矣。湖北雲南廣東三巡撫何以不裁。直督東撫能兼河工。河南居東河之上游。地勢較高。工段較短。修防較易。何以豫撫不兼河工。況咸豐六年。已有裁改南河總督之案也。東撫兼河工不支養廉。河工獨歲支養廉銀一千兩。以彼例此。未可爲平。至以十萬石之米而留河運。以留漕督。淮徐海三屬之釐金。各省之協饌。正陽關海分司五河鹽釐之月饌。所入歲約四十萬。漕標及各營一切歲銷不過二十餘萬。下餘之十餘萬。則歸無何有之鄉矣。過而存之。亦何爲者。學政本曰提學道。自直隸江浙用翰林外。餘省以部曹及參議道知府任之。雍正四年。定翰林部郎並差。嘉慶後。非翰林出身者。必三品以上始得任之矣。夫另簡學政者。非以巡道爲不足信乎。不足信其爲學政。而足信其爲巡道乎。且編檢必在館中。颺歷一二十年。始可望外。一麾出守。求巡道不可得。何以猶是編檢也。今日可任之而爲學政。及放巡道後。反不信之。以爲學政也。如以學政重教化之責。未聞巡道可不以教化爲責者也。亟宜如古制。以巡道兼任學政。巡道自有養廉。自有公費。十九學政。歲科三年。可省養廉二十萬。公費如其數。考費陋規則倍之。數亦不織矣。卽承平無事。猶將梳而櫛之。況值此殷憂啓聖之時乎。所有裁併各員。如他未補官。仿日本依願免官賜金之例。酌給養廉十之幾。以終其身。示朝廷不爲己甚。二改官制以副名實。中國之吏治。病不在設官之多。而在辦事之少。均之有諉卸而無責成。有牽掣而

無贊助。府所以總縣之成也。如貴州石阡等府。及各省直隸州直隸廳。既有本治專管之事。又有屬邑兼轄之事。止此才力。如何能給。可悉改爲縣。知州品高於縣。而其轄境往往有隘於縣者。亦一律改從縣名。庶免歧異。夫縣亦猶是人耳。今綜丞簿巡尉之任。而以一手足任之。欲不隳廢難矣。應仍舉其任而還之其人。以縣丞主賦稅。主簿主水利農桑巡檢主警督橋道。典史主刑獄。而保護教堂。咸有責焉。教官主學堂。知縣但挈持其綱領。稽考其遺失。以時白之藩臬黜陟之。藩臬直隸戶部刑部。督撫主兵主饌。得黜陟藩臬而不干與其銓補。刑法之事。其有縣屬。止一典史。向無丞簿巡檢之處。凡府屬有同知通判。足敷給事。其經歷照磨檢校司獄等員。無非重僮。大可移設。設官以爲民也。親民之官。得其人則庶幾治矣。三辟僚屬以襄治理。新政之行。經緯萬端。求專門於學堂。早亦須十年以後。勢不能不就現有之材。辦現行之事。漢唐有自辟掾屬之例。日本有敕任奏任判任之制。宜令內外正印官。內則於額外司員中。外則於候補各班中。擇賢自輔。所有竹籟之傳。停年之格。趁此焚闕不完。暫勿拘以苛例。亦任人不任法之微意也。其誤事瀆職者。仿日本由本屬長官懲戒之法。曰譴責。如中國之記過。曰罰俸。曰免職。由長官諭令本人。自請免其職。不奪其階。四去兼差以專職業。一官數人。一人數官。權利則互爭。仔肩則互卸。徒令屬吏竊其枋。蠹胥窟其奸。妨損治理。莫此爲甚。不特兼差宜去也。並令久於其署。臯刑契禮。垂工夔樂。愈分愈專。三代下材不古若。而任之繁任

之驟轉什伯於古。往往朝綰銓符。夕兼比部。既筦農政。復總容臺。就令五官並用。亦恐日不暇給。駕輕就熟。蓋難之矣。應請自部曹外放者。卽授以與部務相近之官。他日內除。卽與初授之部相終始。無朝除暮調。治絲自棼。五集公所以完日行。各部之總辦主彙。猶日本之書記官也。彙成。卽由其長閱定行之。則案無留牘矣。今一部也。有管部。有堂官。署各數人。人各數差。竟有旬日匝月不一進署者。總辦主彙。報往拔來。蹀躞於私宅。伺隙於朝房。略閱首尾。草率一押。及事之行。廢闕久矣。應請堂官以下。每日勒定到署時刻。務完本日應行之事。而後退直。其連日不到者罪。外省各局差亦如之。其類外其候補。許隨同學習。許各行所見。卽於辦事之中。寓課吏之意。泰西有仕學院。我一時無此美備。亦宜月由其長聚而試之。試以辦事之條理。不以詞章爲高下。遇差缺。卽取月課專長高等者補之。其劣無文者。惰不振者。躁無恥者。以時別退。無姑息。六嚴濫保以杜倖門。使執保舉與捐納者較。人必謂保舉勝矣。庸詎知保舉之私弊。有什佰於捐納者哉。非不區別等次。非不核實刪減。次卽次其賄屬之不齊者耳。刪卽刪其關節所不到者耳。且所保之事。並非所用之事。就使所保得實。亦復無神實濟。計惟如馮桂芬所議。以小保大。以衆保獨。如部臣缺。則令其部之額內外司員投票保之。如督撫藩臬缺。則令其省之大小京員投票保之。軍機大臣差別其票之多寡。以其名擬正陪。上請宸斷擢用。參王制衆爵之意。本明人會推之法。庶以破藩籬而杜膽狗乎。七厚廉俸以贖臣工。國

朝給俸之薄。率因元明。雍正加外官養廉。增京員祿米。乾隆加恩俸。而一二三品以上俸銀。尙不足以給輿馬。欲其劇精戢志。平章軍國得乎。其七八品以下雜職。歲共五六十兩。亦有家人。亦有輿馬。忝綴班行。如何能給。欲用其身。而令其書空咄咄。仰屋荷荷。殆未可歟。請卽量從其增。京官議政大臣。軍機大臣。大學士。應如日本之太政官。月給八百圓例給之。其下以次遞減。外官自督撫以下。正印官支銷浩繁。酌增之。大抵州縣。總須月給五六百圓。七八品以下雜職。總須歲給五六百圓。所有京官之俸米印結。津貼飯銀。照費陋規。外官之公費津貼。平餘雜費陋規。均仿耗羨歸公之例。和盤托出。提解入公。加俸以外。所餘實多。化私爲公。在上則惠而不費。在下則取不傷廉。乃今而後。可言勸職。否則日日言澄敘。事事求振刷。未見有能濟者矣。八重贓罰。以厲廉恥。今之治贓罪。亦不爲寬矣。何以贓吏且日起。而未有已也。雜流競進。人盡可官。獵得寸符。餓豺攫食。什敗其一。特損級撤任。大則鐫職已耳。而適遂其飽颺之計矣。但有通神之錢。自有回天之力。未幾而舊物光復矣。未幾而崇階又展矣。其害於官箴者。猶小。壞於風俗者。實大。今請凡遇贓吏。一經發覺。必追繳原贓。而又按數倍議厥罰。使羅掘而入者。仍傾倒而出。徒多負一貪墨之名。或當縮牙斂爪。而不敢逞。貪夫敗類。彼既不自惜。我亦何惜而不重譴之乎。九優致仕。以崇廉退。古者七十而致仕。非特以休其筋力。亦以讓賢路也。其未七十而致仕者。時論高之。今則鐘漏垂盡。夜行不休。官止此數。來者孔多。將來學

堂出身之員。但有卒業憑據。自不便限其年以入仕。計惟風厲致仕者。以畧舒積薪之嘆乎。乾隆二十二年。定部員年五十五歲。宜詳加甄別。三十三年。改定六十五歲以上者。夫身膺重寄。國民交賴。自不能潔身遠去。若頭童齒豁。而猶營營於不甚重輕之官。蓋有笑其後者矣。今宜不拘服官若干年。有致仕者聽。明洪武十三年。命文武年六十以上者皆聽致仕。給以誥敕。順治時。令三品以上得自陳求罷退。目前仕路壅塞若此。應更推廣其意。變通其例。但有輕去其官者。不論何時。許其致仕。且令馳驛以榮之。或半俸以贍之。在入仕慮有替冒。不得不多其文結。以示械束。若致仕。則印牘朝陳。章黻夕謝。交代既清。夫復何求。加考加結。繁文縟例。此何爲者。如慮其規避。斷無規避之人。而能舉其職者。如疑其飽颺。此種嗜利無恥之徒。將逐之不暇。豈以其囊橐爲未盈而羈留以益之歟。今制。年未及格。不許致仕。於是無病而曰有病。且非繼而曰出繼。無親而曰有親。曰以降服也。以終養也。則何如明聽其挂冠。既以疏通仕途。亦以遺遠榮利也。十薦自代以察人材。唐制。常參官授上後。三日內必薦一人以自代。如昌黎薦錢徽。馬總韓泰。張正甫。其文具在集中。此意最古。而暗益於吏治。大抵爲缺擇人。雖賢者或不免阿好。若到官薦代。不過例行之事。明知朝廷並不取以相易。然人情自求氣類。斷不肯薦一不肖者以自污辱。朝廷轉可據薦者之多寡。以察被薦者之賢否。爲登進人材之券。天下事有似迂而實正者。此類是矣。十一仿議會以期共治。州縣親民之官也。無論良法

美意。君相主之。督撫施之。一州縣之吏。起而扞格之。卽止矣。嗟夫。官與民之否隔亦久矣。其病原於鄉職既廢。南北互選。官無久任。橫飛食人。於是書役蝗蠹其間。官與民遂疾視而不相恤。驟行新政。滋之擾耳。今既還其任於丞簿巡尉。而更仿日本民選議院之意。於各縣設共治局以通之。不復鄉職而有鄉職之意。不設議院而有議院之益。附郭爲一局。四鄉各一局。局設適中之市集。入局者必令人公舉。先期分校。就近之舉貢生監。豪農富商。得舉人者之姓名。示期至局投票。當官視票之多寡。以定入局之人。多不過四五人而止。其人已爲民舉。舉而不當。民無所尤。官得操縱之。消息之。終不致偏有所菟枯。使局員罔利以爲害。舉凡賦稅學堂。繪圖編戶。民兵警察。水利橋道。保護教堂。一切要政。官得因民之利。治民之事。官亦有所牽制。而不能恣睢以自逞。垂爲定制。紳無干與之嫌。謀及庶人。官有衆擊之助。而書役之溝塹。藉以不攻而自破。泰山之虎。永州之蛇。從此免乎。十二芟無謂之儀從。令甲府州縣。無迴避牌。蓋親民之官。如父母之於子。故皆以知名。晚近以官爲市。一符入手。頭上有餒。深居簡出。疑帝疑天。偶一公出。儀衛森嚴。闐咽於道。小民求一望見。顏色不可得。至若府州縣以上。秩愈尊。膽愈小。輿從以外。間以刀矛槍礮。如禦大敵。殊不可解。英君主今制。居則門以兩紅衣卒。俠立。正門守以紅衣卒八人。出惟六馬駕車。二紅衣卒前導。君且如是。下逮百官。單車徒步。特常事耳。夫旂纛輻繖。牌扇。鞭杖擁護。例固不强之不用。亦不强之必用。胡勿少少芟節。無令道

路以目。且來往時亦省幾許。隨身竿木也。就州縣論。阜快役食。例於地糧項下坐支。名數畧有增減。每州縣阜役歲銷可四五十兩。輻繖扇約如阜役之數。壯役可二三百兩。共歲銷四五百兩。天下千七百州縣。歲計約八十萬兩。綜督撫將軍以下各署。歲一二百萬兩之流可節也。古之人有行之者。巫馬之星出月入。其無輻牌旂鑼繖扇鞭杖可知也。漢范丹長萊蕪步行無車。魏崔林徐鄴令徒步之官。政平訟理。流燬到今。鏟去浮文。集成鉅款。爲帑政計。裁之固無損。爲吏政計。裁之且有益矣。有政事而後有財用。次請言戶政。則籌餉爲當務之亟。同治十年。法之踣於普也。償兵費至二十二千萬鎊。合中國銀可一千兆兩。法人上下一氣。未三年償款一清。駐兵盡撤。西人以其富也。仍附諸頭等國。嗚呼。中國臣民可以媿矣。可以興矣。夫國之不可一日無財。猶魚之不可一日無水。聞歲需償款約二千八百萬。此必統盤打算。卽不能如法之一氣償清。亦須籌備的款。庶可壹意進力。從事新政。否則上焦下熬。歲籌償款且无暇。其於新政。無非狹隘迫促。效蓋可睹矣。夫財者。天不能降也。地不能湧也。則亦惟就固有之大利。變通之整理之而已。一豫算有表。王制。冢宰制國用。必於歲杪量入以爲出。周官太府。歲終則以貨賄之入出會之。唐宋之會計錄猶是此意。今東西國。歲底豫算來歲之用款。列表示民。可爲知要矣。我則各私其私。羣吮衆吸。所有款目。司其事者以爲枕秘。私生欺欺生弊。不問可知。亟宜將入款清釐之。出款撙節之。計其出入相抵。不敷若干。布告國中。咸使聞知。

共設彌補之法。曰豫算表。每行一事。以實估計。畧如今之估工冊。曰決算表。大抵取所不諱也。用所不惜也。當自所取所用。令民共耳共目始。二南漕改折。南漕初定四百萬石。中更髮捻。以次改折。近惟留江安糧道之十萬石以備河運。江蘇浙江二糧道共一百十萬石以備海運。不過四成之一耳。然則改折之有利無害。亦已顯然明白矣。無論河運煩費。未免作繭自縛。卽一百十萬石之海運。亦可已而不可已者也。州縣雖收本色。恐其存倉霉變也。卽就近糶之。而以其價向上海米行豫定應繳之數。至開局時。卽糶以交兌。然則名曰本色。實則購從上海者也。同一購從上海。有沙船。有輪船。則在津采買便。有招商局。有洋公司。則包由商運便。夫何取乎糧道滬局津局通局之總辦提調文案支應監兌催兌漕董之紛紛爲也。目下聯軍未撤。京洋尙是公地。無論河運海運。而往何所存度。此不可不爲之計矣。且也。無論旗丁。無論京員。所領俸米。曾不自食。往往每石減售不過銀七八錢。而以易麵食易白米。則何如各按米數酌增其俸。而兩受其益乎。一轉移間。所抵所省。數百萬之巨款在握矣。三衛田繳價。南漕四百萬石。時會所至。折解多於本色。河運止得海運什之一。似運軍之患宜有艾矣。戶典。凡屯田分給運軍。其不能自耕者。或官召民佃。承租贍軍。或民賃軍田。軍自取息。私相質賣者與受者皆罪。夫昔運四百萬石之漕。而運軍之屯田不加增。今運十萬石之漕。而運軍不加減。此豈能索解人哉。查戶典。乾隆十八年冊載。各省屯田。共二十五萬九千四百十六頃四十八

畝有奇。雖有兵燹。豈竟桑而滄耶。既有私相質賣之禁矣。重以漕督糧道衛弁與兼轄之知府節節鈐束。即使沙石坍塌。豪民影占。運軍詭賣。衛弁乾沒。而冊載炳然。自可按圖索驥。十四所四十三衛守備千總。不武不文。哀然在列。予之嚴限。分別確查。先儘運軍繳價。給爲永業。逾限不繳。不論土客民戶。視運軍應繳之數。酌增二成。卽以屯田與之。運軍象養既久。運既罷矣。因而罷其屯田。猶得先儘繳價。酌減二成。已足以示皇仁。況自髮捻蹂躪。改海減運。運軍之子孫。三桓已微。無慮鋌而走險。若不武不文之衛弁。正苦去之不早。汰冗員爲抽釜底之薪。籌國計爲補眼前之孔。如果經理得人。共二十六萬頃。畝繳銀一兩。可得二千六百萬兩。畝繳銀五錢。亦可得一千三百萬兩。開源則謝不敏矣。如此自然之流。有著之款。何爲而棄貨於地也。四籌議旂糧。卽不爲理財計。而以八旂爲豐沛。故家聚而屯紮於一方。追惟去年之變。不能不爲寒心矣。況乎不戰坐食。歲耗大帑。旣病國計。依旗萃處。日引月長。孳乳繁夥。餘丁無定。饟額有定。嗷嗷待哺。亦病旂民。嗟乎。此兩敵之道也。豈可不爲之所哉。通計京師宿衛旂兵。除九門提督所轄綠營萬人外。共十萬有奇。歲支饟草米豆賞卹銀共三百餘萬兩。嗣又增滿蒙漢三項養育兵共二萬七千四百有八人。歲饟四十二萬兩有奇。順治初。又以各路征兵分鎮各省者爲駐防。無論騎步。皆合滿蒙漢以爲營。共駐防兵十萬七千七百有奇。皆統於將軍都統城守尉。歲饟約準禁旅之數。立法之初。朝廷不欲旗丁爭民人之利。禁置產。禁營

運。禁無事他出。禁與漢人通婚姻。於是男佚於鈞弋。婦休其蠶織。無望其戰守也。生齒日盛。一日。生計日窘。一日。雍乾以來。列聖羣先哲。亦汲汲於此。乾隆初。已有漢軍八旗閒散。准其出旗之令。乾隆九年。御史柴潮生奏請。統已仕未仕。提給饌項。概令出旗。迄今又二百年。漢軍之依旗者如故。固由眷戀國恩。不甘自外。亦以額饌可襲。仕官較易。因瞻顧而不肯棄去也。夫中外臣工。勿得存滿漢之見。歷奉詔旨。乃官制兵制。明明劃滿漢而二之。如之何其可也。竊謂無論滿蒙漢。無論額內外。許置產。許營運。許無事他出。許與漢人通婚姻。其官幕商及他業所至之地。卽報明爲其所隸之籍。曠闕不補。以次裁併。不二十年。規模大定矣。各省駐防。當時固爲安置征兵起見。而亦恐漢人有反側者。始枝分葉布。以彈壓之。漢之傾心臣僕。將三百年矣。外寇充斥。方指揮其臣僕。禦侮之不暇。防之何爲者。且髮逆之擾。如江寧杭州乍浦駐防。效忠喋血。靡有孑遺。大半徙福州荊州鎮江等處。旗丁以實之。每過滿城。煙寮茶肆。游惰盈道。朝廷未見此景象。尙以爲維城可恃。而豈知蒿萊瓦礫。舉目荒涼至此哉。尤不能解者。乍浦副都統等員。以衙署被燬。無存。常年僑寄杭州。旣無其實。奚爲必存其名。糜此帑項乎。誠能集議裁併。設法資遣。所省旗糧固巨。卽如將軍都統等員。其敕印儀仗。歲必一名。列入開銷。此種無名之費。舉此類推。尤可積少成多。職道非不知八旗爲從龍之裔。故朝廷優而給之。然與其爲旦夕之謀。依旗而局促乎一隅。孰如爲久遠之策。出旗則繁衍乎天下。八旗不乏魁

曩宏識之士。必有能辨之者矣。五清理牧地。國朝重牧政。戶典載。盛京及沿邊之地。廣漠無際。屯墾所不能盡。擇水草肥美者爲場。僕典載。牧場分界甚詳。此皆上駟院旗營之牧地也。兵典載。陝西甘肅涼州西寧肅州有牧馬場。江南營馬有牧場者。依界植柳編籬。或掘溝爲限。是綠營亦有牧地矣。此外各省駐防。均有牧地。有離營數十里數百里者。自非牧馬所能及。既已撥爲牧地。徒使奸胥黠民。勾結占墾。髮匪之劫。浙江滿營燿焉。以前牧地文牘。大半散失。而歲由按察司委員征收牧租。則亦尙可鉤考。若夫科爾沁等二十五部落之地。東至盛京黑龍江。西至厄魯特。南至長城。北至朔漠。表延千有餘里。所謂蒙古草地也。光緒二十一年。黑龍江將軍增祺奏墾通肯河等處疏內。並請將杜爾伯特郭爾羅斯一并放民開墾。旋奉旨以地屬外藩。應無庸議。夫藩屬者。朝廷之藩屬也。明明有可興之利。而以藩屬置之。在聖意恐爲藩封擾。自是深識遠慮。然飭令貝子鎮國公等設法招墾。無任富媪精華。壅鬱不鬯。夫亦政體所宜也。聞之過其地者。診察土脈。相度流泉。與內地曾無區別。以二部例之。其餘二十三部。可墾之地。京垓莫數。若能由郡王等分別酌留牧地。所有閒田甌脫。悉數放墾。謂非大利歟。昔之外藩患其強。今之外藩患其弱。蓋時勢已迥異矣。其關內外及各省旗綠各營牧地。亦請嚴飭通查。酌量放墾。其已被占墾者。先使墾戶繳價。逾限奪之。另召繳者。有土此有財。皆按籍可收之利也。尤有說焉。墾則天時地利人力。或有不齊之慮。既曰牧地。牧則斷無所謂不

宜也。但得卜式其人者。大興牧政。谷量牛馬爲富不訾。卽骨角毛腊乳酪。灌輸外貿利亦不繼。此在人爲之耳。六加稅免釐。天下自主之國。其稅則隨時輕重。本有自主之權。我自江寧定約。以稅則載入約中。於是洋貨稅則。外人得持枋而搖我矣。十年以來。除洋藥稅外。歲進口稅約在一千六七百萬上下。內地釐金數畧等。外人病我釐卡櫛比。洋貨之銷路未暢。每與議加進口稅。必以盡罷內地釐金爲要挾。夫使以矛盾。竟如其所要挾。一旦竟加進口稅。以盡罷內地釐金。渠必無詞。卽不能援洋藥之例。加至值百抽二十。但能加至值百抽十。則進口所加。足抵釐金而無不足。而或慮釐金歲入已久。內解外銷。唯恐不給。舉而罷之。疆臣束手矣。不知部協各饑。可由海關逕解。並酌量每省常以外銷之中數。由關提還。以濟辦公。此至便也。或慮互市口岸。已徧江海。釐卡一撤。隨地可以上岸。內外奸商。勢必任意勾結。以漏正稅。誰復向海關進口者。釐金旣已普裁。關稅亦必銳減。非兩失之耶。不知釐卡雖撤。而各省常關固在也。改約時。申明停罷釐金。如有洋貨不粘印花。越關漏稅。船貨一并充公。遠涉重洋。其不敢貪漏稅之小利。而被充公之重罰。決矣。或慮海關之權已屬稅司。雖曰晉用楚材。畢竟非我族類。更停釐金以加進口。是稅司之權益重。何如並行釐金。阿枋尙不盡倒授也。豈不聞三聯單之行。日盛一日乎。洋旂一颺。萬卡無聲。再越數年。恐大宗之貨無報釐金者。釐金雖不停。不過零星土貨。不特不敷比較。且將不敷開銷。不如請停釐金。而於所加進口稅內。肩任

部協各饋。歲提外銷之數。勻給各省。以爲未雨之綢繆。否則不停而停。臨渴而始議掘井。嗟何及乎。七鬻爵停捐。自來得不償失。未有如官捐之甚者也。閻敬銘謂。在銅曹時。詳知此項捐數。出於封衛。貢監者十之七。出於實職官階者十之三。然則官捐所入。數亦無幾。而令各省各班壅滯。坐歎積薪。其委補到班吮吸吾民之膏血者。十倍數十倍此。其失愚者知之。外人笑之。官捐不停。殆不足以言新政矣。雖然。官不可賣。雖流外之秩。足以病民也。爵不妨鬻。雖極品之銜。無傷政體也。韓莢曾因商君民爵遺意。而有抗禮轉售之說。馮桂芬依以議變捐例。今更變而通之曰。鬻封爵。唐宋之開國公侯伯子男。如漢之關內侯。如今之虛銜頂戴。駁歷仕途者得之甚易。國朝五等之封。艱於異姓。今實官之害如彼。而捐項之細如此。不如從重定例。就五等中。按等遞減。花樣既新。禮數亦異。聞者興起。輸將必衆。惟尙寄仕版者。不得援例。以因公晋接。有乖儀注也。曰鬻女爵。周禮天官。有九嬪以掌女學。漢有內起居注。魏有女尙書。齊有女侍中。古固有以婦女備官者也。惟泰西男女並重。各國女學林立。前者晉豫旱災。安徽壽州貞女孫明義。倡捐賑款。曾奉明旨嘉獎。可見巾幗中志切顯揚。樂於表見者。必不乏人。但授以爵。似亦於古有徵。於今無礙。可撰一品至九品名色。或卽以夫人至孺人爲爵。因而鬻之。有欲封贈其父母伯叔兄嫂翁姑及本夫者。如其品。而仍予以大夫將軍郎之封。計於名器並無輕褻。而於度支大有增加。以視捐納實官。冒不韙之名。而僅收有限之款。其利害豈煩

言解哉。八折解例貢。任土作貢。自古相承。爲節費計。槩予鏟除。雖不知政體者亦不敢申此妄議。乃有輦轂之近。物美價廉。俯拾即是。而必責令遠省。循例額解。甚至所解之物。或昔美而今惡。昔有而今無。必籌動庫款。派員分赴鄰省購辦。或徑由承解委員齎款到京購辦。隨赴部府交納。往往正價幫價脚價。較購自都下。價過五倍十倍不等。而解交部府後。非必嗟咄待用。不過陳陳相因。充積屋棟。此豈非勞民傷財徒費無益者耶。各省皆有例解。試舉其畧。如安徽之椶絲。屆時札委二員。赴湖北江西等處購辦。然後派員解京。其浮冒可想矣。江蘇之油燈布。以松江產也。今皆領價在上海購辦。而銷耗擲虛牝矣。浙江之黃絲。既有織造。不以兼辦。例由藩司委二員購辦。呈由巡撫委二員驗收。再由藩司委二員解京。不亦煩費乎。光緒八年。山西巡撫張。請將晉省例解綢絹紙張。折價解部。旋由部府議復。仍令照辦。竊所未喻。職道之愚。似乎例解各貢。可請一律折解。即在都市購備應用。其各省節貢。不動正款。或由公費支銷。或由州縣捐辦。並可酌量緩急。分別應貢應停。而將停辦之價。提充部餼。似亦歲入一大宗也。九仿行印稅。外國之印稅。畧似中國稅契之制而推廣之。查稅契定則。每契價銀一兩。解司正耗銀三分三厘。願契必有尾。頒自藩司。硃費印費紙墨費房費隨費到處一律。藩署取之州縣。州縣則取之吾民耳。其價自一兩至十四兩九錢爲小契。十五兩以上爲大契。須由縣詳府印發。以數萬數十萬之地糧。州縣可信。而十五兩之稅契。便以州縣爲不可信。而必

信之府。徒多一層使費。此不可解者也。小契每張約收錢一千有餘。大契則每兩收及百錢。故漏稅之例至嚴。而民間稅者半。漏者亦半。其黠者以一契分爲正找。以正契投稅而匿其找契。以免稅。凡事經官吏之手。無利無弊。不獨稅契也。誠欲官籠其利。而又可破除官吏之弊藪。莫如仿行印稅。稅例以法爲密。稅值以比爲輕。其制與郵政之售人頭紙畧同。由國家定製印花。設一總售印紙之地。城鄉鎮集。民居鋪戶。躉售零售轉售。均從其便。許扣收百分之一。以爲潤。法例有按張大小之印花。有按值征稅之印花。有躉購印花。有專項印花。不論浮產實產。卽坊肆賣買價在兩銀圓以上者。必購印花紙黏貼之。如不黏貼。及黏貼而不塗銷。希作挪移重複之用者。罰以契價之倍。契券單據。均作廢紙。民知費輕而罰重。自然輸將恐後。視稅契所入當在數千百倍。前者御史陳璧奏請仿行印稅。稱英法德俄等國。此項歲征。皆得一萬萬至二萬萬。日本地最小。亦二千餘萬。中國廣土衆民。卽事屬草創。姑從疏闊。得歲征一萬萬。亦於帑政有裨。但飭出使大臣。采集各國印稅章程。參酌備用。並不必如海關郵政。授權外人。規畫既定。一中材之商。足以任之事。如此其易也。利如此其巨也。豈非挾貧之一策哉。十剔丈荒田。地利所在。人驚趨之。髮捻削平三十餘年。人口孳生倍之。米價翔貴。倍之。原田每每。豈肯坐荒。其沙石衝壓。水利墮廢。墾種不敷。工本修復。無人提倡者。間亦有之。然十不獲一也。自麟册燬失。豪強易於兼併。狡健易於飛灑。於是目中絕少荒田。册內確有荒數。荒者固

荒。不荒者亦捏而爲荒。舊熟新墾。咸弊混於隱匿之內。欲田賦之復額難矣。今將普律清丈。人力財力。皆虞不給。思任事者不肖因而滋之擾也。請言其易行者。莫如別丈。不論何省。孰必多於荒。僅謀丈荒。以時則速。以款則省。由州縣分別屯衛鄉里都堡郵莊。照繪成圖。何處有荒。丈而注之圖。就各分圖合而爲州縣之總圖。荒田既瞭如指掌。熟田自粲若列眉。確查賦役全書。譬如州縣原有額田萬頃。今丈得荒田千頃。必有熟田九千頃矣。順莊籤認。柵鑿相尋。予限不首。作隱匿論。沒其田而罪之。但以釐剔奸弊。並非意外搜求。所有荒田。概可入官。征糧則無主。有來墾墾者則主者爭之。爭之而不耕穫。不菑畚如故也。田率汙萊。闕誤額課。何以堪此。丈歸於官。由官招墾。不問土客。酌收輕價。專款報部。果係田主。何以逃課。闕誤已久。不追其課。亦云寬矣。必令一體繳價。以示罰也。卽以安徽一省論之。每年額征正耗。共一百七十萬餘兩。其豁免者不計。光緒十四年至二十年。共荒闕銀二百四十六萬八千餘兩。他省卽荒不至此。度亦不少。若不從速清釐。額賦日虧一日。夫田荒可言。政荒則胡可言也。十一澈查例災。荒與災相依倚者也。荒清而災未清。則捺荒入災。徒換一名色而已。不獨捺荒入災也。更有捺熟入災者。卽使荒田悉數成熟。糧仍懸於紙上。水旱之災有已時。人心之災有已時耶。夫思歲之災者。官民同情也。乃以災爲利。以災爲例。不思其災。反思其不災。其實不災亦災。並不災亦不災矣。秋成將屆。豪右奸胥。刁生劣監。設局辦災。無論豐歉。有勢力者例入災冊。具

以轉賣與人。平民按畝輸納災費。始得列入。否則。雖真災而糧額依然。蠲緩不及也。有賣災分災喫災之目。有災坊災保災董之稱。非無州縣之詳勘。道府之覆查。不過收受災費。酣嬉一過。而詳覆相符矣。其一二自好之員。歲或有收。不肯報災。報必以實。其下必架匿災大題。紛紛上控。去之而後已。其始劣董蠹胥。構喫災之局。以魚肉良懦。繼且劣董以喫災持蠹胥之枋。而吞噬蠹胥。終且劣董蠹胥。以喫災牽州縣之鼻。而挾制官長。奇災如晉豫無論矣。其餘無歲不災之州縣。凡詳勘覆查者。費有一定。災亦有一定。尤可怪者。秋成定例。報及六分。輒令帶征舊欠。不及五分者。便須分別蠲緩。於是報及五分七八九厘。天下一律。此非愈求其實。益明示以欺乎。竊謂欲清災弊。密網繁文。均可鏟去。其法先嚴於在上。宜通飭復古水則之制。時時以所屬田地之高下。雨暘之愆若。比較水則。於歲報例災之州縣。預遣親密。先往訶察。以核各屬所報分數。大致是否相符。其得災費者。斥之。先議官而後議。及劣董蠹胥。庶災弊可望漸清乎。十二清釐民欠。荒弊矣。災弊矣。因而糾葛愈深。頭緒愈亂者。則曰欠。劫更髮捻。其以開墾爲名之大吏。未嘗無人。州縣之黠者。本未開墾。捏稱全熟。虛詞具報。以迎上旨。應納之課。悉消融於民欠之中。荒固欠。不荒亦欠。災固欠。不災亦欠。則欠在官。自御史劉恩溥奏造徵信冊。民間習聞而習見之。苟所納錢糧。已及上年分數。積欠之款。卽任催罔應。新欠尙可追呼。若隔二三年之陳欠。輒謂朝廷既知之而寬之矣。緩者藉口免征。欠者視爲應欠。則欠在民。

定例。帶征處分。不及九分。卽鑄級。不許抵銷。設例過嚴。因州縣適以自困。自來帶征之難。倍於新欠。雖以銳於圖報之州縣。誰肯貪有限之平餘。而蹈不測之嚴譴。於是例報中稔。留券交代。祇候豁免。而後已。非荒非災。迫之不得不荒。不得不災。變而通之。豈容已乎。今必欲清民欠。不先理荒災。固無從入手。但先理荒災。亦未易竟功。宜豁除眞荒之糧。宜停造徵信之冊。民無可託之詞。紳無可道之法。官無可舞之弊。無捺掩。無浮收。尤要在帶征之欠案。重其賞而寬其罰。俾中材之州縣皆可自效。而民欠之理過半矣。十三編定戶口。自聖祖仁皇帝諭令。孳生人丁。永不加賦。而丁糧并於地稅。於是各州縣所報丁口冊。不過約計其數。循例以達之督撫。督撫亦以爲具文也。不加抽覆。卽據以上陳。所謂奉行故事而已。不知天下大塊也。積於州縣。保甲賦稅。災賑科派。警察等事。無不以戶口爲根本。戶口不實。各事無從措手。亟宜責之共治局。協同分鄉分堡。一一編查。必以實并詳。析繪爲圖。不但可以察知民生之登耗。卽興養立教。亦可得而徐理矣。抑有請者。丁口稅卽頭會箕歛之遺。而東西國以爲正供。正惟有永不加賦之令。民間沐浴膏澤。將三百年。尤不可不思所以報。泰西有民捐戰款者。今議償如此其巨。自口賦外。安得集此大宗。偶一行之。誰曰不宜。第非常之原。黎民思焉。且丁口雖衆。漫無稽考。孤貧者尤多。勢不便盡人而捐之。斷不可直居丁稅之名。轉以驚衆召敗。可豫於編查戶口時。暗暗詳註其家之浮產實產。以爲議稅等次。將來可易其名曰義捐。一人一銀圓。

意若曰義則捐。不義則不捐。稍知亟公者。自不至以一銀圓之微而冒不義之稱。其有自願多輸若干圓者。自是其人之好義實然。名正則言亦順。通其變使民不倦。此在主持其事者之神明其意焉耳。無財則貧。無禮則亂。請次言禮政。一變科舉。古無所謂科舉也。秀士選士。造士進士。人材皆升自學校而已。流失所極。子衿佻達。游說盛行。學校蕪穢。科舉萌芽。此亦時勢所趨矣。濫觴其在。漢之賢良對策乎。至隋唐始專以制科取士。則二者劃然不復可合并。而學校之古意。蕩如秋煙之無復存矣。今行新政。不廢科舉。不足塞中外之望。廢之以驟。恐懷鉛握槧者駭而怖焉。此亦情之可憫者矣。暫請科舉如其舊。而增有用之科。以奪之時文爲一科。以朱子通禮科之意。增掌故科。以鄭樵圖譜學之意。增測繪科。以文事必須武備。增兵畧科。以中外時有交涉。增法律科。以使命首重。專對增編譯科。以制器以給民用。增藝學科。共時文爲七科。如乾隆以前專經之例。今天下學額蓋稍稍濫矣。如一州縣正額。加額得三十名。則七科各占其五。多寡以是爲差。其試時文者。人數雖衆。不得過所占之名數。其餘科則寧缺無濫。惟此科果有溢才。許以他科所缺者補之。其以時文補生員。而鄉會試改占他者聽。否則雖成進士。不過爲府教授爲學堂之中文教習而止。如其地設學堂已屆十年者。一律罷科舉。學政兼以巡道。主小學堂。主考則以督撫爲之。主中學堂。學政之襄校。主考之同考官。均兼聘各省通材。無規規以本省州縣濫竽。分別會同各學堂之教習。綜核平日所課之分數。以

視決得失於一夫。定去取於一日者。不侔矣。二儲成材。新政以前。其已爲舉人爲進士者。不復以新例而斷其仕路。仍而用之。則事非所習。小學堂未設。無從設中學堂大學堂也。宜各省改書院爲儲材館。聚所有未仕之舉人進士。不必課以普通。轉致一無所通。但課以六部當務之亟。及擬新改之外部見後所需者。令之自認一門。或兼認二門。用北宋國學積分之法。隨時去其莠而植其秀。與額外之司員。與候補之各班。相間輪用。其生員得隨同考試。優者用之爲流外官。通材或不易選。若刑名不知。錢穀不對。庶其免乎。三設蒙學。人但知無學則無士。不知無學且無農無工無商無兵。蒙學者。自強之命脈也。天下千七百州縣。不敢謂竟無宏願大力能以學堂自任者。然十不獲一也。既請設共治局矣。令與紳民協力謀之。不必繁爲之法。總期多多益善。可就原有之義塾而擴充之。可分善堂之經費而經營之。可舉廢寺之田產而飲助之。可酌地方向有之例捐而籌集之。有能捐貲共成一學堂。獨成一學堂者。分別予以獎。無論官立公立私立。一州縣若干堂。一學堂學生若干人。及監理者姓名。均達之禮部。俾後有所考。四編課書。有學堂而無課書。猶治田而無耒耜也。朱子大學章句序。明言八歲入小學。十五歲而入大學。後人畧其十五歲以前七年之小學。而爲應試出題計。以大學中庸論語孟子易書詩禮春秋。皓首所不能窮竟者。令髻髻之徒。終日啾啾而誦之。一字之蹟。夏楚隨之。不亦倒歟。且也。所讀之書。所教之人。與禮部邈不相聞。正惟家自爲學。人自爲師。是以

習非所用。用非所習。宜由禮部。采集中外通議。本東西國初級教課書。取其與中國較宜者。譯而編之。並就其級數而酌易。以中國忠孝廉節之故事。爲倫理學。爲修身科。由淺及深。由普通及專門。計所編足數半年讀本。卽刊官版頒發各省。以後隨編隨頒。務令所讀所教。天下一律。始有分數可核。年限可計。夫以晚近之書之夥。頤雖孔孟復生。勢不克徧觀而盡讀。所編各書。畧如東西國章程。令中材之姿。九年必可畢讀。粗已足應世用。然後爲古制大學之期。乃從事於十三經之浩博。如以此說爲謬。試思中國。凡入塾者。大中論孟。無人不讀。輟業數年。乃不能自舉姓氏。何論修齊治平之理。之憤然哉。府以督率州縣也。不必另立學堂。蒙學堂九年卒業。給憑爲秀才。乃升省立之中學堂。以書院所改之儲材館爲之。又三年卒業。給憑爲舉人。乃升京師之大學堂。改國子監爲之。總之以禮部。又三年卒業。給憑爲進士。乃可爲議政所屬官。爲學堂總教習。爲駐省監察御史。擢之可爲部長。爲督撫。其秀才可爲府州縣屬官。舉人可爲督撫各部屬官。皆就其專門而官之。遷擢不出於其署。不習不能。不久不精。無分旗漢。無分清濁。非由學堂出身者。不得授實官。其蒙學堂初級以後無志大成者。就其性之所近。另入農工商各學堂。總期人人有開明之意。以游惰爲恥。學校如林。生徒祁。僑札之彥徧於庠。工倕之巧溢於肆矣。五整宗學。古者。大學在國郊。其師則春官大樂正之屬。王太子諸侯世子卿大夫元士之適子。國之俊秀皆造焉。謂之成均。今國子監。古之太學成均也。上書

房咸安景山八旂官學。則王宮虎門之學也。今夫士庶之成學也難。瓶罍內顧。米鹽凌雜。百人入學。成者未必有一二人。此一二人者。卽蘭薰雪白。未必果當有司之繩尺。欲效無階。若親貴生席華廡。深宮阿保。幼卽有頂帶。長卽有差使。更宜澤以詩書之氣。比來軍機總署等大政。往往以王公重臣爲領袖。在平日剖心研究。尙恐臨事張皇。若以素不相習之事倚其主持。稍一貽誤。卽關大局。應請以咸安景山八旂官學爲蒙學堂。皇儲貴介宗室覺羅之子弟。七八歲卽令人入學。其帖括出身之師傅翰林。令課中文而已。另延教習課書。階級從同。九年卒業。以上書房爲中學堂。三年卒業。入大學堂。與士庶一律。本古成均之意。以廣耳目而習外事。小學堂卒業後。有願入水陸師學堂者。則獎從其優。俄主彼得。走荷蘭。習水師。充學徒。遼哉不可及已。光緒三年二月。西報載德太子之次子亨利。擬於西四月赴兵船應考。將充幼弁。閱二十年。卽統戰艦。謀我膠州。其到京入覲。固王公以下所曾晉接者。同一貴族。彼何其勞。我何其逸。各有休戚之誼。知必有奮發恐後者。六試教習。議行新政。凡曾蠱庠序者。廩乎以失業爲悲。所有蒙學堂。初級無須遽涉西學。並中學亦不可繁重。但令識字。粗解文義。習淺算學。日學所編忠孝廉節之故事而申勸之。教習卽以舉貢生員充。但須彙而試之。縣必中文明暢。口齒清利。或嫻三備。習淺算學者卽入選。按名分撥縣學堂。既由教官監理。時其勤惰。會局白之縣而進退之。三年後。宜進以普通諸學。講拼法。肄西文。則所試之教習。另招初級之學生。

而教之。更聘出洋學生或西人爲之教。均以得有文憑爲據。循循焉教習之。課學生如其子弟。斯成效大著矣。七習體操。蒙學三年。初級各生。年均十歲上下。日必令習體操一時許。東西國學堂。有尋常體操。有兵事體操。三代以上。中國有文舞。卽尋常體操也。有武舞。卽兵事體操也。禮失求野。童而習之。將來爲士爲農爲工爲商。均與兵事爲近。以一人一身之強。合而成爲一國之強。於是兼資文武矣。八分譯書。東西國近出新理新書。指不勝屈。宜譯哲學書以鑿混沌之竅。宜譯政治書以爲改革之鏡。宜譯章程書以爲辦事之法。宜譯近史書以證盛衰之由。宜譯農工商書以重殖民之策。所有人名地名官名物名。均應劃一。至各國外部往來函札。新議條款。議會公會之所議。各有專報。尤宜隨時譯印。俾衆周知。此非一司所能任也。可先擇定書目。而改向有書局之專款。以分譯之。綽有餘裕矣。且於翻譯書籍之時。卽寓造就譯才之法。如馬建忠所擬翻譯書院之制。任得其人。有用之書。有用之才。層見疊出。其有私家譯著之書。呈之官。驗有實用。予以版權。不數年間。而人懷荆璧。家握隋珠。民智從此大開。未有能智而貧且弱者也。禮學之至精者曰兵。眈眈列強。鷹瞵鸞視。朝而玉帛。夕而干戈。大抵非練兵無以弭兵。非備戰無以息戰。請次言兵政。中國三代。亦寓兵於農也。遞更迭變。至國朝而改爲綠營。綠營敝而改爲募勇。募勇又敝而改爲團練。而若團練之無用。則固愚者知之矣。團練者。民兵之大概而非民兵也。今天下談士。震於東西國之強。遂瞋目攘臂而言民兵。夫

新安折臂之翁。石壕捉人之吏。訖今讀者。猶如見民兵之害。況乎官未土著。戶口失實。其二三百萬之勇營。二三十萬之綠營。勢更不能立。卽鏟去乎。善言變者。未見其利。先計其害。各國以民兵強。英國以募勇而亦強。是宜舉綠營募勇團練三者。各師其意。以行民兵。則庶乎無害矣。民兵者。不問其願爲兵與否。照丁籤派。父兄之溺愛。農商之失業。故新婚垂老無家之別。人人思焉。日本至有捐數百金以求免役者。中國廣土衆民。但募土著之勇。如綠營團練然。以爲之民兵。有月餉以贍之。遇戰事則增其餉。安其家。歿則卹其後。此亦順人情而用之者矣。凡京旗之願出旗者。既請設法次第資遣之矣。餘可剔選三萬人。分屯十大營爲衛軍。以西法操練。三年而抽換。歲必合營一練。各省募勇酌留十之四。仿日本分鎮臺之法。省及省以外四隅之阨塞者。分五大枝屯駐。爲正兵。以備非常。其六者裁之。其原籍方募勇以爲兵。解甲歸來。正可操其故業。無慮流而爲匪。以所節之餉。大募土民以練之。三年抽換如旗兵。有籍可稽。有年可核。爲備兵。其教習哨弁什長。取於已設陸師學堂之卒業。及正兵內之能諳西操者。正兵以次曠闕。無須募補。三年後既有備兵。雖正兵曠闕至盡。地方已有恃無恐矣。募民以爲兵。不籤民以爲兵。以一名之餉。練數名之兵。無便於此者。人皆土著。其餉視綠營畧優。視募勇則可畧減。騰出餉項。以抵增餉安家賞卹養老之用。行之數年。民樂其便。官制畧改。戶口亦清。然後定常備後備之章程。武事其有起色乎。一廢武科。武科不廢。弓刀石不得不易以

槍礮。不能禁其演習。則火器之私蓄爲憂。不能清其來源。則入試之流品更雜。且不分水陸。不講兵畧。槍礮卽準。亦非勝兵。考自學臣。本非素習。安有佳選。故以爲廢之便。二訓陸軍。古者材官論於司馬。射御掌於學官。無人不學。故無兵不學。英國雖用募勇。而學校林立。故募勇亦人盡可兵。且不設兵學。雖練無訓。抽換教練。數亦有限。是宜仿日本之兵學。生徒兼用華士族平民。先呈誓願書。履歷書。並保人。問年十五以上。二十五歲以下。以軍醫驗其身材。校長考其曾讀書否。能作文通算數否。合格乃選。分科學習。凡在校中。習業有程。起居有程。不守校規有罰。輯自古名將事親孝臨財廉同甘苦。及守正出奇用間等事蹟。而日課之。所受之業。教習爲之講解。凡城壘建築。地勢測繪。銃礮製造。丸礮配合。隊伍總分。馬騎控御。器用修理。皆顯以圖。貼以說。說所未盡。復分析其形模。折紙搏泥。刻木鎔蠟。肖其形體。必使生徒心口俱了。以盡其術。又於野營演習。召試之。每月小試。半年中試。已滿六年則大試。入選者給憑。校長以時拔補。斯可以言節制矣。三備水師。甲午一役。我之海軍燬焉。今各國又以開通海路爲要約。似乎可以暫緩者。然其制不能遽復。其材不容不儲。礮非不巨也。巡船非不捷也。鐵艦之行率非不速也。魚雷非不多以烈也。然而無駕駛之人。無調度之人。直拱手以資敵人而已。水師學堂不必多。設於內地。財力止此。亦取其人之狎風濤也。沿海七省。各於瀕海設一堂。而訂定其課程。劃一其口令。其中學堂則合各省爲一。立於適中之地。課之於一堂。分之各船。

以期七省一氣。同舟共濟。其大學堂則以練船爲之。考取中學堂之卒業者以造將才。此不能不豫籌者也。四籌出身。水師自有兵船。爲陸師計。兵凶戰危。而學堂與行伍未能溝通。卒業給憑。無官可授。廢然返矣。宜勸爲定制。凡學堂出身者。與原有之行伍。間半輪用。並得拔充勇營之管哨統領。學堂既設。三年以後。標營不另收學習之人。專留爲學堂出身者之進步。自然人人思奮。所有武生武舉難廢。其已到標者。均須附入學堂爲外班。於水陸師規制考求。必屆三年。由校長考試。能諳習其畧者。始得按其班次。與學堂出身者輪用。其已入仕者。亦仿日本教導團。及仕官戶山學校之例。仍須時時講求韜畧。精進不已。或者人頗牧而家孫吳。雖不足爭雄於列強。以之支柱其間。人當不致輕發難端矣。五改警察。中國之綠營。節次裁汰。零星屯駐。分汛防戍。雖曰戰兵。實已近於警察。特不知警察之名義。又無專員以督率之。故渙散荼弱。至於此極。京師首善。道蕪不治。宜併街道溝渠之用。款以築馬路。其支路則仕商爲之。改九門提督所轄之萬人爲警察。而御史指搗與營弁兼督之。其吸烟老弱不任力役者。從嚴甄汰。外州縣警察邏卒而隸之於標營。其副參游以下各弁如其舊。改政府屬之同知通判及巡檢。與各弁交董其事。周禮司隸司隸司隸司險。匡人擲人。漢之游徼。今之巡檢。初制皆此意也。其章程卽仿日本之警部。職在保護人民。去害衛生。檢非違。索罪犯。於是游勇會匪。無所於容。汎兵原有餉項。無須另籌。又可以裁保甲。去阜壯。併驛卒。兼電丁。四者所省。自成巨

款。加以津貼。自然人樂爲用。必警察行而後可以言治也。顧或疑北魏時設置候官數千人。職司伺察。名曰白鷺。其人皆微服雜居府寺。大類今之警吏。然行之數十年。又詔稱候官千數。重罪受賄不列。輕罪吹毛發擧。悉令改置。命以巡街巷。反以病閭閻。深恐無事而擾。不知此非警察之咎。而不善行警察之咎也。無詳析警察之章程。無約束警察之專員。又微服雜居。以包探之役。而予以警察之權。顯與各國警察辦法相反。則又安得而無弊乎。觀於周禮之織悉畢到。東西國之朝野秩然。不可謂非警察之效矣。尤有說焉。日本警部。多以陸軍武官兼統。授以兵器。即可聯爲軍隊。師而行之。無事則以暇操練。有事則足當一方面。其亦後備兵之一種歟。至於兵不能無餉。統兵之人。與司餉之人。必分而爲二。庶剋扣浮冒諸弊。得以互相箝制。互相發覺。中國將貪而卒玩。其病正從餉起。論者狃於髮捻戰功。謂中國各兵。扞外侮不足。平內患有餘。長此不變。正慮內患亦不易平。此則可爲寒心者耳。職道紙上談兵。雖歐洲勁旅。東亞雄師。其法或不盡於此。而大畧則但潤澤之而已。不此之務。而徒讀父書。視如兒戲。謂可出奇制勝。高論屈人。此則必無之事也。曹劌問戰而魯莊言治獄。誠以甲兵大刑也。鈇鉞小刑也。自來大刑之不戢。率由小刑之不平。請次言刑政。一折西律之衷。夫使中國律法能早改。視泰西之律法以爲衡。卽此次懲辦罪魁。亦何至若是其曉曉哉。觀於租界會審。彼之犯事者植立。我之犯事者長跪。卽此一端。見律法不改。直無一日能言交涉矣。日本初用唐律。

後用明律。明治十年。以外交條約。稱泰西流寓商民。均歸領事官管轄。日本欲依各國通例。改歸地方官。而各國咸謂日本法律不完不備。其笞杖斬殺之刑。不足以治外人。於是日本政府。遂一意改用西律。敕元老院依擬法國律。畧參國制。以纂定諸律。至十四年。告成頒行。曰治罪法。曰刑法。其二十八年。卽與各國復申治外法權之前說。美首允之。餘國亦無異詞。雖尙須察看數年。而倒授之阿柄。從此收回。信乎其知務矣。中國自主者也。權主一國。則除公使諸員外。凡外人之僑寄其地者。無不受治於有司。乃不但外人之居內地者。不歸我管轄。並土人之居租界者。轉歸彼管轄。明有化外之民。扞犯禁令。掉臂游行。豈徒臥榻容人鼾睡而已乎。且中國法重。洋人法輕。有時同犯一罪。而華人比重罪。洋人比輕罪。相形之下。其何以堪。美生一案。明明以洋人通會匪謀逆於我內地。幸而發覺。供證鑿然。我無管轄之權。彼律不過坐以監禁。是可忍孰不可忍乎。今卽不能強西人而就中法。亦何不可用洋法以治洋人。誠知治外法權。非空言所能爭復。我竟專用洋法。彼其何說之辭。然則墨守中律。而事事爲所牽制。與改用彼律。而漸漸可望收回。預留將來改約地步。其利害當無待智者言之矣。且不特以洋法治洋人也。卽以洋法治華人。亦復何損於治。公牘皆架砌之詞。例案盡舞文之具。訊供未得。輒事刑求。罪案未定。先加笞辱。斃於杖下。則是任性殺人。瘐死獄中。則是死不以罪。同一死罪。纒首可。銃殺亦可。凌遲殊首何爲者。同一輕罪。罰金可。力役亦可。旣枷復杖何爲者。不

但此也。猶有進焉。二。參公斷之意。西洋有大事公斷人。有小事公斷人。有陪審之員。無時無事。不慮問官之偏抑。矜小民之枉屈。其意可爲至矣。中國有司。不克大畏民志。無情者逞其講張之幻。敢於不信問官。問官進自他途。於刑法本非專家。而更重之以意氣。佐之以刑威。覆盆之下。天日黯矣。外人亦何嘗以其問官爲可信。有公斷。有陪審。雖險健之犯。不得抗公論而騰辯舌。在問官之不嫻法律。懷挾私見者。無論矣。就令熟讀竹書。指日可誓。而獨斷獨行。旁觀不無可議。犯者豈能無詞。何如詢謀僉同。猶不失王制。刑人衆。棄周官。疑獄衆共之意。顧風氣未開。一時無如許法家。卽有其人。亦不便舍其恆業。爲人伸理。各州縣既有共治局員。擬尋常易治之案。則不必膠柱以防煩擾。其事屬疑難。犯供狡展者。則卽由局紳敘明兩造情節。由問官覆訊。而加以讞語。判其是非。務得眞情。而免上控。或慮局員之朦蔽。其與兩造同一土著。見聞自確。卽有所私。當不致人人袒左。或又慮健訟者多。治亂用重。不用刑訊。獄訟益滋。然則今之刑訊。亦不爲不嚴矣。何訟波之騰沸如是也。蓋亦求其本矣。三。正律師之名。訟字從言從公。則請人代言。似亦屈者思伸之義。定例視狀師如鬼物。如毒螫。必鉏而去之。以爲快。夫所以致恨於狀師者。非以其顛倒是非乎。試思爲所顛倒者誰也。儼然南面。誠不足以格之。智不足以燭之。如聾瞽。如傀儡。動輒受狀師之顛倒。不自恨而專恨狀師。毋亦有所不恕乎。且恨之而無術以盡狀師也。則亦可以思所返矣。例又准給官書戳記。令爲訟者代言。安保

官書之非卽狀師。又安保官書之必不顛倒耶。是宜徑參彼法。明定律師之目。有嫻習名法者。由州縣以考官書者考之。民有訟者。兩造得各延律師。無律師者。如無官書之例。官不收閱。如訟者事出無因。全屬子虛。所延律師。或革或辦。一例科斷。律師既可以此爲恆業。又恐因全虛被累。必將自惜其聲名。轉不便播弄。兩造但收田父漁人之利。不顧其害。西例訟已到官。旋經律師勸息者。往往而有。亦其效也。其恫嚇索詐之訟棍。自然無人過問。可以不逐而自逃。不辦而自改。明許律師上堂。則訟者之戚友衿者。凡有諳習其事者。既無干與之嫌。槓幫之譴。儘可出頭代訴。不煩律師越俎之謀。久之無所事事。不能不別營他業。轉可化莠爲良。自非深明治體者。豈易以語於此乎。抑職道之愚。猶有進焉。向以爲中國法密故難治。彼國法簡故易治。庸詎知彼國法律。其繁密較我有過之無不及。特彼之民以學而智者多。輕罪而以爲恥。我之民不學而愚者多。重罪而不以爲恥。改革人心。先在移易風俗矣。且彼農工商各有專律。兵有水陸軍之律。報有報律。往往隨事而著爲令。擇其要者。分別采譯而纂集之。斯庶政始有依據。有條理乎。刑者之多。由於貧者之衆。計惟人人能自食其力乎。請次言工政。非工則農無以資刈埜。非工則商無以供懋遷。故農商之政附焉。日本農商務爲一部。內附工務局。亦可證三者之相灌注相消息矣。美以農富。英以商強。人稔知之。凡屬歐洲。機器林立。鐵路梭織。人方壯年。苟非游手。謀生裕如。聞光緒二十三四年間。考求各國農工商政者之言矣。

美人月可得工銀六十圓。奧人月可得工銀五十圓。英人月可得工銀四十圓。法人月可得工銀二十五圓。意人月可得工銀二十圓。此豈不足徵開通與閉塞之故哉。西人以兵弱我者一。以商弱我者百。彼之汽機鐵路。與夫工藝會農學會等政。不過百年之間。并力一心。期所以繁殖其物產。巧利其器械。遂得與天下雄角。而中國爲其射的。日討國人。教以務材訓農。通商惠工。於己所有者。設法以護之。加意以精之。免出口以暢之。己所無者。移種以植之。如法以倣之。免進口以誘之。廣開農工商學堂。設博物賽珍會。冀以採集羣長。輔成獨智。蓋方興而未有艾也。甚至商務不競。乃尋兵衅。輒以偏師。燬彼商船。使之蹶不復振。而我得隴斷其大利。英於荷蘭。亦商戰之令人心悸者矣。不特奪其商務也。且並其國而利市之。如英以東方公司。遂墟印度。各國以通商佔我口岸。此非大盜之操矛弧者乎。豪商萬人。勝於勁兵百萬。亟起直追。桑榆尙可收也。一大興鑛路。此其爲大利。外人之婦孺能言之。屢次喧聒。而我陽與而陰拒。亦嘗於京師立鑛路局矣。抵制之力多。開通之意少。止以勢力不敵。虛而與之委蛇。曾不能心知其意。所議之章。所允之事。意欲拒之。轉以予之。彼擅其利。我蒙其害。此後國勢。視昔何如。職道不忍言。亦不待言。若非門戶洞開。徒爲彼所蠶食。不如明定章程。所有開鑛築路。官商任自爲之。夫役工食不出中國。五金煤利不待外求。如有風水之謬談。機器之贅說。當道必以全力梳櫛而維護之。其內河有小輪有民船往來轉運便利之處。姑從其緩。如舟楫

所不達。並宜分築馬路。以聯接於鐵路。築一里則專一里之利。或官築路而商開鑛。或甲開鑛而乙築路。分辦合計。衆擎自更易舉。尤可裁省驛站三百萬之歲銷。西人凡橋梁道路開河等項。無論公可爲之。獨力成之。例有專利年限。蓋道路不通。雖有佳鑛。往往爲運脚所沮。窖藏憂貧。則山皆童山水皆愚溪而已矣。厚蓄地寶。坐齋盜糧。總期我能多開辦一處。彼可少覬覦一處。亦先發制人之計也。二包鑄銀圓。補漏卮之窮。救錢根之亟。無逾於此。廣東始之。湖北續之。江南踵行之。前者。朝廷復俞御史陳其璋之奏。沿江各省。均得仿行。甚矣其失計也。多設一局。卽多糜一局之廠屋員役薪水。若機器則先以銀而易鐵矣。甚非管子利出一孔之旨。且不開銀鑛。廣鑄銀圓。不耕而食。銀將大荒。今宜於三處以外。惟京師添設一處。餘概不必續開。各省各就四局之近。解銀附鑄。每鑄若干。贏利若干。核實報明。勻作三成。代鑄之省。附鑄之省。各得其一。而以一成解部。以示利不獨專。天下事官辦。必有排場。必有虛耗。如有著名富商銀行。歸其包辦。歲省支銷。贏利更厚。洋債償款。金入銀出。先零漲落。利外償利。並鑄金鎊。畧可抵制。圖法之敵。於今爲烈。人曰私鑄敵之也。出洋敵之也。而不知皆私銷之爲害。先銷順康之錢。次銷雍乾之錢。次銷嘉道之錢。甚至咸同及新鑄之錢。本屬銅少砂多。而亦銷之。雲鑛所出日細。銅器之用日廣。洋人知其然也。銅價愈擡愈高。順康雍乾之錢。每千計重七觔以外。銷而爲銅。製成煙具。每觔可得七八百錢。是以七觔之制錢。而僅準千錢之用。一銷爲

銅。而可準四五千錢之用。私鑄出洋。人且嫌其利薄而不屑爲。爭以全力注重於私銷。物理論曰。世富錢流。則禁盜鑄。世貧錢滯。則禁盜燬。此深識物理之言也。稍資挽救。則惟有兼鑄當十銅圓。質輕值重。私銷無所用之。所防者惟私鑄而已。但求市面流通。奚必過爲己甚乎。京外官棒。以銀圓計。其餘各項。以兩合圓。出入劃一。既拯圖法。尤裨度支。所謂一舉而兩利者也。三招徠製造。泰西各國。官廠不如商廠之多。官廠亦不如商廠之精。如德之克虜伯。法之科魯蘇。英之阿姆斯脫耶。皆以製造致富。權傾其國。各廠聞中國需用機器。百計延攬。竊謂中國不如招徠洋商洋匠。有願來華開設製造廠者。無論租界非租界。悉從其便。或報明中國出使各大臣。或由其駐中國使臣咨明總署。官給憑照。卽得開設。中國聰穎子弟。可入其廠肄業。不必出洋學習。既近而便。引置莊嶽。舉隅三反。墨近則黑。青出於藍。我可自樹別幟。不須仰息他人。各廠所有監督等。誠非洋人不能。其餘搬運粗重等役。不能不用中國小工。又爲窮民開一衣食生路。何憚而不出此軍火之約。彼必不能持久。此禁一弛。並得在內地製造軍火。俯拾卽是。不須購自外洋。雖遇海警。彼族無從沮截。無識者方慮引水入牆。勢將枝生節外。職道之愚。特慮其薄之不爲。雖招而不肯來耳。否則因利而利。孰有利於此者。四擴充輪業。互市者。彼此交相爲市之謂也。彼能來而我不能往。則非所以言互市矣。中國之所以被各國要挾者。止坐約中利益均沾之語。鑄成大錯。今擬將錯以就其錯。中國之利益。各國共沾之。似

亦當令中國亦共沾之。進口稅則訂明值百抽五矣。我如運貨到彼。稅則宜無異詞。光緒六年十月。招商局和衆輪船運貨至美。其海關稅我百之十。其政府旋飭商部。查核償還。卒不果。其商人羣起。齟齬之。致我折閱無算。同治十二年十月。法與緬約。貨稅值百抽五。不得偏重。緬人之商於法者亦如之。緬尙能得之於法。中國宜亦可得之於各國。應請全權商之各使臣。嗣後中國商船運貨。前往各國。稅則亦準各國來華進口之數。以免歧異。以昭公允。稅則既平。輪業可興。土貨既可暢銷。客貨可收運脚。海軍雖燬。員弁星散。然海戰則不足。責令管駕商船。其中似尙有人。以水師學堂出洋學生之卒業者。分發各船。俾資歷練。其船可備運船之用。其人卽備管駕之材。沿海七省。萬三千餘里。海軍之恢復。總不能忘在莒之辱也。其長江內河小輪。不但宜興輪業。尤宜自造輪船。無以中國專爲彼族殖財之地可矣。五提倡公司。一箸在手。無勇者能折之。進而十箸焉。必勇者始折之。進而百箸焉。雖勇者亦不能折之矣。此公司之義也。中國人人亟私計而無公心。襲故智而無羣力。憚於創始。勇於效顰。一業稍振。環起而角。零星集股。成本無多。彼傾此軋。僧多粥薄。兩敗俱傷。徒爲洋商作陳涉前驅。轉令蹈瑕抵隙。因我便利。縱橫內地。此可爲之太息矣。應令此後無論鑛路輪業銀行紡織墾牧。與夫製造模倣一切之事。均以公司行之。以後公司對前公司。以小公司併大公司。但斷斷不可以官與今大吏亦有志在提倡者。而無如商律未定。未信先勞。末由揭肺肝以示諸商民。無怪

招股而股不來。息借而借不集。合力而力不同。此無他。官督商辦誤之也。官與商有不能不合者。爲之詳其辦理之章程。定其簿籍之格式。時其保護。理其逋負。洋商之交涉。海外之開拓。則不得不仰官之大力。其有假集股爲名。而侵蝕自肥。以致折閱者。則重懲之。必傾其囊橐。破其身家。俾不致壞及於風氣。若夫車來賄遷之曲折。在商言商。官可不必過問。卽必須輔以公款。亦但求本利有著。一任商人好自爲之。此東西國之通例。獨中國偶有公司。往往以官作領袖。以官架門面。職道蓋鏗。焉而慮其後繼已。六保護專利。今天下一機械之天下也。非必西人之材力聰明果駕吾華而上之。特其得一新法。國家驗之。報會傳之。弋利甚捷。獲利甚厚。是以徧國中。鑠肝鋸腎。大小各有所成。旣成矣。白之官。驗明有用。准給賞牌護照。得獨售此技若干年。卽國家欲秘其技。不令另售。亦必給予巨資。以酬其勞而償其費。故莫不標新領異。不惜爐造化而炭陰陽。以冀成一技而名利兩有所獲。今宜令中國。凡有能於各項機器製造如式。卽錄入各局廠。其上者卽爲教習。以免另聘西人。如能脫去泰西人舊式。別構奇巧。或足資敵致果之用。或足濟民生日用之需。一經官驗有效。於獎牌護照俾得專利而外。崇銜以寵之。世職以榮之。如古者以業世官之例。若其人本有官階。能以藝事名家者。尤應破常格而予以不訾之富貴。計華人之流寓外洋者不下數百萬人。就近學習製造格致者必多多益善。一聞故鄉富有路貴有階。誰不復我邦族。炫技求售。用之當自裕如。夫以帖括摺

楷弓刀矢石之工夫智巧。移而用之於格致製造。鉤心鬪角。必有匪夷所思。絕九地而通九天者。上好下甚。人人不以技巧爲菲薄。而以機械爲功名。雖藝而非政。器而非道。治國之本原不盡在是。抑亦富强之嚆矢矣。七陳列設所。耳食之不如目驗也。玩圖之不如撫物也。若不設爲所以陳列之。無論外國之器物。華人不能編觀而多識。卽華地所有之陸產坑產水產製產。洋人亦不能盡悉其種類之翔實。日本曰陳列所。亦曰勸工場。凡蔬果花木米麥之種。網罟耒耜盜漆之器。絲茶棉糖之質。與夫一切天然之品。製造之物。傳其種。摹其形。材木等物。截成方寸。入格備考。計其數目。權其價格。別之以結約諸國。區之以通商各港。以期彼所有者我可仿製。我所有者彼可指購。總之多仿造一種客貨。則多塞一種漏卮。多輸出一種土貨。則多收一種利權。其必自陳列所始矣。八准附洋股。聞之西土。國債愈多則國愈固。外債愈多則國愈危。職道竊謂。以強國借弱國之債。可以制其命。以弱國借強國之債。適以速其亡。中國自以爲強乎弱乎。若不能開國債風氣。啓口輒曰洋債洋債。居間有潤。回用有扣。彼族雖富。何所貪而爲此。蘆漢鐵路。名借比債。實皆俄款。彼其心路人知之。不論官借商借。必以國家爲擔保。卽使由商自借。且合同聲明不與兩國國家干涉。而有利有期。畧有短欠。譬如子弟向人乞貸。未有不取償於父兄。終必令其國家代償而後已。突厥以債弱。波蘭以債亡。前覆不可鑒乎。竊謂洋債有害無利。洋股有利無害。何則。洋債出於一國。其勢專。專則搏免必用全力。

洋股招於各國。其勢均。均則連雞不能俱飛。勢也。亦理也。華商與洋商合股。中國向懸爲禁。不知外洋之商。往來他國。與其本地之商人合立公司。所在有之。各國鐵路電線公司。與金銀各鑛。皆有英商股東董其事。各國之商於英國屬地者。往往互相假貸。合力營運。中國宜亦可以弛禁矣。所陳鑛路鑄幣輪業製造。與所有之公司。中國目前之民智財力。安能同時並舉。因循觀望。耽逐者至矣。是非廣招洋股不可能。以華股爲之發軔固佳。卽以鑛路各業之山之基地。與洋商公估價值。折作股本。而合洋商爲之。亦無不可。蓋准洋商附股。必准洋商共事。借彼所長。輔我所短。因人成事。亦何惜焉。不敢謂洋商合辦。必無折閱無虧累也。然洋商勢不能以與中國商民合股所失之利。強以取償於中國之朝廷。且有洋股。則中國商民卽以爲可信。其附股者亦將踴躍而前。職道試援近事證之。開平煤礦股票。向售每股一百四五十兩。去夏至冬。逐步跌至每股六七十兩。今春聞歸洋商包辦。添附洋股。日內已飛漲至每股一百七十八十兩。此尙不可以悟乎。在力沮洋股者。亦慮洋商之攘權耳。充其攘之弊。不過以所開之鑛。所築之路。與其他業所營之根柢。喧客奪主而已。而有合同可據。有公法可爭。有條約可執。不能以虎狼待洋商。防噎而自廢其食也。夫不附洋股而能局各利於篋筭。有策以永保其權也。職道之請誠妄矣。否則指名要素。凡所營業。任客所爲。終以自失其權。屆時卽有華股。欲附入洋股而不得。瞠目而籌挽救。則如曳奔牛之尾而轉之。難矣。晚矣。故夫廣招洋

股者。所以自保權利之妙用也。內政既修。外交尤重。請改總理各國事務衙門爲外交部。各國皆同。中國自不容獨異。必待外人之請而始改。此亦授權於人之一節也。既正外部之名。始可言辦法。一出使必易服色。日本維新。全國改衣冠。無識者謂耳目一新。其得力在此。豈知非常之原。黎民所惡。且呢羽皮履。盡資於敵。其政府頗悔其驟。我安可覆而蹈之。唯出使人員。則非易服色不可。無論覲見私謁。各使一律。獨中國使臣。翹然獨異。何以堪此。且外人最重茶會。其官中與朝貴富商。歲必數集。集或數千人。男女雜遝。跳舞爲俗。所有服色。大抵從同。僅僅中國使臣以下之數人。頂戴朝珠補服。俯仰其中。自成一隊。不待廣座。稠人指而目之。卽顧影自照。應亦深訝不倫矣。夫人之所以相與者。動曰氣類。以類近則氣易感也。使臣誠善於周旋。賓主欵洽。彼不惜以秘密相輸授。及促膝共坐。見夫衣冠殊製。便有非族之嫌。總不能泯然無迹。傾情相與。在期廷之遣使出洋者何爲乎。將推宗旨於其新報。察從違於其議院。上結紳衿。下連商賈。以探微偵隱。棄疾伐交。鉤之拒之。揜之闔之。而我得先事以爲綢繆。後事以爲挽掾也。試設身以處其地。自恍然於不改使臣之服色。斷不能善外交之政策矣。昔法使忙婆得。改着婦人衣。以刺俄隱事。彼何其陰以驚也。至使署內。如遇慶賀。屆期則使臣仍率其參隨學生等。敬用漢官威儀。以重大典。及任滿回華。則各從其便。二親貴必令游學。日本德川末造。幕府遣榎本武揚等。薩藩遣伊藤博文等。爲留學生。維新之初。各朝貴侯封。爭遣子

弟往學。至明治五年。海外留學者大抵千餘人。可爲能自奮矣。既請整宗學。而令皇族華族。人人納之於學堂矣。將更引置莊懋。可俟中國大學堂卒業後。派員護送往各國大學堂游學。兼察各國政事法律商法教養兵制製造等事。以開牖其耳目。采掇其精華。卒業言旋。依所目驗。罄所心得。毗贊庶政。措正施行。以中國之大。得一二賢親貴。率閔亮內外大臣。主持而部署之。十年可以保太平。二十年可以陟文明。有天下之責者。補牢尙可及也。三使才必須慎簡。諏謀咨度。庶備五善之選。修飾潤色。周知四國之爲。誦詩始能專對。有恥始能不辱。古之言使才備矣。以張騫之使西域。史遷尙議其不得要領而還。不能無疑於今之出使參隨其人焉。語言文字小技也。爲使臣者。並小技而不能則繙譯得而操縱之。翰林之清望不足以壓外人。先世之勳閥不足以懾異族。前此事屬創行。不得不采派虛聲。得失參半。三四十年來。亦設學堂。亦派游學。課而不專。專而不用。千金屠龍。成亦無益。曾不聞以拔擢使才爲事業。尙亦昧於緩急乎。其參贊隨員。尤多竿濫。要津肺腑。輒以情干。屠沽富兒。亦以賄進。無望其折衝樽俎也。貪容陋態。騰笑遠洲。繪入日報。三年屆滿。列入異常。遽登臚任。直以出洋爲終南之徑而已。啓侮召衅。咸由於是。今請以後隨員學生。與繙譯一體。須嫻習語言文字。使臣參贊。卽不能操之以熟。亦須畧涉其藩。方不爲隨員繙譯所牽鼻。使於何國。其平日必於其國條約律法。能條對而心知其意。見在總署人員。一體簡派。以後宜以次遞升。必由出洋學生。升繙譯

隨員。乃爲領事。由繙譯隨員領事。升參贊。升章京。升使臣。峻擢至外部而止。無再各署保送。徇私濫派。以國事爲孤注。中國大勢。如繫卵矣。此時外部使才掄選之法。宜視各國加倍認真。日本亦有流寓之人。各國不逐而獨逐華人。此可以證我之外交何如矣。四外部亦須召見。總署向無召見之班。例以軍機大臣之兼總署者代陳。軍機事孔繁。退直後往往不能日涖總署。僅由主稿之章京送稿畫行。而其中之委曲繁重。未必心口俱了。則代達不甚詳盡。而外交之隔閡多矣。擬請朝廷。於每日召見軍機後。補入召見外部一班。其外部總以一人。佐以二三人。於是有稟承。有謀斷。築舍道謀。其無慮乎。五章京不可分股。外交事不恆有。每遇一事。似乎一國之事。往往關係於各國。分股而辦之。不相照應。不相通貫。顧此失彼。咎何可追。且一股之中。儘有數日會無一事。章京轉得舍業以嬉。夫大臣年力就衰。卅輻其轂。事事尙煩其智慮。章京乃分股辦理。勞逸似太不均。擬以後凡傳到章京。逐日均應到署。不論何股之事。人得各抒所見。以備主稿之指撝。以呈大臣之核定。務期全局在胸。職道又思之。論語正名。馬注謂正百官之名。今以專司外交之官。而曰分國分股。詞不雅馴。不止名不正則言不順而已。此安可不從速改定乎。六彼材不妨聘用。以中國之大。人數之衆。用才者平日既不留心。臨時又不破格。輒號於衆曰。無人才。無人才。此豈足以服天下也。巨厦將倒。亟需衆材。今宜一掃資格門戶之見而空之。任有守有識者以立其體。任畢業專門者以殫其用。而如有所不給。

也。各署之顧問。軍營學堂之教習。明定章程。以資客卿蕃將之助。由余用秦。子胥用吳。固已。西國亦有之。德以用法人。瓦代丹人。磨爾根而強。英以用法人都爾鄂而富。若善用西人者。其日本乎。維新之初。延美人以訓學。聘德人以練軍。三職八局。往往參用各國之人。故一變而輒收其效。政府尤汲汲於網羅本國才俊。收拾人心。亦搜采。亦培植。隨時取以更替。所聘之西人。不數年而十不存一。不十年而百不存一矣。中國積習。但知乞火。不知鑽燧。但思汲水。不思鑿井。如同文館之教習。如各海關之稅司。一經訂定。如嬰兒之不能離乳。職道蓋追念往事。可爲不爲。屢失事機。未嘗不爲之撫髀而流涕也。且我尤有不如日本者。彼自幕府末造。各藩已爭選英俊。厚給資裝。俾受業於泰西。其於各國人材之長短。性情之馴傲。無不確有所見聞。歸值維新。各路要津。舉若所知。多適於用。我則憑洋員之推薦。使臣所延攬。得上駟。而亦買其死駿。有戈登華爾之驍奮。而白齊文則反側矣。有蒲晏臣之忠勤。而穆麟德則兩端矣。其學問雖各有卒業證據可憑。而其黨派。其心術。則不可不熟察而窺其實際。一面通飭搜求學堂之成材。出洋之學生。流寓之華民。予以進身。卽以壹其祁嚮。能拔十而得五。合同限滿。便有替人。至學堂偏設以後。則用之不勝用。職道未聞人材雲集而憂其國之日蹙者也。以上所陳言變法。而實追初意。言新政而多還古制。職道不學無術。何足以知大計。願所言則天下之公言。海內之公理也。又嘗長思却慮。而有不容已於懷者。伏讀母子一心之諭。此誠大

局之幸。所不敢必者。臣下之能一心否耳。此次明諭剴切。度亦無顯持異議者。顧口附和而心鍵鎖。其一懲於改絃更張之繁重。而曰才力之蕭乏也。財力之竭蹶也。疾行恐無善步。亟脈不如緩受。此謂不沮撓之沮撓。其一誤於見小欲速之舊習。未布種子。輒課收成。苛政以督其後。咄嗟而程其效。於是實心任事者。自救頭足之不暇。勢惟有奉身以退。而躁妄近利之徒。呈身以銳進。此謂不操切之操切。朝廷亦鑒斯二者。而知所戒乎。嗚呼。九廟震動。萬靈叫號。蓄懲艾之深念。則創痛未始非福。媒勵薪膽之苦心。而辦事不可無次第。寧使一孔之士。疑爲用夷變夏。無令深目之族。笑爲有目無書。總之。能變則報復且可不提。不變則款議不過延喘。但有變而興。從無變而亡。與其變於人。何如變於己。有可變之機。而屢失之。有能變之力。而坐誤之。以皇太后之手造中興。以皇上之瞻言百里。夫豈不察見及此。而不反手以解此倒懸哉。職道痛大陸之風雲。六龍遠徙。泣故宮之禾黍。三舍未回。感於憲臺之虛衷下問。諄諄焉誘使盡言。遂不覺情之悲而詞之戚也。所有遵札條議新政緣由。理合繕請憲臺訓示施行。祇肅。恭請鈞安。伏乞垂鑒。

附錄

抵制洋鹽說

自太公煮海。而管子正鹽筴以富齊。各君其國。瘠人自肥。此霸者之所以爲霸也。漢以後。雖賦其利。尙未劃界。周建隆二年。定官鹽闌入禁法。似官與商分界矣。宋熙寧八年。令商人自占所賣地。此爲明分界岸之始。以大一統之朝。牟一隅之利。致區其天下。如方野如剖瓜。此豈得謂善師管子者哉。鹽在產地。無論煎曬池井。觔不過錢一二文三四文已耳。官征權之。梟攘攫之。掣驗巡緝。重規疊費。於是到岸則觔售四五文六七文不等。而商人猶有倒綱疲課者。外人知其然也。光緒六年。英使阿里國已以准販洋鹽請。忍而至今。志在必行。如持利劍決潰癰。勢已不復可能禁當矣。東西各國。稅則繁密。獨以鹽爲民生日用所必需。弛不收稅。日本雖有地租。亦無鹽稅。故其鹽皆俯拾卽是。然使販入者果屬洋鹽。迢遙海舶。水脚之所費。進口之所加。計亦不能過貶其直。與我爭售。特是閩粵江浙瀕海皆鹽。勾而結之。遂爲梟私之囊橐。全綱墮地。自在意中。昔也減價敵私而不得。今且減價以敵洋。若非改弦更張。鏘淨掣驗巡緝等陋規浮費。勢必民病商病官病。而煎戶曬戶

亦病。今將先事而綢繆之。一公司造鹽。各商各竈各丁。與其爲洋鹽所擠軋。所刳割。不如相聚而謀。自固其類。自保其利。綜所有成本。由運使督場。平估其實。合爲公司以造鹽。按估本之多寡。定股分之等差。以股分之等差。定辦事之名數。俾所產之鹽。出於一路。悉一場之官商竈丁心光眼力。而稽警儉漏。造鹽若干核之。售鹽若干。自有分數。內地既無所漏。洋商自無所販。此卽淨私於場之意。蓋必能就場緝私。而後能就場征税。所有正課帑利雜款積欠。釐爲四項。核定應征實數。罷去一切舊有色目。庶幾鹽價平而銷路暢。試言兩淮。咸豐季年。江寧失陷。淮鹽片引不行。戶部奏令就場征税。每百觔收錢三百文。時以江路不通。辦無起色。然所奏每百觔收錢三百文。已包應征之數在內。今加以公司之本利及開銷計。觔稅錢十文。宜無不給。而舉掣驗巡緝種種陋規浮費掃而空之。無論商人非商人。人人許販鹽。川平陸夷。鹽如流水如泥土。卽距場極遠所在。增益水陸運脚。計觔售二三十文。販鹽者已沾潤不薄。洋鹽雖賤。亦足以敵之。今雲南。卽本劉晏就場一稅。不問所之之辦法。雲南可行。而潘祖蔭謂不可擴充於天下。何也。一重稅進口。此次款議。誠知不能過與力爭。顧彼例每有此款受損。而取他款之有益者抵之。准販洋鹽。爲彼所涎羨多年之事。我一旦取懷以予。並不取他款以相抵。僅與約明。止販洋鹽。不得販我瀕海之私鹽。劃定一二運使地段。與彼共銷。而進口之稅。畧從其重。彼欣於我之破例畫諾。或當可以屈從。卽不能如彼關。或值百抽百。或抽五六十

之例。大抵援洋藥之值百抽二十。彼其何說之辭。務計其口內外之運費。益以所加之稅。畧如我所自售者相埒。自不致淵魚叢雀。爲彼所一網打盡矣。一仿行鹽捐。章程新改。藩籬盡撤。萬一事機不順。巨課或致虛懸。則遠如管子大男大女吾子之算。近如勝代國初鹽鈔鹽糧之制。籌爲的款以備之。印度每口攤錢七十文。歲納鹽稅金六七百鎊。論者謂中國以四百兆計。其實尙不止此。今除老廢者孤貧者流亡者去其半。二百兆人。歲捐錢一百文。得二千萬。視鹽課已加倍。所食之鹽。較從前價可銳減。仍以省之於民者取之於民。又得人人販鹽。尤爲及於寬政。州縣所屬。既有專主。賦稅之人。又有四鄉共治之人。此特一舉手之勞耳。其捐分四季收繳。輕則易舉。殷賑者無論矣。卽尋常百姓。戶以十口計。歲輸一千文。季捐則二百五十文而已。此區區者。當無慮引爲大難。下無所費。上亦不貪。明提一成。二千萬應提二百萬。以其半分犒收捐之人。弊混者以賊論。以其半留爲地方學堂水利橋道等公用。先將戶口榜示。後將所收所繳所提者榜示。一一令民共見。此亦古有徵而今無損者也。場大使仍其舊。其同判掣所。與夫督巡督銷盡罷之。其有離場窺遠之地。如乾隆十二年。建常平鹽倉於漢口例。由州縣就場運鹽存庋。旬報其售價。以防居奇抑配之弊。江運准用輪船。以期迅捷。其巡兵搨役船夫。除就場雇用以外。有販鹽以爲之生路。所有梟販。皆可化私而爲公。窮變通久。自昔已然。而況抵制洋鹽。欲不變而不能須臾緩者乎。

高聳公樵李穀齋天雞圖記

壬子秋。余於張氏味莼園書畫展覽會。見錢南園雙馬圖。李穀齋天雞圖。張壁間。奕奕有生氣。徘徊久之不能去。未審爲誰氏物也。比陳子仁先爲言。爲其家舊藏。因得假觀南園畫馬。故是一絕。余亦有秋風歸牧圖。穀齋畫。余所藏僅一小冊子。甚精。要不逮此幅。乃丐仁和高聳公撫而歸之。聳公書宗北海。畫出入石濤八大間。道州何詩孫歎爲海內第一。顧頗自矜惜。尤不肯輕爲人作畫。實游豪賈。及日本人士。往往賈重金求尺楮寸縑不可得。獨余有所請罔弗應。爲余撫此圖。年七十矣。圖成。乃欲亂真。以示人。莫不嘆詫以爲難。聳公貌短小。恂恂如畏人。至其潑墨流丹。煙雲鬱壑。縱橫奇恣。不可逼視。蓋其胸中嶽崎磊落鬱積磅礴。常不可一世。而一於繪事發之。故其意境。雄深險怪。錢殿刻露。千態萬狀。各極其肖。斯圖規模樵前人。抑餘事矣。余既識圖之因緣。道聳公之爲人以詔子姓。且以見吾兩人交誼云。時甲寅孟冬。抑戒老人記。

與松忠節書一

豫省與直省電報不靈。和局情形。杳無聞見。北京既失。措手愈難。前於途次。恭讀十二日朝旨。黜陟

王公大臣一節。雖咎有應得。然出自聖心。則名正言順。聞爲外人所請。非此不背言和。此說果真。不免一誤再誤。戰不獲勝。籌又失機。外人窺我俯從。愈加藐視。恐日後百端要挾。無有厭心。當局持籌。不知何以爲計也。然大局至此。惟有革面洗心。力圖補救。所謂失之東隅。收之桑榆也。補救之法。莫先於改營制以禦外侮。整吏治以厚根儲。人材不出。展布莫由。今我國之所重。乃外人之所輕。輕其所重。而重其所輕。宜其弱也。然步步趨仿。則仍落後塵。拘守固非所宜。驟變亦屬非計。某意以擇其可守者守之。宜變者變之。不可拘於成例。坐誤事機。總而言之。上下一心。內外一體。諸求實濟。不尙浮文。諸事各設專司。年年考核。委靡不振者。即時參撤。憤發有爲者。立予陞遷。庶欺矇之弊。可除。效驗之功。可見。否則奉行故事。徒博虛名。藉公帑以利私人。耗民膏而肥己橐。而於成敗得失之所關。從未計也。因循朦混之惡習。未少減也。當今之急務。所宜分門考究。不可須臾緩者。學校政治營務。交涉數大端。而數大端之中。又以得人爲尤急。人材之生。關乎氣運。人材之成。由於學校。人材之用。繫乎國家。伊古以來。不患生材之不多。而患用材之不當。果能隨材之大小。以任事之難易。行見一事得人。則一事治。事事得人。則事事治。又能公其舉錯。嚴其考察。均其勞逸。泯其偏私。無顧此失彼之虞。有初終之患。統籌全局。不廢偏端。綱舉目張。漸臻條理。心齊力合。宏濟艱難。此雖老生常談。亦千古不磨之議。取材之道。先擇其心存君國。志不卑污。廉於持身。勇於任事。然後量材器使。俾得

竭其所長。若用違其材。則材反爲所用。事之不治。用之未當也。且今之村氣勝人者。偶一趨向不端。不免失之於縱。勇敢任性者。閱歷稍淺。不免失之於放。端方正直者。自信太過。不免失之於偏。智敏圓融者。趨避過工。不免失之於巧。精能明察者。不留餘地。不免失之於苛。穩練安詳者。恪守舊章。不免失之於隘。而貪污卑鄙。躁妄庸懦之輩。尙不在此數也。中庸之道。聖人慨之矣。奇材異能之士。豈易言哉。刻之所選。祇求平正通達。質直廉明。品行端而心術正。實事求是。不尙阿諛。作育成之。必有益於國。有濟於時。其材始終一轍。不改初心。舉之於朝。自無所愧。若特舉之在前。頓生變異。則宜隨時加重參劾。以儆其餘。今日事機之轉。全恃人材。人材之出。全恃作育以成之。故尤爲當務之急也。今我憲臺移節蘇臺。舊治重臨。官民欣舞。而西江攀臥。情異心同。在朝廷以海邦財賦爲重。簡調無私。在江右生民。不覺有彼疆我界之別。慈雲遠被。能不依依。蘇省聶藩司。候補道朱之榛。錢志澄。杜道等。皆明達有爲。堪爲憲臺助也。威武新軍四營。原議調駐河南之靈寶。食用稍廉。昨聞夷人已到保定。再進正定。接護教民。恐生枝節。卽飭程軍門統率各軍。駐紮衛輝。扼要防守。王副將等營已開靈寶。軍械由水道逕達陝州。至孟津渡黃河。俟到衛輝。另行審察情形。相機而動。惟念北方寒冷。南勇久居。不獨費用浩繁。卽食無米糧。亦多未便。兼之訓練未精。的非勁旅。一言戰事。把握毫無。與其虛糜正項。無補時艱。不如審度機宜。隨時酌量。意俟北京和局稍有端倪。稟請設法遣回。爲精益求精。

精之計。以顧我軍門面。似屬兩全之策。而免久役之勞。如果此軍將勇有爲。器械足恃。不妨聽其徵調。藉可立功。無如戎事一層。非先知已不能言守。非真知彼不能言戰。況屬淮將節制。未必終始相安。萬一遲而久之。意見仍有不合。非徒徒勞無益。且有動輒得咎之虞。不若相機圖之。亦愛惜將勇預籌之地。因程軍門擬另上條陳。爲久紮之計。故議及之。至各營所需。凡應加體卹者。不能稍吝。有失軍心。設若事事求寬。又不能不予以限制。刻固不可。寬亦非宜。但察其應用與否。斟酌行之。某擬俟營務行止定局。即便陳請開缺。以布衣始。願以布衣終。歸田後倡辦鄉團。爲一隅一室苟安之計。夙蒙高厚。敢布赤心。一明素志。即此次隨軍遠出。一路未出範圍。亦皆訓飭詳明。俾有遵循。未貽隕越。昨二十六日。仰蒙召對。垂詢時事。痛切異常。某據實上陳。乃蒙採納。並奉布置營務。仍來長安之諭。軍機繼進。猶蒙獎許。逃聽之下。慚感交縈。第恨識闇才庸。匡扶乏策。徒負高深。言念及茲。自容無地。景帥有逕赴新任之說。我憲臺何時起節。如取道河南。乞先期賜示。俾趕至洛陽。一聆訓誨。某發書後。即日前進。到陝州後。仍與程軍門商之。分班前進。以免層集之虞。即各州縣車輛。亦多不及也。某再拜。二十八晚。

與松忠節書二

滬關自去夏拳匪肇亂。京津糜爛。道路梗塞。商賈裹足。稅務因以日衰。入春以來。人心稍定。方冀約成兵退。得以暢銷。迺迄今數月。所議各款。皆以要挾過甚。籌之至再。未易允從。雖首禍刻已痛懲。而外間傳聞。尙有續請之說。各報所傳。名姓多有異同。未足爲據。某因公與各領事晤譚。無意中力與分辯。俾免誤聽人言。昨得徐靜齋欽使寓書。知亦有是說。但所開之單。尙未交到。前之所聞。恐非盡臆造也。惟各國所交使館界圖。東至崇文門大街以東。南至前門城根。西至棋盤街。北至長安街北堂子及宗人府。吏戶禮兵工五部。理藩院翰林院太醫鑾儀衛欽天監各衙門。藥庫經版庫四繹館各公所。均包括在內。邸意欲劃出。各國則欲移去。爭持辯駁。彼竟置若罔聞。全權亦無如之何。皇城鑿穿。鐵路有通至天壇及宣武門外者。民房公署。動輒遭拆毀。官民噤不敢出聲。神京首善之區。一旦割裂。誰爲爲之。竟至於此。爲人臣子。能不痛心。中俄密約一層。大關全局安危。美英日三公使不以簽字爲然。日內往返辯爭。不知能有轉機否。南洋與香帥。甯與俄爭。堅持不肯簽字。以免各國效尤。所見極是。卽中俄一約。通融了結。大局和議。亦定必得革面洗心。痛除蔽障。以圖自固。不然。終非其計也。長江一帶。聞有康黨糾約起事之謠。刻經新寧南皮諸公嚴密布置。河南居天下之中。似亦宜預爲訪察也。江西一軍。近在彰德。各營官皆不足恃。惟申都司心境明白。馮委員穩練老成。刻聞陳營官已撤。實無大過。乃從周軍門安頓私人。丁統領一心想錢。亦不勝統領之任。憲臺大人節制

九軍。卽客軍亦可兼顧。從周軍門共事數月。私心過重。布置全無。幸無事尙可支持。有事萬不足恃。某不敢稍有私心。亦不敢緘默不言。恐其日後誤事也。某承乏此間。慄慄畏懼。和約未定。交涉各事。處置更難。值此時艱。躬逢其適。惟有不改初心。不遺餘力。相機應事。博訪周諮。藉資報稱耳。

與松忠節書二

前具書詳陳近況。不知已否上達。比奉賜諭。敬諗道履安和。已於四月朔日。履新汴梁。欣慰無既。承示教案各節。調度周密。法燉意良。新猷誕敷。自足以力挽頹薄。辦理交涉之法。誠莫如尊諭所云。早日了結。愈速愈妙。倘經遲擱。則辯駁愈難。而枝節愈多。但河南風氣凋蔽。民智未開。卽委各官。多未能悉交涉法律各端。悉心研究洋務。課吏之法。實爲目今第一要務。具見精心獨運。挈領提綱。一經軒鑿考成。則官方肅而吏治精。吏治精而民風淑矣。日後各主教。似亦宜先與聯絡。如有主教進見。亦乞隨時接晤。可以藉通情愫。微以窺其意嚮之所之。平時之款洽旣殷。臨事之籌商較易。是亦未始非抵制要挾之一道也。月前長江一帶。游勇私梟。陰相勾結。開山堂。運炸藥。意乘和局未定。蠢然思逞。海上爲各國通商之地。而租界易成通藪。備禦稍未周匝。隨地竊發。外人藉爲口實。動輒要求。某值此時艱。日夜憂慮。惟有自盡其心力之所當爲。旋商法領事。設法將徐春山拿獲。解寧正法。人

心稍定。長江一帶。謠說漸平矣。

與松忠節書四

其承乏茲土。不克有所建樹。尸位擁祿。忽忽至今。滬道之責。首在於交涉。而折衝樽俎。某實無其才。次在於度支。而籌備餉需。某復無其策。至於地方民事。所屬三府。兩關租界。良莠雜處。勸懲兩難。某於八載以前。雖曾縮縣篆。於此間稍有所窺見。而時局之遷變。每況愈下。兼以近來長江一帶。謠言孔多。昕夕告至。聞風聲而誤警。望草木而驚疑。海上各國官商。亦皆聞見異辭。趨起傍徨。不知所措。其間更有狡黠者。且至思乘危以圖利。藉詞於互相保護之約。而陰逞其要挾之謀。刻經飛調防營。扼要駐紮。以護教堂。嚴飭巡弁。詞警村岸。以絕游勇私梟之路。並會商領袖領事簽字。協拿訪問各要犯。以清租界。而杜潛匿。以冀消隱患於無形。然此心搖搖。有如懸旌。不敢謂於備禦兌付之所宜。已能心有成竹耳。河南風氣未開。榛狁習處。自以開民智爲急務。想上如標枝。下如野鹿。化純俗。人人皆思自奮。破椎魯而文明。各屬教案。日來如何。一經蓋籌。當無不大事化小。有事化無。方今吏治積痼過深。交涉一層。諸多未悉。尙望嚴定吏課。時其勤惰而黜陟之。官方既澄。人才自見。遇有教案。尤貴速爲議結。以免遲延積久。枝節過多。轉爲外人藉口。某性素愚拙。復少諳練。然管窺之見。又

不能默而不言。妄陳壹是。幸垂督焉。某再拜。五月十八日。

七〇

與松忠節書五

月前不揣淺陋。妄有所陳說。付驛卒馳遞。計程應已早達軒鑾矣。昨閱報章。敬悉我公已於潼關行在。載觀龍光。颺拜虔歌。君臣喜起。可想也。傳聞兩官行抵開封。尙需駐蹕。或久或暫。人人異詞。究不知。讖耗何似。外人意旨。以早日旋都爲是。南方士庶。亦有同心。惟是京師亂後。百廢未興。市井之蕭條。腥羶之雜處。城郭雖是。氣象已非。想兩官觸目傷心。必有難以爲情者。某雖微賤。亦人臣子。興言及此。悲憤填膺。惟祝兩官。豫防來日之大難。無忘曩歲之深恥。痛除蔽錮。力圖自強。則殷憂爲啓聖之資。億萬年有道之長。未始不基於今日也。日來天氣漸寒。長途扈從。尙祈珍衛以時。

與松忠節書六

某不學無術。妄有所稱述。方恐恐焉。乃者。祇奉答書。期至於道。撫躬省幸。殆自忘爲俗吏。而懷欲有言。更不敢不竭其狂愚。幸鑒納焉。中國自周以來多夷禍。國朝自道光庚子。迄今六十餘年。互市不爲不久。而多一次交涉。卽增幾處口岸。開一次兵衅。卽損幾分國勢。豈眞外交古無善策哉。病在華

夷二字。劃然溝塹於士大夫胸中。尊己卑人。牢不可破。內政之抗敵。曾不警省。小有交涉。輒瞋目攘臂。以求一逞。意欲張國。適以墟之。名曰忠君。適以辱之。至去夏北方之警。而情見勢絀。不待智者知之矣。夫生爲男子。誰無人心。而樂與此等氐獸羴羊相晉接哉。止以時會所趨。既末由以清議當巨礮。以唾沫拒猛虎。不能不虛與委蛇。以求於時事有濟。大抵欲言交涉。不先言交際於無事之時。洽之以情。接之以禮。與之相忘於江湖。及事之來。乃可與爭條約講公法。如第閉而拒之。以不見爲清淨。彼干州縣不得而干督撫矣。干督撫不得而干總署矣。牽一髮而全身俱動。徒益敵怒而貽宵旰之憂。論者謂清而介者不宜於交涉。某謂交涉事體大。正惟清而介者。始能上爲國下爲民。不以小不忍而亂大謀也。不安內不能攘外。既安內又無待攘外矣。且彼之公使領事與教士。亦屢動我以變法。諷我以新政。我卽不爲交涉計。文酣於堂。武嬰於行。綱紐解弛。百無一張。蓋而剔之。亦烏容須臾緩者耶。河南古稱爲中州者也。於兵家爲衝地。川平陸夷。產物不旺。兵差驛驛於前。蹕路供頓於後。吾民益無告矣。擴充土產。大興工藝。提倡卹務。亦救時者之所宜有事也。天子赫然明詔海內外。決計變法。自以學堂爲先務。然歷有辦者。利未見而害先睹。何哉。某之愚。謂非合科學於學堂。先孝秀而才藝。則學堂亦與今日之書院同斯功用也。抑某思之。學堂猶田也。書則田之耒耨也。中國譯書不多。更尠佳本。謹將南洋公學及製造局。與其他教會私家所譯述各書。畧加別擇。購奉多種。以

備甄采。其書純駁不一。在讀者分別觀之而已。另備有神實學者一分。藉爲公子益智之助。如續有所需。仍當購奉。王仲任之言曰。不知古。謂讐。不知今。謂陸沉。某幼事戎行。初不意不知今之爲害。乃至於此。涉歷南北。周旋康成元方之間。時亦粗習於學。而自恨炳燭之明。其光無幾也。輕塵墜露。無當高深。惟自貢其慊慊云爾。

與松忠節書七

睽侍豐裁。倏逾五載。歲益再再。情益惓惓。抗塵走俗。臆廣用稀。愛體之私。末由自達。積衰成瘵。言豈勝宣。伏維轄境。民氣强悍。夙號難治。每於邸報。拜讀奏疏。飭吏安民。整軍輯衆。用能如恒安堵。佩仰奚如。比來情形。更復何似。某任事以來。毋敢逸豫。乃大陸風雲。變幻無定。凡所經歷。前人所無。瀝血剖心。百不一當。萬矢所注。尤詬叢之。寢饋不遑。鬢髮都白。傍徨羿穀。有如騎虎。屢稟乞骸。格不得達。感念知遇。聊復陳之。旅順天險。終爲日俘。俄之海軍。失其根據。無能爲矣。遼陽戰後。相持未決。陸軍勝負。尙未可卜。要其終局。害必及我。不能收漁人之利。而徒爲壁上之觀。毋乃非策乎。杞人憂天。鰲婦郵緯。公亦晒其愚否。姑待俄事稍定。仍卽求退。藉以藏鳩。北方苦寒。寶臣元氣。伏維葆愛不宜。再拜。十三日。

跋

先王父起田間。以牧令躋兼圻。生平大節。既具見於碑狀中矣。顧猶所未逮者。蓋方先王父之少也。躬遭髮捻之亂。及其壯也。又遭拳勇之亂。國勢日以蹙。外患日以深。而朝廷益日憤憤。不知所爲計。先王父痛疾時事之不可爲。殫精盡思。力圖改革。冀挽救國家民族於危急存亡之際。豈不值歟。觀夫備兵上海時。卽以開啓民智。培養自治爲急務。迨開府濟南。首創諮議會。實開今日省參議會之先河。它如學校巡警建設自治諸政。莫不推行斐然。本末悉具。嘗以辦理憲政。成績卓著。膺上考。爲各省疆臣之最。非偶然也。當時章奏一出。輒交口傳誦。士大夫間以爲切要云。洎辛亥鼎革後。曩所爲文字。乃蕩然無復有存者。榮法稍長。從故箚中。得新政條議稿一冊。審是辛丑和約未定之際。所作。舉凡更張制度。作致人材。應合時勢。移轉風氣。爲言變法行新政之根本者。都無所避忌。一一綱舉而目張之。至於積習痼蔽之深。茸鬪頹靡之失。論列纖悉。尤爲痛心。嗚呼。雖章奏文字不可得見。而幸有此。亦足以窺見先王父謀國之忱。且大爲何如也。說一首。舊存條議之尾。記一首。書七首。皆從手澤彙錄者。悉附於後。都爲一卷。俾後世之治近代史言新政者。有所考焉。辛卯四月十七日孫榮法謹跋。

抑戒齋奏牘輯存

抑戒齋奏牘輯存目錄

| | |
|------------------------------|-----|
| 改元伊始請因勢利導以開民智隨時變通以紓民困摺 | 七九 |
| 奏陳第一年籌備憲政情形摺 | 八三 |
| 遵旨簽註新訂刑律草案敬陳管見摺 | 八七 |
| 奏陳銅圓十幣敬籌治標三策摺 | 九〇 |
| 奏覆東省州縣異常虧累亟應變通辦理摺 | 九五 |
| 奏請將義丐武訓行實宣付國史館以彰苦操而資觀感摺 | 九八 |
| 覆陳粵省賭餉遵旨籌辦情形摺 | 一〇〇 |
| 奏劾粵省鐵路弊混亟宜整頓以裨路政摺 附片 | 一〇七 |
| 奏請嚴禁緝匪花紅永遠裁革以蘇民困而清吏治摺 | 一一三 |
| 電陳軍機處代奏改良粵省鹽務籌抵賭餉摺 | 一一六 |
| 奏陳懲治廣東械鬪辦法摺 | 一二七 |
| 奏陳中央集權宜先有責任政府及監察院機關以裨事實而救艱危摺 | 一二〇 |
| 致上海領袖領事摘陳開濬黃浦為難情形函 | 一二三 |

| | |
|--------------------------|-----|
| 駁覆銀行公會參贊比領事薛賠款用金函 | 一二七 |
| 致駐滬日總領事小田切請查禁暗刀照會 | 一二九 |
| 致商業會議公所照會 | 一二九 |
| 致英美法德各領事照會 | 一三〇 |
| 致日本總領事照會 | 一三〇 |
| 致駐滬俄總領事照會 | 一三一 |
| 電稟外務部文 | 一三一 |
| 致日本總領事照會 | 一三二 |
| 覆日本總領事照會 | 一三三 |
| 致商業會議公所照會 | 一三三 |
| 致駐滬各國領事照會 | 一三四 |
| 致上海領袖領事並轉知公會照會 | 一三五 |
| 致上海領袖領事照會 | 一三六 |
| 覆致駐滬英總領事索犯歸案訊供照會 | 一三七 |
| 移覆江西派辦政事處與英美德領事辯論兵艦入湖演說文 | 一三八 |

| | |
|-------------------|-----|
| 稟陳署南洋大臣周增改上海會審章程文 | 一四〇 |
| 覆克領袖總領事照會 | 一四七 |
| 咨出使日本大臣胡欽使文 | 一四八 |
| 致憲政編查館電 | 一五〇 |
| 致憲政編查館電 | 一五〇 |
| 致民政部電 | 一五一 |
| 致郵傳部電 | 一五二 |
| 致郵傳部電 | 一五二 |
| 致桂撫張中丞電 | 一五四 |
| 致桂撫張中丞電 | 一五四 |
| 覆粵紳鄧華熙等書 | 一五五 |
| 致度支部農工商部電 | 一五六 |
| 覆民政部電 | 一五七 |
| 致憲政編查館民政部電 | 一五九 |
| 致憲政編查館電 | 一五九 |

| | |
|------------------|-----|
| 爲澳門交涉告各省督撫電..... | 一六〇 |
| 致外務部電..... | 一六〇 |
| 續致外務部電..... | 一六一 |
| 致外務部電..... | 一六二 |
| 致各省督撫電..... | 一六三 |
| 續致各省督撫電..... | 一六四 |
| 再致各省督撫電..... | 一六五 |
| 致雲貴李督廣西張撫電..... | 一六五 |
| 覆廣州英總領事照會..... | 一六六 |

抑戒齋奏牘輯存

改元伊始請因勢利導以開民智隨時變通以紓民困摺

光緒三十四年十二月

秦爲改元鉅典。威業肇基。宜因勢利導以開民智。隨時變通以紓民困。恭摺仰祈 聖鑒事。竊臣恭讀本年十一月初九日電傳 恩詔。以明年爲宣統元年等因。欽此。謹查成案。關於改元後年號之定更。事體至繁。其弊肇大者。爲全國人民耳目所濡染。生計所接受。則莫如時憲書及銅幣兩事。現逢憲政肇始。九年預備。經緯萬端。設於人民耳目生計所最切近者。聽其迷信。相仍紛紜。作僞。是日言開民智。而有數之學堂。不如家置一編之時憲書。入人深也。日日言紓民困。而偶發之官帑。無救於流行全國之銅幣。病民甚也。敢竭一得之愚。爲我 皇上陳之。查吾國歷代相承。最重正朔。以朔望定月。以寒暑定歲。而歸餘於閏。推定歷授時之命意。誠以月之盈蝕。爲人所共知。時之寒暑。尤人所共被。故取以定歷。使人人易遵。數千年來。告朔之存亡。爲觀聽所維繫。揆時度勢。未可輕議更張。然今日通行時憲書。凡爲村農。課晴問雨之陳編。婦孺趨吉避凶之依據。其稍稍開通之商埠。與

新設之學堂。大抵懸用中西合璧之年表。絕少置備時憲書者。何也。商埠既與西賈往來。學堂更有西文教習。非中歷所能拘。而時憲者滿紙所載吉凶宜忌尋常日用。幾於前後瞻顧之俱窮。先儒王夫之曾著論。力闢建除之謬。是舊學開通之儒已夷然不以爲意。況歐化東漸。智識已開。而奉 敕頒行之歷書。仍此迷信神權之習慣。欲導民以智而不破民之愚。臣甚知其不可也。現逢 皇上御宇伊始。改元新歷。觀聽繫之。臣愚以爲應請 敕下欽天監會同政務處諸王大臣。將新歷重加修訂。務適於國民現在之程度。及 國家將來之希望。應否以中歷爲綱。以西歷及每星期附註爲緯。上方仍恭錄 列聖忌辰。下方則附錄 本朝開國以來大事紀念之日。前頁則恭錄關係憲政之諭旨及九年預備期限清單。而 孝欽顯皇后遺誥 德宗景皇帝遺詔。更應一併謹錄。以示薄海臣民繼志述事之至意。後頁則附錄淺近歌謠論說。使之普通識字。而導之於忠君愛國之途。似此一轉移間。商埠學堂必樂於遵用。而吾國號稱四百兆人民。其大半必購閱歷書者。至此耳目一新矣。臣查憲政預備年限。至第九年內。全國人民識字須有二十分之一。是此項時憲書。正可爲轉移社會教育之助。並應逐年修改。不可沿用舊本。頒行之後。准各省地方官翻印廣發民間。務視舊歷之價爲尤廉。以收普及之效。所謂因勢利導以開民智者也。又查成案。凡改元以後。鼓鑄制錢。改用年號。此定制也。然今日之銅元。非從前制錢之比。現在幣制紛如。因而仍之。則流禍胡底。夫吾國承

平時之幣制。無所謂本位。亦無所謂補助品。生銀而外。制錢而已。然開國之時。不特中外未曾交通。此省與彼省亦多隔閡。故偶有平色之參差。僞鑄之緝獲。其被害之區域有限。無與於經濟界之恐慌。自海禁大弛。益以歷年賠款。外人操金融之出入。而恐慌始見。我國既習用生銀。而又加以平色之輾轉掎克。於是墨西哥等國銀元。乘間而入。民間既利其取携之便。而又少平色剝削之煩。且與制錢十進位有相乘之習慣。舉中國朝野上下數十年來。爲墨西哥等國銀元宣洩之尾閭。而不覺迨各省亟亟鼓鑄大小銀元。又以形式不整齊。成色不畫一。先不能博民間之信用。而賠款大宗及通商鉅埠。外人更拒而不用。蓋經濟權之倒持。所由來漸矣。而恐慌再見。然猶曰銀位之出入。與傭值負販小民積銖累黍者。或未必有直接之影響也。自數年以前。銅斤驟昂。制錢缺乏。各省爭鑄當十銅元。爲補苴之計。夫既鑄銀元。不能不鑄銅元。爲補助品。法理上所應有。亦事實上所必需。然朝廷既未法定何者爲本位。何者爲補助品。限制既已不明。施行卽慮無序。而所鑄大小銀元。尙有七錢二分及七分二釐之規定。銅元則概定價曰當錢十文。循是以往。乃生兩大弊。一則與制錢相較。其值曾不及半。而奸民之私鑄與外洋之輸入者接踵。徒飽少數之貪壑。一則銅元雖由官鑄。而國家正供。多以銀計。官以虛位之銅元而吸收實錢。而再吸收實銀。則謂之盈餘。民以寸積之錢文。而一易銅元。而再合現銀。則不勝其折扣。夫吾國小民生活程度尙低。不特貿易出入。不及一銀元。

且不盡及十文之銅元。然則十文銅元。卽據事實爲規定。以尙不可爲補助品。況益以銅質之劣。價格之不相當。官民取與間之不平。又加民間發行鈔票。均無法律之限制。都邑城鎮各色行店。任意出票。真贗百出。虛詐萬端。債權債務。兩無保護。一經搖動。影響及於各處市場。如今年沿江海各埠。比比皆是。而恐慌乃大見。蓋至是而全國人民。咸直接於恐慌地位。敲吸骨髓。非特剝膚卽已也。夫銅元爲幣制之一端。其流毒至此。孰爲之。無法定爲之。上無道揆。下無法守。國之所存者幸。臣查日本明治初元。諸藩鑄時亦各自造貨幣。品位價格。亦極糾紛。與吾國各省鼓鑄並互相禁制情形極相似。厥後政府實行貨幣制度之改良。先注意於正貨準備之蓄積。並預計年限何時引銷舊幣。何時改鑄新幣。若干年內可許通融。若干年內不能引換。以日本之勃興。自明治三十一年制定。已發行舊幣通用期限。直至三十七年。全國貨幣。始純全統一。夫前車之覆。後車之鑿。吾國幣制之錯雜。誠如日本明治初元。而民間之直接恐慌。幅員既廣。時變乘之。困苦情形。較日本爲尤甚。臣愚以爲改元之始。必提案鼓鑄。應請 敕下政務處會同度支部。視日本前事。分析調查。通盤籌畫。並徵取各埠商會之意見。爲統一全國幣制張本。其大要尤在法定何者爲本位。何者爲補助。例如以銀元爲本位貨幣。卽以小銀元及銅元爲分級之補助品。必銀元一枚以下之交易始准行用銅元。蓋銅元本因本位貨幣之價格過高。交易不便而設。自不當濫於鑄造。使流通之額。過於需要。致反占本

位貨幣之地位。此爲經濟不易之原理。至於何時引銷。何時統一。自非實行準備。並嚴行限制。不足以收實效。所謂隨時變通以紓民困者此也。以上兩端。在民間視之爲布帛菽粟。關係至爲密切。應乘改元之始。請旨分飭切實籌議。分年舉辦。以新耳目而厚民生。並列入憲政預備年限單內。以慰海內喁喁之望。芻蕘之見。是否有當。謹繕摺具陳。伏乞皇上聖鑒訓示。謹奏。

光緒三十四年十二月 日奉 旨會議政務處度支部知道。欽此。

奏陳第一年籌備憲政情形摺

宣統元年二月

查憲政編查館原奏考核專科章程第三條。內載九年籌備事宜。責成內外臣工。每屆六個月。將籌辦成績。臚列奏聞。並咨憲政編查館查核。應自光緒三十四年八月起。至十二月底止。爲第一屆。以後每年六月底暨十二月底。各爲一屆。限每年二月內及八月內。各具奏咨報一次等語。又查憲政編查館原奏九年籌備事宜清單。內載第一年期。督撫所應辦者祇一項。第二年期。督撫所應辦者共七項。今遵奏定考核章程。每年分兩屆奏報。是本年二月。所奏報者應屬於第一年期。茲將第一年期所已籌備。及第二年期應籌辦而已預備者。敬爲皇上臚陳之。查山東籌辦諮議局選舉事宜。於上年十月間設立籌辦處。當時開辦情形。奏報有案。該處參用官紳。並延派嫻習法政辦事素

有經驗者爲參議。文牘庶務。分科辦事。據該處所定期限清單。十一月初。考取司選員。演講諮議局章程。浹旬而畢。分赴各府直隸州。再由各州縣選派明白耐勞之士紳。赴該管之府直隸州。聽司選員演講。亦浹旬而畢。聽講之後。各回本選舉區。實行調查。仍慮人數不敷。得由各州縣加派義務調查員。以資贊助。蓋山東風氣未盡開通。選舉法制。蚩蚩者瞠目相顧。經此次輾轉演講。羣疑漸釋。阻力自消。復慮各州縣或不盡曉事。而司選員或需索供張。仿照直隸辦法。由該處籌給各州縣選舉經費。暨司選員夫馬薪水。期於絲毫不得擾民。以免藉口而專責成。復將初選舉畫分三期。一爲選舉人名草冊告成之期。二爲選舉人名經審查判定清冊告成之期。三爲初選舉投票之期。每屆一期。飭各該州縣電稟該處。以便督催而免延誤。自上年十二月實行調查。現據各屬陸續稟到。人名草冊均依限告成。其有事前稍涉觀望者。亦經臣隨時訪問。嚴加訓斥。目前情形。依照東省所定選舉期限。不至後時。並擬俟復選舉事畢。召集被選各員。於九月開局以前。先期研究一月。爲議案之預備。亦卽爲籌辦選舉之結束。該處開辦以後。一應經費。均經遵章籌撥。於上年十二月附片具陳在案。此屬於第一年期已經籌辦之實在情形也。其有事屬於第二年期。而目前已分別預備者。如原奏清單。籌辦地方自治設立自治研究所一節。上年冬間。臣卽與司道籌商。以爲欲實行自治。必自濬人民自治之知識。並養成人民自治之能力。自應先在省城設立研究所。飭知各州縣。每邑選

派兩人到省聽講。正在札飭間。欽奉 諭旨。頒布城鎮鄉自治章程。本年正月奉文後。卽遵將上項章程列入研究所。分期演講。業於二月初一日開課。並查照憲政編查館原奏。責成諮議局籌辦處兼理地方自治籌辦事宜。正在另案奏咨辦理。此關係地方自治之預備者也。又原奏清單。各廳州縣巡警年內粗具規模一節。查山東巡警業設專官。並先於光緒二十九年開辦警務學堂。大致參照直隸辦法。經前升任撫臣周馥奏咨有案。三十一年三十二年。歷經分派該學堂官班學生及兵班學生。赴各州縣分充巡警官教弁等職。上年臣到東後。逐加考核。以此等學堂。歲糜鉅款。而缺憾滋多。自非大加改良。不足以資任使。嗣准民政部咨行奏定各省巡警學堂章程。內開高等巡警學堂。各省城須設一處。巡警教練所。府廳州縣須設一處。又高等巡警學堂。爲目前警官需人計。得附設簡易科。其各省已設有巡警學堂者。均按照此次奏定章程辦理。並限期設立。由各督撫具奏咨部等語。臣於奉文後。卽諭飭該學堂改爲高等巡警學堂。並將已辦各班分別考驗。畢業給憑。仍按照新章。另行招考。暫定爲正科學額八十名。簡易科學額一百二十名。俟次第招齊。卽日開課。惟定章府廳州縣各立巡警教練所一節。照章每處至少一百名。以山東一百十七府州縣計之。同時學辦。學額將萬二千人。不特此項教員。有乏材之患。抑慮經費交絀。同無米之炊。但巡警爲憲政最要之圖。自不得不從長計畫。現於省城先設巡警教練所一處。學額寬定在二百名以上。一俟招齊。卽

行開課。以資模範。而圖擴充。其各府州縣。從前本派有學生。襄辦警務。但學識究未完備。擬陸續抽換回省。使之補習而宏造就。所有遵章辦理情形。亦當另案奏咨辦理。此關係各府州縣巡警之已豫備者又一也。又原奏清單。調查歲出入總數度支部各省督撫同辦一節。查上年十二月度支部奏遵旨妥議清理財政一摺。內稱決算豫算報告各冊。與從前報銷舊案不同。自應另訂冊式。現擬逐一釐訂。交清理財政局遵式填送等語。此項調查。既須度支部會同辦理。自應候另訂冊式。遵照填報。惟臣自上年到任後。曾將東省財政異常困難情形。於六月間奏明在案。嗣與司道等籌議。以爲不能開源。不能不從事於節流。遂將各項差務。逐一考核。可裁者裁之。可併者併之。可減者減之。計各局所學堂二十餘處。較前歲省銀四十餘萬兩。惟目前新政日增。在在均需款項。經臣核實撙節。任事人員。但求餼廩之稱。力祛調劑之私。兼差概不兼薪。擇人斷非擇地。舉辦伊始。怨謗叢生。但臣忝膺疆寄。未報涓埃。倘取錙銖而用泥沙。卽毫無飽囊之私。於國計民生。所妨已大。東省歲虧甚鉅。此項節省經費。杯水車薪。誠慮無濟。然塞從前已漏之卮。汲來日方長之綆。得尺則尺。得寸則寸。舍此殊少良圖。此關乎調查歲出入總數之已豫備者又一也。又原奏清單。籌辦各省省城及商埠等處各級審判廳法部各省督撫同辦一節。查審判一項。本係專門之學。吾國舊制。各廳州縣兼理刑名詞訟。不特用非所長。抑亦日不暇給。現在九年籌備。凡各省舉辦事宜。無不責成州縣。若再兼

理審判。貽誤恐多。此審判人才。所以尤亟亟也。現在遵章籌辦。自以養成審判人才爲第一要義。查東省法政學堂。開辦已久。上年准學部咨行各省法政學堂。畫一辦法。應照京師法政學堂章程辦理等語。當經臣飭該學堂。即遵照定章辦理。並將原有速成班。分別認真考驗。增益課程。改爲司法講習科。專爲養成審判員之地。新招之講習班。亦准此辦理。似此畧一變通。於定章固無出入。於事實或有裨補。此關乎幫辦各級審判廳之豫備者。又一也。以上在第一年期。已籌辦者一項。查屬第二年期。應籌辦而已豫備者四項。至於頒布資政院章程。舉行議院選舉。應候資政院自辦。調查各省人口總數。應候民政部同辦。頒布簡易識字課本。創設廳州縣簡易識字學塾。應候學部同辦。

遵旨簽註新訂刑律草案敬陳管見摺

宣統元年閏二月

奏言。臣伏讀本年正月二十六日。上諭。戴鴻慈等奏請飭催京外各衙門簽註新訂刑律草案一摺。著京外各衙門照章簽註咨送。以憑核訂而昭畫一等因。欽此。仰見慎重刑律。圖進文明之至意。查原奏我國刑律不能不改之故有三。曰。慮於時局。曰。鑒於國際。曰。懲於教案。無非以我國法律未修。輕重失宜爲藉口。三者之中。或誤以領事裁判權爲治外法權。文義上之解釋。原奏已明。或更誤以教案爲交涉。遇民教兩造訴訟之案。往往牽入國際。外人亦利用而愚弄之。數十年來。不特外國

居住之人民。不受我國所屬地法律之支配。尋至我國內地人民。恃外國居住人一二爲護符。亦將不受我國法律之支配。原奏所謂入教愚賤。氣凌長官。聞於交涉。細於因應。臣愚以爲此非聞於交涉也。本非交涉而誤爲交涉則聞矣。非細於因應也。無可因應而與之因應則細矣。何怪裁判權之移於領事。保和會之抑居三等。桁楊改色。繫敦無光。羞朝廷而重蹙吾民之生命耶。故居今日而言刑律。變固變。不變亦變。但變在我則或有桑榆晚景之收。變不在我將愈釀塗炭生靈之厄。觀於通商各埠。外人對於中國罪犯。請復答責。刑罰不中。民無所措手足。嗟言及此。可爲痛心。臣細繹修律大臣所訂刑律草案。變通之事例凡五。內如酌減死罪。或議其太輕。刪除比附。或疑其太渾。其所以酌減及刪除之理由。實皆採取歐美列邦之學說。參以中國舊時之習慣。斟酌損益。頗具苦心。原奏均已詳言之。無可議亦無可疑也。臣竊竊然議且疑者。則不在枝葉上之討論。而在根本上之解決。根本維何。中國如不改訂法律。尙能適存於列強競爭之世紀否。尙能範圍此住居衣食之人民否。原奏所稱不能不改之故。固不待智者而自明也。此所謂根本上之解決也。雖然。我國現用之刑律。已成何等之時代。我國今日之時代。應適用何等之刑律。原奏於不可適用之處。則別爲暫行章程。又或恐暫行章程之或有窒礙也。則曰舉行警察爲之防範。普及監獄爲之教養。罪重法輕之弊。可無顧慮等語。蓋臣之顧慮即在此矣。夫各省舉辦警察。僅存形式耳。或並形式而未備耳。上年民

政部始頒行警察學堂及巡警教練所章程。按照九年籌備期限。今屆甫在舉辦。若監獄爲籌備清單內所未及。似不能卽屬於籌備審判之一部。其實監獄如不改良。則雖受極文明之裁判。而仍處以極不文明之監獄。與新訂刑律。乃真有直接之關係。其弊尤甚於巡警之不完備也。刑律枝葉之討論。縱極完密。事實之障礙。固已多矣。臣聞刑法之沿革。先由報復時代。進於峻刑時代。由峻刑時代。進於博愛時代。我國數千年來。相承之刑律。其爲峻刑時代。固無可諱。而外人則且持博愛主義。馴進於科學主義。其不能忍讓吾國以峻刑相殘也。非惟人事爲之。亦天道使然也。原奏所謂警察爲之防範。監獄爲之教養。卽由峻刑而進於博愛之證也。論者不揣改訂刑律主義之所在。而毛舉峻刑時代之習慣。瑕指而癩索之。毋怪格不相入也。故爲我國今日計。旣不能自狃於峻刑主義。則不能不援取博愛主義。警察所以強制未犯罪之人不得爲非。監獄則並教養已犯罪之人。復歸於善。亦曰感化主義。是二者在刑法上爲旁義。而在新刑律實行之先。則非有切實之預備。至某年巡警辦有規模。某年監獄均已設立。則新刑律終不可實施。我國新政。變甲而不變乙。並甲亦不效。大都然也。就東省情形而論。曹兗數府。以強悍聞。殺人于貨。相習成風。治斯土者。亦惟嗜殺爲能。殺愈多而盜亦並不減少。故夫刑罰者。最後之制裁也。日以刑罰加諸民。則制裁之道窮而樂生之意少。老子曰。民不畏死。奈何以死畏之。故峻刑主義之不得不轉入博愛。理有固然。亦勢有必至也。如是

則今日京外衙門對於刑律。不必從枝葉討論。仍當從根本上解決。既如原奏刑律不能不改。則惟有預籌未施行此項刑律之先。應用何種助長之方法。使之易峻刑而進博愛。易威嚇而用感化。似非僅如原奏空言法律知識所能辦。此臣竊奇忝膺。不敢爲苟且之圖。亦不敢存凌躡之見。擬在東省擇地先辦一寬大之監獄。經營伊始。難在籌款。尤難在得人。蓋必須擇宅心公正具有慈善之願力。而尤樸實耐勞。有監獄之經驗學識者。綜理其事。始不至視爲例差。有如傳舍。臣智短才疏。不敢謂辦理必有效果。而默察新刑律之入手。非經此階級不可。無論東省財政如何支絀。然上體天心之仁愛。下傷民命之顛連。蕩滌瑕垢。咸與維新。巨斷不敢不勉爲其難。一俟計劃稍有端倪。另款奏報。其刑律草案。經飭知按察使胡建樞查照。分別簽註。茲據詳覆並簽各條。臣察閱之餘。亦係從枝葉上討論。聊備千慮一得之用。除分咨查照外。芻蕘之見。是否有當。伏乞 聖鑒。

宣統元年閏二月 日奉 旨修訂法律大臣法部彙議具奏。欽此。

奏陳銅圓十弊敬陳治標三策摺

宣統元年閏二月

奏陳銅圓十弊。敬籌治標三策。恭摺仰祈 聖鑒事。竊維我國幣制。向無所謂本位。隆古之世。以粟易布。以陶冶易農器。有無相通而已。自生齒易繁。交易者不能不有所憑藉。而便於取携。於是太公

立九府圖法。周景王鑄大錢。自茲以後。輕重大小名種蓋紛如矣。先儒王夫之論漢文帝除盜鑄錢令也。其言曰。一錢之費。以八九之物力人功成之。無用之銅化爲有用。以益民而利國。利亦溥矣。又曰。一錢之費。用十之八九。則盜鑄無利而止。由臣觀之。如前之說。在閉關時代誠然。而今則環球交通。各國由銀本位而躋於金本位。銅之爲用。已退居於補助之地位。如後之說。則在閉關之時。盜鑄者不過國內之民而止。卽曰盜鑄。其利猶藏於民也。今則自鑄當十銅圓。而三五年來。民生凋敝。日甚一日。非惟無利。害尤甚焉。臣於上年十二月間。奏陳改元事宜摺內。曾歷請將銅圓限制鑄造。法定貨幣本位及補助品三等級。爲統一幣制張本等情。奉旨會議政務處度支部知道。欽此。欽遵在案。顧默揣銅圓受害之現象。與治標之方法。有爲前摺所未及。不敢不爲我皇上縷陳者。請先言其弊。一國之幣制。必合乎其人民生計之程度。遠且弗論。試以今日程度與近三二十年前相較。其終日汗血僅傭值百數十錢者。殆無少異也。而試問其人日用所需之飲食服御器皿一切消耗之費。視二三十年前。乃或相倍蓰焉。或相什伯焉。辛苦愁歎。屢焉不可終日。非銅圓爲之阱乎。夫所便於當十銅圓者。爲其與十文之制錢相當也。一錢之費。應用十之八九。漢時且然。況在今日。而銅圓與制錢較。乃僅值十之四五。是作僞也。非作法也。弊一。利者人之所趨。上以僞倡。下以僞應。官鑄則行。民鑄則禁。是防川也。弊二。顧盜鑄在民。猶可說也。前數年間。各有奏參銅圓虧空之案。層見迭

出。舞弊輒在局員。昔之盜鑄者民。今之盜鑄則並在官。弊三。官執法則奏參抄矣。民觸法則籍沒監禁矣。然私鑄仍踵項相望。有自外洋運到銅胚者。有手搖機器軋成者。餌之以利而驅之於法。是罔民也。弊四。如果當十竟當十。亦可說也。完糧納稅。以銀兩計。市場貿易。以銀圓計。以終日備值僅獲百數十錢之貧民。一與之接觸。必輾轉遞加成色。或合銀兩。或合銀圓。則當十銅圓尙不及八九文之用。弊五。民苦其拮克。而官樂其贏餘。此省鑄。彼省亦鑄。互相禁制。如防敵然。蓋不特視民鑄爲私鑄。卽視官鑄者亦如私鑄矣。弊六。錢者。貨泉也。藏者曰泉。行者曰布。皆取流行無阻之意。今此省對於彼省之銅圓。非退絕卽折抑之。而奸商乃得僞鑄私運以售其欺。一國之官。彼此不相聯屬。一國之幣。彼此不相流通。是何景象乎。弊七。富人猶可。貧獨如何。彼默付其日獲百數十錢。經銅圓輾轉之拮克。尙不足以餬口。又安望能贍家。不得不邀求營業之加價。始而見諸機械各戶。繼而見諸勞動工人。一加再加之不已。亦一閱再閱之不已。其事誠激。其情已可憫。此二三十年前未有也。鉅而走險。恐尙不止此。弊八。如果工藝發達。土貨暢銷。則生活程度與之俱高。亦固其所。今中國足稱生利之事業。祇此舊有之數種。又未加改良。致外來種種貨物。日浸月灌。故工藝一途。亦頗衰落。向之自食其力者。其手技類多拙劣。生利者未見其贏。分利者徒奢其欲。銅圓乘之。雖加價如未加價矣。一籌莫展。兩敗俱傷。弊九。向猶以爲害在民而利或在官也。今則官亦困矣。完糧納稅。曩或有所

謂盈餘焉。盈餘者。銀價不甚昂。而錢串亦不甚長。故見爲有餘也。東省州縣曾提取盈餘矣。今卽不提盈餘。而瘠苦之缺。尙不足以自存。賢者視得缺爲畏途。不肖者或多取而爲虐。上無法定之幣。下無法守之官。上下交征而國危。弊十從根本上解決。則必操金融之出入。而後可與歐美各國經濟界抗衡。而今則本位尙未堅定。奚論金融。亦必圖實業之發皇。而後可使人民生計增長其程度。而今則知識尙少開通。何來實業。惟銅圓之害。既剝及脂膏。則補救之方。更急於眉睫。臣所爲輾轉籌思而姑爲治標之策者也。查日本明治初元。諸藩錯峙。各自鼓鑄。幣制紛糅。日臣松方精研財政。自明治三十一年發布統一幣制之政令。三十七年始收統一幣制之效果。我國今日銅圓。其紛糅情狀。與之極相似。如調查日本統一辦法。分期籌備。則我國銅圓。其銅質之低昂。銅色之參差。與夫銅圓以外復有制錢。而價格又絕不相當。一言蔽之。皆可謂之非法。法定如何。我國如確定以銀爲本位。則一兩重之銀圓。按照市價。定爲可易當十銅圓若干文。其於凡不滿一銀圓之交易。則通用銅圓。爲補助品。中間更鑄爲一二錢以上之小銀圓。爲層接之補助。又恐民間交易尙有不及銅圓十文者。更添鑄當二當五之小銅圓。爲層接之補助。其向來行用之制錢。與銅圓價格既太不相當。且歷來私鑄制錢。搜禁未盡。不如由部臣通盤籌畫。奏請 敕下各省。儘若干期限內。盡收天下之制錢。改鑄法定之銅圓。庶補助可以得宜。輕重不致偏畸。此爲治標之上策。或慮各省情形不同。銅圓

充斥者固多。銅圓缺乏者或在不免。籌備之始。不如略分階級。銅圓與制錢價格太不相當。勢不能不將銅圓分期抑價。如京師行用當十大錢後。皆通用作二文。亦以此項銅質並無當十之實在也。天下事無其實而襲其名。久之必有仍還其實在者。今銅圓實質既不過值錢四五文。故民間交易。亦有私自折扣。以求還其實在之漸。與聽其私自折扣。價格必又不整齊。不由國家法定自某年起至某年止。自八九文遞減至五六文爲止。蓋遞減至五六文。則去實質已不遠。必無再有私鑄者。所謂盜鑄無利而止也。此爲治標之中策。或又慮邊省腹地尙用制錢。或制錢銅圓並用。尙在銅圓未甚充斥之時。則民間亦未受何等之影響。遽言折扣。轉拂輿情。不知政者正也。非人人而悅之。謂也。且其未甚充斥之區。長官或乘閒請鑄焉。奸商或牟利暗運焉。未充斥者。必至於充斥已也。幸其充斥之未至。而飲酖以爲甘。必將恨其充斥之難去。而噬臍有不及。苟且補苴。制錢銅圓並行。亦應價格稍爲區別。以杜其充斥之萌。然我國古時卽有圖法。今東西各國盛稱幣制法也。制也。今天下而無不從。禁天下而無不止。倘一國之中。有兩種銅幣之形式。而質料價格又復懸殊。此環球所竊笑。亦考古習法之徒所大惑不解者也。是爲下策。並此不爲。紛糅也聽之。充斥也亦聽之。交關也聽之。交征而交困也亦聽之。朝下一令曰可以搭用。暮下一令曰無許折扣。而不計及以上種種之妨害。相率而爲僞者也。惡能治國家。是爲無策。前湖北巡撫臣胡林翼之論籌錢也。曰富國之道。須

先利民。乃有根本。欺民者詐。剝民者自剝其身。割肉充饑。腹未飽而身已殘。痛哉言乎。軍興之際。老成謀國。猶拳拳根本至計。今聖上御宇。籌備新政。中外觀聽所繫。獨此日日需用。人人需用之物。尙爲阱於國中。無道揆。無法守。如之何其可也。微臣蒿目瘡痍。不敢緘默。忘其一再之瀆。敬請宸謨獨斷。救下會議政務處度支部。並臣前摺切實籌議。事關全國幣制。似應列入九年籌備清單。議定以後。請旨頒行各省。依限遵行。以廣皇仁而紓民困。曷勝屏息悚惶之至。除分咨外。理合恭摺具陳。伏乞皇上聖鑒訓示。謹奏。

宣統元年閏二月二十四日奉 硃批度支部知道。欽此。

奏覆東省州縣異常虧累亟應變通辦理摺

宣統元年閏二月

奏爲覆陳東省州縣異常虧累。亟應變通辦理。謹先將大概情形。恭摺具陳。仰祈 聖鑒事。竊臣於閏二月十四日。承准軍機大臣字寄。宣統元年閏二月初十日。奉上諭。有人奏請豁免州縣攤款等語。各省攤款一項。實足爲地方官之累。著各督撫查明。司道府各衙門攤捐款項。分別是否重要。政務必需之款。應否裁除。詳晰妥酌。奏明辦理。原摺著鈔給閱看等因。欽此。仰見 朝廷體恤地方。澄清吏治之至意。伏查東省司道府各衙門攤捐款項。迭經分別裁減。其重爲地方官之累者。則在

提取州縣丁漕之盈餘。溯查盈餘一項。於光緒二十六二十七兩年。經前任撫臣袁世凱暨前護撫臣胡廷幹先後奏明在案。臣蒞東以來。竊見州縣虧累。萬分難支。於本年二月。遴派精於會計委員。前往各屬。詳細調查出入款項。正爲豁免提款酌定公費起見。與此次鈔給閱看原摺。意正相符。本擬俟該委員等查竣奏明辦理。茲奉寄諭垂詢。不得不先將大概情形。爲我皇上瀝陳之。臣維禁人之貪。必先有以養其廉。責人以忠。必先有以厚其祿。國家之於州縣。廉俸之外。有丁漕平餘。所以待之者。至優極厚。自償款無出。新政待興。不得已攤款加提。而州縣日形蕭瑟。自銅圓充斥。銀價增長。丁漕不敷報解。而州縣虧累更不能支。在其始原屬一時之權宜。而流弊遂及於今日。夫牧令者。朝廷託以數十萬生靈之命者也。我皇上念切民依。日以子惠羣黎。督責州縣。若牧令皆各仰屋愁歎。自救不遑。安能望其心有餘閒。勤勞民事。譬之乳母。飲食不繼。饑餓呻吟。而責以哺乳充饒。嬰兒肥碩。理之必無。事所難強。方今各省銅圓之累。大率相同。州縣之艱。度亦不甚大異。以臣日擊山東州縣情形。屢有求免去任。疊請交卸之事。甚有因虧無抵。發爲心疾。佯狂涕泣。以求苟免於監追者。夫以牧民長吏。至於愁苦無聊。日日憂貧。朝不謀夕。此危邦之陋風。非天下之細故。循此不變。其何以國。且凋敝既極。廉能之吏。束身自愛。往往觀望不前。轉便卑污苟賤。得以輾轉因緣。便其私計。聚多數貪鄙無行之吏。肆居人上。彼且朘削民膏。剝奪元氣之不暇。而冀其教育普及之實。

行。地方自治之成立。是北轍而南其轅也。臣一再籌畫。以爲現在推行新政。當先重任親民之官。而重任親民之官。當先令其寬於有餘。而後乃得以責其事效。物窮必變。琴瑟不調。則改弦而更張之。今欲紓州縣之困。莫如將歷年提款一律豁除。欲地方吏治之有起色。莫如統合全省州縣之缺。消息贏虧。務劑於平。一律改爲公費。而其辦法之大綱。則在以後指撥之要需。待解之急款。不再攤州縣。不加派農田。別由臣另籌抵補。夫如是。州縣而稱職。俾之久於其任。設瘼厥官。則嚴効隨之。仕途或有澄清之一日也。臣與司道再四籌商。意見均同。僉以此舉具有數利。查提取盈餘一項。本籌款不得已之苦心。循謹州縣。尙不敢加派於民。貪婪者則巧立名目。暴斂橫征。盡責償於百姓。今既報解寥寥。已成無著。不如捐此空名。令州縣無所藉口。既解農民之困。且杜貪吏之苛。爲百姓留一分脂膏。卽爲 朝廷多培一分元氣。利一也。全省州縣之缺。不能盡同。賠累之區。廉吏亦復畏避。其有一二膏腴之邑。巧官仍多鑽營。今擬酌劑贏虧。一律改爲公費。明幹之吏。俯仰足給。爭願盡其賢勞。中材之人。欲望不奢。亦且息其奔競。作賢能之氣。靖仕路之蠶。利二也。公費之定。擬以缺之繁簡爲衡。不以地之腴瘠爲準。其相差之率。不令懸殊。以一其心。其所定之數。俾足自給。以示其厚。在下無擇肥棄瘠之心。在上收爲地擇人之效。利三也。大抵州縣之積習。開徵不遠。則爭謀到官。丁漕既完。又急思解任。存一官傳舍之念。尠爲民請命之忱。擬改爲公費之後。每月由司庫支領。通年合計。無

過豐亦無過儉。人自不生趨避。專心戢志以奉公。蓋必先安其心而後能辦地方之事。亦必久於其任而後能盡州縣之才。利四也。而尤有大利者。則擬將公費酌中定數。俾其贍身家給賓客而有餘。買田舍長子孫而不足。使貪夫無所利以託足而仕路清。志士得所藉以設施而官治理。天下者州縣之所積。合羣策羣力之效。庶以立可大可久之基。惟是東省財政。困難萬分。經臣一再奏明在案。免提盈餘一項。款目極鉅。抵補爲艱。改爲公費。頭緒殷繁。澈底清查。辦理不易。第念舉行國家要政。層累階級而下。集於州縣一人之身。若州縣人人自危。則新政事事皆廢。雖詔旨森嚴。部章敦迫。奉行故事。仍於實際無裨。臣日夜籌思。州縣凋敝情形。至於此極。微特現辦要政。無由策其進行。且恐滿目生靈。日益滋其糜爛。根本之患。固在地方。影響之大。關乎全局。若不毅然改圖。以後愈難收拾。權衡輕重。利害昭然。臣忝膺疆寄。具有天良。力所能爲。不敢不勉。如蒙聖明俞允。免提盈餘一項。除由臣督飭司道另籌抵補。暨改爲公費。安定辦法。欽遵現奉諭旨。一併奏明辦理。謹先將州縣異常虧累亟應變通辦理情形。恭摺覆陳。伏乞皇上聖鑒訓示。謹奏。

宣統元年閏二月二十四日奉 硃批。著按照所奏妥慎籌辦。期收實效。以清治源。欽此。

奏請將義丐武訓行實宣付國史館立傳摺

宣統元年五月

奏爲義行可風。據實臚陳。請 宣付國史館。以彰苦操而資觀感事。竊臣自上年履任。卽聞堂邑義
丐武七卽武訓。積資興學。能人所難。光緒十四年九月。前撫臣張曜。奏請建坊。給予樂喜好施字樣。
奉 旨著照所請。禮部知道。欽此。欽遵在案。又查接管案卷內。光緒三十年。署臨清直隸州知州莊
洪烈。堂邑縣知縣王福增。署館陶縣知縣向植稟稱。竊堂邑縣人武七。卽武訓。父宗禹。母崔氏。幼失
怙。隨母行乞。所得食。必先其母。人皆稱孝。七歲。母病歿。武七仍行乞。自恨不識字。不讀書。見鄉塾兒
童就學。輒尾隨其後。羣兒頗厭辱之。則大憤。誓必教人人讀書識字。於是晝則行乞。夜則績麻。或爲
人磨米麥。得一錢。存之。他人或予餅。則食其殘者。而市其完全者。得錢。亦存之。漸積漸多。先爲黠者
所給。既而里黨欽其行。乃爲存放生息。閱數十年。共積至萬餘串。先在堂邑柳林集。捐置地畝。設立
義塾。次至館陶。見僧人了證。在楊二莊設塾。喜其同志。資助錢三百千。以贊其成。已而至臨清。設塾
於史巷。光緒二十二年四月。病歿於臨清。年五十有九。今臨清城西南。有武訓義塾。卽乞人所建。而
州人以其名名之者也。訪諸耆老。僉云武訓行乞三十餘年。未嘗費一錢。甘一飯。或勸置妻室。蹙然
曰。有妻則有子。將耗吾資。竟終身不娶。積銖累寸。設學三州縣。宅舍經費惟備。並倩董事董理之。已
絕不過問。惟師生有惰者。則長跪其前。因是人多敬憚之。成就日多。似此苦操奇行。應請奏咨立案。
俾免湮沒等情。臣查該員等所稟。在武訓歿後。故綜敘事實較詳。其所設學塾。與積錢之數。有在前

撫臣張曜奏獎以後所設施者。以一乞人興學三州縣。捐資萬餘串。僅予尋常旌表。誠恐苦操奇行。不足以示來茲而風薄俗。自聖詔屢頒。學校踵起。教育義主普及。官立公立之不足。必藉私立以補助之。國家又設爲種種獎勵。爲誘掖勸導之具。近數年間。薦紳巨室。偶有薄輸其財產。以求合乎獎勵之數。博一時之美譽者。此其人已百不一二。若以一乞人。竭數十年之汗血。無絲毫名譽之歆動。不娶妻置田產。惟孜孜興學。以償其必人人讀書識字之素願。其志量品格。卓立乎萬物之表。非所謂人能宏道者歟。臣甚敬之佩之。前者恭逢恩詔。採訪義行。臣愚以爲如武訓之行。則可謂大義。武訓之心。則可謂至仁。合無仰懇天恩。特降綸音。宣付史館立傳。以彰奇行。出自高厚鴻慈。作齊魯諸生之氣誦。聲庶達乎里閭。洗播間噂。賦之羞。有志盡成爲豪傑。並據署提學便羅正鈞詳請前來。臣覆查無異。所有義丐積資興學。籲懇宣付史館立傳各緣由。除造具事實清冊。分咨國史館學部禮部查照外。理合恭摺具陳。伏乞皇上聖鑒訓示。謹奏。

宣統元年五月二十九日。奉 硃批。學部議奏。欽此。

覆陳粵省賭餉籌辦情形摺

宣統元年八月

奏爲覆陳粵省賭餉。遵旨籌辦情形。恭摺仰祈聖鑒事。竊臣於宣統元年七月二十二日。承准

軍機大臣字寄。宣統元年六月初三日奉 上諭。有人奏請停收廣東賭餉等語。著體察情形。妥籌酌辦。原片著抄給閱看等因。欽此。遵 旨寄信前來。當即轉行司局欽遵辦理在案。竊查粵省賭餉之爲害。萌蘖於三十年以前。而騰躍於近十年以內。本年五月間。前督臣張人駿會遵 旨覆陳賭餉出入大宗。以爲實行禁賭。必先妥籌抵餉。嗣無論籌得何款。均先儘賭餉撥抵。務期賭博陸續禁絕。賭餉次第停收。並俟諮議局成立。會集議員。妥商辦理各等語。奉 硃批著照所請欽此。乃絲綸之色方新。而封奏之書又上。蓋禍去惟恐不速。詢謀益見僉同。此誠粵省一大裨政。亦諮議局定章應興應革一大問題。不嫌反覆討論。以覘輿論之公。而絕鴆脯之毒者也。查原奏各節。前督臣張人駿覆奏摺內言之備矣。臣覆加查核。切知粵省受賭害剝膚之痛。與賭餉爲政體所關。有爲原摺所未詳。並前督臣覆奏所未及者。謹將遵 旨籌辦情形。爲我 皇上縷陳之。查粵省賭餉。類別有四。一曰榜卜餉。卽闖姓是。一曰緝捕經費餉。卽番攤是。一曰基鋪山票餉。一曰彩票餉。其鄉僻賭博。如花會等名目。向不承充餉項。仍在例禁者不與焉。四者之中。以闖姓爲最早。溯查同治四五年間。前督臣瑞麟前署撫臣郭嵩燾罰繳聞姓軍需銀十四萬兩。至十年十一年間。前督臣瑞麟前撫臣張兆棟復援案罰繳銀三十二萬三千五百兩。名曰罰款。實抽分賭館之餘利也。此爲闖姓繳費之濫觴。迨同治十三年。御史鄧承修始有禁抽闖姓賭款之請。光緒元年。給事中黃槐森復有申明前禁

之請。前撫臣張兆棟奏陳閩姓賭局已禁不宜復開。欽奉 諭旨。將閩姓賭款嚴申禁令。永遠裁革。不准藉詞復開。以肅政體等因。光緒六年。御史鍾孟鴻復有閩姓賭場徙至澳門恐成漏卮之奏。經前督臣張樹聲覆奏。謂中國力能自強。未嘗不可據理阻止。又痛陳閩姓賭館之害。奉 旨。欽遵各在案。是當日賭博之最著者惟閩姓一項。然其時言官之陳奏。疆臣之籌慮。已焦然於止渴飲鴆之非計。積薪厝火之宜防。臣所謂萌蘖於三十年以前者此也。迨光緒十年。前督臣張之洞等奏准弛禁濟餉。爲一時權宜之計。而榜卜之聲。喧闐於道路。自科歲試以至鄉會各試。無歲不有。官家以奏准有案。亦遂視若無覩。箝口結舌。象箸不已。必爲玉杯。於是民間又有小閩姓之設。幾於無人不賭。無日不賭。而粵省之賭風乃愈熾。迨光緒二十六年。前署督臣李鴻章復將番攤賭博改名爲緝捕經費。初則每年僅繳餉銀一百三十餘萬兩。二十九年。前督臣岑春煊以小閩姓爲害最烈。先行禁止。而番攤一項。飭改爲官督商辦。分地招商承充。歲收約銀三百萬元左右。三十一年。歸併善後局。飭商加餉。現計歲收約銀二百七八十萬兩。惟邊境欽廉一帶。不准開設。又龍川和平長寧連平長樂南澳等廳州縣。陸續籌抵有款。先後飭將賭博嚴禁。基鋪山票一項。除一次報効各款並農工商實業等項經費不計外。新舊認款約歲收銀一百三四十萬兩。備詳於前督臣張人駿覆奏摺內。其彩票一項。已爲他省普通之弊政。初由前督臣李鴻章以澳門彩票盛行。不能禁絕。不如設法抵制。

飭由司局詳明准歸商人承辦。名曰中和公司。自光緒二十六年六月起。歲收七兌餉銀十三萬二千元。嗣後承辦之商。因滯銷減餉。屢有變更。迨本年四月。連前所認並加餉。每年共繳銀五萬七千五百餘元。此在粵省賭餉中爲數最微。凡以上各賭餉。或撥充水陸防營勇餉。或爲添練新軍。及舉辦新政。並一切雜費之用。前督臣張人駿覆奏摺內聲明有檔案可稽者。臣所謂騰躍於十年以內者也。臣綜核四種賭餉。其歷史不同。現籌辦法亦因之而殊異。榜卜餉一項。自科舉停止。本在毋庸直議之列。本屆舉行優拔各考試。死灰爲之復燃。本年正月間。經前督臣張人駿諭准商人承辦。共認繳餉銀三十萬元。分五場勻繳。至明年。朝考後爲止。此實榜卜之尾聲。爲今明兩年之賭餉。並非常年收款。惟下屆壬子一科。尙應考優。臣擬截至明年爲止。以後無論何項考試。不准商人承充闖姓卽榜卜餉項。以符先朝諭旨永遠裁革不准藉詞復開之至意。此應尅期禁絕者一也。彩票一項。江南北等省皆有之。其舉辦緣起。則皆曰抵制外來之彩票。臣在蘇松太道任時。始而上海租界。高懸旗幟。出售彩票。臣與駐滬各領事往返商榷。以彩票非正經營業。將租界華界一律禁止。未幾而各省彩票踵興。均視上海爲淵藪。南市一帶。遂仍開設。而北市屬於租界。至今闐如。相形之下。可爲太息。是亦不可以已乎。此項彩票。在粵人之尤嗜賭者。方熟視而無睹。蓋其他賭類繁多。慾望更鉅。歷來商人承充彩票。滯銷告退。率以此。今日繳餉無多。臣方從事於裁汰冗濫。此項彩票

五萬餘元之餉項。欲裁則逕裁矣。但本省之彩票禁。而外省之彩票來。則不足以服粵民之心。而遏賭徒之餓。應請 敕下江西南湖北有彩票各省分。能由各督撫各自爲禁固甚善。否則亦勿聽商販到粵售銷。以妨禁令。至於澳門密運。或慮莠民屯徙。恃爲利市。然果中國力能自強。自可據理阻止。前督臣張樹聲奏摺內已剴切言之。譬之人家有好賭之子弟。而父兄防其避賭於鄰舍。乃招子弟歸而縱賭。且坐取其利焉。不待智者而知其不可也。臣擬截至本年冬底爲止。不准該賭館再發售宣統二年之彩票。以上兩宗指撥之餉。現計裁節水陸防營各糜費。當足相抵。無須另籌。此應尅期禁絕者二也。此外則惟緝捕經費。基鋪山票。爲賭餉之大宗。夫以番攤賭博風氣之壞。查照刑部議准廣東省各項賭博應加重治罪之文。番攤應居其首。蓋番攤賭博內尙分銀攤錢攤兩種。銀攤則必稍有身家。始預於其列。錢攤則傭工負販。自數文以至數十百文。皆得與賭。夫傭工負販。日獲此數文至數十百文。亦藉以餬口。一爲番攤所搜括。則立迫於饑寒。至迫於饑寒。則無所不爲矣。夫以從前部議加重治罪之賭博。一旦而變爲奏准承充餉項之賭博。於是通衢大道。高懸門帘。大書特書。有曰緝捕經費者。有曰海防經費者。而基鋪山票。及各項彩票。亦鱗次櫛比於闐闐之間。入其國而其教可知。是何景象乎。人亦有言。賭博所以鑄造盜賊。夫明知其爲鑄造盜賊。而故養成之。又適以害已。是不智也。抽收其餘利。而美其名曰緝捕經費。養成之而又捕戮之。是不仁也。不仁不智之

政策。未有可以立國者。除照前督臣奏請無論籌得何款。均應先儘賭餉撥抵外。仍通飭各屬。一邑籌抵有款。則禁一邑。一鄉籌抵有款。則禁一鄉。猶慮向無賭博之區。尙有蔓延之患。刻已分電各屬。何處有賭。何處無賭。一俟報告到齊。彙列一表。其向無賭博之處。卽分飭立案永遠不准設賭。前則以籌抵爲禁。此則兼以堵截爲禁。並一面與司道籌商的款。一面交咨議局會議辦法。蓋照諮議局定章第二十一條。應議決本省擔任義務之增加事件。是籌抵固屬於義務之增加。卽禁淨以後。仍恐偏僻州縣。或有官紳庇賭之事。今得地方議會。互相稽查。庶耳目較周。而邪慝不作。總之籌款多則多減賭餉。籌款少則少減賭餉。餉則遞減以至於無。賭則遞禁以至於絕。臣到任未久。於禁賭年限固不敢斷言。然熟籌審處。規劃亦止於此。此應分期禁絕者三也。凡此皆遵 旨籌辦之大概情形也。抑臣尤有進者。從前賭禁之弛。大率出於一時之權宜。今世變侵尋。粵省爲南洋門戶。九年籌辦。觀聽繫之。若留此稗政。而不亟思湔除。竊恐妨礙既多。而籌備無效。何以言之。如諮議局章程。營業不正。不得有選舉權。而粵省開賭者號稱賭商。且有貿然赴部註冊。自比於公司者。妨礙者一。地方自治。方在萌芽。他日實行。對於此項賭博。必應在驅除之列。粵省則凡此項賭徒。區分地段。招人承充。既至其地。則事屬餉需。官長亦不得阻止。奚論紳士。妨礙者二。巡警保衛治安。對於聚賭之徒。本應拘辦。粵省高張旂幟。巡警不得過問。而盜賊潛滋。妨礙者三。教育爲萬事之母。籌備清單。尤所

注重。然一鄉一邑。設一學校。不敵設一賭館。習染移之。子弟多暴。教育將何所施。妨礙者四。此特舉其顯而易見者。害不有不除。賭博之有百害而無一利。奚待臣言。而獨至廣東。則視爲大利之所在。腥羶相習。幾數十年。近則外侮內憂。人心悔禍。探諸輿論。亦羣覺其非。益佩先朝永遠裁革之諭。固已燭照幾先。而留造於我子孫黎民者甚大。臣愚以爲粵省賭禍既深。又迭蒙諭旨體察籌辦。血氣之倫。固已同聲感戴。臣所籌擬各項辦法。可否請特降諭旨。將闖姓卽榜卜餉。儘明年截止。以後毋論何項考試。不得再准商人承充彩票。則截至本年冬底爲止。並不准他省彩票到粵運銷。以壹禁令。至於澳門一隅。向爲賭徒嘯聚之所。應仿照禁烟辦法。據理阻止。使外人無所藉口。至於番攤卽緝捕經費。又基鋪山票承餉既鉅。應節節限制。凡無賭之區。不得再開賭博。有賭之區。仍著設法籌抵。並一面由臣與司道等。籌有的款。分別減禁。共勉爲立憲國人民。湔除既往。策勵將來。現適值諮議局開議之時。一經聖訓傳宣。在各議員同受國恩。自必倍形鼓舞。庶籌抵非託空言。而禁賭可覘實效。蘇民生於水火之中。啓之者先朝。而成之者我皇上也。微臣接篆至今。寢食傍徨。以爲治粵政策。不除弊則興利爲無方。不節流則開源爲易竭。粵省歲入。向時賭項爲大宗。經此次節節裁汰。則歲入頓減。而歲出尙日見其增。除將預計禁賭後財力不支。及出入相抵。現已歲虧甚鉅。另行奏報外。所有遵旨籌議賭餉各緣由。是否有當。理合恭摺具陳。伏乞皇上聖鑒訓示。謹奏。

奏劾粵省鐵路弊混亟宜整頓以裨路政摺

宣統元年十月

竊維公司定律。由股東公舉查賬人。每年查賬一次。出人款目。於開會時宣布。所以堅股東之信仰。而圖實業之擴充。法至善也。粵路創辦之始。股東踴躍爭先。義形於色。乃時逾三年。用款至七百餘萬元。成路只一百二十八里。尙有合興公司原築三十餘里在內。於是物議沸騰。徧於遐邇。經前督辦大臣大學士臣張之洞。電派駐粵分局總辦調補廣東高雷陽道王秉恩。會同總協理。監視清查。自本年三月初一起。至九月。始行竣事。茲據王秉恩稟稱。該公司歷年進出各賬。只有年結。具詳結算情形。股東概不與聞。卽每年二月。公舉查賬。亦屬循行故事。並未認真調查。此次公舉政界。實爲創例。自應從速確查。以慰股東之望。原擬自三月初一起。以兩月爲限。無如各賬目紛紜糾葛。出入收支。概無一定規則。又無蓋用公司關防之簿籍。一經簽詢。輒諉爲疏忽失察。縱無弊端。已屬非是。況顯然昭著。實已彰彰可考。不容諉卸。如收九十餘萬大元。並不註明大元。欲以角子相混。冀乾沒銀水四萬餘兩。又存放銀號之款。有五十餘萬。不計息銀。至如新泰厚元記銀水不符。簽詢。則認爲錯誤。滙豐銀行渣打銀行存款數目不符。簽詢。則認爲忘記補列。此皆彌縫未工。飾詞欺掩者也。其工程處歷年購買外洋物料單據。總工程師鄺孫謀久匿不交。迭催數日。始將洋單交出。查對尙未

齊全。第就其送閱各單。及合同來往信件。用中文譯出。詳細勾稽。擇其可疑之處。反覆駁詰。鄭孫謀答覆。或前後異詞。或避重就輕。或答非所問。或飾詞推諉。所有迭次答覆各詞。均經報紙登載。現又刷印成帙。分別布告。其中有重支浮支。合同單據關係鉅款。情節較重。故併將原單映出。以備檢閱。此外工程各弊。如擅自包工。及支償多於原約。暨開報工程。浮用泥石。井碼丈尺。並不將平水單同時發出。種種狡譎情形。亦已率同該委員等。詳細查明。佈告中外。綜核粵路接收已逾三年。總理已歷兩任。用款至七百四十餘萬元。成路祇一百二十八里。尚有合興公司原築三十餘里在內。平均牽算。每里應需成本銀五萬七千餘元。若將製造廠車頭車輛機器材料等銀。照商辦性質。攤入成本併計。約每里應需銀六萬五千餘元。且由迎嘴站至源潭一帶。尙未鋪墊碎石。而自上年冬間。源潭開車後。直至本年八月二十二日。始接展至港江口。計路一十餘里。內有叔伯塘路工及湖洞橋翼牆於三月間傾卸破壞。復停車修築十餘日。始再開行。至養路費。計自開車之日起。至宣統元年二月止。區區一百餘里之路。已用去銀十七萬餘元。任意支銷。並無預算規定。其購料詳單。及工程合約單簿。路線圖表。平水底單。迄未交出。無憑調查。該路開辦至今。三年之久。成路祇一百二十八里。現在二期股銀。已收至八九成之譜。而核計現存銀僅五百餘萬兩。尙有四百餘里之路未修。且韶州上平石一帶約百餘里。至今未測定路線。預籌路費。即使三期股銀如數收足。亦有不敷之慮。

況股票近來跌價甚鉅。二期股銀之所以勉及九成者。因上賴督辦大臣之維持。冀收桑榆之效也。若不及時整頓。三期股銀。將何所望。查浙江鐵路總理湯壽潛。不受薪水。費省工速。廣東寧陽鐵路總理陳宜禧。以美國工頭出身。回籍辦寧陽鐵路。月受薪水祇八十元。而歷三十五閱月。全路一百二十二里。卽已告成。每一華里。建築費及車輛材料等項。平均計算。成本僅二萬餘元。惟粵路總理梁誠。每月支薪銀二千兩。凡事悉聽董事局及總工程司所爲。把持播弄。不敢干預。釀成腐敗。不可收拾之局。迨查賬吃緊之時。梁誠並未核准辭退。亦未交待清楚。輒自啓程晉京。董事金莖。尤爲粵路之蠹。總工程司鄭孫謀。月支薪水港紙銀二千二百兩。此次匿單抗查。固屬罪無可逭。況在工三年。成路如此之少。糜費如此之多。作弊如此之甚。工程如此之草率延緩。前經股東指攻。臚陳罪狀。彼猶要結金莖。代爲洗刷。聯絡胡舜琴。爲之爪牙。且利用洋工程司。以掩其短。實屬貪劣無能。恭閱邸抄。郵傳部奏特參京奉汴洛鐵路貪劣各職員各摺。欽奉諭旨。革職。永不敘用。並著地方官驅逐回籍。不准逗留各等因。仰見。朝廷重視路政之至意。今粵路公司諸人。敗壞路事。核其情節。較諸京奉汴洛諸人。似有過之而無不及。應如何奏請從重懲處。並咨部維持。以裨路政。不勝屏營之至等情前來。事關粵東鐵路全局。既據澈查稟報。不敢墜於。上聞。惟該路前經奉。旨。歸郵傳部管理。應如何。敕部嚴加考核。整頓維持。俾公司用人行事。有所激揚。聖上自有權衡。非臣所敢

擅擬。

宣統元年十月 日。奉 硃批。著郵傳部切實查辦。欽此。

前摺附片

續據駐粵分局總辦高雷陽道王秉恩稟稱。本年七月初五日。據查賬委員等稟報。調查工程處批發貨物據。見有生利號十餘單。內簽洋字。筆畫不清。細驗所蓋懷如道坦四字圖章。與鄭工程司所用圖章。迥不相同。又無貨倉圖記。當即留心稽查。本日。竟有持生利偽單。又到公司工程處賬房領銀。經賬房周辛垣及管理黃兆雲。將人單扣留。詢明其人名梁財。即盧譽結。順德縣人。自去年十一月起。由工程賬房朱商賢。串同偽造號單領銀。共計先後十餘次。領得銀二千四百餘元分用。現鐵路公司已將梁財移送南海縣訊究。旋准該公司總理梁誠照會。稱朱商賢即董事朱南洲之姪。已於初九日。據朱南洲將朱商賢拘獲。解南海縣收訊。其騙領銀兩。及購獲朱商賢花紅。均由朱南洲湊足繳還等語。而股東鄭道鎔等。又以周辛垣許才之黃兆雲等三人。管理公司賬目。憑偽單發銀。歷九月之久。十餘次之多。均未比對覺察。求分別治罪。現正飭縣分別訊究。又八月二十三日准該公司協理咨呈。查戊申年六月二十五日。匯新北機司鎔驗費折實洋銀一千二百六十七元一毫。

零。再於六月二十九日滙聖得勃鎔驗費。折實洋銀一千二百七十五元四毫零。查此二次金鎊數目。係照時價折實。惟新北即聖得勃。係屬重支。經於本年四月三十日繙譯員朱琴叔收銀。如數交回賬房。照數收進。又戊申年十一月二十五日。滙獻蘭非鎔驗費。折實洋銀一千五百四十九元零。再於本年二月十七日。滙閑倫鎔驗費。折實洋銀一千四百九十九元零。查此二款金鎊數目。係照時價折算。惟獻蘭非即閑倫。係屬重支。經於五月間繙譯員朱琴叔取回萬國銀行如數銀單二張。交存賬房。查以上兩件。雖錯誤重支。而銀已填還。又查戊申年六月二十九日。滙喝式鎔驗費。洋銀四千五百一十六元。原單金鎊四百二十一鎊。鄭總工程師減去二十一鎊。祇滙四百鎊。復於二月十三日。滙閑色格鎔驗費。洋銀四千九百八十九元零。此係四百三十一鎊之數。喝式即閑色格。顯係重支。此皆繙譯員朱琴叔經手。自應傳問追補。查朱琴叔名崇德。係新會縣舉人。該總理派充公司繙譯員。由外務部委充哥美埠繙譯。調赴仰光。六月辭出公司。先已啓程。現查追朱琴叔家屬。如數補交歸還。俟交清再行具報等由。當查文內所稱重支三款。已經查賬員查出布告。惟現文皆稱朱琴叔經手。內有兩款。已如數交回。而核計支出日期。均歷數月之久。直至委員查出。始行繳回。其中自有情弊。似不能僅以收回了事。且尙有一款。計銀四千餘元之多。尤不能置身事外。又粵省各報。載有頭段支應員朱培林。係總理梁誠兒女姻親。現因梁誠辭職。有人指揭朱培林虧去公款一

萬三千餘兩。公司派人檢查數目。實有其事。朱培林即逃去等語。據股東共濟會鄭道鎔等函請澈查。並稱各段支應員衛章甫黃際唐鄺君質等。亦有虧空。又支應員沈伯銘前虧之款。尙未填還。請一併澈查等由前來。查公司內虧空重支各弊。久已嘖有繁言。現因委員查賬。大致皆已彌縫無迹。乃朱琴叔朱培林兩人。未克填補。致被指報。似應按照商律。嚴予處罰。庶足以儆效尤而維路款。應請咨明外務部。飭調朱琴叔回粵。清理賠繳。一面責成粵路公司。查明朱培林等虧空何款。飭緝嚴追究辦。再本年閏二月初二日。該公司總理梁誠電督辦大臣及郵傳部。內稱黃埔添購屯積地價。約銀四十餘萬兩。當據股東鄧植槐堂等函告。查購地局三年之內。並無此數支出。請將該處地方契約實調驗等語。亦經飭行查賬委員。查取稟覆。隨訪聞該處地價。實無如此之多。亦無如許之地。可以購買。公司諸同人因築路成本費太鉅。恐被指摘。故將成本費撥入購地價內。以爲掩飾之計。俾期符合原電每中里築費約二萬元之語。實則並無此地可以購買。賬內亦未支有此項數目。任意虛掩蒙混。即此可概。至安徽候補知府周麟述。充公司購地員。所購之地。聞價銀尙多未經清交。且有不實不盡。人言嘖嘖。現飭將公司原日購買地畝價銀冊。全行刷印。發各業主自行取閱。如有謬輒未清。及數目不符者。即可自向清理。或稟地方官查明究追。又訪聞二期股銀有虛收八十萬之事。經飭查賬員留心確查。隨據查明收支所支數。有交代滬分局交各善堂股銀三十八萬六千

餘兩。又支各善堂兩條未對數銀一十三萬八千餘兩。又支佛港未滙到股銀三十三萬二千兩。以上各款。皆未聲明。係交某善堂銀若干。及佛山香港上海某字號。當經簽出詢問。據其答覆。詞語極爲含糊。未盡吻合。訪聞此款係金葵周麟述梁玉堂郭道之等。捏報入收。故重行支出。並無各處收條。誠不知是何居心。現在此款業已開支。若其久無著落。則前期股銀。又少去八十餘萬。亦應嚴飭該公司。迅速查明。從實布告。以釋羣疑等情前來。查商辦公司。全賴出入賬目絲毫不苟。方足以昭大信。今粵路公司種種弊混。無異監守自盜。應如何從嚴懲處。並亟施補救。理合附片具陳。伏乞聖鑒。敕部併案嚴核施行。

奏請嚴禁緝匪花紅永遠裁革摺

宣統元年十一月

奏爲嚴禁廣東緝匪花紅。請旨永遠裁革。以蘇民困而清吏治。恭摺仰祈聖鑒事。竊維政者正也。苟在上之不欲。雖賞之不竊。廣東向以多盜聞。豈盡民之無良。抑亦立法之不善。有以致之也。臣下車伊始。卽聞廣東有緝匪花紅一事。旣而詳詢僚屬。證之案卷。乃知花紅者卽緝匪之賞格。他省多取之官。而廣東獨取之民。名爲因緝匪而給以花紅。實則因有花紅而反以縱匪。作法於弊。其流毒蓋如此。恭讀光緒八年三月間諭旨。有人奏廣東潮州鎮總兵方耀創立花紅名目。勒捐富戶。

半歸私橐。著裕寬確查具奏等因。欽此。是廣東花紅之裨政。早在先朝睿慮之中。查方耀由總兵歷官水師提督。號稱武健。綜其生平。治匪最久。殺戮亦頗多。匪風亦因之稍戢。尙不至因有花紅而故意縱匪。然其法則固弊之甚焉者也。方耀歿後。弊愈不可究詰矣。前督臣陶模檄各屬文有云。廣東各屬。往往以匪已在逃。勒繳花紅了事。地方官於既繳花紅之後。遂置匪於不問。匪族亦以遵繳花紅。遂可藉免交匪。其謹慎者。不過以此塞責。其不肖者。更將緣以爲奸。始僅責成匪之父兄。繼遂推至匪之親屬。甚者及於疏族祖祠。眞匪飽劫掠之資。平民受追呼之慘。而地方官之視追繳花紅。更重於勒交匪犯。痛哉言乎。以臣所聞。其流毒尙更有可悲可駭者。吾國戶籍法未定。父子兄弟一家之財產。皆公共之財產也。一家之中。有一人爲匪。卽籍沒其一家之財產。於是其父兄子弟。無可倖免。亦有迫而爲匪。是以一匪之牽連。而驅多數人於爲匪之路也。可悲駭者一。其或父兄子弟財產之不足。則更鬻及匪之妻子。夫匪誠不義。其妻豈盡不貞。匪誠不慈。其子豈盡不孝。徒以追繳花紅之故。而至於鬻妻賣子。且非特匪之妻子也。並有累及親屬疏族。而亦鬻妻賣子。以償花紅之費者矣。可悲駭者二。祠產亦一族公共物也。祖宗雖賢。亦不能禁其子孫無一人之不肖。以緝匪之故。而鬻割其祠產以爲花紅。生者無以存。死者亦將餒矣。前明九族連坐之慘。尙不至此。可悲駭者三。如果有花紅而竟能緝匪。或匪風因之稍戢。猶可說也。十餘年來。廣東之盜風如故。廣東之花紅

亦如故。積而久之。緝匪者之心目中。祇知有花紅而不知有匪。誠有如前督臣陶模所言者。是花紅之無益於緝匪。適以懈緝匪之責。而長地方象匪之風。且使無所控告之民。強者散四方。弱者轉溝壑。立法之不愼。上背朝廷罰鍰之意。下益鄉里魚肉之資。此弊不除。非特不可維新。抑亦不能守舊。可長太息也。近年以來。此項花紅。已提存省城官錢號。緝獲有匪。隨時由水師提臣行文支取。以免各屬官紳隱吞之弊。辦理亦頗具苦心。然訪聞省外營縣。習染相仍。尙有藉口於花紅名目。以自飽其欲壑者。正本清源。非一律永遠革除不可。臣迭與水師提督晤商。如從前懸有花紅。俟獲正匪。仍按格給賞。其匪名賞格。須豫爲宣布。通飭榜示周知。屆時緝獲。咨會給領外。此後應緝之匪。除匪贓應照例追繳入官。其餘不得分文勒派匪之親屬。以絕禍累。水師提督於粵省情形。向稱熟悉。有見於財政困難。取之公家。深虞不給。臣與一再討論。百害必除。寧由官家切實撙節。另儲常年款項。專爲緝匪給賞之用。總不得逾萬兩之數。其著匪懸賞較巨者。則另行籌撥。水師提臣亦深以爲然。此後文武衙門。如有私收匪族花紅者。概以贓論。嚴加治罪。以冀副朝廷軫念痼瘼。整飭官方之至意。再廣東械鬪罰款。弊端大略相同。前欽奉諭旨。實力整頓。以除積弊。而安善良等因。欽遵轉行在案。惟此項緝匪花紅。爲原奏所未及。臣責任兼圻。於民生疾苦。不能不先去其已甚。緝匪花紅之舉。相沿數十年。收款當數百萬。不知戕幾許人之性命。破幾許人之財產。而後得此。卒之花紅未

嘗一日減。而匪亦未嘗一日無。此何爲者。臣見聞既確。用敢毅然決然。不憚公家歲增此巨萬之款。爲民間除無窮之毒害。然後嚴定緝匪之考成。與婪索花紅之處分。信賞必罰。除暴安良。道不外是。所有嚴禁廣東緝匪花紅。請永遠裁革各緣由。芻蕘之見。是否有當。理合恭摺具奏。伏乞 皇上聖鑒訓示。謹 奏。

宣統元年十一月二十七日。奉 硃批。著照所請。該部知道。欽此。

電陳軍機處代奏改良粵省鹽務籌抵賭餉摺

宣統元年十二月二十九日

北京軍機處王大臣鈞鑒。洪密粵省賭餉之害。迭奉廷寄飭查。經前督張人駿奏陳在先。樹勳奏覆於後。除彩票闡姓。先限期禁絕。其番攤山票兩項。爲數較鉅。餉需所關。必籌有的款。方可一切禁絕。均經奉 旨照准。欽遵在案。樹勳統籌粵省財政。各項併計。將虧至一千三百餘萬兩。業另摺奏陳。是賭餉一層。非別籌大宗款項。斷難有濟。因查粵鹽額銷之數。歷屆遞加。現計歲入銀三百三十餘萬。視前數年。已覺增多。然調查省垣城關各屬。私銷卽已充斥。省外可知。揆厥由來。粵省濱海。地甚縣長。汙港紛歧。防緝非易。鹽戶運商。諸多弊混。私鹽之輸灌。日見其多。官鹽之分配。尙虞不足。坐此不改。或僅爲支節之變更。於鹽務終無起色。加以各項規費。歲糜不貲。暗耗明銷。埒於正課。今擬改

歸商辦。照章領取旗照。購運配銷。惟嚴杜洋鹽入口。並預定相當之價。毋俾居奇。原有出納正課。仍筭之於運司。並淨除各項規費。以清鹽蠹。商人始尙躊躇。迭經諭以大義。以禁賭爲地方除害。應勉爲其難。可望就範。如能每年繳銀一千萬兩。則除運司原收額銀外。其餘即可抵作賭餉。並酌補虧短之用。刻正飭商籌議。期在必行。茲事體大。而不易之宗旨。一曰化私爲公。以裨鹽政。二曰以公濟公。以抵賭餉。三曰兼顧民食。不令鹽價較從前爲過昂。但圖始爲難。在深明大局者。固樂於贊成。而自便私圖者。亦故存反對。如窟穴鹽務中人。則不願改辦。窟穴賭館中人。則不願禁賭。其倚賴鹽規賭費之人。亦羣焉附和之。且時時責官長以一律禁賭。而又不願官長設法籌抵。此種議論。實與破壞無異。樹勳前陳禁賭摺內。卽請明發諭旨。以示事在必行之意。今既擬以改良鹽務爲籌抵賭餉之舉。以應興之利。除應革之弊。實於地方大有裨益。謹乞代奏。請旨飭下度支部農工商部。先行立案。以堅承辦者之心。樹勳仍隨時督飭。俾不爲浮議所惑。俟有成議。再據實奏聞。乞先代奏。樹勳叩。鑒印。

軍機處奉旨。袁樹勳電奏改良鹽務籌抵賭餉一摺。該部知道。

奏陳懲治廣東械鬪辦法摺

宣統二年五月

粵東民俗強悍。械鬪之風。甲於天下。匪眦細故。動輒尋仇。招雇鬪匪。購置槍械。疊連禍結。殺掠相尋。甚至蔓延數十村。糾纏數十載。擄掠生口。發掘墳墓。田園荒廢。家室流離。慘酷兇殘。殆無人理。其主謀者。多鄉族管理祖嘗之人。藉鬪開銷。從中漁利。幫鬪之匪。事不干己。肆行焚掠。惠州府屬並有紅黑旗匪徒。專以幫鬪爲事。鬪釁一開。聞風自至。往往本村已知悔禍。而幫鬪者未鑒所欲。竟至欲罷不能。地方文武官馳往彈壓。理喻則違抗不遵。勢禁則苦於兵力單薄。迨稟請派撥營隊。而鬪禍已不可收拾矣。已故大學士臣張之洞。前在兩廣總督任內。以械鬪定例尙輕。奏請照天津鍋匪辦理。奉旨交部議准。凡僱募匪徒。殺人放火。擄生劫財。兇暴昭著者。不分首從。一律就地正法。迄今二十餘年。此風未能止息。推求其故。蓋因鬪案多以罰款賠償了事。並未深究主謀。嚴懲幫鬪。以致各鄉無所顧忌。近如番禺縣之橫沙茅崗。及石牌沈村等鄉。同時五鬪。營縣前往彈壓。膽敢開槍向官兵轟擊。順德所屬之南浦霞村兩鄉械鬪。甚至傷斃弁勇。兇橫若此。非嚴行懲創。貽患何可勝言。況從前所謂鬪匪。尙不過鹽梟盜賊。濁迹其中。近年情形。迥非昔比。三點會之外。又有小刀會劍仔會諸名目。醜類繁多。遇事麇集。並有革黨到處煽誘。聯絡一氣。其陰謀詭計。防不勝防。萬一借械鬪爲名。乘機蠢動。所關尤非淺鮮。臣與在省司道妥籌辦法。據廣東按察使趙瀆彥會同營務處司道詳稱。擬分別治標治本兩法。所謂治標者。當場嚴懲鬪匪。不論本村外村之人。凡持槍械在場鬪殺。卽

屬土匪。如官到村。仍敢羈集不散。應由地方文武察看情形。何造不遵彈壓。卽准官兵向何造開槍。格殺者照律勿論。其止鬪之鄉。及僅圖自衛。並非有心逞兇者。仍不准輕於開槍。以示區別。至主謀糾鬪之人。實爲罪魁。地方官查辦鬪案。必責令交兇。不知兩造對壘之時。火器連轟。本不能知何人致斃何人。是勒交只屬具文。否亦不過賄買頂兇而已。應責成地方官。嗣後嚴究主謀。拿獲到案。無論能否交兇。審實卽按例擬抵。使知償命之苦。罪有所歸。鄉族無主持之人。聞風自可斂戢。其槍械嚴行追繳。不准稍有隱匿。如敢抗違。准該文武官督兵進村。按戶搜檢。除槍械外。不准擅動民間一草一木。違者以軍法從事。此治標之法也。所謂治本者。州縣爲親民之官。聽斷者宜勤慎。粵民雖悍。其械鬪多因尋常細故。或爭田水。或爭墳山。果能裁判公平。遇事速結。何致釀成鬪釁。間有橫蠻鄉族。並不稟官。恃強逞忿。然當聚謀未定之時。聞信卽往解散。保全必多。應通飭各州縣。嗣後倘有因控案久懸不結。致成鬪案。或聞報不速往查辦。任意延玩。一味敷衍搪塞者。卽由司處查明。詳請嚴參。以儆玩泄。至鬪鄉祠產。前督臣張之洞原奏查封入官。益以一切鬪費。皆取之祖嘗。必使其無可開銷。則此風不禁自絕。臣前於禁革花紅案內奏明。將查封祠產一律禁革。係就廣東緝匪之弊言之。與查封鬪產不同。擬嗣後互鬪及幫鬪鄉族。均查明祖祠嘗產。除酌留祭饗之需外。其餘悉數提出。爲舉辦該鄉小學堂及工藝廠之用。以其祖若宗所遺之產。還以教養其子孫。地方官倘有侵漁

產價者。卽行詳參。此治本之法也。

奏陳中央集權宜先有責任政府及監察機關摺

宣統二年五月

奏爲時局艱危。敬抒管見。恭摺仰祈 聖鑒事。竊臣自牧令起家。蒙 先朝知遇之隆。擢任監司。洊膺疆寄。其間躬所親歷。內政外交。諸大端。常以能見諸實行。不遠於情事爲趨向之鵠。自奉憲政籌備之 詔。兩年以來。核實進行。事之應辦而無待遲回者。則計日程功。而惟恐不及。事雖應辦。而無窒礙者。則時有獻替。而未敢少阿。凡應興革各事宜。前經先後臚陳。 聖明在上。或曲予優容。或 敕交部議。誠如 諭旨。內外相維。庶政皆然。薄海臣民。同深欽仰。顧臣有不能已於言者。則最新之學說。所謂中央集權是也。夫中央者對四方而言也。中央無權。則四方何所附屬。集之誠是也。然四方無權。中央亦將孤立。則集之亦必有道矣。稽之古訓。所謂四方風動之休。所謂推四海而準。動則必有發生之機。準則必有比差之率。其注重中央明矣。三代以上。封建諸侯。流弊至周。判爲十二。合爲七國。天子拱手於上。幾若贅旒。爲中央最無權之時代。秦廢封建。裂都會而爲郡邑。廢侯衛而爲守宰。自漢以後。相沿未改。雖其間設官分職。代有不同。唐臣柳宗元謂有叛國而無叛郡。有叛將而無叛州。在閉關時代。中央集權之明效。蓋如此也。今者時殊勢異。郡邑之制。固未少改。卽中央之

權亦未少替。以近事論。中興諸臣。身握疆符。一切兵權財權。雖力任籌畫之勞。支配之責。而盈虛酌劑。亦無事不受成於朝廷。用能內外一心。光著盛業。蓋權者稱量之物。物不可以畸輕畸重也。故權焉以平之。是集其權。而非集其所權之物也。以權任諸中央。以所權之物布濩於四方。無輕重不齊之患。百姓足君孰與不足。而於是天下太平矣。或者曰。今寰球大通。非曩時閉關之比。故一切政策。當集於中央。非空言集權所能救濟。是說也。臣尤疑之。各國造邦。制度不同。其地理習慣亦迥異。歐美疆土。號稱富強者。其幅員率視吾國二三行省。而吾國以二十二行省——之大。其間山川阻塞。未盡交通者。十而六七。督撫坐鎮一省。任事以後。非積歲月。尙不能周知情偽。而中央以最遼遠之觀察。欲縣斷於數千里之外。平時又未詳審調查。如各國社會。皆爲政府盡力。偶遣出外觀察。少僅兼旬。多或數月。非道聽卽臆斷。而自以爲得之矣。且各國之中央集權也。則尙有最要之政策焉。曰政府負責。惟政府能負責任。故一切籌畫支配。皆在政府。酌盈濟虛。亦在政府。而吾國則不然。歷年各省關繫國家行政經費。如海陸軍各項。無一非責之各省督撫。又地方偏災。或意外損失。並九年籌備種種新政各經費。無一非責之督撫。是中央集權而地方負責任也。天下事安有權不之屬。而能負責任者乎。僕夫失轡。則馬且奔踉。而立蹶矣。且臣尤有進者。各國政府負責任。而其事尤與議院相維繫。議院者所以監察政府。而使政府負完全之責任者也。蓋君天下者莫患乎肆亡等之欲。

如秦皇廢封。建置郡縣。其制則公。其心則私。故二世卽不能振。尙書所載民視民聽。周禮詢於國危。國遷。在昔聖君。亦以人民監察。爲鞏固其責任之必要。非自剝其權。實亦稍寬其責也。議院未立。則政府負無限之責任。而無所監察。揆時度勢。且猶不可。況不負責任哉。九年籌備清軍。旣以人民程度未及。而遲國會召集之期。則監察機關。尙未完備。爲目前政府計。欲集權亦必先自負責始。必自組織內閣始。然臣以爲卽使政府眞能負責任。以吾國之地理習慣。種種如彼其異。將來外省主管各官。咸直接於中央政府。督撫介居其間。威信皆無所施。已成贅旒之勢。若遽加裁撤。揆時度勢。似又有不能。是所剝削者。四方辦事之實權。而與爲凌替者。四方固有之責任。手足不完好。萬無能捍衛頭目之理。此大可慮亦大可危者。至於九年以後。召集國會。究能否實行監察。則尙非臣所敢知。諸也。臣又按督撫一職。當三代時之牧伯。漢時尙稱州牧。晉魏以還。有都督總管持節刺史經畧節度名稱。至前明始定名曰總督巡撫。我朝因之。而明定其職掌。爲統轄文武軍民。考察布按諸道。及府州縣官吏。以時舉劾而黜陟之。又兼督軍務。兼理糧餉。其職務爲至重。其用爲至專。誠以吾國幅員至廣。中央不能一一直接。則分寄耳目於督撫。是督撫者卽中央之代表也。督撫之賢不肖。則三載有考績之明文。臨時有進退之敕令。斷不慮其權重而自專也。今時事變遷。在中央欲統一機關。因而別謀組織。遂並前此督撫奉行之職務。亦削而去之。不爲駢枝拇指。卽無異十羊九牧。而內

外幾無負責任之人。又何以對眈眈環視者之協以謀我乎。方今學說朋與。人材競進。師其所長。以救我短。亦羣治進化所必需。然或陳義過高。或言論偏激。則亦有遠於情事。而轉受實禍者。前大學士臣曾國藩有云。言治術則莫若綜核名實。言學術則莫如取篤實踐履之士。物窮則變。救浮華者莫如質。又云。方今時事孔棘。追究厲階之生。何嘗不歸於發難者。彼豈實見天下之大計。當痛懲而廓清之哉。豈預知今日之變。實能自我收之哉。其言至爲沈痛。臣不敢謂今之嚶嚶於時者。無識大計。知時變之人。而發之。是否卽能收之。臣固未敢遽言。竊願 皇上用人行政。以綜覈名實爲先。取篤實踐履者。以救浮華之弊。而又參酌古今中外之情勢。爲新官制區分權限張本。須知事事應有一我在。是吸取。非盲從。是貫通。非附和。臣受恩深重。知而不言。益用疚忤。應否 敕下政務處憲政編查館核議。仰體內外相維之 諭旨。通盤籌畫。斟酌損益。以裨事實而救艱危之處。出自 聖裁。所有微臣敬陳管見各緣由。理合恭摺具陳。伏乞 皇上聖鑒訓示。謹 奏。

致上海領袖領事摘陳開濬黃浦爲難情形

光緒二十八年二月

敬啓者。黃浦開淤一事。既經各大國欽差暨我全權大臣畫諾。已半載有餘。其不容以一國私請。率

有更易明矣。我南洋劉官太保本樂贊成此舉。一律開通。既興商務。益睦邦交。一再致辯。又何爲者。第計利防害。中外同情。有益於人。必無損於我。有濟於商。必求無困於民。聞附約三十七款。係商會中數人之見。止願開通黃浦。不願我華民農田船隻。並不願各大國在滬地產業主。事出倉卒。亦何怪焉。各大臣欽差遽徇其請。我全權大臣亦遽徇各國大臣之請。匆匆列入附約。而本樂贊成者轉有所爲難矣。劉官太保蒞南洋十餘年。每遇交涉。事事和衷。從不膠執己見。此貴總領事所素悉。無待本道贅陳。今以黃浦開淤一節。甚至因而抱恙。因而求退。其故何也。以附約三十七款。竟似各大國不重開河。明明借開河攘此主權。劉官太保初非不願開河。因開河反失主權。設身以處。何以堪此。方北方戰時。拚身家性命。始能互保其地。迨和議既成。轉無自由保其主權。劉官太保謂不敢咎各大國。亦不能咎我全權大臣。惟深自咎前者之互保。有以利各國商民而適以害敵國商民。是以貴總領事函促派員愈急。劉官太保抱恙愈亟。求退亦愈亟。以無詞下對商民也。貴總領事洞悉沿浦一帶情形。平日和平中正。又爲本道夙所欽佩。劉官太保種種爲難心事。不能自白。而本道代白之。貴總領事無力擅改。固已。倘荷鑒及實情。會議詳達駐京貴國欽差。並達之貴政府。極力主持。俾劉官太保至所爲難之數端。商爲更改。不成。則貴總領事所以爲敵國之盛心。可告無憾矣。成則中外得其平。貴國之力。實貴總領事之惠也。不獨敵國沿浦農民及千百萬民船同承愷澤。長與浦水

俱深。卽劉官太保與本道之幸拜嘉貺。豈有量哉。茲者。至所爲難者八條。分別另摺開列。本道不才。未克爲劉官太保分憂。不得不向貴總領事饒舌。諒我罪我。未由自必。諸祈鑒復施行。順頌日祉。

計開實在爲難各節於左

一 第二條 管河道語。明攘主權。且與第一條修治河道局之宗旨。亦自相悖。

一 第三條 自製造局之下龍華港起。至揚子江中紅浮標處止。查洋輪出入。北自吳淞口。上泝法租界而止。其上爲中國南市。大號洋輪。向所不到。河之深淺。可無過問。民船聚泊。界限秩然。若由公局經修。則南市萬百千號大小民船。往來旋泊。從此窒礙。南市新成馬路。經費將從何出。且各國商輪。遠道來華。自法租界以下。至下海埠。綿亘十餘里。均爲租界碼頭。各有專歸。豈我土著商民船隻。不能留此一隅。得以自由。公法公理。商情民情。如此偏枯。不應亦不忍也。擬請自下游開起。上至法租界止。以上河道本深。卽再緩數十年不開。船隻尙可暢行。如必須一律開濬。當由道與稅務司。會同工局所延工程司。督同理船廳承辦。民船聚泊有地。南市經費有著。其開濬所需費由公局分撥。旣免辦法兩歧。且於原章無礙。

一 第四條 該局應任之員。查各國議員公董。例以費之多寡爲衡。中國旣須認籌一半之費。中國卽應坐派一半之員。

一第八條 所舉督辦。如不能專歸中國。亦應中外各舉一員。

一第十三條 過法租界或各租界各港。此外入河之各他港。自港口往上二英邁勒之遠。夫約日修治黃浦河道局。自應以黃浦爲限。斷方符約義。橫侵旁軼。直是修治內地河道局矣。約載之謂何。

一第十七條 所有浮燈浮標標燈等。及第二十二條上海引水一切事務。歷由稅務司督同理船廳經辦。數十年次第改良。一切妥協。從無遺誤。蓋理船廳本係著名出色之員。且情形久而益熟。如公局所辦。果屬能手。自必同此辦法。既聲明仍按一千八百五十八年中英津約第三十二款辦理。應請仍歸稅務司督同理船廳照舊經營。自無疑義。

一第二十八條 河工應用之地。二十九條河岸地段。今擬凡租界沿浦。及對過東岸漲灘。先由理船廳會同會丈局員。文明畝分。無論已占未占。有照時值繳價者。卽由道給印契管業。否則作爲官地。以後公局需用畝分價目。便易查核。如損及岸上農田。亦須照給時價。

一第三十條 租界地稅。兩岸地稅。非中國式樣船稅。查租界以外兩岸地主。半屬貧苦小民。所管之地。多係奇零片段。中國新法未盡講明。農民終歲作苦。勉以仰事俯蓄而不足。無端飭令加稅。天下無此人情。卽使分沾水利。各國亦無令中國內地加稅之權。況黃浦開深。於岸上農

田。並無所利。黃浦淤淺。滄海可以桑由。愚民無識。且有利於淺。不利於深者。強而稅之。怨咨之聲。啼號之聲。亦各國所不忍聞。應請除租界各地外。將兩岸議抽地稅。會議一律刪去。

以上名節。均有實在爲難之處。此外尤有慮者。附約開河各條。係侵越主權辦法。並無切實工程辦法。查租界之例。除工部局費外。不應有別樣稅項。以開河之故。忽增地稅。各國律法。小有異同。居留各商。意見參差。即使勉強輸納。一二年以後。或外國人。或中國人。萬一有拒阻輸納地稅之事。勢不能不停工待款。而中國歲認一半之巨帑。擲付浦江。虛糜豈不可惜。是以劉官太保前者函達貴總領事。必須各貴總領事能擔保各商。永遠輸納此項地稅。不至中輟。正可表見劉官太保深願贊成開河之本意。容敢代表。並乞察照。

駁覆銀行公會參贊比領事薛賠款用金函

光緒二十八年

啓者。新增賠款一節。本道既就約章保票證明。應照原載金價合銀之數。爲付足關平之實據。函致貴參贊。並承錄函呈請領銜大臣核示矣。久未得復。本道固以爲前函反復。理至明晰。各國大臣。應無異議。乃昨接來函。詳悉一是。始知各國大臣。仍執第六款。文載中國應付各國賠款屬金欠。應比較約內所指諸國金錢。按照海關市價計算之說。深用詫異。前函已詳者。茲不具論。請卽金欠言之。

向例之還款以金而賠款以銀者。各國用金。借我以金者。我亦以金還之。我國用銀。賠款固取諸我者也。故不以金而以銀。借款賠款之分。其辨甚明而理至公也。歷稽成案。莫不分別聲明。付金付銀。彼此從無爭執。此次新約。固賠款也。當日我全權大臣與各國全權大臣訂議時。文牘往來。一則曰賠款四百五十兆兩。再則曰賠款四百五十兆兩。約成之後。我大皇帝之所允許者。亦祇認爲賠款四百五十兆兩。天下臣民之所共聞者。亦祇知有賠款四百五十兆兩。蓋無論如何。但執賠款二字。已足爲付銀不付金之鐵券矣。各國大臣若曰中國賠款既須分年償清。則此款當作爲欠款。不知此賠款之欠款。非還款之欠款也。且我不已認息四釐乎。論賠款則祇可付銀。論欠款則我已認息。是又不足爲付金之據也。使當日議約之時。各國全權大臣與我全權大臣聲明。此款若一期內全數償清則已。若不能。則當如還款之例。以金訂入約內。宣佈天下。本道今日亦復何言。乃約文不獨絕未言及。方且斷斷於兆兩。斷斷於平色。則亦明知賠款無還金之例。而不能自舉其詞矣。今乃舍全約明顯易見之文。而執介乎疑似之間之一語。強本道以從。本道所不敢也。至如約內所指各國金錢。如德三馬克零五五英三先令各云云。不過當日索償時由金合銀之價。而不足爲還金之證。前函辦之明矣。毋待贅陳。此事我全權大臣與各國全權大臣議之。我中國大皇帝許之。本道奉命爲付款之員。何能違約以徇貴參贊之請也。空言往復。實不得已。惟貴參贊更詳察之。泐復。順頌日

社。

致駐滬日總領事小田切請查禁暗刀照會
光緒二十八年

爲照會事。照得本埠城廂內外租界流氓衆多。往往身藏利械。劫奪逞兇。業經本道通飭各巡防局。嚴加巡緝。隨時拏解。現據用洋傘戳傷行人之案數起。係尖利刺刀。裝入木柄。納洋傘之中。在正經商民。頗知自愛。決不購此違禁之物。一入匪類之手。便屬傷人之具。任意持行。明目張膽。即使巡勇見之。亦知爲傘而不疑其有刀。迨至地方偏僻之區。遇事生風。拔刀相向。令人防不勝防。愈爲得計。肆意橫行。貽害之烈。實甚於他項軍械。亟應設法究禁。以靖地方。此傘牌號。標明橫濱野田商店。自是貴國商人所造。業經面商。已荷允爲查禁。殊深感蒙。除函致稅務司隨時查禁。按照私運軍火辦理外。合再備文照會。並將洋傘送呈察驗。爲此照請貴總領事查照。切實禁約。仍望示復。足紉公誼。望切施行。須至照會者。右照會駐滬日總領事小田切。

致商業會議公所照會
光緒二十九年十二月

爲照會事。照得日俄兩國。失和構兵。中國守局外之例。業奉上諭。頒行中外。並蒙外務部擬訂條規。

通飭遵守。由道出示曉諭在案。上海爲通商總匯。富商巨賈。聚集如斯。誠恐不知禁令。或有糾合巨資。密地幫助戰國。以供軍需情事。相應抄錄示稿。備文照會。爲此照會貴董事。請煩查照。傳諭各商一體遵照。後開條規辦理。毋得故違。致干查究。望切施行。

致英美法德各領事照會

光緒二十九年十二月

爲照會事。照得俄日開戰。誠恐內地匪徒。造謠滋事。業奉督撫憲通飭文武各員。預爲布置。毋使滋生事端。務將各國妥爲保護。仍飭會商各國領事。勿令兵船駛入長江口內。以免人心惶惑。轉生事端。邊經本道先後會商貴總領事暨各國總領事。荷蒙會議。兪允長江各口。各國原有兵船駐泊者。仍舊一律留駐。此外不再添派入口。茲經電奉督撫憲復諭。深佩貴總領事暨各國領事敦睦之誼。飭再照會申明。除分別照會限。爲此照會貴領事查照。仍希照復備案。望切施行。江海關道。

致日本總領事照會

光緒二十九年十二月

爲照會事。照得此次日本與俄國開戰。我國應守局外之例。業經遵照南洋大臣電飭備文照會貴總領事。轉致水師兵官。不得將兵艦在中國沿海屬地並口內停泊採運及作爲戰爭等事在案。至

於兩國商船。非戰艦可比。既在局外之國往來貿易。我國自應一律保護以符公法。昨與貴總領事暨俄國總領事先後面商。兩國游弋師船。在揚子江口外及口內。彼此均不與商船侵犯。以免日後別生枝節。仰承一體照允。當經本道電奉南洋大臣復諭。深佩兩總領事睦交之誼。飭再照會聲明。除照會俄國總領事外。爲此照會貴總領事查照。仍希照復備案。望速施行。須至照會者。

致駐滬俄總領事照會

光緒三十年正月初五日

本道前經備文。請貴總領事限令貴國兵輪滿洲。於正月初五日下午五點鐘起。至初六日下午五點鐘止。二十四點鐘內。起碇開出中國管轄江海屬境之外。此係恪守中立之條規。毫無偏倚。定荷貴總領事原諒。轉致貴國兵輪船滿洲邊辦。惟究於何時駛出淞口。請煩查明見復。勿再推諉。以便本道照會日本總領事。立即轉致秋津洲兵船。一律遵照。限期駛出口外。以示公允而符條規。

電稟外務部文

光緒三十年正月初六日

俄兵輪滿洲。先由職道商令移泊江心。並查禁裝運軍需各情形。迭經電稟。昨晚日領事照會。日俄開仗。貴國外部頒行中立條規聲明。俄兵輪停浦未去。民心惶惑。日本暨各國商務有礙。與條規限

二十四點鐘退出者不符。本兵輪秋津洲爲防商務利益。被俄兵輪脅迫。本日進口。停張華濱。應俟俄兵輪滿洲起碇。向中國管轄外開去。經一晝夜。並於滿洲駛經張華濱之前。預行移泊吳淞長江上游。以示公允。而符條規。俄兵輪何日何時開去。廿四點鐘何時起算。預先知照等語。職道商之稅司。自應守定中立章程。會晤日領事。亦以俄兵輪宜速出行。遲恐生事。商之俄領事。以公使與外務部商定在先。必須請示後行。職道告以中立條規如此。未便違背。致日人有所藉口。回署後。即備文限該兵輪昨日五點鐘起。至本日下午五點鐘止出口。擬候接復照辦。即復日領事。轉促秋津洲駛赴長江上游暫泊。過廿四點鐘出江。以符條款。再日艦入口。恐俄兵輪滿洲萬一出口。該國商輪往來。慮遭不測。此亦實情。乞鈞部轉致俄使飭遵。

致日本總領事照會

光緒三十年正月二十一日

爲照會事。照得俄兵輪滿洲號拆卸軍火汽機一事。頃奉外務部電諭。商諸貴國駐京大臣。以俄兵船果能將礮位後膛槍枝子藥。並行船要緊機器拆卸。令該船不能行動。即可照辦。弁兵在船。亦無妨礙。已電責總領事飭速商辦。以便日本兵輪早日出口等因。除照會俄總領事。一面函致稅務司查照。將滿洲號礮位後膛槍枝子藥。並行船要緊機器拆卸起存。並將起存日期見示。即行轉請貴

國兵輪開出本國江海屬境外。相應備文照會。爲此照會貴總領事。請煩查照施行。須至照會者。正月廿一日。

覆日本總領事照會

光緒三十年正月

爲照復事。正月念二日接准來文。以俄兵輪滿洲拆卸礮位後膛槍枝子藥。並緊要機器。一切早經駐京公使與外務部商妥。俟各項禁件起存海關。由本總領事赴關察看。電請飭令在淞之本國兵輪開出口外。再查所開禁件內水電一項。未經列入。應一併起存等因。查此事先奉外務部電諭。卽經轉致稅務司照辦。旋准覆。謂關上無寬大之處。可以存儲汽機。請稟撥蚊船一隻。傍在新關對面備裝等語。隨又稟由南洋大臣電復。船隸李軍門。飭卽就近商辦。業已飛布去後。應俟蚊船派撥到滬。卽行裝駁。另行知照。茲准前因。除函致稅務司將水電一項一併起存外。相應照復。爲此照會貴總領事。請煩查照施行。須至照會者。

致商業會議公所照會

光緒三十年二月

爲照會事。光緒三十年正月初十日。准代理領袖比總領事薛照會。准本道照會。旋於是月三十號。

准英會審公廨來函。均以華洋控案。應用牌票及傳票。務先查明。然後出票。請照辦示復等因。今各領事議定。嗣後遇有案件。倘尚未查明確實。終不出牌票拘提華人。如被告確係緊要拘提。自當查明後再行出票。又各領事議妥。凡有尋常案件。控告華人。應出傳票。惟如有控案係錢債追款。爲數甚鉅。恐被告逃逸。應出牌票。照請查照等因到道。爲此照會貴公所。請煩查照施行。須至照會者。

致駐滬各國領事照會

光緒三十年

中國商民公司行棧旗式。擬有紅地黃月。月中加一青龍。以示識別一案。業經照繪旗式。分別呈報照會移行在案。嗣因招商局輪船。懸掛紅地黃月旗式。行用已久。未便紛更。而各公司均請自設旗號。復經由道與中國公正紳董。及平日考究商務者。詳加酌核。除招商局官督商辦者。已定有旗式。應毋庸議外。擬以前定之黃月中一龍者。爲商民個人事業尋常通用之旗。另定一黃月中二龍者。爲商民合衆公司事業特別之旗。凡經奏准。及稟定有案者。方准懸有。亦不得另立別樣旗式。由道稟奉南洋大臣。咨請外務部分咨照會。除將前兩種旗式。各繪四十分。呈請南洋大臣核咨。並分別照會移行外。合繪續定旗式。備文照會貴總領事。請煩查照。

致上海領袖領事並轉知公會照會

光緒三十年七月初十日

爲照會事。照得本道前准日本總領事小田切來文。本國外務大臣電飭。俄艦進滬既過二十四點鐘。中國須令立刻出口。如不願。須起卸一切軍器機器。停口內一定之地。以待戰畢。倘不能擇一而行。日本卽自認一適當手段。卽行辦結等因。當經本道將奉到外務部電諭。飭令收取軍器。並令俄弁兵等。出具不預戰事供狀。將該艇歸中國保護看管辦法各節。照會俄總領事。查一面照會貴總領事查照在案。嗣以俄總領事堅謂巡洋艦阿_少斯哥及滅雷艇格羅蘇華意。係爲修理損傷而來。例得進口。修竣出口。不允起除機械。本道因查外務部中立條規。確有准戰國師船修理損傷之例。然其工程只能以行抵最近口岸爲度。限期應聽地方官酌定。當卽函致新關稅務司。派員查驗估修。一再聲明。須按條規辦法。乃旬日以來。修理遷延。竣工無日。疊與俄總領事照會。往復籌商。始終未有一實的實作工日期。本道不得已。按照條規。酌定巡洋艦進塢多日。舵板將次修好。應限四十八鐘。修竣後二十四點鐘出口。魚雷艇已早逾俄國駐京大臣所請修理五日之期。不准再修。應限二十四點鐘出口。倘不出口。卽收取軍火機器。照會飭遵。乃俄總領事。疊次來文。不肯照辦。本道不得已。一面駁復。一面派萬翻譯親往面商。以今午雷艇出口之限已滿。應卽收取軍械。而俄總領事堅謂

兩船工程。尙未據工程師估定。未估定之前。本道不能預定期限。並謂機械亦不能收取。須各稟請政府核辦。殊不思我國中立條規。既定有由地方官酌定期限之語。則衡情定限。係本道自有之權。何庸瑣瑣稟瀆上憲。更何能以局外工程師所估爲憑。今俄總領事既不以本道辦法爲然。則明明以外務部所定之條規爲不然。而不欲受我之保護。有意破壞我之中立。將來設有人如俄總領事之意。以破壞我之中立。在俄國進口之師船。設有意外。固與我無涉。應由俄國擔其責任。而上海爲各國通商總匯。關係匪輕。倘有牽動。一切亦應由俄國擔負責任。除照會俄總領事查照外。本道查日俄戰事初起。卽聞貴國政府昌言。願保我國之中立。久深銘佩。而貴總領事又遇事主持公道。今值俄國師船。不肯遵守我之條規。不願受我之保護。有意破壞我之中立。本道不得不將此情節。詳細備文貴總領事。俾知上海將來。設有意外之事。均係俄國擔其責任。而與中國無涉。爲此照會。請煩查照。並希轉致公會。一體咨照施行。須至照會者。

致上海領袖領事照會

光緒三十年

爲照會事。本月接准俄總領事照會。接統帶在滬之本國水師提督文開。奉海部大臣阿親王札開。奉本國大皇帝上諭。巡洋艦奧斯科。卽阿斯科爾。滅魚雷艇格羅蘇。福意。卽革羅蘇華。均卽拆卸軍

器等因。奉此。現定於七月十四日晚七點鐘。該兩船一律下旗。從下旗之時起。該兩船即作爲卸去軍器。其守護之兵丁。卽行撤退。其修理工程。奉海部大臣札飭。仍續行照修。請轉致中國地方官。並會商卸去軍器之詳細辦法。至該兩船水手之一分。卽遣送回國。照滿洲船一律辦理等因。本總領事准此。相應照會貴道查照。速卽飭令。將該兩船設法保護。一切因自下旗及撤退守護兵丁之時起。所有看守該兩船及其責任。全屬於中國政府。並請貴道知照稅務司。與本總領事會商該兩船實行卸去軍器詳細辦法。本總領事現已電請政府訓條。一俟接到此項詳細辦法之訓示。卽可辦結等因。除函致稅務司派員前往俄船。妥爲起卸軍械機器外。查俄國艦艇。既遵照我外務部所定。逾限不出口。拆卸軍械機器。歸我保護。業已按照我國中立條款辦理。除照會日總領事英總領事外。合應照會貴領袖總領事。請煩查照。轉致領事公同一體施行。須至照會者。

覆致駐滬英總領事索犯歸案訊供照會

光緒三十年八月

爲照覆事。准來文內開。鬧天宮在租界挖人雙日成廢。較行劫尤重。公堂判永遠監禁。與治其死無異。尙有何從重究治耶等因。准此。查大清律法內載。凡以一應傷人之物。置人耳鼻內。及孔竅中。致篤疾者。如瞎兩目折兩肢之類。杖一百。流三千里。又載。強盜已行。但得財者。不分首從皆斬。又載。

俱發以重論各等語。今鬧天宮在川沙糾衆行劫。復逃匿上海租界滋事。膽大妄爲。實係愍不畏死之徒。衡以我國刑章。強搶得贓。例應處決。挖傷兩目。法止滿流。罪名輕重懸殊。是以應將該犯照律從重科斷。實非永遠監禁足以蔽辜。且兩國和約。又載有華人的犯罪由華官按華律懲治之條。本道之再三奉商不憚煩勞者。期於約章律法允協而已。應請貴總領事查照前文。仍將鬧天宮一犯。飭解本道衙門。發廳歸案訊供。按律懲辦。足紉公誼。

移覆江西派辦政事處與英美德領事辯論兵艦入湖演礮文

光緒三十年八月

准貴處移。洋務所案呈。光緒三十年八月十六日。奉署撫夏札開。光緒三十年八月初九日。承准欽差大臣辦理通商事務兩江督部堂魏咨開。據江西派辦政事處呈稱。南新二縣稟報。德兵輪發特難德。駛抵省河。未據前途各縣稟報。已飭查稟復等情。到本大臣。據此。查各國兵艦不能駛入內地。港河。迭經駁阻在案。此次德兵輪發特難德。違約駛抵省河。何以地方官並不隨時稟報。殊屬玩忽。應請貴部院飭令查明稟復。並通飭嗣後遇有各國兵輪駛入內港。務須隨時電稟。以憑核辦。茲據前情。相應咨請查照。轉飭遵辦施行等因。到本署院。承准此。查各國兵輪駛入內港地。前據呈報。當

經批飭行各該縣。先後稟復。均經批俟滬道與各領事辯論明晰照會至日。再行由處詳候核辦在案。承准前因。合就行處。即便查照。轉飭一體遵照辦理。仍移饒九道知照。並一面由處移催滬道。迅將各國兵輪違約駛入內港。速與各領事力爲辯論。一俟辯論明晰照會至日。卽行詳候核辦。毋稍宕延。切切此札。等因奉此。查此案前經飭據各該縣具稟復。並稟奉撫憲批示到處。均經移行。嗣因德兵輪迭次駛入鄱陽湖。發特難德更於七月兼旬之間。出入鄱陽湖數次。且云屏風山演礮。誠恐稍滋事端。關係非輕。而二十八年原詳。與正案無甚出入。業經本道遵照督憲前批。將兵輪歷次游弋鄱陽湖演礮。攔阻不從情形。並申明英約第五十二款意義。詳請撫憲。會同督憲。咨達外務部核辦在案。今奉前因。除移行外。移請查照。希卽迅與各領事辯論明晰。尅日見復等因。查各國兵輪。駛入內地。演礮游弋。前於本年四月間。英兵艦圖意趨赴鄱陽湖演礮。美兵艦威力路博赴潯游歷。曾奉前南洋大臣電飭商阻。由道照准英領事。允俟該國水師提督到滬轉致。美總領事函復。已轉致公使酌辦。當經由電稟復。至六月間。又有德國兵船發特難德。及物微賜。擬往洞庭鄱陽湖游弋演礮。由德總領事先期知照。稟奉兩湖兩江督憲。電飭商阻。經按約駁拒。旋接德總領事函。洞庭鄱陽湖。本國別國兵艦。常往游弋。領事不能函阻。今照華官先期照會之辦法。反有不允。以後德輪游弋。不便知照等語。又經駁復去後。旋接該領事函復。以此事已經漢口領事稟報駐京大臣。本總領事

不能插身事內。張官保魏制臺欲如何辦理。請逕咨商外務部可也。函復到道。當經申報兩湖兩江督憲鑒核在案。茲准前情。合函備文移復。

稟陳署南洋大臣周增改上海會審章程文

光緒三十一年五月

敬稟者。本年正月初九日。奉憲臺札。准外務部咨。准奧美德英俄荷韓比義日大西洋日本十二國駐京大臣聯銜照稱。上海會審公堂修改章程一事。中畧照錄原札。咨飭該關道逐條詳細核議。聲復。以憑商定等因。到本大臣。抄單札飭遵照咨飭。事理逐條詳細妥議稟咨。等因到道。奉此。遵查上海租界。設立公廨。派員會審中外錢債詞訟。一應交涉案件。同治七年。奉頒洋涇濱設官章程十條。辦法本極周密。如果中外實力奉行。原無流弊。乃外人往往不遵。委員亦復徇徇。以致定章幾同具文。現在既奉修改。即可趁此切實妥議。以期補救。然陳義太高。又慮多所扞格。難於就範。而事權所在。又未可再任侵奪。連日會商副律法官羅道貞意。就節略逐一考究。職道竊謂修改二字。指原章不盡妥善。或行有流弊而言。此次交議各節。係屬增補應辦事宜。祇應作為續增。不宜認為修改。免致原章應有主權。稍有損失。現商由羅道將原來各條。參酌約章。懲前毖後。分別可否。逐條登註。並於十一條之外。另添二條。作為續增。上海洋涇濱設官會審章程。持平立論。不著重筆。以期動聽。易

行。而原章亦可並行不悖。惟事關治權。未便再任侵損。如擬改之處。各國尙有異詞。務請大部力賜堅持。勿予刪改。大局幸甚。理合開具清摺。專肅稟復。仰祈察核轉咨。並求批示。

謹將奉行奧美等十二國照請修改上海會審公廳章程。引證舊章。參酌原議。逐條登註。另開各條。

第一條 (甲) 上海會審公堂。於所有詞訟案件。應立華文冊檔。將每案分註冊中。按次編號。凡收狀日期。兩造姓名。籍貫何國。控告何事。開審後所有按日堂斷堂諭。以及復訊上控訊辦各件。亦須一一註明。並將結案之堂諭。詳註冊中。(乙) 所有刑名案件。亦須照立華文冊檔。一切詳註各情。與上文同。(丙) 以上兩項冊檔。凡與本案確有關涉之人。皆許隨時查閱。

前件查原章所定會審委員權限。祇准發落枷杖以下罪名。如至徒流以上。應歸地方正印官照例審議解勘。原所以慎重庶獄。保我治權。惟外人近來擴張界內權力。靡所不至。每欲加重會審委員之權。以爲漸圖侵奪之地。今乙條特立刑名案件。未定限制。卽爲暗破原章限制發落枷杖以下罪名之計。此節若不抱定原章。與之堅爭。此後界內無論何項重案。皆非地方官所能過問。誠不僅有失治權已也。至委員審斷案件。及訪拿人犯。本須設立印簿。將如何拿人如何定案緣由。逐日記明。以便上司查考。今甲條詞訟案件。分立冊檔登註。以便稽查。核與原

章辦法相符。尙屬可允。惟近來公共租界開拓日廣。每日捕房解訊。及交涉會審之案日繁。檢查不易。若再連自理詞訟並列一冊。更屬混淆。自宜分立冊檔。以清界限。至冊檔許人隨時查閱一語。查原定設官章程第二條內載。如案情只係中國人並無洋人在內。卽聽中國委員自行訊斷。各國領事毋庸干預等語。此係照約辦理。現在約章未改。自應遵守。未便改議。況案中緊要公文。及未結之案。有須機密者。詎可任人查閱。惟結案之後。應將判詞。及已釋已辦人證姓名。隨時懸示。以期大衆週知。擬將本條三端。酌改如下。(甲)上海會審公堂。於捕房解訊。及會審交涉案件。應分立華文冊檔。將每案分註冊中。按次編號。凡收狀日期。兩造姓名籍貫。何國何人。控告何事。開審後所有按日堂斷堂諭。以及復訊上控訊辦各件。亦須一一註明。並將結案之堂諭。詳註冊中。(乙)所有會審同知權限。凡刑錢等案件。在枷杖以下及監禁五年以下各罪名。均准訊辦。分立冊檔同前。(丙)以上各項冊據。除捕房解訊及會審交涉兩項。凡與本案確有關係之人。皆許隨時查閱。其餘自理詞訟刑名案件。不在此例。惟案結後。應將判詞。及已釋已辦人證姓名。隨時懸示。以期大衆周知。

第二條 會審公堂所審各案。除中外會審官員商定有關風化之案。應行密訊外。其餘各案。均須任人公聽。

前件。光緒二十九年。上海拿辦革命黨鄒容等。並封蘇報館案內。曾奉外務部電知。駐京公使擬俟此案辦結。另訂善後章程等因。今此條所指。有關風化之案。應行密訊。似卽駐京公使另訂專章之意。擬請照行。

第三條 會審公堂應以實缺同知任爲正堂。凡控告洋涇濱北租界內無論何品之中國人員。均可一律審斷。又應有一二華員。任爲副堂。以便承辦正堂交審之案。其品位應不亞於候補同知。其委撤之權。均操之上海道。

前件。查大清律例內載。文職道府以上。武職副將以上。有犯公私罪名。應審訊者。仍照例題參。奉到諭旨。再行提訊。其餘各員。題參之日。審訊。又載。凡參革發審之案。查明被參之人。如係同知。游擊以下等官。遴委知府審理。如係道府副將等官。遴委道員審理。各等語。是有職人員。遇有應行提訊者。必須照例題參。且官階較大之道員。只能審判道府副將等官之事。道府副將以上。概不得問。然則同通州縣。更何能任意傳提審判乎。今各使欲以會廢權力。駕乎道府及問刑衙門之上。實屬無此辦法。且上海客官不少。內而尙書侍郎京堂。外而曾任督撫司道。以及奉差道府大員。倘照此而行。則凡居租界內之官員。無不人人自危。萬一有事。勢必大起衝突。回憶前年。有一英婦。自稱曾爲李文忠畫一小照。勒索巨款。英領事堅請公堂。出票提訊。李

季高京卿。幾費口舌磋磨。方能無事。前車之鑒。不能不加意防範。然顧名思義。靡員既以實缺。同知任之。則該靡一切傳提審判之權。當照中國官制。以撫民同知衙門應有之權力辦理。務使銜缺相當。權力相平。否則種種窒礙難行。擬請參以活筆。酌改如下。凡控告洋涇瀆租界內之中國人員。承審華員。准照本國官制應有之權力辦理。被控人員。亦准照例具訴。如應傳之人。內有體面之人。於傳票姓名之旁。註明准其暫保。邊繳保銀。免予管押。

第四條 (甲) 除通體關涉華人案件。其餘各案。均應有外國官員會審。此外國會審委員。應視各國商民照約應得之利權。由各國領事官分別委派。(乙) 中外堂官。如有意見不合。未能結案之處。應請上海道。及案內外國人之本國總領事官或領事官覆核。

前件。查同治七年原章第二條。若案情只係中國人。並無洋人在內。即聽中國委員自行訊斷。各國領事無庸干預。又咸豐八年通商稅則善後條約。附載兩國議約大臣照會。聲明彼此意見不合。各宜呈報上憲等語。今除通體關涉華人之案。餘由外國官員會審。如意見不合。請上海道及領事覆核。查與原章前案。大致均尚相符。除乙條照行外。甲條擬請改爲(甲)。除兩造均係華人。並未牽涉洋人案件外。其餘各案。均應有外國官員會審。此外國會審委員權限。應照烟臺約第二段辦理。並應視各國商民照約應得之利權。由各國領事官分別委派。

第五條 會審公堂牢獄。須照洋涇濱北租界工部局止疫章程辦理。並由該工部之醫官稽查。

前件。上海租界會訂之初定章程。聲明江河北關等處。不歸公局管轄。迨後美界西華德線路展拓之後。另訂虹口租界章程。亦載有天后宮廟。及出使大臣行轅等。均不歸工部局節制之語。所有會審公廳。爲中國辦公衙署。與江河北關出使行轅相同。所設牢獄。亦未便工部局干預。至止疫一事。雖係衛生美舉。惟西醫治法與華醫不同。華人體氣。亦與西人迥殊。往歲吳淞輪船驗疫。因西人治驗之法。均非華人所能任受。頗滋物議。今獄犯用西醫。雖只云稽查。未言醫法。但驗法亦非華人能堪。自應由公廳延用資深老練之華醫。自行辦理。所需經費。卽在該廳口口項下提用。擬改如下。 會審公堂牢獄。應做西法止疫。由該公堂自行延訂資深合格之華醫辦理。應需常年經費。由上海道指撥。

第六條 凡居住洋涇濱北租界內之華人。無論何案。經會審公堂提究傳訊。所出之提傳各票。應由領銜總領事畫押蓋印。方能施行。若被告係外國商民雇用者。其提票。並須由該東人之本國領事畫押蓋印。方能行提。

前件。雖爲原章所無。然十餘年來。各國領事相沿爲例。難以挽回。一切情形。已於附稟聲明。擬請照行。

第七條 凡詞訟刑名各案。如有外國會審官在座。兩造均可聘用律師。各律師先須呈明。已在駐滬本國領事署堂下邀准。方能在會審公堂充當律師。

前件。擬請酌改。開列於後。凡詞訟刑名各案。如有外國會審官在座。兩造均可聘用律師。惟各律師必須經其本國公堂允充律師。會審公堂方准充當。否則不准。

第八條 凡審訊案件。本案之中外堂官。如以爲律師不遵命令。即可暫禁其在本堂充當律師。其暫禁限期不出一個月。如經該律師之本國領事官允諾。則暫禁之限。可展至六個月。

前件擬請照行。

第九條 凡審訊案件。如照華例。並無成案可查。會審公堂應照商民相沿之法。公平斷讞。

前件。查中國承審衙門若無成案可查。應比相似之例辦理。如無例可比。即由承審官衡情酌斷。原文所謂商民相沿之法。照西法乎。抑華法乎。未免含混。既爲中國公堂。自宜比照中國商民通例酌斷。擬請改爲比照中國商民通例斟酌辦理。

第十條 凡原有之章程各條。與此項續增章程不相牴牾者。照舊施行。

前件。查公廨會審原章。中外官員如能實力奉行。界限本極清楚。牴牾句下。應改爲中外官員仍舊實力奉行。

擬增會審章程二條。一。會審公堂應添設□□□□。釐定妥善章程。一。自此次增定章程之後。除由原訂衙門會商修改外。中外官員均不准擅議更章。以上遵飭逐一查議。並添籌二條。是否有當。統候鈞裁。

覆克領袖總領事照會

光緒三十一年五月

查上海洋涇濱北租界地皮章程載明。凡在租界內之中國衙署。出使行轅。及天后宮等處。均劃出由華官自主。不歸工部局節制。是華官管理本國衙署。有獨立完全之主權。今工部局忽派巡捕看管會審公廨。不但侵奪主權。實屬藐視中國。中國與各國皆是和好之國。而工部局又爲寓居租界內各國商民代表人。竟行此憑凌欺藐之事。殊屬駭人聽聞。總而言之。此事最要關鍵。在租界內之中國衙署。照條約章程。工部局應否派捕看管。此節。本道查得。該工部局實在無權辦理。至該工部局董致領袖總領事函內所論各節。與此案應論之主義無涉。至會審二字義。應作何講解之處。煙臺條約中講解甚明。閱之便能自解。此事。該工部局既違和約。又背章程。輕藐本國國體。莫此爲甚。亟應備文照復貴領袖總領事。請煩查照前因。飭工部局將看守會審公廨之巡捕速行撤回。以存睦誼而固邦交。

咨出使日本大臣胡欽使文

光緒三十四年

爲咨行事。據署東昌府館陶縣縣令方鑿稟送。縣屬紳董汪心一等。接到上海由郵局寄來。留學日本山東同鄉會印送。轉禍爲福白話說帖四本。有礙礦務交涉。請設法查禁等情。到本部院。據此。查華德採礦貿易合同。於光緒二十五年。呈請勘辦五處礦務。其間屢議屢輟。迄未就緒。至三十三年結議時。經前任楊升院咨商外部。遵照核覆函電。將改訂合同簽押。並先後奏咨有案。其中挽救利權。已爲不少。此案事經七任。時閱十年。似此結束。已費盡心力。且當時礦政局與公司代表協商。有俟礦產於兩年限內勘畢。或於五處之中。擇留一二。餘俱作罷之議。現擬併在一處開採。其餘均可作罷。則較之前議。更有進步。在官家代謀之苦。本不願求諒於人。乃合同簽字。已及一年。勘礦之期。並未逾限。始而陵縣臨邑等處。張貼保礦會四言韻語。繼而卽墨等處。有捏造工人白話說帖。甚至以非理暴動之詞。煽惑鼓動。節經飭屬分別剴切諭禁在案。今日留學生又編有轉禍爲福白話說帖。雖無悖逆字樣。其爲未明此案情事則一。在諸生遠適異國。眷念故鄉。方託於忠愛之忱。以發爲憤激之語。但情事既有未符。則附和因愈失實。如該生僅云和平抵制。而內地之白話說帖。已有搶富戶仇官長之語。夏間更有託於保礦保路之名。昌言爲不穩妥之舉動。時值久旱祈雨。而妄思蠶

動者日紛紛矣。諸生所言之利未見其一。而害且百焉。此情事之未符者一也。且諸生亦自思和平抵制諸條能實行否。能有效否。本部院宦蘇最久。其地文物開通。似較東省爲早。然當時蘇紳議減滬寧鐵路借款。而附和者亦倡爲不與做工。不與經商。不坐滬寧火車諸說。而深識之士。卽知爲無效。以爲空言抵制。徒貽笑外人。蓋吾國教育既未普及。工商尤無團體。罷市罷工。徒資宵小搶攘之便。馴且釀爲交涉。至於不坐火車。更無其事。卽今之滬寧鐵路。其坐客之擁擠。且數倍於膠濟也。此情事之未符者二也。至於該生等所言集股辦法。言之亦甚易矣。不知外國開礦。往往罄無數之資財。前者仆。後者繼。然彼國礦學固已列入專門。而雄於資者。雖逕擲而不惜。故能卒厥厥功。吾國習爲礦師者尙少。尤狃於近利。不肯輕斥其資財。一由於知識之不完全。一由於辦事者之無信望。諸生所籌三吊五吊之辦法。卽號召十室之邑且不足。何論全省。聞各省留學生在東京開會認股。其認股之時。呼號羣集。唯恐其不多。而實繳者曾不及十之二三。其成效可知。此情事之未符者三也。諸生所持爲唯一之計劃。而不自知其闕於情事若此。又囂囂然曰廢合同廢合同。則試取近事爲證。津浦鐵路。蘇杭甬鐵路。從前皆草約也。何以皆不能作廢。粵漢鐵路。則合興公司有違背合同之處。卽非草約。亦可作廢。彼此相較。知非強懦優劣之不同。亦情事不侔爲之也。東省民智未開。致從前一切實業。皆棄置不辦。前如諸生說帖所云。惑於風水之爲害。實爲洞燭鄉情。迨外人履我堂奧。

復從而涎之。又不汲汲於根本之計。力圖自強。徒斷斷於五處七塊。而此外應興之實業。概未聞有實地之研究。是東隅已失。而桑榆之收。復無望也。張皇債事。外強中乾。皆爲取敗之道。本部院不忍沒諸生忠愛之忱。又不願諸生僅爲憤激之語。徒滋流弊。無裨事實。用特備文咨請貴大臣。傳諭山東留學同鄉會。是否印送上項白話說帖。務各平心研究。勿肆黨張。現在國難頻仍。海外聚嘯之徒。且刊布種種謠言。希圖煽惑。諸生有志求學。且立說僅止於開礦。尙非附和匪黨之比。但匿名書件。同干例禁。更望諸生勿輕效之也。爲此咨請貴大臣查照。傳諭宣布施行。須至咨者。

致憲政編查館電

光緒三十四年十一月十三日

憲政編查館鈞鑒。冬電敬遵。惟武舉一項。可否比照文七品武五品之例列入。舉人爲文武通稱。按之原章。亦不相背。武生仍不列入。以示限制。又參革人員。擬應留其出身。向例褫職者仍准重赴鹿鳴筵宴。爲參革不及出身之證。現在初辦選舉。應否稍寬資格。以資激勸。至削奪停止各項。仍從其嚴。以副朝廷精取慎擇之至意。統乞鈞裁電示。樹勳叩。覃。

致憲政編查館電

光緒三十四年十二月初六日

憲政編查館鈞鑒。據諮議局籌辦處詳稱。章程第三條。學貢生員得有選舉權。查學生獎勵定章。高等小學畢業。分別給予廩增附出身。是否與舊時一律。如其一律。則章程中學以上畢業得有選舉權之條爲無效。如不一律。則同生員名稱。同一係學識上之資格。錄舊而遺新。更足阻向學之心。細按條文。實無兼顧之理。東省高等小學。獎勵上項出身而又合年齡資格者。實繁有徒。應如何通融辦理之處。乞咨請示遵等情。謹據奉達。伏候鈞示。樹勳叩。魚。

致民政部電

宣統元年七月十一日

民政部鈞鑒。據地方自治籌辦處稟開。城鎮區域過廣地方。得分劃若干區。刻應設之區董。是否即在城鎮選舉董事時。同時選出。抑在選舉董事後另選。特許之代理人投票時。應將代理憑證呈驗。其憑證是否由作爲選民之人書立字據爲憑。抑別有給予憑證辦法。城鎮議事會議員。以二十名爲額。而粵省各廳州縣所治城廂地方。居民有僅一二萬者。其議員名數。是否仍照定額。抑以鄉議事會按照人口之數爲比例。遞爲減少。不論本籍京旗駐防或流寓。均爲城鎮鄉居民。而廣州駐防住居省城內西偏一帶。行政尙多區別。辦理選舉時。是否悉照定章。抑援前五條分區方法。暫行辦理等情。請爲電詢鈞部。特此奉達。即乞示覆。以便飭遵。樹勳。真。

致郵傳部電

宣統元年十月初三日

朔。粵漢路會股東紛擾情形。陳道望曾已電陳計達鈞覽。查粵漢鐵路開辦至今。弊竇叢生。爲天下詬病。現據王道秉恩揭。正咨請核辦。今股東紛爭選舉權。其病根由於到會股東。權限漫無限制。正本清源。非按照商律。參以他省選舉定章。剔除種種弊竇。則雖選舉總協理有人。徒滋股黨風潮。於事無濟。勳意請大部先覆該公司。展緩選舉日期。俟勳與司道等細加討論。明日將詳情電達後。再由大部酌辦。該路已奉旨爲大部管理。已往如彼。而現象又如此。整頓維持。不能不從根本上解決。先此奉布。餘續電。樹勳江。

致郵傳部電

宣統元年十月初四日

部鑒。洪密江電計達。月朔粵路股東紛擾情形。已由陳道望曾電陳在案。查粵漢鐵路弊竇叢生。現經粵路分局總辦王道秉恩澈查。均有確據。正擬另咨辦理。欲從根本上解決。非將從前積弊推理廓清。即使勉強選舉。亦恐終無寧歲。查股東約分兩派。其占股多者。有四大股東之目。公司中人。多其同類。小股東勢處不敵。惟公司中弊竇。既爲小股東所指摘。遂有共濟會之設。在小股東自以爲

救正。而大股東則目以爲反對。但大股東股多人少。小股東股少人多。其實股東到會。其權限皆漫無限制。以致風潮愈演愈劇。查欽定商律。股東會議酌定一人十股以上或二十股爲一議決之權。依此類推等語。故蘇浙鐵路各公司。定爲每交足百股滿五百元者。有一議決權。其不滿百股者。得聯合而成一議決權。共推一人到會。以示限制而免紛靡。其選舉權被選舉權。更視公司股份之多寡。遞加權數。深合商律類推之意。粵路股東誤於一股一議決權之語。於是每股僅五元。祇有交一二期僅洋一元者。亦廁足會場。計會議人之資格。視江浙加百倍不止。設使到會。亦無如許之廣場。其大謬病根。卽在於此。又江浙公司。其本人不到會而託他股東代表者。其代表之權。亦視股數遞減。或以兩權作一權。或以五權十權二十權作一權。卽本人股份較多。亦有至多不得過若干權之限制。蓋公司以權利公溥爲原則。不應任少數人把持。致激成水火。粵路則反是。大股本人股份權數已多。又加以展轉代表。權數更多。故未開會之先。卽知舉某人爲總協理。爲董事。卒至公司中皆爲其同黨。遂有今日之流弊。小股東自知權數不敵。乃租借他人股票。如某堂某記並無姓名者。卽冒稱己票到會。以冀多得當選之人。其實按照商律。股票均應填姓名籍貫。江浙公司。凡不更正姓名。仍稱某堂某記者。概不發入場券。先期登報聲明。亦將以杜弊混。粵路事漫無紀律。若不亟予更張。恐路未成而股款亦將不繼。該路既奉旨歸大部管理。似應正本清源。飭展緩選舉期三四箇

月。或派專員到粵。會同欽派之勸業道。及分局總辦王道。督同該公司。遵照商律。並採取江浙選章辦法。限制權數。以絕紛囑之禍根。並照章廣登各報。以示大部竭力整頓咸與維持之意。並一面俟王道稟揭到大部時。按照各節。嚴重主持。以維路政而保桑榆。大局幸甚。勳見聞既確。敢據實奉聞。乞鈞裁示覆。樹勳支。

致桂撫張中丞電

宣統元年十一月

日前廣西諮議局來電。以粵東賭商承充鹽餉。並以鹽價昂貴爲疑。當覆篠電。由尊處轉文。頃又接該局效電。仍以鹽價一層。粵垣如逾五分。西省必昂多一倍。貧民恐難負擔。越鹽且暗暢銷。請酌辦法等語。查西省鹽價。向視粵垣自必較昂。猶之湘省所食淮鹽。每觔需一百二三十文。弟係湘產。固所深知。湘省僻瘠。不下於桂。未聞因鹽貴而重困貧民。蓋湘人食鹽。歲費有限。稍有增加。不致過累。況現定粵鹽。將來至貴。不得過五分六釐。原係仿照從前已有之價。何以同一價。逾五分。從前可以負擔。而今因禁賭之故。反不能負擔乎。鹽課爲國家稅。本日又奉旨。疆臣會辦鹽政。所有粵省改良鹽務情形。自應分別奏咨。以期妥善。如遇兩省有牽連關係之事。確在諮議局範圍以內者。自應照局章辦理。乞轉飭知照。

覆桂撫張中丞電

宣統元年十一月

電悉。承商章程。須俟奏咨後宣布。連日正飭詳細確訂。至於鹽價不逾從前已有最昂之數。早經牌示。此事發起時。曾先電奏。奉旨該部知道。嗣又與部中往復電商。因事未大定。故未宣布。茲擬先將電奏發表。並抄送尊處。祈代宣布。並登報周知。

覆粵紳鄧華熙等書

宣統元年十一月

敬覆者。前奉惠函。本擬卽行裁答。以鹽事正在籌商。不敢以影響之詞。上瀾清聽。夫賭之爲禍。而矣。鹽法之改良。亦不容緩矣。承示五可慮。容有與事實未盡相符者。敢剖晰陳之。如云。鹽價恐漲至一百文。遠地或至二三百文等語。查粵鹽最貴時。以近數年爲比例。曾每觔至五分六釐左右。今擬定價。鹽缺價昂時。不得過五分六釐。尋常仍照市價。其熟鹽提鹽。加以人工者。仍照舊聽民間自定。是並無每斤漲至一二三百文之說也。可無慮一。又云。該商等有港澳私鹽公司。恐引洋鹽入口。致開交涉。而長漏卮等語。不知粵省鹽法之壞。卽在私鹽充斥。遍於城關。省外更無論。其糜費於規用。而無益於公帑者。且比比也。此次改良。用意在化私爲公。故能驟增巨餉。並須由殷實商號環保。加具

不得私運洋鹽切結。更有緝私巡輪。照常防緝。可無慮者二。又云。該商設輪緝私。勒限加價。恐絕漁戶生路等語。勒限加價之說。並無其事。已明言之矣。漁戶照常生業。亦無恐慌之可言。此無慮者三。又云。水陸緝私。必領大幫軍火。恐有串匪走稅情事。查此後即改商辦。其緝私巡輪管帶。必由商公舉。而官爲遴委。是操縱仍在官。但不干預其運銷範圍耳。可無慮者四。又云。該商等均賭博無賴。恐非殷實。致蹈包釐覆轍。有礙餉源等語。查此次承辦各商。多半有舊商在內。惟承餉既巨。不能不添入新商。報紙傳聞。頗有失實。況此次須先繳按餉二百萬。原所以備不虞。與包釐辦法。截然不同。可無慮者五。以上各節。公等所慮。亦即鄙人累日所熟籌者。正在商之大部。並飭商妥擬章程。如果實行。則取之民間者無幾。而一旦遏絕賭禍。使各餉有著。較之空言籌抵。實不啻天淵。至於粵省鹽價。本視他省爲廉。鄙人原籍湘南。所食淮鹽。每斤至一百二三十文。湘中之醜瘠。尙不以爲苦。況粵省財力。究饒於湘。而籌議之始。即預擬至貴不得過若干之價。以免藉口。而顧民食。似可告無罪於邦人君子矣。公等熱心桑梓。竭誠相告。至所願聞。鄙人責任地方。利害兼權。更無旁貸。惟乞協力維持。以成盛舉。至於少數不便之人。亦應開誠布公。犧牲以從多數。非特粵省幸福已也。

致度支部農工商部電

宣統二年正月

〔上略〕前奉上月大部庚電。承示鹽務商辦。必須有確實見地。始終擔負。如有十分把握。將詳章奏咨核辦等語。查鹽務商辦利於公。利於私。但不利於私橐自肥之官。及視爲世產之鹽商。承詢果用何法辦此。蓋卽去其私橐私產而公之。卽此已爲數不資。現在羣疑漸釋。且經敵處將預爲酌定五分六釐鹽價。及預收票銀二百萬兩按餉。次第牌示。咸知確有把握。並無紛擾。且官場一切仍舊任保護之責。而不侵銷運之權。出納操縱。仍由官爲之主。與修明法令之諭旨。亦屬相符。已於上月二十七日。詳晰奏咨。並將章程及職商姓名分咨鈞處。其按餉二百萬兩。分存銀號。聲明俟奏准開辦時。再行提用。並加具鋪戶保結。以備不虞。亦經該銀號等申報在案。至局外議論不切事情之處。奏稿均已詳敘。總之不改商辦。則鹽餉無由驟增。不整頓鹽務。則賭餉何從酬抵。此事計畫頗苦。疑謗相隨。目前議論已平。而主張官辦之人。尙不無保全私橐之見。樹勳惟有開誠布公。破除情面。尤賴鈞處提倡維持。以期有濟。昔陶文毅改辦淮鹽。丁文誠改辦川鹽。當時曲折困難。羣議沸騰。亦實仗廟謨獨斷。內外和衷。始收效果。樹勳自慚庸劣。苟非確有把握。亦何敢輕於擔負。乞俟奏咨到後。迅賜核議。請旨施行。先布大概。統請維持爲叩。〔下略〕

覆民政部電 宣統二年三月初二日

民政部鈞鑒。鑒電悉。頃據廣東地方自治籌辦處詳稱。本處籌辦廣東城鎮鄉地方自治期限清單。悉遵照民政部逐年籌備未盡事宜清單辦理。分別繁盛城鎮。中等城鎮。未經指定之其餘各城鎮。近城各鄉。偏僻各鄉。計分伍次。逐漸進行。粵省雖屬濱海陬區。而各廳州縣亦多交通不便之處。計自上年籌辦。以迄今茲。文電交馳。辦理已有頭緒。茲據全省各屬稟報。擬定爲繁盛之城者十一處。繁盛之鎮者三十一處。合計繁盛城鎮共四十二處。現已飭令設立事務科。趕速籌辦。凡經民政部核定各繁盛城鎮地方議事會董事會。務限於八月初一日一律成立。以免延誤。所有據定各繁盛城鎮地方。理合造具清冊。詳請電咨。指定核覆。俾得遵照辦理等情前來。查冊開擬定繁盛城地方三十一處。爲南海。番禺。順德。新會。香山。三水。歸善。海陽。潮陽。澄海。石城各縣城。擬定繁盛鎮地方三十一處。屬南海者五。曰九江堡。曰大瀝堡。曰官山。曰佛山。曰沙頭堡。屬番禺縣者一。曰河南。屬順德縣者一。曰石龍。屬香山縣者三。曰隆都。曰小欖。曰黃梁都。屬三水縣者一。曰四堡。屬增城縣者一。曰新塘。屬新寧縣者二。曰屋昌。曰公益。屬新安縣者二。曰深圳。曰黃松岡。屬海陽縣者三。曰龍溪。曰南桂。曰上蒲。屬潮陽縣者三。曰東三區。曰西二區。曰西三區。屬澄海縣者二。曰汕頭。曰蘇南。屬饒平縣者一。曰黃岡。屬石城縣者四。曰安鋪。曰石嶺。曰塞篷。曰青岫。屬英德縣者一。曰含洸。以上除原冊另咨外。合先據詳電達。以備覆加核定。彙案奏報。樹勳。冬。

致憲政編查館民政部電 宣統二年三月十六日

憲政編查館民政部鈞鑒。據地方自治籌辦處稟稱。查鈞館宣統元年六月魚日覆川省電詢自治章程正稅公益捐。與十一月眞日覆選舉納稅多額議員章程正稅公益捐。兩則似稍有異。如覆自治章程正稅云。由人民自行繳納官府。並非作爲股本及他項之用。均謂爲租稅。覆選舉納稅多額議員章程。則云鹽茶課釐油酒糖捐百貨釐稅均應作正稅各等語。查解釋自治正稅。係指直接稅。若鹽茶油酒糖捐。其出產或製造之人。自行繳納正稅者。固屬直接稅。至於展轉販運。作爲股本。似應於間接稅內。況粵省各捐。名目繁夥。有總商包抽。復分商承攬者。尤間接中之間接。應如何明示界說。或指定各正稅名目。以示標準。至公益捐或分附捐特捐名目。自是強制徵收性質。然如自治範圍內款有隨意樂輸二元以上。非按年繳納者。可否准作公益捐。以上各疑義。均擬電請鈞部核定。示遵等語前來。謹據奉達。乞賜覆。樹勳。諫。

致憲政編查館電 宣統二年四月初二日

憲政編查館鈞鑒。前月諫日。電請鈞館解釋地方自治章程內稅捐辦法。現粵省各屬繁盛城鎮調

查選民資格。紛來請示。乞賜核覆。飭遵。至盼。樹勳。冬。

爲澳門交涉告各省督撫電

宣統二年六月

〔上略〕澳門附近過路環地方。道光年間。葡人卽築有礮臺。久爲粵省匪藪。上月。新寧縣被匪擄去學生十餘人。在該處關禁勒贖。現在澳界尙未勘定。既不能照會澳督往拿。承認爲彼之屬地。又未便派兵往緝。致啓交涉。正在籌辦之際。該事主稟由澳督派人往拿。被匪擊斃數人。本月初六日以後。葡又派兵圍拿。亦被匪擊退。匪乘勢佔葡築之礮臺。葡兵又傷斃數人。嗣由葡派兵輪。用開花礮轟擊。將礮臺奪回。並起出學生及他處被擄者十餘人。匪多傷斃。連日葡兵圍捕。不准行人船隻往來該處。我兵派往協捕。葡亦不願。惟在界務正在磋商。此次葡兵剿匪。雖係事主所請。且在其所築礮臺之地。然界務究未勘定。事前竟不知照敵處。亦殊未合。但圍捕原因的係剿匪。且已起出被擄人口多名。恐外間謠傳不實。特先電聞。再我兵既不及協捕。然仍恐該匪竄入內地。並慮澳兵越界滋事。已連日會商水提。飭營遣派兵輪。駛往該處防堵。另派員至澳確查。以備交涉。〔下略〕

致外務部電

宣統二年七月

〔上略〕據居澳紳民公稟。葡人侵佔界地。展拓無厭。此次藉端海盜。復侵過路環要隘。得寸進尺。欺我力弱。肆意無忌。是一日界務不清。卽一日無一定之界線。邊守請照會葡使。派員速勘。劃定界線。以免彼此糾葛。〔下略〕

續致外務部電

宣統二年七月

〔上略〕葡人於前月十九日第二次派往路環剿匪之兵。現留住該島。約有百名。並未退出。此次剿匪。雖由事主所請。然事前並未照知。事後華兵商往會剿。彼又固拒。澳門界務未定。路環難認爲葡屬地。按照中葡條約第二款內載。未經定界以前。一切事宜。彼此均不得有增減改變之事。現葡擅向路環用兵。似已有違條約。不合者一。華人居住西洋屬地。身命財產。照約應由葡官保護。況路環並未屬葡。該處居民。雖不乏與匪交接之人。而安分良民。亦尙不少。此次葡人剿匪。不分良歹。悉將民居轟毀。華人生命財產。損失甚鉅。不合者二。葡人從前駐守路環之兵。只十餘名。葡使既稱匪已肅清。則剿匪之兵。自應全退。乃續派葡兵。留駐該島。竟有百名之多。大背不得增減之約。不合者三。粵人與葡感情最惡。此次路環居民。被葡焚殺。民情更爲憤激。而葡人增兵駐守。顯爲強佔路環張本。與日後議界尤多窒礙。可否仰懇大部。酌將以上各節。照詰葡使。並令增駐路環之兵。速行退

回澳門。以符條約。〔下略〕

致外務部電

宣統二年七月

〔上略〕粵省牌照捐。每膏一兩。抽銀三毫。以三個月爲一期。第就現在每兩抽捐三毫計算。每箱四十顆。每顆四十八兩。折半成膏。一箱可捐至二百八十元。照上年進口洋藥一萬八千五百餘箱。當收捐銀四百四十餘萬圓。收捐之數。按期加增。吸煙之人。逐期減少。相銷相抵。雖不能作爲經常歲入。三年之內。所收當不少。蓋非膏價日昂。則沾染嗜好者。無所激刺。外人加稅之說。係另一問題。如爲全國統籌。粵固不能獨異。若因粵辦膏捐而遽然應允。轉恐其以言詬人。而授以重征洋藥之口實。且純乎籌款性質。於禁煙宗旨。未免毫釐千里。卽就籌款論。向來進口洋藥。釐稅並征。每箱只收一百一兩。現雖儘力磋商。稅釐再加一倍。亦尙不逮目前開收膏捐之數。且加稅必訂條約。一經議定。再不能逐步加增。於自由禁煙。實多妨礙。在沈迷煙毒者。亦易起遲疑觀望之心。寓禁於徵。鈞部政見。至當不易。利用外人情願加稅之機會。極佩盡籌。惟加稅辦法。僅能覺察進口洋藥多少之總數。進口以後。行銷地面甚廣。某處購土若干。禁煙是否得力。究屬無憑稽查。著手膏捐。禁網嚴密。非得已也。於外國土商貿易上。並無關礙。至先撤膏捐。徐商加稅。幸而有濟。磋商亦尙需時。禁煙已

度鬆動。況停招待稅。叵測居心。難逃鈞部洞鑒。經飭據禁煙總局研究利弊。英使所請。似乎窒礙太多。務請酌核轉覆。從長主持〔下略〕

致各省督撫電

宣統二年八月初十日

仲帥微電已復。頃接清帥萃帥佳電。以救時急策。重要簡單。宜從鐵路下手。擬大集外債。十年趕造。用意甚美。鄙意仲帥原電謂大難在無主腦。此語最爲扼要。借債舉辦鐵路。美國前事可師。然凡辦一事。必先有一主體。而後一切有所附麗。鐵路爲我之鐵路。我借債而我築之。是主體在我也。若今日中國之借債。則動機悉出外人。並強迫以必借。其情形已與美異。既借之後。對於主體。究係何關係。將來若何籌還。萬一屆期不能歸還。又若何籌措。此一層必須通盤計畫。免蹈借款自亡之覆轍。尊電謂鐵路告成。則行政勢如破竹。此亦須有主體。則政令始有發生之地。始有操縱之方。若但恃借款造路簡單政策。則吾國內政又從何發生。又從何操縱。美國維新合衆政體。發生操縱。自在議院。吾國政體不同。京外尙無發生操縱之樞紐。恐主體不立。則所謂破竹之勢。亦在彼而不在我矣。竊意借款築路。此不過應行政策之一端。應如何解決。我輩似可贊助。而不能代擔責任。諸公卓見云何。事關大局存亡。乞從長計議。並示復爲禱。

續致各省督撫電

宣統二年八月十一日

蒸電意有未盡。鐵路爲應行政策之一端。就路言路。吾國幅幘旣廣。日伺堪虞。則以借款築路爲伐交伐謀之政策。亦目前所宜急籌者。俄日協約成而東三省危。滇越鐵路成而滇桂危。似此偉大工程。吾國斷無此財力。欲稍遲回。而人不我待。則不能不借款。並藉以牽制各國。譬如滇路則不可純用法款。東三省則利用美款。各國旣因均勢而有所顧忌。我亦得及此間隙以修明內政。如此辦去。更須立定主腦。所謂主腦者。曰責任內閣。曰國會。此二語爲現今普通常識所共有。顧勳竊以爲內閣國會云云者。爲吾國各項政策之起點。非謂憲政完全之結果卽在是也。所慮者國會成立。必經無數曲折困難。尙非旦夕閒事。然使先組織內閣。尤慮僅有負責任之形式。與目前樞臣無異。而事機萬變。仍責難於一人。此則立憲專制。兩無所當。無論何種政策。今日以爲是。明日又以爲非。一方面以爲是。一方面又以爲非。此仆彼起。此起彼仆。時不我與。而國不可爲矣。故鄙意築路爲應行政策之一部分。借款爲築路中應研究之一部分。似不必謂全國鐵路俱應如此。於救亡政策主腦所在。似係另一問題。至於清帥莘帥佳電。謂鐵路所用工料。悉取於國內。此款留布民間云云。鑒於前車。亦非事實。鐵路借款。往往工程師購料兩層。操之外人掌握。其吾國鐵廠所出。尙未敷全國築路

之用。洋工程師更藉詞挑剔。爲彼國材木及工廠銷運之尾閭。歷年各路所用木料。可覆按也。故卽就鐵路而言。無論外款自款。亦不可無主腦。清帥幸帥。公忠體國。觀此時艱。思下一急劑。用心良苦。敢貢獻見。用備研究。仍乞諸公指示。

再致各省督撫電

宣統二年九月初一日

安帥宥電。慕帥勘電。均悉。事理以討論而始明。閣會關係尤鉅。仲帥發起。列公主張。皆法治也。安帥所見。則人治也。慕帥所謂歷來講吏治實業。成效安在。正坐人治而非法治。故今立一法而必全國一致。無人能踰越範圍。則必經多數公認。既公認則不復能違犯。夫是之謂立憲。閣會問題。實不過法治之機關。至於執持進行。視乎其人。但其人苟不當。亦必有多數人監督之。此意仲帥電已明。所謂敷衍闒茸。皆無所施也。鄙意如此。乞再審擇。樹勳先印。

致雲貴李督廣西張撫電

宣統二年九月初四日

堅帥冬電悉。閣會兩事。故處於奏覆趙王條陳內。卽以此爲歸宿。卽與專奏無異。如有聯銜之舉。弟必附驥。但國會一層。總應純全由人民著力。督撫代爲籲請。轉失國會之價值。此意春間曾電復堅

帥。卽歷次摺內，但陳國會等從之理由，而不作籲乞之詞者，正以地位不同，故惟將人民悃情，合詞轉達，亦無不可。悉聽尊裁。勳。支印。

覆廣州英總領事照會

宣統二年九月

〔上略〕案照粵城現辦禁煙，限令膏店吸戶，於購土後三日成膏，迭經貴總領事官聲稱，三日成膏，爲時太迫，與販運煙土英商貿易有礙，請爲展限等由。當經飭由禁煙局委員，前赴貴署面商，並飭該局妥爲籌議在案。查中國禁煙一事，迭奉諭旨切實辦理，並承各國合議贊成，貴國政府且允按年遞減入口煙土，無非欲除痼疾，永絕洋煙流毒起見，似此善舉，早爲各國所欽仰。無俟本督部堂贅言。惟中國吸煙之戶，人數衆多，一時勢難禁絕，是以籌辦禁煙入手辦法，必須限制吸戶購煙，嚴查膏店私賣，節節稽核，方能週密。至於膏捐一項，本係寓禁於征，務使煙膏價昂，吸戶自然日少。香港總督上年亦謂，煙膏加價，禁煙方能有效。可見膏捐辦法，實爲禁煙必不可少之政策。彼此均有同情。且舉辦禁煙，設立戒煙局所，派員稽查，給發牌照等事，需款甚巨，此等經費，不能不取於吸煙之人。卽如泰西各國舉辦一切政事，無不就事籌款，是以禁煙而抽膏捐，亦係各國行政不易之法。貴總領事官前云，販賣洋藥商人，亦知此項貿易，終歸消滅，可謂深明時事之言。蓋不禁煙則已。

如實禁煙。則洋藥貿易。勢必日就減少。以至於無。斷無既欲禁煙。又欲洋藥暢銷之理。且禁煙種種條例。無論抽捐與否。均與洋藥貿易。有間接之關係。此爲勢所必至。莫能倖免。不獨限期成膏一事爲然。惟洋藥入口。貴總領事官有維持英商貿易之責。本部堂竊念彼此友誼。不願因此小事。致貴總領事稍有爲難。現經飭行禁煙局再三籌議。據稱限期成膏一節。原爲嚴杜膏店私賣。易於稽查。雖三日之限。不無太嚴。惟期限過寬。則奸商惟利是趨。必致私賣煙膏。走漏捐款。於禁煙功令。大生阻礙。茲爲英商貿易起見。將前定章程。改爲膏店限一個月成膏。成膏之後。再繳捐款。似此辦理。限期較前寬至十倍。則贊助禁煙。維持貿易。亦可兩得其平等語。查核所議。均極公允。成膏限至一月。於洋藥入口貿易。自可無礙。應請貴總領事官。通飭各洋商。一律遵照。

歲辛卯。余既手寫先大父新政條議。并襟文如干首。都爲一卷。藏于家。壬辰春。又從亡友武進伍守恭所。得見先大父備兵上海時。與外人交涉文移。載所藏約章大全中。亟彙錄一通。存於帙中。昨歲偶披覽商務印書館近所彙印東方襟誌。又得章奏函電文移數十首。因勘校得失。汰其兩見者。以章奏爲首。次以函牘。總之曰抑戒齋奏牘輯存。俾與條議合行。固不意渡海南來。已委棄一切於垂盡之年。而竟能獲此。雖所存未必有十二三。度亦不能有過於此者矣。至章奏格式。一仍其舊。前賢纂錄。此例正多。遵而行之。亦畧存典制之意爾。民國第二甲寅四月朔。孫榮法謹識於臺北寓樓。

曾孫孝儒孝傑孝俊校字

補遺

沈雲龍錄

督示（宣統二年正月初一日）

督憲袁爲剴切示諭歸伍事。照得新軍與警兵均爲保護地方治安。本日忽因細故互相衝突。殊屬野蠻。本部堂現經查明彼此均有誤會。訪問新軍有尙未歸伍者。必係誤聽謠言。畏罪離營。查此次起釁。不過一二人無知逞忿。原與大眾無涉。爾等務宜各守軍人紀律。作速歸伍。勿爲人言所惑。本部堂一秉至公。原情辦理。決不株連。倘敢故違。則係自干法律。亦不爲爾等寬宥。爲此剴切示諭。新軍人等一體遵照。毋違。特示。

督示（初二日）

督憲袁爲剴切事。照得昨日兵警衝突。情罪尙有可原。今早持械潰變。叛逆形勢顯然。本應立飭勦辦。深恐玉石同捐。准其歸營繳械撫慰。一律無嫌。倘或執迷不悟。身首異處。堪憐。特示。

督示

兩廣總督部堂袁爲諭訓事。照得此次新軍之變。非本部堂所及料。抑豈本部堂所忍言。然懲前毖後。不得不爲爾等痛言之。邇來國家多故。勢甚岌危。力圖自強。特練新軍。以爲兵力充足。內訌旣弭。外侮自消。故不惜鉅款。注重于斯。孰意該軍毫無意識。不思感奮。反肆倡狂。將歲巨萬金錢。置之虛牝。內貽君父之深憂。外啓隣封之訕笑。則安用此新軍爲哉。夫同舟遇風。篙槳齊力。自然轉危爲安。迺放棄責任。徒事操戈。共覆水中。有何利益。推原其故。實因狂悖之徒。煽爲邪妄之說。不顧大局。徒快陰私。彼則遠颺。陷人屠戮。輕浮險躁。擾害治安。此皆連年捕誅無庸愛惜者也。至爾等軍人受軍事教育。資格既高。意識當具。豈全無忠君愛國之心。不識服從命令之旨哉。乃以小忿之故。遂成叛逆之舉。膽敢持槍抗拒。打壞協司令。鎗斃長官。燒燬營房。殘折軍械。犯上作亂。一至於斯。使數年之組織。犧牲無數之財產。國家所恃爲干城。地方所恃爲捍衛者。一旦破壞。鎗缺斧折。名實俱喪。今年新軍本欲成鎮。自此以來。遂不能達。至今思之。猶爲心

痛汗下。今死者已矣。生者具在。試問爾等舉動。豈獨有負國家。又何以對父母妻子乎。爾等來時。父母叮嚀告戒。妻子牽衣泣別。上則勉爲忠良。下示冀博利祿。中則望保全名譽而歸。長爲高尚之民。豈料甫出里門。便忘戒囑。所行所爲。狂悖至此。自取屠戮不足惜。其如老親弱息何。爾試思之。當亦慘然淚下。假令當日不因小費與店口角。何至巡警干涉。巡警既來。使爾等和平告語。自當調解。亦未必遽行無禮。卽巡警無禮。亦只得控訴爾之長官。與巡警交涉。何得不守軍紀。不畏王法。遽行暴動。且訪聞當日爾等未著軍服。蜂擁街衢。藉端滋擾。與流氓爛仔何異。又安望警兵之能以特別優待也。凡此非爲巡警袒護。不過欲爾等思前想後。爲異日良善之基礎。至初一日打警局。傷警兵。目無法紀。亂乎否乎。順乎逆乎。假令當日爾等擾亂。游手爛仔。從而附和。城池失守。生靈塗炭。而曰非爾等之罪乎。尤可異者。與警兵爲仇。係屬二標。於一標何涉。二標犯法亂紀。方思救過不暇。一標不以爲戒。反聽令于砲工。輜各營合同逼迫二標同叛。揣情準理。則二標尙不過逞一朝之忿。而一標與諸營其被匪人誘惑藉事叛亂也。審矣。本

部堂不忍不教而誅。再三開導。繳槍回營。一律免死。倘猶執迷不悟。口出悖言。不得已臨之以威。仍望其不自外生成也。卒之悍然不顧。抗逆戎行。再事姑息。匪惟失刑。何以整軍。區區此心。情法兩衡。自取罪戾。夫復何尤。幸而二標知悔。不再從惡。一標與諸營亦多繳械來歸。既有一線之良。自開三面之網。本朝廷之赤子。竟弄兵于潢池。其叛也可憾。其歸也可矜。青年子弟。尙足自新。本部堂仰體好生之德。決不吹毛求疵。該軍人等務各安靜。切勿再生事端。致滋罪戾。但既破壞軍政。亦難再爲強留。凡于初四日逃回獲回者。俟委員分別護送回藉。毫無虐待。父母之於子也。背則鞭之。改則懷之。本部堂之于爾等。亦若是而已矣。嗟嗟。本部堂不德。既未能教化于先。復不能誠感于後。使爾等迷罔至此。雖協標教練之官。不得辭責。實皆本督部堂之罪也。嗚呼。既往不咎。咸與維新。但爾等洗心滌慮。思念朝廷之厚澤深仁。參考古今之忠臣孝子。處爲良民。出爲良士。以助我大清無疆之休。勗哉。苟不加檢束。一誤再誤。則國家自有典刑在此。諭。

督 札

兩廣總督部堂袁。爲札飭事。照得此次新軍釀事始末。原因極爲複雜。外間不盡週知。遂多異同之論。亟應明白宣告。俾始末了然。庶不至爲妨害治安之言論。蓋言論卽事實所由生。倘黑白混淆。則是非愈晦。爲患何堪設想。本署部堂特撮叙此事大概。牌示本轄。以供衆覽。其文曰。爲牌示事。照得新軍釀事情形。本署部堂迭秉宸謨。不得已而出於勦。其中變幻多端。原爲此邦人士共見共聞。猶憶正月初五日自治社研究諸紳公函。一則曰若輩無知誤會。迹近抗拒。此亦自作之孽。再則曰新軍不遵約束。迹近反叛。罪無可逃等語。就事論事。既叛迹顯然。則決不能稍存姑息。此函列名如鄧官保。及梁紳慶桂。易紳學清。盧紳乃潼等十餘人。類皆鄉邦耆碩。且在自治研究社所發。亦足覘輿論之公。乃自初五以後。本署部堂方籌策善後。竭慮焦思。而外間議論紛然。一若新軍橫遭冤抑。勦之既非。遣散之尤非。似忘其抗拒反叛之罪者。何一省會之輿論。而自相矛盾若此。現在事已粗定。本署部堂應將新軍釀禍之原委。剖晰敷告于有衆。上年立憲諭旨有云。紳民明晰國政。不明晰則黑白混淆。是非錯雜。影響大局。非細故也。

此事初起。緣警兵口角。馴之拘解揪毆。新兵出外。不着軍服。非也。警兵拘解。動輒揪毆。無禮違章甚矣。亦非也。時已除夕。經官長到場解散。並禮遣新兵。且飭由巡警道嚴切查究。蓋心知曲在警兵。欲保重我新軍之名譽也。事固寢息矣。未幾而初一日該標兵竟衝毀巡警第一分局。而警兵兩名受傷矣。又未幾而第五分局又被新兵衝毀。並毆斃警兵一名。且毆傷警官矣。又未幾而該標兵竟回營搶取槍枝子彈矣。此等舉動。視前一夕與警兵口角。蓋已稍稍變相。然本署部堂仍以該兵向警兵尋衅。意在報復。就事論事。出示招速歸伍。爲持平之辦法。蓋三十初一兩日。自表面觀之。純乎無意識之舉動。然其違犯軍紀。較之巡警違犯警律。已有過無不及矣。至初二初三兩日。而情形乃大變。所謂迹近抗拒迹近反叛者。乃一一顯露。姑約略言之。抗拒放假。抗拒招撫。抗拒本營官長之命令。乃至衝毀協司令部。劫講武堂槍械。並迫脇各標起事。叛跡顯然矣。管帶齊汝漢苦心勸導。中槍倒地。猶大呼衆兵不可作亂。叛迹更顯然矣。于時該兵等居然列隊佔據要隘。且大言今日非向警兵復仇。乃革命軍出世之日。則叛迹更顯

而又顯矣。就事論事。三十之事。猶可言兵警口角。兩有是非。初一日則新兵糾集復仇。至于毀局傷人。則新兵無一是。而巡警無所謂非。然猶可曰以復仇爲名。與警兵固有連也。至初二以後。則彼兵等已昌言叛變。逆迹昭然。凡辦事必先就其重者。論罪亦止就其重者。事機至迫。罪狀又至明。無論其爲革黨與否。卽此抗拒叛變之實迹。無有不勦。且無有不速勦。諸紳函中所謂自作之孽也。迨至初三臨陣始尙好言慰撫。而該兵昌言悖逆如故。且先行開槍。于是防軍等乃開槍還擊。斃數十人。陣斬騎馬頭目五人。倡首之倪映典在內。而該兵等乃棄械逃散。以上各情形。共見之亦共聞之。然尙有爲外間所不及知。亦不及料者。本署部堂始爲愛惜軍人之名譽起見。且以安反側之心。故迄未宣告。今者懲前毖後。必須大衆週知。方見辦事之難與用心之苦。上年十一月間。據督練公所人員面稱。該營執得票紙一張。上有同盟會天運年號字樣。因無人承認。無法根究。而該營卽留意形迹可疑者。自十一月起陸續開除不少。此事前叛迹可疑者一也。十二月間捕獲匪首李洪。盧子卿等。據供拜盟起事。詞連新軍。適該營又查

獲票據。並查二標正兵劉茂昌有勾結會黨情事。當送請發縣審訊。此事前叛逆漸露者二也。至于起事前後尙有其他叛逆可爲證據者。上年十二月底稅務司報稱哈德安船進口。有西裝華人坐大餐間。帶有日本皮箱。欲其揭看。此人托言鎖匙在僕人手上樓去取。卽不復回。至關啓視。則內藏炸烈猛藥及手槍子彈等物。此一證也。又初三夜新城宜安里一屋。同時火起。馳救卽熄。事後檢視。各物均燬。下壓有紅絨被。已浸火油未燃。揣其中不類棉絮。拆視得大旗十二面。紅色而藍其角。中作白色日形。環以光芒十二道。此必匪人內應。事敗遁去。而遺火焚燒以滅跡。此又一證也。如後二事。外間或有知之者。如前二事。外間固無從知。亦不及料。豈知天下事固有出于君子愛人以德之外者乎。合衆說紛紛。大致以兵散可惜。疑官長不愛惜軍人。更疑官長袒護巡警。並疑官長欲張大以邀功。創爲種種不根之說。甚至悼嗟附和。視若國殤。則試問如上種種情形。旣咸知爲抗拒矣。叛逆矣。安有抗拒叛逆之徒。而可以曲爲袒護者乎。惟事須分別以觀。此次起事。容多脇從之人。本署部堂亦旣資遣而派護之。俾有自新之路。

與諸君子與人爲善之意。本亦相侔。其發爲偏宕之論。一若既係新軍。卽當崇拜。不問其是否抗拒。是否叛逆。豈將以縱若輩之膽。而以此次抗拒叛逆爲未足耶。本署部堂心數其人。益知前因後果之良非無自。文明各國軍政。係官長特權。苟擾亂治安。惟有執法以從事。此皆爲保護人民之生命財產起見。不僅爲居官之考成。至於此次在事文武各員。不但無邀功之見。照例須自請議處。巡警必須整頓。其違章各員兵。亦應一律分別懲治。此尤在官長範圍以內之事。第辦事有次第。輕重緩急。依序進行。此皆可爲大衆宣告者也。本署部堂履任至今。凡于捕風捉影。以空言誣人之黨案。必反覆推鞠。以冀得事理之平。此次新兵釀禍。外間但知與巡警口角之近因。然其橫決離奇。其罪已難曲恕。況初二以後之叛逆昭著。更兼三十以前之票據顯然。彼言者設身處地。應作如何辦法。幸其破綻尙早。事用不集。逃散以後。軍械已遺。且跟縱搜緝。派員貲遣。故閭閻安堵如常。否則何堪設想。論者乃狃于散兵之沿途安靜。遂謂其不應作爲悖逆。然則當日之戕營官。佔要隘。奪槍械。排隊迎戰。口出悖逆。非該兵等之爲而誰爲。一

言蔽之。謂其中有脇從附和可也。謂其中盡完全高尚焉不可也。至于新軍之應如何招練。應如何嚴加遴選。如何明定規則。自當參照部章。以期重新耳目。力湔前愆。語云往者不諫。來者可追。幸紳民等其各遵悉。

兩廣總督咨各省督撫電文

各省督撫鑒。洪密粵省傳布會匪。招黨散票圖逞。勳聞悉嚴飭文武查拿。旋獲頭目盧子卿。李洪兩匪。訊認詳明。卽提正法。因供涉標營。正密查辦。該標兵除夕藉端與巡警互鬥。正月初一日竟敢糾衆毆打警局。初二日毀拆營盤司令處。奪械登山負隅。形同叛逆。時砲隊管帶勸阻。堅不繳械歸營。並將該管帶戕斃。查係一標及砲工輜七營各兵全變。勳會同李提督再三示諭招撫。勸以繳械歸營。免其深究。如不欲當兵。妥送回籍。有願照舊。亦聽其在營。仍當保護。不料該兵自稱革黨。弗恤良言。初三午揚旗率隊來撲城。不得已督率防營弁兵迎往。叛兵一見。齊施槍砲。是役擊斃叛兵一百餘名。陣

斬廿餘名。奪回槍枝千桿。上下及戰馬十七匹。大紅旗一枝。叛兵潰逃。我軍追勦之。白雲山下地方。時已黑夜。叛兵奔散。惟難于再進。計叛黨尚有千名。卽行探蹤勦辦。並已分飭各路一體截拿。不難一鼓盪平。至二標三營。三標一營。均尙守律。仍駐原營。現在省城地方安謐如常。

兩廣總督札行督練公所善後草章

爲札委辦事。照得新軍徵兵。多係良家子弟。因誤于一念之迷。以致相率叛變。自應就地懲辦。以儆其餘。惟既已窮蹙無歸。願受招撫遣散。亦宜網開一面。法外施仁。庶幾感朝廷浩蕩之恩。知將保首領以歸。革面洗心。化爲良善。此亦招降善後應有之義。現經本署部堂督飭各員。擬就遣散降兵事宜共十條。收殮尸骸槍枝共六條。亟應札發該所。卽便會同妥酌辦理。除分行外。合就札發。札到該所。卽便遵照會同按照現發草章迅速妥辦。是爲至要。如有應行參酌未盡之處。亦卽統籌妥議辦理。仍將情形具報查

考毋違。(計粘抄草章一紙)

一札藩學臬三司督練公所(遣散招降事宜)

一從古善後收降。最難聚數百曾爲叛逆之人。照料不到。輒生他故。宜卽由督練公所會同協標等官點名造冊。將平日素不安分者。暗屬看管。格外留心查察。免致別生暴動。至起解時。則一同送回原籍。

一降兵宜按各縣列爲一冊。以便委員派勇專送回籍。須五兵互相保結。在路不逃不叛。如違同坐。到該縣時。由縣令照會本城正紳。飭人傳知父兄。邀同團保。或隣近一二公正人。取具嚴加管教。永不再爲匪人所誤切結。三年之內。只准在家安分營生。三年無事。作爲平民。

一降兵除視其遠近核計程途。給發盤費。須稍爲充足。無使過苦。如有短少侵蝕等弊。准其隨時控告。從嚴查究。

一降兵由藩學臬三司及督練公所給發護照一件。三年安分。作爲平民。他人不得欺

侮。

一降兵宜分數起行走。至多不過二三十人。多則難于彈壓。恐生他變。

一護送降兵。每起派委員一名。得力巡防兵十名。（此種巡防兵須未與新軍交仗者。）小心押解。仍派本營隊及排長司務長等官一員。隨同調護教導。押解之人。均和言談笑。不得加以欺侮。違者治罪。降兵由藩學臬三司及督練公所札送該縣。由該縣將詳細發落情形申覆。以昭核實。

一降兵宜按站行走。如有水路。亦可由水路行走。除委員派勇護解外。如前途聞有危險。可隨時由各縣加派勇丁同解。以昭慎重。

一降兵中如由他處審實。供得確係頭目。則酌予監禁。否則不必吹求。

一藩學臬及督練公所點名遣散時。宜略舉從前名臣名將一二事。或先爲匪人所誤。反正之後。卒爲忠義。名光史冊。以勗其向善之心。免至再爲歧趨所誤。（以上係渾舉大概。至詳細情形。可由藩學臬三司及督練公所斟酌辦理。）

- 一 速飭善堂僱人承埋叛兵尸骸。免至暴露腐敗。釀成疫症。如能由善堂搜集薄棺。或速用木板釘製。不過一二百具。由公家發給款項。尙屬非難。庶仁人不相掩耳。
- 一 此項徵兵。多係良家子弟。誤于一念之迷耳。家中父母妻子抱痛之切。實所難言。此時尸骸想未分蒸。同棚之兵。自能認識。卽令該官長會同善堂。速帶明白兵丁。（卽在降兵挑選）檢認編號。將來爲該家屬欲來看視。或領歸安葬。均無不可。以示朝廷曠蕩之恩。則以後徵兵。革面洗心。或更易感化耳。
- 一 承埋之夫。宜稍多給賞號。務宜深爲挖坎。須在四尺以下。免致穢氣暴露。有害衛生。
- 一 宜以次按埋。編號刻碑。
- 一 編號之後。仍須造冊存督練處。以備查考。（以上專論尸骸）
- 一 檢收槍枝。每槍一枝。可給花紅數元。或卽令該官長在降兵中挑選明白者數人。同行收集。免至落到匪手。致昭患耳。

兩廣總督袁廣州將軍增會奏新軍釀變勦撫情形摺

奏爲查明粵省新軍藉端開營。繼復昌言叛變。遵旨勦撫。擒獲首要。地方平定。各情。恭摺具陳。仰祈垂鑒事。竊宣統二年正月初二初四等日。臣等先後將新軍滋事分別勦撫各情。電請軍機處代奏。初七日准軍機電。奉旨增祺等兩電均悉。此次標兵叛亂。勦辦尙屬迅速。其餘各營。亦難保無勾結匪黨情事。着該署督等將所獲各匪。嚴切根究。實力查拏懲辦。以絕根株。無留餘孽。欽此。欽遵。竊查近年新軍滋事。不僅一省。就粵論粵。有總因焉。有遠因焉。有近因焉。教育未普及。則軍人之資格。難語完全。上年八月間。憲政編查館會奏覆核陸軍部籌備事宜單開。城市游惰公民。則不宜徵。廣西等省匪黨夾雜可慮。則不便懲各等語。實爲洞見癥結之論。粵省從前倉卒徵兵。所謂游惰而夾雜匪黨者。不敢謂其必無。卽無矣。其未受教育者。仍居多數。此總因也。既有游惰及夾雜匪黨之慮。故投營之時。軍心卽不甚固。逃亡之報告。既月有所聞。而港澳密邇。匪徒乘間煽惑。防不勝防。故粵省徵兵之難。前督張人駿已剴切奏陳于先。臣樹勳與陸軍部亦縷祈商榷于後。朽索明知難馭。滋蔓更不易圖。此遠因也。積此二因。故有觸卽

發。或因口角微嫌。或因放假細故。橫決離奇。已自忘其爲軍人資格。而不逞之徒。乘機裹脅。昌言叛逆。釀爲亂萌。則已非爭論微嫌細故時所可料及。亦非爭論微嫌細故者之本心。此近因也。綜此三因。而後粵省新軍釀事之始末。可得而言焉。方事之未起也。上年十一月間。臣樹勳曾據督練公所參議吳錫永面稱。該管統領于營房內拾得票紙一方。內刊有同盟會及天運年號等字樣。徧詰各級官長及軍士。均諉不知。當以事無左證。嚴切誠諭。如有誤收此項票紙者。塗繳免究。亦無應者。而陰將形跡可疑者陸續開除多名。爲先事預防之計。爲此事直接之遠因。又臣等訪聞匪徒。倡言革命。勾結港澳三點會黨徒起事。密飭營縣捕獲匪首李洪盧子卿卽黃子卿二名。訊明據供拜盟結黨。購運軍火。約期舉事不諱。且與新軍有涉。十二月廿八日。提李洪盧子卿正法。爲此事間接之遠因。二十九日新軍統帶復在營內起出票據數張。亦有同盟會字樣。並查二標一營後隊二排三棚正兵劉茂昌有勾結會黨情事。當送督練公所發縣審訊。而該兵等之蓄謀愈露。爲此事直接之近因。然該營在事人員。防之益密。因慮及新

軍放假。而各營所存之槍彈甚多。隨以營庫潮濕。恐損藥力爲詞。飭將各標營所存槍彈。運送城內軍械局收存。正擬陸續搬運。而三十日兵警交關事作。是日二標三營兵士吳英元。在城內刻字舖。定刻名戳名片。託同營兵士華宸衷代取。爭論價值。彼此齟齬。本城第一分局警兵上前干涉不服。適目兵王冠文等經過。幫同理論。警兵遂鳴號集衆。而是時各兵有未穿軍服者。遂一併拘入警局。撐持之際。間有揪毆受傷者。該標統帶聞訊。率員馳往彈壓。惟時文武員弁亦至。秉公查理。將各兵釋回。該警局辦事不無孟浪。亦飭巡警道分別查處。事已寢息。本月初一日。該標統帶就全標官兵團拜。甫將前事懇切演說。而該兵已有突出進城。聲稱向警局復仇。惟時該公所參議及巡警道。聞訊馳往彈壓。行至巡警第一分局。見有毆傷警兵兩名。門牕略有衝毀。正查勘間。復聞東門第五分局亦被新兵衝毀。馳往查勘。已毆斃警兵一名。並毆傷警官。衝毀房屋。而各兵已星散回營。復擬搶取槍枝子彈。該標統帶等竭力彈壓。一面剴切演說。密派數員。將該標三營及三標第一營槍機拆卸。子碼收檢。暗運城內。其餘各營亦擬照

辦。而時已昏暮。城將上鑰。且相距較遠。不及而罷。綜三十及初一兩日情形。純乎兵警交闕。爲無意識之舉動。此爲直接近因之近因。然初一日新兵出營尋釁後。多有離營不歸者。臣樹勳當卽示諭歸伍。侯秉公查處。一面傳諭該營初二以後暫勿放假。卽假亦須由官長率領。不准穿著便衣。以重名譽。二三標各兵無異詞。而一標及砲工輜各營抗違不服。由有前充排長倪映典。及正目黃洪昆爲革黨主動。藉口爲二標兵士向警局復仇。遽奪槍械出營。衝毀協司令部。劫講武營堂機械器物。並脇二三標。因機械先期拆運。幸未全變。砲營管帶齊汝漢向衆兵勸導。倪映典突出短機。自後擊之。洞穿脇。齊汝漢猶大呼衆兵不可作亂。氣遂絕。惟時臣增祺與都統等聞訊。派旗兵登城守護。臣樹勳與水師提臣李準遴派多員。前往持諭繳械免死。而各兵已據占東門寺牛王廟各要隘。派員往撫。各兵等遂倡言今日非止向巡警復仇。乃革命軍出世之日。其語言悖狂至此。蓋至是而情形爲之一變。叛迹顯然。非復無意識之舉動矣。就事論事。該兵等既奪械戕官。衝協司令部。占據要隘。諭之不聽。撫之不從。且口出悖逆之言。是

無論其爲革命與否。斷不容養癰貽患。上貽宵旰之憂。況省城沙面地方。洋商駢集。西關一帶。尤爲商務菁華。兼以密邇港澳。既防外人藉詞干涉。萬一黨羽接濟。更恐枝節叢生。詢謀僉同。莫如速勦。初三日。水師提臣李準。督率親軍統領保外道員吳宗禹。帶隊出城。相機勦辦。新軍協統張哲培亦隨往鄉導。行至牛王廟附近。倪映典等帶領叛兵。列隊來迎。始仍派員往諭繳械。投誠免死。倪映典反勸我歸附。共圖大事。語至悖逆。繼而分三路來撲。勢極兇悍。並先開槍傷防軍數人。吳宗禹等乃揮隊迎戰。用退管砲還擊。轟斃數十人。陣斬騎馬頭目五人。有逆首倪映典在內。先後擒獲黃洪昆等四十餘人。蓋巨魁已就殲矣。于時各兵棄械紛紛逃竄。復遣火延燒第一標營房。登時奪回槍械甚夥。並有另股新兵屯集石牌村廣九鐵道一帶。遣員往撫不從。見大隊已創。始逃散。復跟縱搜緝。次日于白雲山瘦狗嶺等處。拿獲革黨頭目新軍司務長王占魁。江運春。目兵尤龍標等。及餘黨二百餘人。奪回快槍一百餘枝。指揮刀雨衣各器械。是役也。防軍各路躡勦。計共受傷三十餘名。死去二人。提訊王占魁等。供與黃洪昆相符。確

係倪映典等爲革黨主動。並有運動章程十條。內有時時作大舉之預備等語。其運動各界尤以各省軍界爲最多。並有新軍爲革命出力。非爲國家等語。蓋勾結煽誘。已非一日。原擬俟軍械運齊。約期起事。適值二標與警兵衝突。謂有機可乘。迫不及待。而叛情乃驟露。故乃迅速勦辦。預遏禍萌。此皆上秉宸謨。文武員弁相機用命。得以至此。又同時西關地方。亦有焚燒警局及警兵擊槍抵禦。傷人命之事。當卽彈壓解散。連日復由臣樹勳遵旨辦理善後一切事宜。另案奏陳。恭請聖裁。綜此案始末言之。其總因由于無教育。或自以爲受軍國民之教育。而自由獨立之說。深中乎其心爲病者。然肌理不密。外感乃得而乘之。此不惟粵省爲然。各省軍人。滋事比比。非無意識之衝突。卽受外來之誘脇。不從根本上改絃而更張之。難未已也。其遠因近因。無不相乘而至。此次釀事之前。雖在事各員。或先期搜獲票據。開除形迹可疑之員兵。並搬運槍彈入城。致若輩陰謀敗露。故禍速發而不甚大。及釀事以後。各該員等竭力奔救。得轉危爲安。並一面嚴飭防管保護洋人。使無所藉口。不致別生枝節。功似足以補過。惟究未能弭

患未萌。釀此巨變。損失已多。難辭溺職之咎。除砲一營管帶齊汝漢已身殉。應另案奏卹外。所有卸任廣東新軍協統張哲培。一標統帶劉雨沛。一標三營管帶楊長卿。於該標叛兵倡先起事。既未能先事鎮壓。臨時又未能守護營房。致遭焚毀。比照軍人反叛舊律。守禦官處分綦嚴。惟新軍甫在訓練。究與敵軍對壘情形不同。自難援照擬議。而新軍定制。又祇有懲罰輕罪專條。於此項罪名。尙未另訂。又砲二營管帶林金鏡。工程營管帶陳宏募。輜重營管帶許嘉澍。或學術尙好。或辦事頗勤。此次該兵釀變。實係一標主動。而砲工輜各營受其徇脇。目前辦理善後。不能不多資熟手。俾恢復之有期。惟究應如何處分。臣等未敢擅擬。應請旨將張哲培。劉雨沛。胡兆瓊。楊長卿。林金鏡。陳宏募。許嘉澍七員。又于如周一員。于叛兵倉卒起事之際。遺失關防。情節較重。一併交部分別從嚴議處。其下級官以下各員。在逃者俟緝獲訊供。再行懲辦。臣樹勳未能弭患無形。亦有應得之咎。請并交部議處。至于巡警違背警章。有壞職務。其原因亦在無教育。各省警兵交關。皆自忘其專嚴之資格。厥咎維均。自應分別整頓。並將不職各員兵。

秉公撤辦以儆將來。其槍斃警兵一案。當人多嘈雜。難得主名。已另案嚴行緝究。並分別撫卹各該家屬。以昭平允。除將善後事宜。由臣樹勳切實辦理。分別奏咨外。理合恭摺具陳。伏乞皇上聖鑒訓示。再此摺係臣樹勳主稿合併陳明。謹奏。

按：宣統二年正月，抑戒老人署兩廣總督任內，適發生革命黨人倪映典領導廣州新軍起義之役，治史者類多能言之。惟有關應變及處理善後之官方資料，殊尠紀載。茲從李介儒編「粵東軍變記」中摘錄，以供研究之參考。

署理山東巡撫袁樹勛奏接兼日期摺

奏為恭報微臣抵東接印任事日期叩謝

天恩恭摺仰祈

聖鑒事竊臣於光緒三十四年三月初八

日欽承

恩命署理山東巡撫官即具摺謝

恩旋於三月二十四日

陛辭仰蒙

召對一次

訓誨周詳莫名欽感嗣即束裝起程至天津與署理北洋大臣正任山東巡撫臣楊士驤晤商要公茲於四

月十二日馳抵東省十三日准署撫臣吳廷斌派委濟南府知府張學華撫標中軍參將劉雲會將山東巡撫

關防鑲改印信臨清關監督關防暨

王命旗牌文卷等件齊送到臣當即恭設香案望闕叩頭謝

恩祇領任事伏念臣備員翊貳未報涓埃沐

鴻露之頻施攝專圻之重任查東省首重外交次重河精軍

政宜肅吏治宜澄固已盡關緊要至新政之學堂巡警招墾勸工並商埠之綏來與旗丁之生計籌畫尤屬繁

難難經歷年創辦於前尚待逐事詳求於後如臣愚昧深懼弗勝惟有懷遠

慎矢勤實事求是不敢以權時攝篆稍涉因循勉期殫竭乎血誠仰答

鴻慈於萬一所有微臣接印任事

日期並感激下忱謹恭摺叩謝

天恩伏乞

皇太后

皇上聖鑒謹

奏光緒三十四年四月二

十一日奉

硃批知道了欽此

署理山東巡撫袁樹勛行營公孔令貽奏稽查登萊青膠學務摺

奏為臣等續查山東登萊青三府及膠州直隸州四屬學務事訖恭摺會陳仰祈

聖鑒事

竊臣令貽於上年九月出省稽查濟南泰安兗州濟甯州各屬所辦學堂業將大概情形及查

學宗旨於本年二月會同前署撫臣吳廷斌合詞

奏報奉

硃批學部知道欽此欽遵在

案日令貽旋於二月十二日由省起程先赴青州府城調查各項學堂以益都縣所設高等小

學教授管理最為合法其蠶學一區尤有實效可觀萊屬則風氣稍開經官紳極力提倡兼用

勸導強迫之法各級學堂始漸完備而濰縣於官立學堂外民立學堂亦占多數足見學風之

盛登州各校以蓬萊縣小學及師範傳習所規制為良煙臺近傍海濱開通最早士紳頗能盡

心學務民辦各學內有水產學堂一區開辦未久立法尙善膠州則各級皆備均能認真辦理其餘所屬各縣臣令貽先於出省時會同前署撫臣吳廷斌遴委諸悉學務人員分投稽查先後稟覆前來臣令貽於四月十一日將三府一直隸州學務查訖回省與臣樹助晤商後並據委員稟報情形及所填統計表會同詳細覆核其各處設學層級均係按照地方程度酌量辦理尙覺條理不紊綜查山東登萊青三府舊盛科名文學之風獨冠他郡且地饒海線交換智識見聞較廣故生徒國文程度平均考核優者居多而各項科學似亦領悟較易臣令貽每到一校必集教員生徒示以效忠守正之道教育強國之因使之端其趨向壹志學業更取教員所輯講義及生徒所習文藝細加觀覽其有授受不合者隨時示以改良之法至經費出入關係學界漲縮故於學堂之用項分銷產業有無必逐款諮詢總期清理浮濫歸諸切實以仰副朝廷興學育材之至意現在各學校均將散放暑假一俟秋初開學即擬馳赴曹沂各府稽查再當續行 奏報所有臣等稽查登萊青三府及膠州直隸州四屬學務緣由謹合詞恭摺具陳伏乞 皇太后 皇上聖鑒訓示再此摺係臣令貽主稿合併陳明謹 奏光緒三十四年五月初九日奉 硃批學部知道欽此

署理山東巡撫袁樹勛奏查勘曲阜 文廟工程擇要興修摺

奏爲查勘曲阜 文廟工程擇要興修並估計工料銀數恭摺仰祈 聖鑒事查接管

卷內光緒三十二年十一月十五日奉 上諭朕欽奉 皇太后懿旨孔子至聖德配

天地萬世師表允宜升爲大祀以昭隆重一切應行典禮著該衙門議奏欽此當經禮部酌議

文廟工程奏奉 兪允欽遵否行在案伏查山左爲聖賢桑梓之邦 先師既

升爲大祀修飾曲阜 文廟視各處爲尤要况自同治年間重修以後迄今三十餘年未

經大加修葺此次 綸音特沛典禮崇隆自應展拓規模以符體制惟部議有謂致敬之道

以實不以文現在物力維艱良材難得若從新改造工程鞏固恐不及前不如擇要修理以示尊崇經前撫臣吳廷斌與衍聖公臣孔令貽往返函商意見相同派員敬請查勘曲阜

文廟如

大成殿

寢殿

大成門杏壇樓所并亭

崇聖祠啟聖祠列國

殿奎文閣暨各處門坊牌樓牆垣或添蓋黃瓦或修飾見新間有年久鈔朽之處亦一律修整逐細切實估計共需工料銀五萬三千四百餘兩至舊有物料自當酌量留用庶於隆禮之中仍寓節儉之意所需工款由藩司設法騰挪節省動用應請作正開銷不動年例部撥之款並飭兗州府督同曲阜縣認真監督工堅料實勿使草率偷減一俟工竣再行委員前往驗收核實報銷以重要工據署布政使胡建樞詳請 奏咨到前署撫臣吳廷斌未及核辦卸事移交前來臣覆查無異除咨部查照外所有查勘曲阜 文廟工程擇要興修並估計工料銀數緣由理合恭摺具陳伏乞 皇太后 皇上聖鑒謹 奏光緒三十四年五月初十日奉 硃批該部知道欽此

署理山東巡撫袁樹勛奏東省財政困難情形摺

奏為東省財政異常困難謹將查明目下實在情形恭摺具 奏仰祈 聖鑒事竊維山東一省兵燹之餘久稱凋敝綜計從前歲入苟無意外大宗出項尙可敷衍一時卽遇黃河漫溢工賑兼籌猶恃有京餉可以截留賑捐可以挹注庚子以後賠款驟增新政具舉升任撫臣袁世凱先事預籌因設籌款局加權煙酒各稅定錢糧價酌提州縣盈餘均經 奏報有案爾時支用浩繁皆有的款爲之預備盱衡時局者方以東省爲完善各省仿而行之成績亦班班可考乃不十年而事會變遷度支急迫至於今竟有日不暇給之勢臣履任後接見司道及各局所專員無日不博訪周諮推究歷年至此之故月餘以來略知梗概蓋其中有三大原因焉關於入款者一關於出款者二敬爲我 皇太后 皇上縷晰陳之查光緒二十七年釐

定各州縣錢糧劃一章程每地丁銀一兩統按制錢二千四百文完納一切火耗解費皆在其內其時銀價每兩易制錢一千二百文上下因分別缺分之大小酌定錢漕盈餘之多寡計此項實提州縣中飽八十餘萬悉爲預備洋款兵餉之用又以局收各項稅捐舉行新政酌盈劑虛始得以彌縫無闕嗣後銅元盛行銀價日漸加漲刻計庫銀一兩市價至一千八百有奇由後溯前每兩相差在四錢以上於是前提盈餘之款一再核減至三十餘萬之多入不敷出爲數甚鉅而各州縣仍復賠累日增無不以得缺爲兢兢吏治亦因而日下至各局如煙酒稅捐貨釐墾租無款不以錢合銀則又銳減三分之一年來持籌而計仰屋而嗟惟此爲最大之關鍵實非初辦時所能逆料又查光緒三十一年加練第五鎮正兵山東攤認每年新餉銀六十萬兩本係裁汰武衛軍先鋒隊各營於餉項似無出入但東省幅員既廣伏莽猶多要地防營萬難抽撤當時改定營制煞費躊躇已不免浮於裁額旋因曹屬不靖添募游擊之師地方始臻安謐事機所迫勢不能顧恤帑藏致貽養癰之患又查練兵經費一項光緒三十年東省認解十九萬二千兩三十年續認三十五萬八千兩以後歷年統按部定五十五萬兩原數分期籌解司道局各庫幾至搜羅淨盡其在煙酒兩稅項下認撥者益覺籌措爲難蓋煙酒稅歲無定額所收本不敷認撥之款而又早經分撥各項新政之需實係挖肉補場先其所急夫以東省瘠苦之區除賠款外疊次派撥至百數十萬之鉅復值銀價奇昂入款較前大減至於苛細雜捐本無大裨歷經裁汰淨盡際此民窮財匱之時羅掘一空來源久涸然猶幸近三年中仰邀 福庇黃河順軌工賑較輕否則京餉無可挪移捐輸無可希望雖有善者莫能爲無米之炊_臣於到任後察看情形莫名焦灼當飭司道開具清摺於一年出入核抵計藩庫歲虧銀九十餘萬籌款局歲虧銀二十餘萬善後局歲虧銀三十餘萬如商埠洋務各局之漏卮百出皆不與於此數而意外之支銷尤無從預計長此不變年復一年何堪設想_臣以非材初膺疆

寄自應力圖報稱勉任其難何敢稍涉張皇貽憂 君父第時會至此若再緘默苟安日久更難收拾至應如何設法畧爲治標救急之謀容_臣督飭司道悉心籌議再請 旨辦理_臣惟有竭盡血誠不敢欺飾一字以期仰答 高厚鴻慈於萬一所有_{微臣}查明東省現在財政異常困難情形恭摺據實上陳伏乞 皇太后 皇上聖鑒訓示謹 奏光緒三十四年六月初十日奉 硃批知道了欽此

山東巡撫袁樹勛奏東海關常稅收支各款摺并單

奏爲東海關常稅收支各款銀數繕單恭摺仰祈 聖鑒事竊查東海關常稅每年征收正額銀五萬兩額內盈餘銀一萬二千兩額外盈餘銀八千兩光緒二十二年經前撫_臣李秉衡遵 旨嚴核關稅提款充公摺內聲明以上正額盈餘均照實數報部不准再有短收賠繳名目並另提充公銀二萬兩至二十五年又經前撫_臣毓賢清釐關庫續提充公銀二萬兩先後報部候撥嗣皆撥充營餉旋於光緒二十七年九月初十日准外務部咨各關常稅在口岸五十里以內者歸新關兼管於十月初一日開辦常稅收數內提出一成經費交本口稅務司又准 行在戶部電開各省常關自十月開辦起暫按每月提出二成解滬又准外務部咨據總稅務司申稱煙台戶關常稅耗銀應歸稅數造報各等因先後飭據東海關監督李希杰以常稅自稅務司兼辦後未能再將從前節省清釐名目劃出請自光緒二十七年爲始一律實征實報不得少於往年征報之數免去節省清釐名目統歸正稅開支等情詳經咨部議准所有光緒三十三年正月十七日以前征收銀數業經 奏報在案旋准部咨嗣後征收稅數應扣至三十三年二月底止截數開報再自三月初一日起扣足一年作爲一年期滿與稅司清摺所報年月不致兩歧並將收支各款繕單報銷等因轉飭遵照在案茲據東海關監督登萊青膠道何彥昇詳稱自光緒三十三年正月十八日起至二月底止又自三月初一日起至三十四年二月底止所有稅務司兼管煙台戶關稅務共收百貨稅銀七萬二千二百兩零隨征一分耗銀七千二百二十一兩零零星雜款銀四千四百四十七兩零在口岸五十里以外所轄南北大小各口征收內

地商船百貨稅銀四萬三千三百八十八兩零隨征一分耗銀四千三百三十八兩零菸酒加征一倍稅銀七百五十一兩零統共征收稅銀十一萬五千五百九十九兩零隨征一分耗銀一萬一千五百五十九兩零雜款銀四千四百四十七兩零菸酒加征一倍稅銀七百五十一兩零除隨征一分耗銀及稅務司兼管煙台常關所收雜款暨奉文加征菸酒一倍稅銀不入額數外所有征收常關及各口稅銀十一萬五千五百九十九兩零較諸正額及額內外盈餘有盈無絀至所收耗銀一萬一千五百五十九兩零內支稅務司一成經費並內閣及翰林院度支部給事中等處飯銀並各委員書差經費共用銀八千五百三十八兩零尚餘一分耗銀三千二十一兩零專款存儲候撥造具清冊呈請 奏咨前來臣覆查無異除將清冊咨部查照核銷外理合繕單恭摺具陳伏乞 皇太后 皇上聖鑒訓示謹 奏光緒三十四年七月初七日奉 硃批該

部知道單併發欽此

謹將東海關常稅自光緒三十三年正月十八日起至三十四年二月底止收支銀數繕具清單恭呈 御覽 謹開 舊管 一存銀十二萬四千五百二十二兩四錢二分四毫六忽七微 新收 一收煙台大關改歸新關稅務司兼辦自光緒三十三年正月十八日起截至二月底止內地商船稅銀七千一百三十一兩八分八釐 一收煙台大關改歸新關稅務司兼辦自光緒三十三年正月十八日起截至二月底止內地商船稅銀七百十三兩一錢九釐一毫 一收煙台大關改歸新關稅務司兼辦自光緒三十三年正月十八日起截至二月底止內地商船雜款銀六百八兩四錢八分七釐 一收煙台大關改歸新關稅務司兼辦自光緒三十三年三月初一日起至三十四年二月底止一年期滿內地商船稅銀六萬五千七十九兩八錢八分四釐 一收煙台大關改歸新關稅務司兼辦自光緒三十三年三月初一日起至三十四年二月底止一年期滿內地商船稅耗銀六千五百七兩九錢八分八釐 一收煙台大關改歸新關稅務司兼辦自光緒三十三年三月初一日起至三十四年二月底止一年期滿內地商船雜款銀三千八百三十九兩四錢四分八釐 一收南北分口內地商船稅銀四萬三千三百八十八兩三錢五分 一收南北分口內地商船稅耗銀

四千三百三十八兩八錢三分五釐 一收南北分口菸酒加征一倍稅銀七百五十一兩七錢三釐 以上
 新收共銀十三萬二千三百五十八兩八錢九分二釐一毫 開支 一支解北洋陸軍第六鎮光緒三十二
 年分閏戶加餉銀一萬兩 一支解光緒三十三年分京餉截撥北洋陸軍第四鎮軍餉銀一萬兩 一支解
 奉撥直隸永定河工款銀一萬八千三百八十八兩九錢二分九釐三毫一絲 一支解光緒三十三年分先鋒隊
 餉銀四萬兩 一支解光緒三十三年分練軍節省撥作先鋒隊餉銀二萬六百二十兩五錢六分 一支解
 加放俸餉並補水共銀一萬五千二百四十六兩四錢五分 一支解江海關道新案賠款二成並補水共銀
 一萬四千四百七十兩七分一釐九毫 一支解稅務司正耗稅款內一成經費共銀八千三百八十八兩四
 毫一絲 一支護關弁兵薪糧公費銀一萬二千四百八十三兩八錢九分六釐四微 一支解內閣暨翰林
 院度支部給事中供飯銀一千五百兩二錢六分二釐 一支煙台大關暨各口委員書差經費共銀六千八百
 十兩六錢九分九釐八毫 以上共支銀十五萬七千六百三十三兩八錢六分九釐四毫二絲四微 實在 一
 存銀九萬九千八百七十七兩四錢四分三釐八絲六忽三微內有一分耗銀三千二十一兩八錢六分五毫九
 絲專款存儲候撥餘銀應解各營軍餉列入下次開報光緒三十四年七月初七日奉 硃批覽欽此

又奏鹽運使張蓮芬籌辦煤礦請假赴津等片 再據辦山東嶧縣才興煤礦有限公司鹽運使張蓮芬
 稟稱公司於光緒二十五年詳請奏明籌辦山東嶧縣煤礦摺內曾聲明須集股自造運煤鐵路以資轉運嗣
 因股本招足又於三十二年按照礦章詳請專案奏辦先後均經部覆核准有案本年四月以後疊次轉奉郵
 傳部文以公司運煤鐵路應俟津浦鐵路勘定路線後再行酌核辦理等因伏查運路事宜關係礦務全局亟
 須赴津稟請督辦津浦鐵路大臣面商辦法擬乞假一月並懇附 奏派員督理運司篆務前來臣詳加查核
 該運司所陳各節既為妥籌運煤路工起見自應照准所有鹽運司篆務委候補道崔繼善暫行署理除分飭
 遵照外謹附片具陳伏乞 聖鑒謹 奏光緒三十四年七月初七日奉 硃批該部知道欽此

又奏兗州府捕河通判實卿試暑期滿請實授片 再試署兗州府捕河通判實卿於光緒三十三年四月

十八日到任扣至三十四年四月十八日試署一年期滿經理汛務均無貽誤任內並無叅罰處分亦無分賠代賠銀兩例應實授據署布政使胡建樞會同署兗沂曹濟道兼管運河事務吳煜詳請具 奏前來臣到任未滿三月例不加考惟核與定例相符應請實授除將該員親供履歷咨部查照外理合附片陳明伏乞 聖鑒敕部查照施行謹 奏光緒三十四年七月初七日奉 硃批吏部知道欽此

山東巡撫袁樹勛奏伏汛期內河工平穩摺

奏為伏汛期內黃河三游險工一律搶護平穩恭摺具陳仰祈 聖鑒事竊照東省黃河本年桃汛工程防護平穩情形業經前署撫臣吳廷斌 奏報在案臣履任後綜理庶政尤以河工重要倍切兢兢時值伏汛將臨當經督飭各游總辦道員妥為布置多備磚石稽料等物認真修防以期有備無患迨節交庚伏山水并發河流增漲又疊據豫省電報萬錦灘二次共長各水尺五寸沁河三次共長水一丈二尺二寸溜勢奔騰浩瀚洶湧異常各處險工喫緊如上游南岸之岳莊斬莊孫樓楊莊北岸之賈垓田隄工挂劍台臨黃堰之宋集玉皇廟李橋廖橋中游南岸之北店子楊莊老徐莊小魯莊傅莊河套圈陳孟二圈王家梨口胡家岸北岸之邱家岸大馬頭五龍潭桃園大王廟溝楊莊鈞頭高家葛家店李上台鐵匠莊濟陽東關下游南岸之梯子驢蛄子灣大道王東西馮家圈董家佛頭寺甯海北岸之劉旺莊白龍灣大小崔家張毛家馬張家官家葦家嘴王莊劉家夾河董王莊鹽窩張家灘等處俱因大溜沖擊埽壩墮陷者不一而足隨暨隨隨均經相機搶護其尤為險要之處如上游南岸之賈莊雙合嶺溜勢下挫高寨尤為喫重趕修磚壩四道托溜外移中游南岸之濼口埽壩墮動更甚添建石壩三道北岸之席家道口舊埽走失運柳趕做頂廂上壓草批復捆柳包石沈至根際下游北岸之菜園牛王莊溜忽上隄沖場隄前淤灘數十丈牛王莊春間新修磚壩坍塌入水深至數尺及一丈四五尺不等趕緊分拋磚石力護隄身綜計以上危險各工幾生巨患經各該總辦分投督率無分風雨晝夜奔馳搶辦始得化險為夷並據先後稟報前來現在伏汛已過通工一律平穩洵堪仰慰 宸願惟秋汛方長豫省仍疊報長水防務更不容稍鬆臣當嚴飭各游總辦督率在工文武員弁切實修防慎益加慎總

期力保安瀾以顧大局所有伏汛期內三游險工一律搶護平穩情形理合恭摺具陳伏乞

皇太后

皇上聖鑒謹 奏光緒三十四年八月初六日奉 硃批知道了欽此

山東巡撫袁樹勛奏三十年分驛站錢糧報銷摺并單

奏為報銷山東省光緒三十年分驛站錢糧繕具清單恭摺仰祈 聖鑒事竊查驛站錢糧例應按年報銷

所有光緒二十九年分驛站夫馬等項經升任撫臣楊士驥開單奏報在案茲查山東省光緒三十年分夫馬
工料連開等項並買馬銀兩除奉裁外應支銀十三萬七千七百五十七兩零內濟南等十府濟甯臨清膠州
三直隸州歷城等州縣驛站項下共支銀十一萬四千八百三十六兩零應扣六分減平及四分飯銀另行由
司報撥其買馬未用夫馬建餘等項共銀一萬九千二百八十七兩零與另收德州等州縣皮廠變價銀二百
七十六兩統已解司至歷城西關遞運所三十年分應付夫價除減平外實支銀二十七兩零按照部章在地
丁銀內給領還款又帶征三十年分夫馬驢頭團月銀三千六百三十三兩零應候部示遵行據布政使朱其
煊備具各屬總散冊揭加具印結詳請核辦前來臣覆查無異除冊結送部外謹繕單恭摺具陳伏乞

皇太后 皇上聖鑒敕部核銷施行謹 奏光緒三十四年八月初六日奉 硃批該部知道單併發欽

此

謹將山東省光緒三十年分驛站錢糧收支銀數繕具簡明清單恭呈 御覽 謹開 收款項下 一收

光緒三十年分走遞夫馬工料連開等項除奉裁外實收銀十一萬七千三百九兩六錢九分 一收買馬銀
二萬四百四十七兩五錢五分二釐 以上共收銀十三萬七千七百五十七兩二錢四分二釐 支款項下

一支光緒三十年分正月起至十二月底止濟東泰武兗沂曹登萊青十府濟甯臨清膠州三直隸州並所
屬歷城等州縣各驛站夫馬工料並雜支等項共銀十萬九千六百七十九兩一錢一分三釐 一支德州等

州縣買補倒斃馬五百二十二匹 共價銀五千一百五十七兩五分 以上共支銀十一萬四千八百三十
六兩一錢六分三釐內扣六分減平銀六千八百九十兩一錢六分九釐應支銀十萬七千九百四十五兩九

錢四釐核扣四分飯食銀四千三百一十七兩八錢四分應同扣存減平銀兩另行由司報撥實支銀十萬三千六百二十八兩一錢五分四釐其買馬項下尙有未用銀一萬五千二百九十九兩五錢二釐仍以地丁起解毋庸算爲買馬餘贖又應城縣西關變運所共應付夫價銀二十九兩七錢六分內扣六分減平銀一兩七錢八分六釐實支銀二十七兩九錢七分四釐遵照部章在地丁銀內給領還款 一光緒三十年分夫馬驢頭閏月銀三千六百三十三兩二錢五分八釐應候部示遵行 一應存夫馬建餘銀三千九百九十七兩三錢一分九釐又中東二路德州等州縣驛並李家莊塚莊二驛皮廠變價銀二百七十六兩統已解存濟庫光緒三十四年八月初六日奉 硃批寬欽此

●又奏委丁達意充中游河工總辦片 再原派總辦中游河工道員丁達意前蒙 簡放兗沂曹濟道業經臣飭赴新任並奏明 聖鑒在案查兗沂曹濟道本省應辦地方事務巡防督緝尤其專責原不能兼任他差惟黃河爲山東命脈所關丁達意治河有年歷練最深情形最熟其中游調度有方商民深資倚賴未便遽易生手所幸曹濟一帶自剿匪肅清後曹州鎮陸建章督隊巡緝仍前嚴整加以各屬推辦清鄉胥小欽迹地方尙稱安謐雖治盜與治河同是要政而權其緩急現在大汛正臨河務喫重非該道仍舊綜理不足以資督率而慎蒞防臣熟審再三惟有將中游總辦事官暫令丁達意兼充凡道署一切公牘包封送工移辦俟伏汛經過再飭丁達意銷差另選妥員接充中游總辦以期各專責成除咨部外謹附片陳明伏乞 聖鑒訓示謹 奏光緒三十四年八月初六日奉 硃批知道了欽此

●又奏撫標各軍第一次至第六次報銷片 再前准陸軍部咨山東撫標第一次至第六次報銷案內購買馬價與例價未符各營長夫並未劃分搬運夫若干名弁兵恤賞等銀亦未聲叙照何項章程支給應令補行奏明再行核辦等因當經行知善後局查覆去後茲據該局詳稱東省撫標營制餉章本係 奏明仿照武衛右軍先鋒隊章程辦理馬匹一項照先鋒隊定價每匹支銀二十六兩委係核實動用無可刪減至各營長夫原定章程未分搬運服役名目嗣經援照先鋒隊定章步隊每營長夫一百七十名內搬運子藥夫三十名服

役長夫一百四十名馬隊每營長夫九十六名內搬運子藥夫十四名服役長夫八十二名又恤賞一款兵丁病故每名賞埋葬銀十兩陣亡官弁每員酌賞銀一百兩兵丁每名五十兩頭等重傷官弁六十兩兵丁三十兩二等依次遞減查先鋒隊各款均經核銷在案今撫標各軍第一次至第六次報銷事同一律詳請 奏咨前來臣覆查無異合無仰懇 天恩俯准敕下陸軍部照案核銷出自 鴻慈除咨部查照外理合附片具陳伏乞 聖鑒訓示謹 奏光緒三十四年八月初六日奉 硃批陸軍部知道欽此

山東巡撫袁樹勛奏救護失事商船出力人員彙案請獎摺 并單

奏爲迭次救護中外失事商船出力各員遵照奏定變通章程彙案請獎恭摺具陳仰祈 聖鑒事竊查光緒三十三年九月十五日承准憲政編查館咨開奏定救護中外失事商船變通章程內載嗣後東省遇有中外商船實係在洋面遭風觸礁驟將沈沒地方文武官紳果能奮身冒險救出三十人以上准其每次按照異常勞績擇尤請獎一兩員其餘出力稍次人員概按尋常勞績請獎每次每船不得過兩三員等因山東沿海一帶礁石森列島嶼糾紛商船遇有風浪往來恆易失事向由登萊青膠道會同拯濟局總協理督飭各府州縣在於沿海緊要口岸設立分局遴派委員司事常川駐局多備船筏隨時奮力救護歷經在事出力人員擇尤保獎均經恭奉 硃批著照所請獎勵等因欽遵在案光緒三十四年四月據升任東海關監督登萊青膠道何彥昇詳稱光緒三十三年正月初三日奉天趙允興商船在蓬萊縣馬家村後洋面遭風觸礁經蓬萊縣知縣徐致儉會同拯濟局委員湖北截取直隸州州同蕭昌世府經歷職銜張學源前往救護登時救起水手搭客四十人四月十六日營口德順商船在甯海州金山寨洋面遭風觸礁經前總理拯濟局山東補用道李福全督同拯濟局委員候補縣丞蔣紹儀州同職銜李繼欽前往救護登時救起水手搭客五十八人五月初五日蓋平陳元連商船在昌邑縣下營口洋面遭風經拯濟局委員分省補用知縣史遜候補典史王鴻年府經歷職銜葉秦前往救護登時救起水手搭客三十一人五月二十六日霑化王鏡源商船在昌邑縣三山口洋面遭風經拯濟局委員江蘇試用布理問蔡錦麟候選府經歷吳節讓縣丞職銜劉孫雲前往救護登時

救起水手搭客三十人六月初八日甯波隄順昌商船在福山縣八角口洋面遭風觸礁經總理拯濟局指分江西試用道唐文鼎督同署福山縣知縣許葉珍拯濟局委員縣丞職銜馬應禧前往救護登時救起水手搭客三十四人七月初八日奉天通順商船在甯海州金山港洋面遭風觸礁經拯濟局委員候選州判傅增松府經歷職銜熊昭漢府經歷職銜李道鏞前往救護登時救起水手搭客七十八人九月初八日接縣東順興商船在蓬萊縣蘆洋口洋面遭風觸礁經拯濟局委員前直隸延慶州知州劉鳳鏞分省補用府經歷馮麟翹鹽大使職銜許葉莛前往救護登時救起水手搭客四十六人九月十一日奉天胡生慶商船在蓬萊縣兩陸城島洋面遭風觸礁經拯濟局委員分省補用知縣吳志賢府經歷職銜王啟瑞縣丞職銜徐繩武前往救護登時救起水手搭客四十一人九月十四日奉天李德順商船在福山縣之罘島洋面遭風觸礁經前協理拯濟局三品銜分部郎中顧溶會督登州府同知鮑忠瀚之罘汛外委趙雲成前往救護登時救起水手搭客三十二人九月二十日甯海周祥泰商船在榮城縣成山頭洋面遭風觸礁經拯濟局委員分省補用縣丞黃鼎銳府經歷職銜任向榮司事文董黃元照前往救護登時救起水手搭客四十七人九月二十五日福建公成增商船在文登縣馬山口洋面遭風觸礁經署文登縣知縣王鑑清會同拯濟局委員候補同知王斯謀補用縣丞劉丙勛前往救護登時救起水手搭客三十五人十月初一日黃縣永豐泰商船在黃縣龍口洋面遭風觸礁經署黃縣知縣候補知縣武晰會同龍口稅局委員知府用湖北補用直隸州知州陳名發司事縣丞職銜劉希喆前往救護登時救起水手搭客三十三人十月初二日甯波張俊臣王德順方長發等商船在利津縣太平灣洋面同時遭風經利津縣知縣沈介福會同拯濟局委員候補直隸州知州馮樹勳儘先把總王崇義前往分投救護登時救起張俊臣船水手搭客二十三人王德順船水手搭客二十一人方長發船水手搭客二十二二人共六十六人十月初五日奉天李興順商船在蓬萊縣劉家旺洋面遭風觸礁經管帶登州海防中營儘先副將王步清會同拯濟局委員候選知縣汪景玉司事縣丞職銜高崇勳前往救護登時救起水手搭客三十二人十月十八日天津孫正順商船在黃縣吧岬島洋面遭風觸礁經拯濟局委員直隸州知州用

候補知縣陳兆琛江蘇試用縣丞袁承湛候選巡檢江乃恭前往救護登時救起水手搭客三十六人十月十九日上海金永泰商船在卽墨縣刺條山洋面遭風觸礁經卽墨縣知縣正任館陶縣知縣陳統燾會同拯濟局委員指分湖北補用直隸州知州王庭琛試用鹽大使唐承典前往救護登時救起水手搭客三十二人十一月初二日奉天元興商船在海陽縣老龍頭洋面遭風觸礁經拯濟局委員揀選知縣周士鴻試用知縣丁長昇分省補用縣丞朱慶元前往救護登時救起水手搭客七十二人十一月初五日甯波金裕亨商船在黃縣桑島洋面遭風觸礁經拯濟局委員北河候補知縣劉毓瀟州同職銜沈宗琦補用府經歷章錫名前往救護登時救起水手搭客四十三人十一月初六日奉天同德商船在甯海州雲溪村洋面遭風觸礁經拯濟局委員舉人王元縉會同甯河州巡警局巡官河南議叙縣丞陳汝賢司事文童鮑恩濟前往救護登時救起水手搭客三十二人十一月初七日奉天同長興商船在黃河北岸口洋面遭風觸礁經拯濟局委員候選知縣趙鑑江蘇試用府經歷王清芝司事縣丞職銜錢基璜前往救護登時救起水手搭客四十九人十一月初九日奉天金恆順商船在甯海州養馬島洋面遭風觸礁經甯海州知州候補知縣何恩錫會同拯濟局委員教習本班先補用知縣蕭方駿縣丞職銜王慶基前往救護登時救起水手搭客五十三人十一月十五日青島同興商船在海陽縣草島嘴洋面遭風觸礁經拯濟局委員候補直隸州知州張秉澤直隸補用縣丞吳汝楫司事府經歷職銜厲鼎鎰前往救護登時救起水手搭客三十九人十一月十九日南通州得力商船在海陽縣嵩山鄉洋面遭風觸礁經拯濟局委員四品頂戴分省補用知州袁照淨候選巡檢吳慶基司事縣丞職銜程鑑洛前往救護登時救起水手搭客六十四人十一月二十八日鄞縣裕順成商船在文登縣折山口洋面遭風觸礁經拯濟局委員揀選知縣蕭鶴祥候選府經歷王步奎縣丞職銜呂士杰前往救護登時救起水手搭客四十六人十二月十六日蒲台程元勳商船在昌邑縣白狼口洋面遭風觸礁經拯濟局委員試用通判蔣怡章試用縣丞劉式鏞候選從九品馬友文前往救護登時救起水手搭客四十一人光緒三十四年正月十六日奉天同義豐商船在甯海州金山港洋面遭風觸礁經拯濟局委員直隸試用同知萬奎基河南試用知

縣白芸候補縣丞王衍慶前往救護登時救起水手搭客五十六人正月二十六日開平局承平輪船在榮城縣大魚島洋面迷霧觸礁經在任候補同知直隸州榮成縣知縣劉文燧會同拯濟局委員補用縣丞劉藻琴司事府經歷甄衡史邦慶前往救護登時救起華洋難民一百五十六人二月初五日奉天復源厚商船在福山縣岡前洋面遭風觸礁經協理拯濟局候補員外郎文彞會同署福山縣知縣候補知州姚贊元委員縣丞職銜王浩前往救護登時救起水手搭客四十七人二月初六日金州王仁盛商船在甯海州北頭村洋面遭風觸礁經拯濟局委員留直補用都司董寶泰江蘇補用縣丞王兆棠司事文童武德翼前往救護登時救起水手搭客五十二人均經隨時稟報有案查該員等在蓬萊甯海昌邑福山榮成文登黃縣利津即墨海陽各州縣境所轄洋面先後救護失事商船三十一隻當時或遭風或迷霧以致觸礁桅折船傾人貨強半蕩水將沈沒該員於驚濤駭浪之中督率勇役各駕船筏不避危險奮身向前登時救起各該船舵工水手華洋搭客人等共一千四百二十一名逐案分計均在三十人以上撈起貨物亦均各逾六成洵屬在事出力據保人員每案異常尋常不過三員未敢稍涉冒濫自應遵照憲政編查館奏定變通章程分別請獎以示鼓勵除武職自干把以下照章咨部核獎並將各該員銜名履歷先後分咨外務部吏部陸軍部分別立案查核外所有各案出力人員繕具清單恭呈 御覽合無仰懇 天恩俯准照擬給獎出自 諭格鴻施謹會同北洋大臣直隸總督臣楊士驥恭摺具陳伏乞 皇太后 皇上聖鑒訓示謹 奏光緒三十四年八月二十一日奉 硃批著照所請該部知道軍併發欽此

謹將東省疊次救護失事商船出力各員擬請獎勵繕具清單恭呈 御覽 計開 山東蓬萊縣知縣徐致愉 請以直隸州知州在任候補 拯濟局委員湖北截取直隸州同蕭昌世 請免補本班以知州仍留原省補用 拯濟局委員府經歷職銜張學源 請以府經歷不論雙單月選用 前總理拯濟局山東補用道李福全 請加二品銜 拯濟局委員候補縣丞蔣紹儀 請免補本班以知縣仍留原省補用並加同知銜 拯濟局委員州同職銜李繼欽 請以州同不論雙單月選用 拯濟局委員分省補用知縣史遜

請免補本班以直隸州知州仍分省補用並加四品銜 拯濟局委員候補典史王鴻年 請俟補缺後以主簿用 拯濟局委員府經歷職銜葉葵、請以府經歷不論雙單月選用 拯濟局委員江蘇試用布理問蔡錦驊 請免補本班以知州仍留原省補用 拯濟局委員候選府經歷吳節讓 請俟選缺後以知縣用 拯濟局委員縣丞職銜劉孫雲 請以縣丞不論雙單月選用 總理拯濟局指分江西試用道唐文鼎 請歸候補班補用並加二品銜 署福山縣知縣許葉珍 請以直隸州在任候補 拯濟局委員縣丞職銜馬應縉 請以縣丞不論雙單月選用 拯濟局委員候選州判傅增松 請免選本班以知縣不論雙單月儘先選用並加同知銜 拯濟局委員府經歷職銜熊昭漢 請以府經歷不論雙單月選用 拯濟局委員府經歷職銜李道鏞 請以府經歷不論雙單月選用 拯濟局委員前直隸延慶州知州劉鳳鎮 請俟補缺後以直隸州知州在任候補 拯濟局委員分省補用府經歷馮麟翔 請免補本班以知縣分省補用並加同知銜 拯濟局委員鹽大使職銜許葉莛 請以鹽大使不論雙單月選用 拯濟局委員分省補用知縣吳志賢 請免補本班以直隸州知州分省補用並加四品銜 拯濟局委員府經歷職銜王啓瑞 請以府經歷不論雙單月選用 拯濟局委員縣丞職銜徐繩武 請以縣丞不論雙單月選用 前協理拯濟局三品銜分部郎中顧溶 請免補本班以知府分省補用 登州府同知鮑忠瀚 請以知府在任候補 拯濟局委員分省補用縣丞黃鼎銳 請免補本班以知縣分省補用並加同知銜 拯濟局委員府經歷職銜任向榮 請以府經歷不論雙單月選用 拯濟局司事文童黃元照 請以從九品不論雙單月選用 署文登縣知縣王鑑清 請以直隸州知州在任候補 拯濟局委員候補同知王斯謀 請俟補缺後以知府補用 拯濟局委員補用縣丞劉丙勛 請免補本班以知縣仍留原省補用 署黃縣知縣候補知縣武晰 請俟補缺後以直隸州知州補用 龍口稅局委員知府用湖北補用直隸州知州陳名發 請俟補缺後免補知府以道員用並加二品銜 龍口稅局司事縣丞職銜劉希詰 請以縣丞不論雙單月選用 利津縣知縣沈介福 請以直隸州知州在任候補 拯濟局委員候補直隸州知州馮樹勳 請俟補缺後以知府

用 管帶登州海防中營儘先副將王步清 請加總兵銜 拯濟局委員候選知縣汪景玉 請免選本班以直隸州知州分省補用並加四品銜 拯濟局司事縣丞職銜高崇勛 請以縣丞不論雙單月選用 拯濟局委員直隸州用候補知縣陳兆琛 請俟補缺後免補直隸州以知府在任候補並加三品銜 拯濟局委員江蘇試用縣丞袁承澐 請免補本班以知縣仍留原省補用並加同知銜 拯濟局委員候選巡檢江乃恭 請俟選缺後以縣丞用 卽墨縣知縣正任館陶縣知縣陳毓崧 請免補直隸州以知府在任候補 拯濟局委員指分湖北補用直隸州知州王庭琛 請俟補缺後以知府仍留原省補用 拯濟局委員山東試用鹽大使唐承典 請免補本班以知縣仍留原省補用並加同知銜 拯濟局委員揀選知縣周士鴻 請以知縣不論雙單月遇缺儘先選用並加同知銜 拯濟局委員試用知縣丁長昇 請俟補缺後以直隸州知州用 拯濟局委員分省補用縣丞朱慶元 請免補本班以知縣分省補用 拯濟局委員北河候補知縣劉毓瀛 請免補本班以直隸州知州留直補用並加四品銜 拯濟局委員州同職銜沈宗琦 請以州同不論雙單月選用 拯濟局委員補用府經歷章錫名 請免補本班以知縣仍留原省補用 拯濟局委員舉人王元縉 請以知縣不論雙單月選用並加同知銜 甯海州巡警局巡官河南議叙縣丞陳汝賢 請俟補缺後以知縣用 拯濟局司事文童鮑恩濟 請以從九品不論雙單月選用 拯濟局委員候選知縣趙鑑 請仍以知縣分省補用 江蘇試用府經歷王清芝 請免補本班以知縣仍留原省補用並加同知銜 拯濟局司事縣丞職銜錢基璜 請以縣丞不論雙單月選用 署甯海州知州候補知縣何恩錫 請俟補缺後以直隸州知州仍留原省補用 拯濟局委員教習本班先補用知縣蕭方駿 請俟補缺後以直隸州知州仍留原省補用並加四品銜 拯濟局委員縣丞職銜王肇基 請以縣丞不論雙單月選用 拯濟局委員候補直隸州知州張秉澤 請俟補缺後以知府仍留原省補用 拯濟局委員直隸補用縣丞吳汝楫 請免補本班以知縣仍留原省補用並加同知銜 拯濟局司事府經歷職銜厲鼎鍾 請以府經歷不論雙單月選用 拯濟局委員四品頂戴分省補用知州袁照藩 請免補本班以直隸州知州分

省補用並加三品銜 拯濟局委員候選巡檢吳肇基 請俟選缺後以縣丞用 拯濟局司事縣丞職銜程鑑洛 請以縣丞不論雙單月選用 拯濟局委員揀選知縣蕭鶴祥 請免選本班以直隸州知州歸部選用並加四品銜 拯濟局委員候選府經歷王步奎 請俟選缺後以知縣用 拯濟局司事縣丞職銜呂士杰 請以縣丞不論雙單月選用 拯濟局委員試用通判蔣怡章 請免補本班以同知分省補用 拯濟局委員試用縣丞劉式鋪 請俟補缺後以知縣用 拯濟局委員候選從九品馬友文 請以巡檢不論雙單月選用 拯濟局委員直隸試用同知萬奎基 請俟補缺後以知府仍留原省補用 拯濟局委員河南試用知縣白芸 請歸候補班補用 拯濟局委員候補縣丞王衍慶 請免補本班以知縣仍留原省補用 在任候補同知直隸州榮成縣知縣劉文燧 請免補同知直隸州以知府在任候補 拯濟局委員補用縣丞劉藻琴 請免補本班以知縣仍留原省補用 拯濟局司事府經歷職銜史邦慶 請以府經歷不論雙單月選用 協理拯濟局候補員外郎文彝 請免補本班以知府分省補用並加三品銜 署福山縣知縣候補知州姚贊元 請俟補缺後以直隸州知州在任候補 拯濟局委員縣丞職銜王浩 請以縣丞不論雙單月選用 拯濟局委員留直補用都司董寶泰 請免補本班以游擊留直補用並加副將銜 拯濟局委員江蘇補用縣丞王兆棠 請免補本班以知縣仍留原省補用 拯濟局司事文童武應翼 請以從九品不論雙單月選用光緒三十四年八月二十一日奉 硃批覽欽此

山東巡撫袁樹勛奏武備學堂人員核減請獎摺 併單

奏為遵照部咨將武備學堂請獎人員核實刪減恭摺仰祈 聖鑒事竊查山東武備學堂學生畢業所有在事出力各員經升任撫臣楊士驥於光緒三十年八月初六日奏請獎叙嗣經陸軍部會同吏部議駁以定章武備學堂學生畢業成就在六七十人以上考驗相符方准將在事人員請獎文武併保不得過十六員山東武備學堂畢業學生考驗成就者共四十四名請保十五員與定章不合應核減員數再行奏請獎叙以昭

核實等因於光緒三十四年正月二十一日具奏奉 旨依議欽此欽遵鈔錄原奏咨行到東當經前署撫臣吳廷斌轉飭遵照去後旋即交卸未及核辦茲據該學堂詳稱東省武備學堂創辦最早其時風氣初開開辦學堂者少全賴各員勸導多方始得成效昭著所有畢業學生除考驗及格四十名外尚有調赴日本留學七名調赴北洋將弁學堂肄業八名雖未一律送考學業實亦有成在事各員奉職勤勞文武併計異常尋常共保十五員實在並無冒濫今陸軍部必以考驗名數為衡不得不勉為刪減謹就前次請保各員中擇其資勞較次者核減四員餘仍請照原擬給獎等情懇請具 奏前來臣覆加查核該員等在武備學堂効力三年不無微勞足錄茲僅請獎異常四員尋常七員委實無可再減核之定章亦尚相符謹繕清單恭呈 御覽合無仰懇 天恩俯賜敕部照擬給獎以示鼓勵出自 鴻慈逾格除咨部查照外理合恭摺具陳伏乞

皇太后 皇上聖鑒訓示謹 奏光緒三十四年九月初七日奉 硃批該部議奏軍併發欽此

謹將山東武備學堂在事出力各員遵照部咨酌減請獎開列清單恭呈 御覽 計開 分省補用道袁世敦擬請 賞交軍機處存記 指分廣東補用知府張起濱擬請免補本班以道員仍留原省補用 山東試用府經歷張肇瑞擬請免補本班以知縣仍留原省補用 賞給原銜已革江西候補知府林介弼擬

請開復原官仍繳捐復銀兩 查該員前在江西甯都直隸州任內經原任江西撫臣李興銳以遇事勒索物議沸騰奏參革職係因甄別獲咎尚無實據 以上四員請照異常勞績給獎 大挑知縣劉溥擬請仍以知縣歸本班先期補用 分省試用縣丞董福善擬請俟補缺後以知縣用 府經歷臧銜吳遇庚擬請以府經歷歸部銓選 縣丞臧銜張惠田黃冕世裕均擬請以縣丞歸部銓選 監生韓淞濤擬請以巡檢歸部銓選

以上七員請照尋常勞績給獎光緒三十四年九月初七日奉 硃批覽欽此

●又奏革員恩芳辦理河防得力請留東差遣片 再本年黃河工段前於六七月間屢接河南電報萬錦灘暨沁河等處先後共長水二丈有奇東省地居下游險工疊出臣以相機救護急切需才適有已革江蘇海州直隸州知州恩芳措資北上道過濟南臣前在江蘇深悉該革員熟諳河務任事實心爰即截留幫工以資臂

助

助該革員分投搶險兼任稽查勞瘁不辭於河防大有裨益若由此留工効力洵爲切實可靠之員合無仰懇
天恩准予留東差遣出自 鴻慈謹附片具陳伏乞 聖鑒訓示謹 奏光緒三十四年九月初七
日奉 硃批著照所請該部知道欽此

山東巡撫袁樹勛奏黃河安瀾出力人員鄧際昌等請獎摺

奏爲節交霜降黃河普慶安瀾恭摺馳陳仰慰 聖懷事竊臣於伏汛期內會將工程一律平穩情形 奏
報在案入秋以來河水來源奇旺加以山泉併發刷底淘根異常剽悍經臣嚴飭工員加意防守迨節交白露
以後水勢忽又增漲險工林立幾於防不勝防如上游之雙合嶺大小高寨岳莊莊國莊孫樓中游之北店
子楊莊老徐莊小營莊河套圈陳孟二圈王家梨行胡家岸辛興店黃陸崖南壇王家客桃園溝陽莊葛家店
鐵匠莊濟陽東關下游之西馮家唐家歸仁鎮馬張家菜園茶家嘴鹽窩蝎子灣道旭圈董家十莊佛頭寺王
家院甯海等處俱因大溜沖擊或埽壩整陷或隄身坍塌均經廂築穩固其尤險者上游臨黃民埝上段李橋
對岸沙嘴挺生逼溜北趨迤下羅莊陡出新險坦坡刷坍殆盡隨即添築後舡搶做柳壩方得無恙中游濠口
以溜勢上隄埽壩紛紛蟄動夏間雖已添砌石壩仍不足恃此次又增建石壩三道席家道口情形相同亦添
做柳壩五道皆得以抵禦湍溜下游白龍灣地勢坐灣淤灘全行刷去添作磨盤新埽二段土壩基三道牛王
莊磚壩前之碎石衝塌入水同張肖堂之淤灘各刷坍數十丈水逼隄根均立時廟柳拋石並添做護沿石埽
數段始免續塌綜計以上各工十分危險經各該督辦督率在工員弁一律搶護平穩並據先後稟報前來臣
查山東黃河前二十年中雖間遇連歲安瀾而頻年告決甚至一年數決者居多河患本無一定祇視人力爲
轉移積久生疲人情習慣或以年年順軌爲常有恃無恐人力偶懈害即隨之臣到東後有鑒於茲查悉前
已三屆安瀾不勝消長循環之懼竊以淤高之河腹積朽之埽根年復一年皆足爲工程致病非恃人力則病
莫能治屢經檄飭通工文武諄諄嚴誡及此迨七月二十一二等日沁河共漲七尺四寸萬錦灘亦復迭次報
漲豫電頻來胆幾摧碎旋值大雨滂沱歷兩晝夜之久又有長清等縣之沙河坡河狼溪河之水同時暴漲曲
折串入黃河河水陡長至三四尺至七八尺不等爲多年所未有驚濤駭浪拍岸盈隄岌岌可危者以中游濠

口為最該處距省城僅十餘里門戶攸關發生巨患大局何堪設想其餘紛紛報險絡繹於途凡工員棘手之時皆微臣困心之地若不迅決機宜拚力抵禦恐於三載安瀾之後必有一方失事之憂何以上對朝廷下對黎庶每念及此寢饋難安只有勉措工需相機應急一面分馳電檄嚴飭工員放手搶辦並明示賞罰用資勸仍多派親信可靠之員隨處查察諭俟霜降以前臣必親歷覆查藉覘實際幸在工人等萬眾一心無論風雨晝夜均能不顧性命爭安危於呼吸卒使瀕危處所皆得化險為夷臣現在通勒全河博詢輿論每遇坐灣頂沖凡走埽坍塌之處經在工人等指點當日搶護情形猶歷歷如繪而奇險之中游濠口下游張肖堂等處所有添建石壩暨護沿石埽鈎連櫛比壁壘一新尤想見運石之多施工之猛實在安危異狀事後且喜懼交并則當日胼胝之苦與全河工作之勞更非奏疏所能詳譬苟非人力足恃則河患未知如何如今財政窮於往歲竟能四屆安瀾實非臣初念所及此皆仰賴 皇太后 皇上福庇 河神效靈臣欣幸之餘冰兢倍凜相應懇 恩頒發大藏香並 御書匾額一方由臣祇領虔詣 大王廟懸挂祀謝以答 神庥在工各員每屆霜清無不仰叨 恩旨本歲躬蹈危險力與水爭自未便沒其勞動除將出力員弁彙案保獎外其尤為勤奮出力之員應先照章請 旨給獎以昭激勸合無仰懇 天恩俯准將花翎二品銜分省試用道鄧際昌請仍以道員分省儘先補用並 交軍機處存記指分江蘇補用知府施炳燮請免補本班以道員仍歸原省補用並加二品銜濟南府同知黃篤瓚請以知府在任候補並加三品銜四品銜山東候補直隸州知州周忠清請免補本班以知府仍留原省補用四品銜直隸州用本班先教習補用知縣蕭方駿請歸候補班補缺後免補直隸州以知府補用試用知縣方家永請免補本班以直隸州知州仍留原省補用並加四品銜候補縣丞寶立身試用縣丞汪廷尙陳緒曾均請免補本班以知縣仍留原省補用留直補用副將何東來請免補本班以總兵 記名簡放出自 鴻慈現在水已歸槽通工平穩仍飭在工文武隨時認真修守不准稍涉大意至來歲修防事宜應如何布置妥協容臣悉心詳籌另行 奏報所有節交霜降黃河普慶安瀾緣由謹恭摺由驛馳陳伏乞 皇太后 皇上聖鑒再此摺臣行次青島拜發合併陳明 謹 奏光緒三十四年十月初三日奉 硃批另有旨欽此

山東巡撫袁樹勛奏巡閱河防抵省日期片

再臣前以巡閱河防海疆等事當於九月初二日 奏報帶印出省是日即由陸路歷泰安兗州濟甯曹州一帶接見文武印委詳詢民事密察吏治查閱防營隨處認真考究尙幸地方安謐民氣緩和行至上游買莊乘舟而下查勘險要各工十五日抵中游濠口暫回省城會晤督辦津浦鐵路大臣尙書呂海寰以鐵路建橋地基商推數目業經會 奏在案二十一日臣仍由濠口登舟接勘中下兩游工程抵利津縣黃流入海之處而止綜計三游工段均尙穩固已於安瀾摺內陳明仰邀 聖明洞鑒臣復督飭三游總辦道員妥籌來歲修防所有各段險工應如何預爲布置容俟擬定辦法再行詳細具 奏河工勘竣由利津遵陸至周村乘火車至青島改坐輪船由威海而至烟台察看海疆一切情形先後會晤駐膠德國辦事大臣駱任廷及駐烟台國領事均屬優禮歡迎益徵敦睦各該州縣及華商等皆於謁見時備查政界學界商界力求整頓並歷舉朝廷明詔求治殷殷全在官爲提倡士商承風藉以預善人才振興實業無不同聲額手感戴 皇仁臣聞見之餘實深欣慰即由烟台乘舟折回青島仍坐火車於十月初五日抵省此次水陸奔馳總以減少騎從勿擾地方爲主計行程一月經過州縣兩澤應時麥已晉種堪以仰慰 宸廑謹 奏光緒三十四年十月二十二日奉 硃批知道了欽此

山東巡撫袁樹勛奏豫籌黃河辦法擬請加培堤工添撥經費摺

奏爲豫籌黃河辦法擬請增購石料加培堤工並添撥經費恭摺仰祈 聖鑒事竊臣上月查勘黃河工程曾於回省後計及河內創建鐵橋擬將來歲修防事宜詳細妥籌辦法業經奏明在案誠以河流善變全在思患豫防山東河窄險多較豫省倍難修守兩岸一縷沙堤專恃埽壩爲保障而埽壩悉資稽葺持久殊難非因大溜怒沖易致塌陷即經歷數年鈔朽仍須更新費款費工至無窮盡惟有拋石護埽砌石成壩最足以禦狂瀾而資經久然堤堰過形卑薄雖埽壩石工林立僅能藉捍湍流不能保無漫溢非加高增厚亦不足以固茨防從前河患

之多姑無具論卽光緒二十八九年間已三見漫決前升任撫臣周馥統籌全河曾於分年籌辦河患摺內估計培堤經費銀二百萬兩嗣因款絀未辦始奏請常年磚石經費分撥三游擇要拋護連歲四慶安瀾臣謂磚石之功居多臣前次巡閱河防周歷千有餘里每遇險要工段督同三游總辦逐細履勘推求利病竊見迎溜頂衝處所凡用磚石護掃及砌成石壩者類能屹立洪濤足資抵禦第限於經費無多未免顧此失彼仍宜抱定宗旨擴充石工則加鑲積料之資卽可遞減以後每歲綜計節省尤鉅惟堤堰無二百萬大修之費雖間年撥款加培漸覺殘缺改觀而小補尙不足恃總由河面過窄堤身過低河則愈淤高堤則旋旋旋刷橫流撼削兼之風掃雨淋卑薄之形日益加甚一經巨汛每多水與堤平若仍循舊例修防尙不能恃無恐況來歲非往年可比不得不先事豫籌蓋津浦鐵路橋工已定基於中游濼口該處河面連旱灘寬不過三里其橋柱矗立中洪恐冬令水凌擁擠夏秋汛水抬高種種實多阻力臣前與督辦津浦鐵路大臣尙書臣呂海寰籌議會奏凡緊靠鐵橋壩堤雖由鐵路局酌加修築然祇爲堅護路工起見至距橋較遠之工程責在三游總辦通籌全局則臣以橋柱橫河各游亦高有後患在橋以上沿至上游患在水以遇橋攔其來源難以暢消卽隨處啓盈槽之漸橋以下沿至下游患在水以過橋停滯其去路不能速下則緩流卽積淤之基但在水小時雖致病或不覺其重若驟來盛漲不惟中游受困在先卽上游亦以盈槽懼溢下游亦以積淤難容恐新險環生各游均所難免然則如何爲計則莫如增購石料加培堤工庶可收有備無患之效舍此則別無良策臣督同各總辦切實商籌三游情形不同尙須酌分辦法中游距山尙近宜於全用石方上下兩游距山較遠運石較艱祇有擇要拋石護掃量爲多增石壩其最遠地段仍各就原設磚窰多燒大磚以濟石料所不及至加培堤工上游地段較短中游稍

長其最長者爲下游又以徒駭入海尾閭漸次淤墊較上中游尤形卑薄卽無鐵橋阻礙而加培亦斷難延緩當飭各總辦分別詳細履勘卽將三游所需購石培堤兩項核實確估除額撥續撥防汛搶險各經費外至少約共需銀十萬兩茲據詳請具奏前來臣覆加查核參以前次親勘情形固因勢利導之要工亦未雨綢繆之要鍵所需經費俱係撙節估計無可再減應准照擬辦理明知時事艱難財政奇窘既不敢動用部撥年例各款本省工捐已停亦復無從籌撥然黃河爲東省命脈所關何敢以工需無出致令疏於人事自取因小失大之愆再四思維祇有就本省藩運兩司庫竭力設法挪湊以濟要需相應仰懇 天恩俯准 敕部作正開銷乘此冬令水小以及來歲春融卽將各項工料及時興辦臣仍當隨時督同認真經理工竣核實報銷現正裁汰冗員嚴除浮費斷不准稍糜工款以重帑藏所有豫籌黃河辦法擬請增購石料加培堤工並添撥經費緣由謹恭摺具陳伏乞 皇上聖鑒訓示謹 奏光緒三十四年十二月初二日奉 旨該部議奏欽此

山東巡撫袁樹勛奏諮議局籌辦處需用經費遵章籌款撥用片
再山東省設立諮議局籌辦處所有開辦情形業臣恭摺具奏並聲明需用經費遵照定章籌款撥用在案查諮議局章程第十章第五十三條內開諮議局經費由督撫籌措專款撥用其款目一爲議員旅費二爲議長副議長及常駐議員公費三爲書記長以下薪金四爲雜費五爲豫備費又第五十四條內開前條公費及薪金數目由督撫定之等語惟現在遵設之籌辦處所有辦事人員公費薪金及各州縣選舉經費司選員夫馬薪金並諮議局建築各費皆在諮議局未成立以前籌備所必需經該處在事官紳公同豫算格外撙節計自開辦之日

起至明年八月止辦事人員公費薪金及雜費活支各款需用銀九千餘兩各州縣選舉經費仿直隸辦法由該處籌給以免藉端斂派計山東初選舉州縣一百零七處每處給銀一百八十兩約需銀二萬兩又山東十三屬每屬派司選員一人概不受地方供應自任事之日起明年復選舉事竣為止每月給薪金夫馬銀六十兩以十個月算約需銀七千八百兩以上三項共需銀三萬九千餘兩又建築諮議局所亦爲用款之一大宗查中國向無民選議院諮議局爲議院基礎一省觀瞻所繫大格惟輪自應求其樸實而不求其華美惟房舍形式必適於議事之用加以常駐及辦事各員列屋而居規模又未便過狹亦由該處核實豫算連同購地約需銀四萬兩此實無可再省并計前項共需銀七萬九千餘兩其略有特別支項不能豫算者屆時一併核實報銷飭由布政使朱其煊遵章籌措茲據稟稱此項經費在節省運河經費銀內撥用將來諮議局成立應需之款卽逐年在此項內動支不再挪作別用以免另籌而資挹注詳請 奏咨立案前來臣覆核無異除分咨查照外謹附片具陳伏乞 聖鑒敕部立案施行謹 奏光緒三十四年十二月十四日奉 旨該部知道欽此

山東巡撫袁樹勛奏參戒煙不力各員摺

奏爲專案參劾戒煙不力各員以清仕途而祛沈痼恭摺仰祈 聖鑒事竊臣恭讀本年十一月二十三日 上諭各直省督撫司道均有察吏之責尤當振刷精神爲民造福所屬人員必須認真考察秉公甄別等因跪誦之餘莫名欽悚夫精神者事實之母也吾國近數十年鴉片流毒一染嗜好則精神委頓爲積弱一大原因而歲出漏卮不可殫計積弱生貧積貧愈弱形狀佻怯何論精神然則欽遵 諭旨力求振刷舍厲禁鴉片其道奚由前准禁煙大臣咨送奏定章程及各項表式迭經分別示諭通飭一體遵行煙館則定期封閉吸食則勒限減

除土店則嚴飭限制不准增開煙地則清查改種並於遼東調查選舉之便將種煙及賃田與人種煙各戶咨明憲政編查館削奪其選舉公權爲拔大塞源之計又於省垣設立禁煙公所訂擬查驗官員戒煙辦法檄飭布政使朱其焯等總理其事濟南府知府張學華候補知府朱猛爲提調自開辦至今分期調驗節經臣嚴詞督飭不准稍涉欺朦仍暗訪明查無論實缺候補各員苟才具尙有可取而形跡不無可疑者必諭其如期戒斷敢濯自新其年老頹唐已無戒斷之望則風其無再戀棧貽玷官箴數月以來有志振作陳明斷戒者固不乏人而巧爲掩飾沈痼自甘者所在多有蓋平旦之氣旣已怙亡心死之哀不可救藥此輩卽身膺民社斷難望其自新新民爲地方造福恭釋一家一路孰輕孰重之識旨實未便稍予姑容致妨要政查有山東武定府同知蔡恩榮署蒲台縣知縣候補知縣龔敦仁正任金鄉縣知縣署陽信縣知縣陳冠正任霑化縣知縣鍾樹森館陶縣典史韓瑋森以上五員係實缺人員煙癮旣未斷淨聲名亦復平常精神萎靡辦事竭蹶應請革職候補知府穆文開候補同知李友鑫候補通判楊浚基候補知縣徐受謙兆蘭張祖謙郭鴻賓王乃禎實乃漢劉邦彥候補府司獄錢煜齡候補鹽大使朱光翼試用從九品楊慎修候補典史史書雲試用典史楊維翰候補守備高岱齡張殿英以上十七員均屬嗜好甚深戒除不力張殿英一員結稱並無戒完其餘各員或巧爲掩飾或情形顯著現逾限已久戒斷無期請一併革職黃乃漢劉邦彥二員曾充禁煙檢查委員有意欺朦大負職守應請永不叙用候補知府唐式郁荆震生候補知州謝端候補通判孫震候補知縣范文華姚近曦候補布經歷陶元錦試用縣丞王毓萃試用典史郭慶溥以上九員煙癮未除精神短少請以原品休致候補知府謝錦甲候補直隸州知州陳爾延以上二員沾染嗜好不知振作應請勒令回籍事關禁煙要政於吏治前途極有關係敬分晰臚陳

請 旨辦理此次奏劾之後臣仍當督率屬僚認真訪察一面將各項表式彙齊咨報戒煙大臣查考惟東省地方遼闊此次調驗官員雖分省內省外兩種辦法深慮耳目未周或掩飾於一時或已戒而復吸臣惟有預戒屬僚決不以出結咨報在先稍存迴護於後仍當隨時查察據實糾劾以除酖毒其減種煙地據各屬稟報今屆統計確減十成之六期於明年改種雜糧一律禁絕土膏店舖亦有減無增各屬戒煙人數尤視上年銳減仍一面設法推廣戒煙會社勸諭貧乏編氓實力斷戒期於減一游惰之民即增一富強之望而此事樞紐全在地方官長嚴爲督率官不自治何以臨民民且自弱何以強國今既迭奉 諭旨斷不容姑息愛人內煩 宵旰之勞一夫時虞不獲外啟列邦之侮十年致有煩言微臣目擊時艱責無旁貸所有籌辦東省禁煙事宜並奏劾戒煙不力人員緣由謹繕摺具 奏伏乞 皇上聖鑒訓示再所遺各缺東省現有應補人員應即照章叙補合併聲明謹 奏光緒三十四年十二月十六日奉 旨另有旨欽此

山東巡撫竟樹勛奏創設圖書館等摺

奏爲東省創建圖書館並附設金石保存所以開民智而保國粹恭摺仰祈 聖鑒事竊據署提學使羅正鈞詳稱求學無古今之殊藏書有公私之異儒修勳稱稽古而致用則尤貴通今收藏私諸一家而官書則公之天下惟是列朝藝文之志 天府四庫之儲瓊琬琳瑯浩如煙海邇自五洲交通新理日出無人不由於學無學不各有其書東西列邦莫不競設圖書館博物院高樓廣場羅列古今縱人觀覽稱爲智識之輸入品良以學堂教授既有專門而參考之書則必藉公家之力廣爲儲藏以遺餉於學者迭奉學部頒定學務官制權限暨教育會章

程皆以設圖書館爲要務比年直甯湘鄂各省已先後報立規模漸啓山東乃聖人桑梓之邦爲我國數千年文明所自出經師之傳注衣被方來金石之留遺甲於寰宇而濟南省會之區圖書之府缺焉未備雖聊城楊氏海源閣之著錄福山王氏天壤閣之收藏輝映後先足徵文獻然地既拘於一曲力復限於一人且秘籍非世用所必需而借覽尤主人所深惜靈光雖耀無裨儒林現擬參照各省及各國藏書便覽之法設立圖書館一所首儲四部之善本兼收列國之寶書將以通新舊之機緘非僅侈觀瞻於耳目儲藏必須擇地建築尤貴適中開辦既需鉅資常年宜籌經費當此公項維艱不敢另請專款擬就學司衙門歲入的款量加樽節以成此舉並就公地建屋以省購地之費查府城中學堂東偏有貢院隙地一區背湖面山開朗適中方廣二十六丈計爲樓十二楹前列廣廳足敷藏書及閱覽各室之用就中附設山東金石保存所凡本省新出土之品與舊榻精本博訪兼收以表山東古文明之特色免鄉氓無識者之摧殘亦存國粹之一端也至於購備圖書現苦才力不足一時未能求備擬自本年爲始按年採辦積以歲月不難蔚成鉅觀所有營造圖樣及藏書閱書章程另案具報等情詳請具奏前來_臣查山東自學務改革以來雖日漸開通而學術究未能精粹良以殷殷向學者寒士居多鴻篇巨冊購置爲難教授既有專書參考尤資群籍是圖書館之設誠爲必不可緩之需該學司受任年餘經營學務不遺餘力此次請立圖書館附設山東金石保存所實屬深得要領復以東省財政奇絀所有應需建屋購書各費該學司悉於歲入學務款內逐年樽節而出均不另請專款虛時局之艱難誠熱心於教育裨益良非淺鮮除咨部查照外謹恭摺具陳伏乞 皇上聖鑒敕部立案施行謹 奏宣統元年二月初三日奉 硃批學部知道欽此

山東巡撫袁樹勛奏籌辦地方自治設立研究所情形摺

奏爲遵章籌辦地方自治設立自治研究所開辦情形恭摺仰祈 聖鑒事竊臣恭讀本年

正月二十七日電傳 上諭前經憲政編查館奏定頒行分年籌備事宜本年各省均應舉

行諮議局選舉及籌辦各州縣地方自治設立自治研究所選用公正明慎之員紳一律依限成立各等因欽此仰見慎重初基鞏固邦本之至意欽佩莫名臣維地方自治誠如原奏名雖近沿泰西實則根荦中古比閩族黨之制燦備於周時三老嗇夫之名僅存於漢世至歷代之保甲鄉約及今各處水會善堂積穀保甲諸事則雖以本鄉之人辦本鄉之事然選舉之法無存把持之患愈亟賢者有塗炭衣冠之懼而自好不肖者煽狐鼠城社之風而路人以目官長誤以摧殘民氣爲賢能人民誤以習慣服從爲安分禮失求野文郁從周斟酌今事窮思變臣於去年冬間卽與司道籌商以爲地方自治施議今日必先知其所難而後知其所便夫愚民烈燄熾於暴秦科舉拘繫始自唐宋政治委靡知識消亡譬如久病痿痺而與之馳驟則厥足用傷甫及含哺而遽餉膏粱則雖茹必吐卽如近數年間教育會商會等其辦有秩序者固日進於文明其貌是神非者或益叢爲詬病此其所以爲難也然天下無無弊之法中人皆可造之才國所與立者惟民民所附麗者惟國三代以上君與民相親故則君自治之文見諸禮運五洲而遙國由民所積故地方自治之制行且同倫今者蒐採列邦商榷舊制將名義範圍經費各節咸納於自治監督之所卽爲城爲鎮爲鄉各區悉蘊爲自治精神之所寄以少數官制之能力鞏衛國家與以多類人民自治之能力保守疆土譬如有中央而護以四方有頭目而捍以手足其爲得失無待著龜此又所以爲便也臣等再三討論遂於上年冬間卽擬定自治研究所章程計東省一百零七州縣每處選派二人到省入該所研究延派嫻習法

政學識開通者分別先任所長及教務各事宜業於本年二月初一日開課並遵原奏責成諸
議局籌辦處兼理地方自治一應籌辦事宜仍派該處司道率同在事員紳認真辦理概不另
支薪水以節糜費一俟養成此項自治人才略有基礎再推行各州縣遵章依限擴充除將自
治研究所章程及職員清單分咨查照外芻蕘之見是否有當恭摺具陳伏乞 皇上聖鑒
訓示謹 奏宣統元年二月二十三日奉 硃批該衙門知道欽此

●又奏籌辦各州縣巡警豫備情形片 再憲政編查館奏定九年籌備事宜清單內載第二
年期各廳州縣巡警年內粗具規模一節查上年准民政部咨行奏定各省巡警學堂章程內
開高等巡警學堂各省城須設一處巡警教練所府廳州縣須設一處又高等巡警學堂爲目
前警官需人計得附設簡易科其各省已設有巡警學堂者均按照此次奏定章程辦理並限
期設立由各督撫具奏咨部等語查東省於光緒二十九年開辦警務學堂參照直隸辦法經
前任撫臣周馥奏咨有案三十一年三十二年歷經分派該學堂官班學生及兵班學生赴各
州縣分充巡官教弁等職又光緒三十二年經前升任撫臣楊士驤奏請於兗曹兩府分設巡
警學堂一所嗣奉部復准其暫行試辦在案臣上年到任後將省城警務學堂逐一考核覺缺
憾頗多非加改良難資任使即查照新章諭飭該學堂改爲高等巡警學堂將已辦各班分別
考驗給憑仍照現行章程另行招考暫定爲正科學額八十名簡易科學額一百二十名次第
招齊即日開課至各府州縣照章須設教練所一處每處至少一百名東省百餘州縣學額將
萬餘名如同時並舉則財力既虞告罄教員亦慮乏材查從前各州縣本派有學生襄辦警務
但學識究未完備擬一面陸續抽換回省使之補習而資造就並在省先設巡警教練所一處
學額寬定在二百名以上現正在招生開課所有職員名目學科等級悉查照定章辦理一俟

省城辦有基礎再圖擴充至兗曹兩府巡警學堂開辦已及三年考察情形殊少成效應俟學生畢業一律裁撤以符定章所有籌辦各州縣巡警豫備情形除分咨查照外理合附片具陳伏乞 聖鑒訓示謹 奏宣統元年二月二十三日奉 硃批該衙門知道欽此

●又奏籌辦各級審判豫備情形片 再憲政編查館奏定九年籌備事宜清單內載第二年期籌辦各省省城及商埠等處各級審判廳法部各省督撫同辦一節查審判一項在吾國舊制皆視爲州縣分內之事其聽訟判決稍稍負神明之譽者大都得之經驗而非有專門之學問譬如醫者用藥以病人之生命爲嘗試必俟其經驗稍多而或有一二之微中以是言之宛滯之能伸雪者殆無幾何在閉關之時州縣以此爲考成終日堂皇不難徐增其閱歷今則世變孔亟地方應辦之事愈多即如九年籌備凡外省所應辦者無一不富責成州縣論學問豈能兼長論時閒亦慮未逮與司道等悉心斟酌欲籌辦各級審判當先養成審判人材然參仿列邦制度揆之吾國情形以一縣設立一審判廳計之每邑分爲刑事民事兩庭每庭推事三人山東百餘州縣需員六百餘人而檢察員及典獄官尙不在內其與此事相需而成之律師陪審等員更無論矣現在新政繁興百端待理不特經費支絀且無如此寬廣之講舍爲同時并進之圖查東省法政學堂開辦已久上年遵照學部畫一辦法業已切實舉行茲將原有之速成班分別認真考驗增益課程改爲司法講習科專爲養成審判員之地新招之講習班亦准此辦理庶幾此項人才稍有萌芽將來逐漸推行不無基礎仍候法部訂章會同辦理所有籌辦各級審判先行豫備情形除分咨查照外理合附片具陳伏乞 聖鑒訓示謹 奏宣統元年二月二十三日奉 硃批該衙門知道欽此

●又奏劾戒烟不力人員請於戒斷一年後量予開復片 再臣恭讀上年十一月二十二日 上諭各省督撫司道均有察吏之責尤當振刷精神爲民造福所屬人員必須認真考察等因欽此竊以近今新政日增在在須得人而理即精神振刷尙有日不暇給之虞況沈溺嗜好使之身膺職守則上好下甚且如疾疫之傳染而流毒無窮况禁煙 嚴詔三令五申在上者以臥薪嘗膽日儆其國民在下者乃酖毒宴安偷生於旦夕天良既昧人格何存故上年十二月間臣於奏報東省禁煙情形摺內奏劾戒烟不力各員以資儆戒經奉 旨欽遵在案查此項戒烟不力各員或由禁煙公所司道所揭陳或由該管道府所稟揭經臣覆核並擇其聲名平常及年老頹唐精神竭蹶者分別奏參其禁煙公所續行調驗人員尙有形跡可疑與跡近規避者並飭藩司覆驗彙詳另行具奏本年正月間曾查明禁煙王大臣在案臣與司道等籌辦此事雖嫉惡之甚嚴亦用心之頗苦揆度情形尙有一得之愚謹敢爲 皇上縷陳者查戒烟不力各員論其藐違功令情罪應入於私惟經此懲創如果痛改前非少則兼旬多或數月自不難於戒斷在奏參之時原祇據其現在本不能計及將來但或年力尙強發憤之餘精神居然振刷是其人之應否錄用似應由各該衙門察看於戒斷一年以後聲叙該員於政治學問或有所長並加其實已戒斷切結咨送禁煙王大臣查核後酌量彙請開復予以自新之路仍杜其倖進之階其原參尙有別項情節如聲名素劣年力已衰者均不在此列除從前陳明戒斷各員 隨時查察儻有掩飾一時或已戒復吃據實糾參外芻蕘之見是否有當理合附片具陳伏乞 聖鑒並敕總理禁煙事務公所核議立案施行謹 奏宣統元年二月二十三日奉 硃批禁煙大臣知道欽此

山東巡撫袁樹勛奏設立清理財政局開辦日期摺

奏爲遵

旨設立清理財政局擇日開辦恭摺具報仰祈

聖鑒事竊臣於宣統元年正

月初四日准度支部咨酌清理財政章程一摺單一分於光緒三十四年十二月二十日具奏奉

上諭前據憲政編查館奏議覆度支部奏清理財政章程當以財政關係重大不厭求詳仍飭度支部妥酌具奏茲據度支部奏稱該館核覆章程增益條文益加周密妥善可行等語方今財政艱難內外交困必以廓清積弊確定預算爲先全賴部臣疆臣和衷共濟各飭所屬共矢公忠按照所擬章程實力奉行認真辦理用副朝廷慎重度支之至意單併發欽此並准刷印原奏章程咨行到臣當查章程第四條內開各省清理財政局設總辦一員以藩司或度支使充之會辦無定員以運司關鹽糧等道及現辦財政局所之候補道員充之又第三十四條內開各省清理財政局所有辦事章程另行詳訂各等因遵卽由臣派委布政使朱其焯爲總辦鹽運使丁達意及南運局總辦候補道陳炳文爲會辦飭令預籌局所並酌派熟悉財政者先將該局應行籌備各事按照部章妥爲布置一俟財政局辦事章程頒發到東再行添派員司依限辦理茲於本年閏二月十二日准度支部刊發清理財政局辦事章程二十七條並恭錄原奏

諭旨咨行欽遵查照派員設局先行開辦等因復經

檄飭該司道等遵照定章分別遴委科長科員並延聘議紳卽日開辦一面札飭善後局給山東清理財政局

木質國防以昭信守旋據該司道等詳稱已於閏二月二十日啟用關防開局辦事呈請具報

等情前來

查東省財政自道光季年

欽差查辦至今六十餘年頭緒至爲繁曠爲一省計亟塞已漏之卮爲全局言共汲方長之綆非得人而理束手益慮其無方倘及今不圖噬臍更悔其何及

惟有會同監理督率屬員導濁流而使清析禁

而就理經國有政聚人曰

財或基于此除飭該司道等悉心經畫開具局員職名清單辦事細則並酌定開辦及常年經費數目由_臣覆核另行咨部備案外所有東省設立清理財政局開辦日期合先恭摺馳報伏乞 皇上聖鑒訓示謹 奏宣統元年三月初五日奉 硃批度支部知道欽此

●又奏推廣旗丁生計各款請作正開銷片 再上年署撫_臣吳廷斌副都統_臣文瑞遵

旨會同 奏籌推廣旗丁生計歲增學堂經費銀一千兩旗營工廠三年經費銀約二萬兩

在案查旗營學堂工廠兩款已於上年分別動支原奏請由司庫籌墊於裁停餉項內陸續扣銷現查此項動支銀兩均係安置旗營閒散子弟無餉可扣原設旗丁額餉一時未能裁停亦無從按年分扣應請作正開銷以便飭司局分認照撥按年造報免致展轉挪移致生疑議據司道會詳請 奏前來_臣覆核無異除分咨外理合附片陳明伏乞 聖鑒敕部立案施行謹 奏宣統元年三月初五日奉 硃批該衙門知道欽此

山東巡撫袁樹勛奏凌汛期內黃河通工防護平穩摺

奏為凌汛期內黃河通工防護平穩恭摺仰祈 聖鑒事竊查河工桃伏秋三汛固屬緊要而凌汛期內尤宜加慎嚴防東省河長一千餘里上下游寒暖不齊封凍既有後先解釋即難一律近年往該漸淤尾閘不暢一遇上游冰泮下游去路不暢水勢立見抬高且河形灣曲甚多冰塊擁積最易剝傷壩壩在在堪虞上年臘月下旬入氣嚴寒雨雪交加遂致全河凍結經_臣嚴飭工員多備攪淺排木及敲凌器具並飭各總辦常川駐工督率兵弁實力核過小心防守嗣據各游總辦稟報上游於立春前冰凌消化河水陸長八尺有奇各段壩壩均形吃重中游水尤狂悍冰塊非常厚大險工處所岌岌可危下游地近海邊奇冷異常正月初旬間天氣陡暖上中游冰凌下注擁塞河中水勢抬高九尺各工紛紛出漏均經營委各員竭力搶堵堅實厥後東風屢作下游全河始見解通冰塊滿河勢如山傾極折據凌不及幾至擁上隴巔情形十分危險如蒲兩營之三合莊道旭王旺莊利兩營之圍董家佛頭寺甯海青兩營之蝎子灣大道王利北營之牛王莊宋家集津北營之

劉家夾河王莊惠北營之唐家歸仁鎮白龍灣濱北營之清河西小崔家張肖堂等處塌壩被淹擦損十居六七而三合莊險情尤重走塌兩座擦損二十餘座齊兩營情形較輕而梯子壩裏頭塌四段均被擦毀勢亦險極臣函電交馳指示機宜並派員隨處密查協力補救幸賴在工文武各員弁不避艱險無分晝夜隨時拚力搶護始得轉危為安現在凌汛期過全河工程一律平穩堪以仰慰 宸廑臣仍當督飭工員趕將殘缺塌壩修補整齊並加培春工添購石料遵照去冬勅籌奏明辦法切實興作不准稍涉草率以資抵禦而重河防所有凌汛期內黃河通工防護平穩緣由謹恭摺具 奏伏乞 皇上聖鑒謹 奏宣統元年三月初九日

奉 硃批知道了欽此

●又奏已革海州直牧恩芳等河工出力請開復原官片 再已革江蘇海州知州恩芳經江蘇巡撫臣陳啟泰以性情乖謬等語 奏奉革職又已革湖北光化縣知縣歐陽養由前盛京將軍臣趙爾巽調赴奉天經調補郵部尚書前東三省總督臣徐世昌正任奉天巡撫臣唐紹怡以居心巧詐等語 奏奉革職上年四月臣撫東後時當伏汛河兩萬錦灘沁河等處相繼漲水二丈有奇東省地處低窪疊出險工正在需人搶護適該革員等措資北上道渴濟雨來謁深悉熟諳河務辦事實心即截留工次以資贊助均經先後 奏明奉

旨允准在案即經欽遵分派稽查三游隨同搶險當秋汛增漲之際中游深口溜勢上堤塌壩紛紛墊陷適恩芳稽查刊此協同搶建石壩三道並於席家道口添做柳壩五道得以抵禦湍溜下游張肖堂淤灘坍塌刷數十丈勢正危急適歐陽稽查刊此協同搶護沿石埽數段始免覆塌該員等竟能躬蹈危險不辭勞瘁一律搶護平穩克奏安瀾迨至凌汛下游之唐家歸仁鎮及三合莊梯子壩各段因上游解凍冰塊下駛填塞滿河水勢陡漲八九尺竟將檣凌椿樁截斷擠散凡埽壩擦損及各座墊走之處幾至失事該革員等相機分投協同各汛員弁隨時設法搶救得以化險為夷實為異常出力據各該總辦道員稟報前來臣查該革員等服官江鄂頗著政聲委無實在賊私劣蹟今在河工効用尤能艱辛不避力與水爭既屬異常勤奮堪蓋前愆恭讀宣統元年二月初二日 諭旨所有光緒三十四年以前緣事降調革職已未錄用文武各廢員著該部查

明事由總單呈覽等因欽此仰見 朝廷鑒念廢員激動人才之至意欽佩莫名值茲時事奇艱需才孔亟凡有一技之長無不上荷 聖明垂鑒錄用况如該革員等才具優長實心任事現又在河工充當要差著有異常勞績若竟令其終身廢置更爲可惜合無仰懇 天恩俯准將已革江蘇海州直隸州知州恩芳已革湖北光化縣知縣歐陽燾均開復原官升階銜翎仍發回各原省補用並免繳捐復銀兩俾昭激勸出自逾格 鴻慈 爲愛惜人才起見理合附片具陳除咨吏部查照外伏乞 聖鑒訓示謹 奏宣統元年三月初九日奉 硃批恩芳等均著留於河工効力俟續有勞績再行請旨欽此

山東巡撫袁樹勛奏設立幕職分科辦事摺

奏爲遵 旨設立幕職分科任事恭摺具陳仰祈 聖鑒事竊 臣恭讀光緒三十三年五月二十七日 諭旨各省新官制由督撫體察情形請旨辦理等因欽此欽遵在案查原奏清單第五條督撫衙門幕職內開秘書員參事分掌機密摺電及各項文牘事簡者一人兼任三科以下之事統由各督撫自行徵辟無庸拘定官階大小分別奏咨並應酌設助理及繕寫人員各等語 臣惟幕職之稱由來最古漢李廣幕府省約文書籍事爲幕職之濫觴古者將軍謂之幕府以兵門合施帷帳故有此稱厥後以襄辦文書者謂之入幕亦沿用幕府之稱稍稍歧矣或更以秦漢以來自辟曹操當之則尤有別蓋曹操有爲主官直接民事者而幕府則否原奏章程自行徵辟略如古之曹操掌理僅止章奏文牘則略如古之幕府秘書參事名雖異而地位則同設立伊始必名正而後言順不可不審也遠者勿論近數十年來中興名臣或起自幕府蓋本其平昔之學問而加以文牘之經驗事變錯隕瞭然於心目所差者未身臨辦事之一境耳一旦直接辦事上之經驗行其所習沛然若決江河矣其亦有經驗深徵辟

之以備顧問尤獲疑難質問之益此幕府所以爲培養政治人才之地而今日分科任事尤必不容緩者也惟原奏章程在九年籌備清單未頒以前與今日情形少異謹釋酌量變通之

諭旨自應隨地隨時量爲參酌山東密邇畿輔輪軌交通風氣日臻發達各項文牘倍繁於前到任將及一年就現行事實酌定名稱職掌如機密摺電函牘非一人所能兼顧擬設祕書員二人仍就其所長兼他科事務其參事照章應分十科事簡得以兼任擬暫設參事員三人並舊有之刑名錢穀爲五人分科兼辦茲將分別徵辟委派人員謹爲 皇上縷陳之查江蘇補用道施炳燮秉性忠純風骨迥上前在兩江總督幕府垂三十年與兩江督臣劉坤一尤深契合如拳匪之亂保全東南和平日俄之戰上海嚴守中立該員竭誠贊畫血性過人尤熟於條約稅則辦理交涉因應咸宜服官江蘇心折最久上年到任即延該員入幕掌理機密函電籌商各項要政深資得力又坐補河南唐縣知縣前翰林院庶吉士沈同芳壯歲辭官在籍力任義務如奏辦之蘇省鐵路公司江蘇教育總會皆艱難締造該員以文字助其發揮明通正大切理鑒心時論翕然維時在蘇松太道任所兼漁業公司監督延聘該員編訂漁業歷史派員携赴義國賽會獲最優等之獎品文字與實業見重海外如此嗣隨同赴廣東查案討論諮詢益資贊助上年創設山東諮議局籌辦處即延派該員爲參議並在幕中參豫各項新政掌理機密章奏電牘深中窾要以上二員知之有素均擬派爲衙門祕書員施炳燮兼交涉科參事員沈同芳兼學科郵傳科參事員又近來新政日增各部院通行章程多有延派法政人員分別辦理之語上年籌辦諮議局及地方自治並改良巡警清理財政及於法政學堂附設司法講習科爲養成審判人才之用先後延派廩貢生黃敦傑附生方

表分別籌議循序進行該員均在日本法政畢業中學極有根柢新政尤能會通經辦諸務并非有條熱誠奮發不避勞怨黃敦懌擬派爲度支科兼法科參事員方表擬派爲民政科兼農工商科參事員再從前各省督撫以至州縣衙門均有刑名錢穀兩席在閉關時代日行公牘範圍止此大小相維亦具有條理今新刑律既未實行則法科之屬於舊刑律及禮科應辦事宜仍由刑名辦理吏科職掌遺除並度支科之沿用成法者仍由錢穀辦理用其所習此應變通者也又山東河工特殊於各省非嫻習情形恐滋隔閡營務一項登萊青既接海疆曹克濟又素稱強悍掌理文牘自以熟手爲宜查有分省補用道郭際昌在東多年局面安詳辦事勤慎擬派爲河工科兼軍政科參事員河工在原章十科以外此亦應變通者也至於照章應設之助理繕寫等員查衙門向設文案處從前委員多至五六十人自到任減至十餘人加以繕寫各員尙不及二十人照章毋庸奏咨仍由量材分科委派總期有一人得一人之用兼任者概不兼薪以上各科當隨時督察整理將來鼠事之繁簡酌派入數之多寡仍照章按年分別奏咨備案抑尤有進者原奏章程祕書參事各員不作爲官缺且美其詞曰徵辟曰保薦簡擢皆所以示別於屬僚也唐臣韓愈送石洪赴河陽幕府序有撰書辭身屬幣之語其禮節可知當時士人以受辟爲重方今官場流品日消僅留此幕職徵辟一途爲志士長揖之地前湖北巡撫胡林翼謂自督撫以至州縣幕中皆應有嚴重通經術之人日侍左右使匪僻之心無自而生竊師其意恪守徵辟名義不以輕獎之禮待人冀有嚴重之效及我惟鄧際昌一員係曾任山東實缺人員已札委在先其施炳燮等均經先後延訂入幕分派辦理所有遊設幕職分科任事情形除咨外理合恭摺具奏伏乞

皇上聖鑒訓示謹

奏宣統元年三月十四日奉 硃批該衙門知道欽此

●又奏署內設籌備憲政考核處等片 再臣衙門遵設幕職分科任事自係爲各專責成起見惟憲政籌備期內必應有總匯之區以便隨時考核近直隸總督楊士驤奏請在署內設憲政籌備處奉 旨欽遵有案 惟京師憲政編查而既設考核專科則各省督撫衙門必應設籌備憲政考核處即由幕職中之辦理此項憲政者到處分別考核未辦者促其進行已辦者核其成績不另刊闕防應行文贖山 隨時總核施行蓋此爲署內一機關部不應再有文牘申轉之煩也酌派委員數人掌理庶務編輯繕寫等事以歸簡易而節糜費又一省之中幅員遼闊州縣繁多其交通未便之區日行公牘輾轉稽延亦爲進行一大阻礙茲擬在該處附設山東官報凡關係憲政事件分晰詳載札發各屬閱行在各該屬員奉到此項官報之日其事尙未接有公文者即以官報爲憑以期迅捷除另擬章程分咨開辦外合先附片陳明伏乞 聖鑒訓示並敕憲政編查館備案施行謹 奏宣統元年三月十四日奉 硃批憲政編查館知道欽此

●又奏設立製造理化器械所片 再據署提學使羅正鈞詳稱竊查山東高等學堂所用理化器械向係膠州商人下立璜所製經用彌年咸稱便利因高等學堂西偏間房設立工廠名曰山東製造器械所責成該商丁立璜承辦該商精於藝學深願効力公家富與訂立攬據於學務經費樽節之款分期撥發以爲開辦之需並添雇工師購備應用材料選徒傳習經營數月成器日多縷計該廠所製如力水氣熱聲光電化諸門新式器具分別都居繪印圖樣呈請查照光緒三十二年八月學部通行各省獎勵製造教育用品章程准將所製物件傳知各學堂一律購用以示提倡而資鼓勵等情詳請具 奏前來 查理化器械爲格致學科實地試

驗所必需各處學堂類多購自遠方耗費甚鉅現在東省自行設立專廠所製器械極日親加試驗物美價廉確占優勝將來各學堂一律購用於推廣教育之中隱寓土物心誠之意似於教育用器實業前途均不無裨益除由日隨時督飭認真經理並將圖冊咨部查照外所有山東新設製造理化器械所緣由理合附片具陳伏乞 聖鑒敕部立案施行謹 奏宣統元年三月十四日奉 硃批該部知道欽此

山東巡撫袁樹勛奏東省辦理禁煙情形摺 併單 聖鑒事竊日恭讀宣統元年二月二十四日奉 旨據實覆陳恭摺仰祈 聖鑒事竊日恭讀宣統元年二月二十四日奉

上諭禁煙一事乃今日自強實政教養大端於衛生足民興地利寒漏冠各節皆有極大關係特是禁吸禁種及籌款抵補洋土藥稅釐三事相爲表裏禁煙大臣民政必度支部各省督撫將軍都統各分權限各專責成將如何辦法自行切實覆奏各等因欽此仰見 朝廷銳意圖強作新民氣之至意 臣竊維禁煙固鑿固以禁吸爲歸宿而入手辦法禁種亦爲最要蓋奪其所恃以救其所溺也查東省種煙地畝以兗沂曹濟四屬爲最固由豐粟利厚倍蓰稻粱而習染風從相率私種幾於無地蔑有則又以近接蘇豫都爲著名產土之區故除武定一府地濱斥鹵土性不宜雖登州枕海環山砂石相錯亦復多有種者其餘如濟甯東昌泰安臨濟青州萊州膠州種者亦居十之四五崎零錯雜分析尤難本擬按照部章分成減種因諸多窒礙於上年十月間通飭一律禁種旋據濟甯金鄉單縣滕縣四州縣先後稟稱均係多種春收爲時較晚不及改種若遽概令創毀不會紹其衣食不得不爲民請命各等語查所稟尙屬實情且兗曹素多盜風民氣強悍教堂林立真一別滋事端亦不可不慮因即

批飭查明實係畸零貧戶酌量辦理仍以切實禁種爲宗旨並令取具種戶本年收割後不致再種切結及里區長如有私種甘同懲罰保結一面由口擬定清查煙畝表式札發各屬無論向種現種令將區域姓名畝數切實填註本年閏二月在候補州縣中揀派樸實耐勞者五十三人就表開畝數多寡一縣一人或兩三縣一人分赴各屬按畝親歷履勘並爲定其考成分別獎罰各該員咸知所勸均能實心任事僻壤荒陬無一處足跡不到兩月始據稱除濟甯等四州縣外確已禁淨一律改種五穀並各取具切保各結在案此後即嚴飭各州縣隨時稽查倘再有私種情事定當照部章欺飾處分立予懲處光緒三十四年六月冊查東省一百零七州縣種煙者七十六州縣共八百六十九頃三十七畝有零本年僅濟甯等四州縣尚有煙地合計已不及二百頃約已減四分之一此歷辦禁種實在情形也禁吸一事官員爲斯民表率本當從嚴所有東省實缺候補投効文武各員節節督飭所屬遵章取具印甘保結互相稽考並予限六個月有愆者責令斷戒復經臣按照禁煙大臣調驗章程在省設立官員調驗所派員專司其事無論有愆無愆概令入所調驗三十六時以杜取巧規避等弊在省司道大員及實缺文武各官由臣親偕入所一律查驗以身爲率俾昭大公省外實缺候補各官卽由該管道府就近查驗並取具印甘保結送所有形跡可疑者卽行分別札調入所查驗自該所設立至裁撤通共調驗文武各官三千零四十八員除將冊結咨送禁煙大臣外凡嗜好甚深並巧爲掩飾各員均經臣特奏奏在案其餘因公出省或有事故各員人數已屬無多隨時由藩運兩司認真調驗分別詳辦學界軍界卽責成各該管長官實力檢察倘有沾染嗜好之師生及兵役人等立即斥退不稍姑容又如各該衙署局所之幕友書差並在官人等一律切實嚴

查勸懲互用務期各有實際至商民人等五方雜處稽察尤難惟部定吸戶牌照立法甚善既可分年遞減且憑此買煙吸戶亦易於區別因飭各州縣酌留官土膏店一、二家責令承領營業憑照按年認繳照費無照者即係私設查出立時封閉其餘如開燈煙館一項已吸者易於隱藏未吸者易於傳染與售賣土膏店不同且上年到任之始即經首懸厲禁現已全省無一此項營業者他如客寓以及游燕之所開燈供客並製造販賣煙具各肆亦經一律查禁乃一年以來私賣私販之案尙時有所聞益知沉痾太深非一時所能挽拯一面由部擬定清查吸戶表札發各州縣切實查造以爲發領牌照實行按年遞減之計一面通飭各州縣選派紳

於朔望在市集將吸煙之害編爲演說分投勸誡並用淺說白話擬成告示張貼各處以期漸移風俗至戒煙社會得力尤大蓋偏僻貧寒往往欲戒不能醫士良方更不易覓自經設立戒煙社會紛紛赴會領藥或在會斷戒各屬大致相同又飭令實力推廣務期普及現在全省統計官立公立民立共已設有戒煙社會三百四十九處已成五萬五千八百六十六人現戒二萬九千一百二十九人此歷辦禁吸之實在情形也惟是禁煙爲自強要政頻年迭奉諭旨諄諄告戒不啻三令五申政務處禁煙大臣及各部院咨行奏定各項章程亦復至爲完密臣敢不揆遵循照辦理間有因地方貧瘠天時亢旱暫爲酌量之處亦查與年限不逾蓋既欲冀種族之強盛亦不能不恤閭閻之困苦寬其既往卽有以策其將來但使黎庶憐功令之森嚴咸知敬戒不必使胥役藉法網之周密致啟騷擾利害相兼當權其大日惟有督率所屬切實辦理固不敢稍涉紛繁亦不敢略形疏懈總使本年全省禁煙一律淨禁並使吸戶遞年減少由少而無漸進新民於康樂和平以期上紓

深宵宵吁之勞外副列國贊成之意

至於抵補洋土藥稅釐事關軍國要需全在通盤熟籌第苛細之捐既不足以集成鉅款而搜括之政又非所以培養民生如東西各國有所得登記各稅似尙不盡取之於民然亦須俟憲政成立之後方可仿辦目今尙非其時部所擬鹽斤加價印花稅兩項自係大宗足資抵補此外如再有可籌之款可備 聖明採擇 當隨時悉心籌畫專摺 奏陳所有遵 旨覆陳東省辦理禁煙實在情形各緣由理合分按州縣詳晰繕具清單敬呈 御覽爲此恭摺具陳伏乞 皇上聖鑒訓示謹 奏宣統元年四月十五日奉 硃批該衙門知道單併發欽此

謹將山東各州縣煙畝分別禁種前後並各屬戒煙會數目已戒現戒人數分晰繕具清單恭呈 御覽

計開 濟南府 歷城縣 煙地一頃十二畝五分三釐本年禁淨 戒煙會三處已戒二千三百四十人現戒一千二百人 章邱縣 煙地三頃九十九畝五分九釐本年禁淨 戒煙會五處已戒二百三十五人現戒一百十五人 鄒平縣 煙地上年未種 戒煙會一處已戒五十人現戒三十人 淄川縣 煙地二十四畝九分三釐上年冬禁淨 戒煙會一處已戒一百六十人現戒六十人 長清縣 煙地四畝七分六釐本年禁淨 戒煙會九處已戒一百七十二人現戒三十二人 新城縣 煙地十頃十七畝二分本年禁淨 戒煙會五處已戒一百一十一人現戒四百三十人 齊東縣 煙地向無 戒煙會九處已戒三十六人現戒一百一十人 齊河縣 煙地上年未種 戒煙會一處已戒三十四人現戒四十六人 濟陽縣 煙地向無 戒煙會五處已戒四百四十八人現戒五十九人 禹城縣 煙地一頃六十畝九分上年冬禁淨 戒煙會二處已戒一百八十九人現戒十四人 臨邑縣 煙地向無 戒煙會一處已戒六十九人現戒二百七十二人 長山縣 煙地四畝七分六釐上年冬禁淨 戒煙會二十七處已戒二百六十人現戒三百八十八人 陵縣 煙地上年未種 戒煙會六處已戒一百三十一人現戒一百四十六人 德州 煙地

向無 戒煙會一處已戒六百二十七人現戒二十六人 德平縣 煙地向無 戒煙會一處已戒三百十
 二人現戒一百六十人 平原縣 煙地十頃八十五畝二分本年禁淨 戒煙會一處已戒五百七十四人
 現戒一百二十八人 東昌府 聊城縣 煙地十五畝三分四釐上年冬禁淨 戒煙會二處已戒一百七
 十人現戒二百人 堂邑縣 煙地十畝八分上年冬禁淨 戒煙會一處已戒三百八十一人現戒一百八
 十六人 博平縣 煙地一頃九十一畝一分八釐上年冬禁淨 戒煙會四處已戒二百三十六人現戒三
 十二人 茌平縣 煙地六十六畝五分上年冬禁淨 戒煙會三處已戒四百一十人現戒二十五人 濟
 平縣 煙地三頃三十八畝上年冬禁淨 戒煙會一處已戒二百六十三人現戒一百一十八人 莘縣
 煙地二十一畝四分上年冬禁淨 戒煙會五處已戒一百一十二人現戒六十人 冠縣 煙地二十畝四
 分五釐上年冬禁淨 戒煙會三處已戒三百六十七人現戒七十一人 館陶縣 煙地四十二畝五分上
 年冬禁淨 戒煙會一處已戒四百七十二人現戒一百二十一人 高州 煙地上年未種 戒煙會二
 處已戒六百三十人現戒七十四人 恩縣 煙地一頃三十二畝一分上年秋禁淨 戒煙會三處已戒一
 千二百人現戒八十六人 泰安縣 煙地十七頃八十畝五分二釐五毫上年冬禁淨 戒煙會一處已戒
 七百八十二人現戒九百七十三人 萊蕪縣 煙地二十二頃六十七畝七分五釐上年冬禁淨 戒煙會
 一處已戒三百一十二人現戒五百四十三人 新泰縣 煙地五頃七畝六分三釐本年禁淨 戒煙會一
 處已戒二百四十人現戒一百七人 肥城縣 煙地五畝六畝七分本年禁淨 戒煙會一處已戒四千
 二百人現戒三千一百人 東平州 煙地五頃九十九畝四分五釐上年冬禁淨 戒煙會五處已戒二千
 二百二十五人現戒二百一十三人 東阿縣 煙地一頃四十畝本年禁淨 戒煙會一處已戒三百八十
 三人現戒九十七人 平陰縣 煙地五頃十一畝五分本年禁淨 戒煙會一處已戒三百一十人現戒八
 十五人 武定府 惠民縣 煙地向無 戒煙會一處已戒二百十人現戒六十三人 陽信縣 煙地無
 無 戒煙會一處已戒五十人現戒十八人 海豐縣 煙地向無 戒煙會一處已戒四十九人現戒一百

十六人 樂陵縣 煙地向無 戒煙會一處已戒八十一人現戒二十八人 商河縣 煙地向無 戒煙會一處已戒五十四人現戒四十人 濱州 煙地向無 戒煙會五處已戒三百五十人現戒二百九十三人 利津縣 煙地向無 戒煙會二處已戒三百四十八人現戒一百八十八人 濰化縣 煙地向無 戒煙會一處已戒二人現戒九十九人 蒲台縣 煙地向無 戒煙會四處已戒二百五十二人現戒四十四人 兗州府 滋陽縣 煙地二十三畝五分本年禁淨 戒煙會一處已戒三百四十九人現戒一百八十四人 曲阜縣 煙地七十七畝二分三釐本年禁淨 戒煙會一處已戒一百六十人現戒三十三人 甯陽縣 煙地三十一頃三十四畝五分本年禁淨 戒煙會一處已戒三百六十三人現戒二百二十五人 鄒縣 煙地三十一頃六十三畝三分六釐本年禁淨 戒煙會一處已戒一千七百三十八人現戒二千四百四十七人 泗水縣 煙地三頃五畝六分一釐本年禁淨 戒煙會一處已戒二百三十五人現戒十四人 滕縣 煙地四十九頃九十八畝一分本年禁淨 戒煙會一處已戒四十四人現戒十九人 嶧縣 煙地二十六頃七十二畝八分一釐本年禁淨 戒煙會一處已戒無現戒十二人 汶上縣 煙地八頃三十八畝八分四釐本年禁淨 戒煙會六處已戒二百四十五人現戒四百五十三人 陽穀縣 煙地三畝五釐本年禁淨 戒煙會一處已戒七十六人現戒十八人 壽張縣 煙地一頃四十九畝四分五釐本年禁淨 戒煙會一處已戒十七人現戒三十九人 沂州府 蘭山縣 煙地十五頃七十一畝八分八釐本年禁淨 戒煙會二處已戒一千九百四十一人現戒一千二百九十三人 鄆城縣 煙地十頃七十畝一分二釐五毫本年禁淨 戒煙會一處已戒四十人現戒三十人 費縣 煙地二頃三十四畝本年禁淨 戒煙會一處已戒一千六百一十五人現戒六百五十一人 莒州 煙地一頃九十七畝八分九釐本年禁淨 戒煙會一處已戒一百三十二人現戒二十七人 蒙陰縣 煙地一頃五十七畝五分九釐六毫本年禁淨 戒煙會四處已戒四百二十人現戒三百二十五人 沂水縣 煙地一頃二十三畝四分本年禁淨 戒煙會一處已戒六十二人現戒二十九人 日照縣 煙地二頃三十四畝七分本年禁淨 戒煙會

一處已戒七百六十九人現戒三百五十二人 曹州府 荷澤縣 煙地三頃二十四畝三分本年禁淨
 戒煙會三處已戒一千三百四十人現戒三千六百人 單縣 煙地六十頃十一畝六分本年六十八頃四
 十二畝 戒煙會六處已戒一千零五十六人現戒一百二十人 城武縣 煙地九頃二畝一分本年禁淨 戒
 煙會一處已戒八十三人現戒二百八十五人 曹縣 煙地二十九頃四十二畝五分本年禁淨 戒
 煙會一處已戒四十五人現戒無 定陶縣 煙地十四頃三十八畝一分二釐本年禁淨 戒煙會一處已
 戒九十三人現戒六十人 鉅野縣 煙地三十一畝五分本年禁淨 戒煙會一處已戒二百八十八人現戒
 七十八人 鄆城縣 煙地三頃九十畝五分本年禁淨 戒煙會五處已戒八百一十二人現戒五百三十
 六人 濮州 煙地四頃二十一畝四分二釐上年秋禁淨 戒煙會十四處已戒三百六十九人現戒三百
 三十七人 范縣 煙地一頃十六畝五釐本年禁淨 戒煙會一處已戒四十五人現戒三十九人 觀城
 縣 煙地十六畝七分五釐本年禁淨 戒煙會一處已戒五十二人現戒五十八人 朝城縣 煙地向無
 戒煙會一處已戒一百二十八人現戒二十六人 登州府 蓬萊縣 煙地向無 戒煙會八處已戒七
 百五十三人現戒八百六十一人 黃縣 煙地向無 戒煙會一處已戒七百六十人現戒二百九十三人
 福山縣 煙地二十五畝一分上年冬禁淨 戒煙會四處已戒五千零六十九人現戒七百三十六人
 棲霞縣 煙地九畝五分以上年冬禁淨 戒煙會五處已戒五百九十一人現戒一百二十五人 招遠縣
 煙地八十九畝七分一釐上年冬禁淨 戒煙會三處已戒二百五十人現戒三百零八人 萊陽縣 煙地
 一頃十七畝六分三釐本年禁淨 戒煙會五處已戒一百零三人現戒二百三十三人 甯海州 煙地向
 無 戒煙會三處已戒三百十四人現戒二十八人 文登縣 煙地向無 戒煙會四處已戒三百六十一
 人現戒二十九人 海陽縣 煙地五十畝六分上年冬禁淨 戒煙會一處已戒一百二十六人現戒七十
 八人 榮成縣 煙地向無 戒煙會三處已戒一百十人現戒四十人 萊州府 掖縣 煙地上年未種
 戒煙會一處已戒七百二十一現戒三百五十一人 平度州 煙地八畝三分上年冬禁淨 戒煙會

十二處已戒一千一百三十六人現戒三百四十八人 昌邑縣 煙地六十畝八分二釐上年冬禁淨 戒煙會七處已戒五百五十九人現戒六百二十六人 濰縣 煙地十一頃二畝三分七釐本年禁淨 戒煙會一處已戒一百五十七人現戒一百二十人 青州府 益都縣 煙地八頃八十畝五分七釐上年冬禁淨 戒煙會一處已戒一千三百五十人現戒六百三十人 臨淄縣 煙地一頃八十七畝四分八釐本年禁淨 戒煙會二處已戒二十七人現戒五人 臨胸縣 煙地一頃二畝五分本年禁淨 戒煙會一處已戒一百二十人現戒三十三人 高苑縣 煙地是年未種 戒煙會五處已戒六十四人現戒一百十人 博山縣 煙地向無 戒煙會五處已戒三百五十二人現戒二百十五人 博興縣 煙地一頃五十八畝三分五釐上年冬禁淨 戒煙會一處已戒五十二人現戒二百三十八人 諸城縣 煙地四頃九十四畝四分二釐本年禁淨 戒煙會一處已戒一百六十五人現戒二人 濰光縣 煙地十二頃七十七畝六分上年冬禁淨 戒煙會三處已戒五千三百七十人現戒六十八人 昌樂縣 煙地一頃五十二畝三分二釐上年冬禁淨 戒煙會五處已戒六十二人現戒五十人 安邱縣 煙地三頃九十一畝五分五釐本年禁淨 戒煙會一處已戒一百三十五人現戒三十人 樂安縣 煙地九頃九十八畝三分八釐本年禁淨 戒煙會四處已戒十人現戒二十人 臨濟州 煙地十九畝六分上年冬禁淨 戒煙會一處已戒一百六十八人現戒一百七十六人 夏津縣 煙地十四畝一分上年冬禁淨 戒煙會二處已戒一百三十二人現戒二百十五人 武城縣 煙地七十九畝七分五釐上年冬禁淨 戒煙會六處已戒六十六人現戒四十六人 邱縣 煙地向無 戒煙會二處已戒一百二十人現戒七人 濟甯州 煙地三十一頃六畝六分一釐本年十九頃二十一畝三分三釐 戒煙會一處已戒十一人現戒四十八人 金鄉縣 煙地八十二頃九十九畝三分本年八十二頃九十九畝二分 戒煙會五十五處已戒二千六百一十一人現戒九百八十八人 嘉祥縣 煙地一頃四十畝五分五釐本年禁淨 戒煙會十五處已戒一百五十二人現戒八十人 魚臺縣 煙地二十六頃七十三畝七分本年禁淨 戒煙會三處已戒二百七十三人現戒九十六人 膠州 煙地四頃五十三畝四釐上年冬禁淨 戒煙會一處已戒二百四十二人現戒十五

人 高密縣 煙地三頃十畝四分一釐上年冬禁淨 戒煙會一處已戒七十三人現戒十六人 卽恩縣
煙地三頃五十四畝四釐上年冬禁淨 戒煙會七處已戒六百九十九人現戒三百八十五人 宣統元年
四月十五日奉 硃批覽欽此

●又奏署濮州牧高士英等辦理禁煙得力請照異常給獎片 再 伏讀本年二月二十四
日 上諭禁煙一事責之各省督撫酌量本省情形督飭所屬認真禁拔相其土宜改考爲
良定當考其成績優予獎擢等因欽此仰見 聖明實事求是有勞必錄之至意欽服莫名
又查政務處民政部奏定禁煙稽核考成各章程凡州縣禁種減至十分之三查在一年
之內並無騷擾情事均准以異常勞績分別奏獎山東辦理禁煙雖不敢遽言成效而各州縣
之能實行禁種者固不乏人茲查有候補通判署濮州知州高士英於未奉 通飭以前一律
禁種又候補直隸州知州前署泰安縣知縣陶鏞於既奉通飭之後實力嚴禁已種者勸令拔
棄不用壓力而民自樂從本年派委候補知縣丁樹奇朱占春分赴該州縣覆查確係於一年
內禁淨並無騷擾情形該二員辦理禁煙實屬異常勞績自應先行 奏獎以勸其餘 查光
緒三十四年六月河南撫 臣林紹年奏候選道前署禹州知州蔣懋熙會同禹州州判王維垣
禁種煙苗又十月熱河都統 臣廷杰奏在任候補直隸州知州建昌縣知縣陶藻華會同塔子
溝巡檢張洪業禁種煙苗以一縣各保二人照章以異常請獎均蒙 特恩著照所請今
東省事同一律合無援案仰懇 天恩俯准將候補通判署理濮州知州高士英候補本班
以直隸州知州仍留原省遇缺卽補候補直隸州知州前署理泰安縣知縣陶鏞免補本班以
知府仍留原省補用以昭激勸而資觀感理合附片具 奏伏乞 聖鑒訓示謹 奏宣統
元年四月十五日奉 硃批著照所請該部知道欽此

山東巡撫袁樹勛奏籌辦審判廳並變通府縣審判廳辦法等摺

七〇

奏爲遵照豫備憲政清單籌辦審判廳並懇變通府縣審判廳辦法及初級審判廳權限以利推行而維治體恭摺仰祈 聖鑒事竊維司法獨立名詞則新而意義則古虞廷明刑舉陶惟知執法秋官設屬鄉遂俱有專司誠以教養事繁不能兼治獄訟漢唐而降臬守漸清臬斷奉若神明居官視爲殿最在閉關之世或南面行簡而有餘泊門戶大通恐惟日兼營而不足在內多冤滯之獄在外攘裁判之權_臣於本年二月間曾將籌辦審判先行豫備情形附片奏明在案查九年期限清單自本年起至宣統七年逐年均有應行籌辦之事依期成立不容延緩若非有總匯之區爲之提綱挈領則督催無自深恐貽誤將來爰與司道等籌商援照本省審判廳籌辦處委藩學臬三司爲總辦加派嫻習法政人員分充會辦各職務以助進行俟全省審判成立或新官制實行提法司已有專職無容另設機關即將該處裁撤以一事權而免糜費此爲目今籌辦審判入手要義其實上所謂籌辦者一曰審判人才之養成除上次奏明將法政學堂速成班改爲司法講習科次第增加以養成審判官外豫計各處審判成立後此項推事檢察及典簿主簿錄事書記承發吏庭丁檢驗吏各員東省一百零七州縣需人至少在二千以上僅恃司法講習科之附設斷斷不敷茲擬飭按察使及濟南府署官審局委員並候補人員曾任差缺者於法政學堂附設夜課專授民刑民法及訴訟法並外國之審

判例伴有經驗之官吏得以擴張其知識而令曾在京外各法政學堂畢業之優秀者擇尤派充官審局幫審委員俾有學問之學生得增長其閱歷另飭巡警學堂添設司法警察班並飭法政學堂籌辦檢驗吏養成所儲之於未設審判以前用之於既設審判以後此已籌辦者一曰審判地所之分配例如山東之濟南爲省城又爲商埠煙臺周村濰縣雖同爲商埠而商務之繁簡人口之多寡懸殊初級審判廳設幾所每所職員應置若干民刑應分幾庭推廳設幾缺平昔訴訟習慣出入用度衙署應否建設管轄如何分區現在已派員分投調查爲設置之豫備此已籌而待辦者二曰審判經費之豫計支出之大宗爲官吏之俸薪爲辦公之費用爲衙署之建設或租借入款之大宗爲固有之官款爲民事訴訟之例銀爲照章之罰款出入必不能相抵且或懸殊本在意計之中惟現在財政困難各省一律東省不敷尤鉅既挹注之無方亦羅掘之殆盡此已籌而不能即辦者三此臣籌辦山東全省審判廳之大概情形也然萬事以財爲母有財而後有用臣統觀九年籌備惟審判爲至繁重用財亦爲最多而知原定府縣審判廳辦法初級審判廳權限有不能斟酌變通以求適於吾國之事實者謹竭一得之愚以備聖明採擇查九年期限清單第四年籌辦府廳州縣城治各級審判廳第一年籌辦鄉鎮初級審判廳是每府廳州縣城治至少必設地方審判廳一所初級審判廳一所鄉鎮平均計算每處必在四所以上以此例推則每一廳州縣必有地方審判廳一所初級審判廳五所又據法院編制法初級審判廳須置一員或二員以上之推事初級檢察所須置一員或二員以上之檢察官是每一廳州縣之初級審判廳須設官二十員左右矣地方審判廳既分民刑兩庭又兼用台議制合計推事長庭長推事檢察長檢察官總在十員以上俸給

太少則不足以養人之廉卽不能貴人以事茲平均計算每員歲以六百兩計則俸薪一項每一廳州縣歲費已在二萬兩左右矣加之典簿錄事書記承發吏庭丁檢驗吏各項俸薪與其他辦公費用至少亦須萬金是一廳州縣當歲費三萬兩左右台吾國二十二行省各府廳州縣計之歲費約以五千萬兩計而建築等費尙不在內既虛 國家無此人才抑亦斷無此財力變通之法奈何則試先求之事實查吾國州縣之面積與日本之縣大異平均計算每縣約當日本之二郡人口多寡迥異訴訟繁簡亦殊若照上項編制權限辦理轉虞事務過簡而新設各官不無冗濫閒散之嫌今議者以日本司法制度爲標準而不知其名稱與實際大相懸殊於是有爲權宜之計者謂宜以州縣權兼推事長其意亦在祛冗濫而節糜費然司法與行政混合其弊已人人能言之卽謂過渡之際不妨暫予通融然當憲政頒布之時又值期限促成之會與其補苴而違背立憲之原則不如變通以漸合現在之情形臣愚以爲宜於府直隸州設立地方審判廳一所而於有轄地之府及廳州縣設立初級審判廳一所或二所似此轉移於事實既無窒碍而全國此項經費可銳減十分之九有奇若然則編制舊案亦須有量爲變通之處查法院編制法初級審判廳祇能審判二百兩以下之民事監禁一年罰金百元以下之州事今既於有轄地之府及廳州縣但設初級審判廳則案情稍大者勢必遠涉該管之府直隸州拖累遲延民情必不甚便而府直隸州之地方審判轉有日不暇給之虞臣竊以爲宜將初級審判廳權限略與擴張民事以五千兩上下爲限刑事以十年以下監禁爲限如此斟酌變通則司法獨立之實既可舉行一面培養人才任使或不虞其少一面預籌經費節省已實覺其多事關全國籌辦審判臣利害相權琴瑟不調改弦更張出於必不獲已所有東

省遵照預備憲政清單籌辦審判並懇變通府縣審判辦法及初級審判權限各緣由除分咨政務處憲政編查館大理院法部查照外芻蕘之見是否有當理合恭摺具陳伏乞 皇上聖鑒訓示並敕下各該部院衙門核議施行謹 奏宣統元年六月初七日奉 硃批該衙門議奏欽此

山東巡撫袁樹勛奏法政學堂通籌畫一辦法摺

奏爲東省法政學堂遵章通籌畫一辦法現已次第施行恭摺仰祈 聖鑒事竊 臣於上年六月間准學部咨開本部具奏北洋法政專門學堂擬令遵照奏定京師法政學堂章程切實辦理並令各省法政學堂畫一辦法一摺奉 旨依議欽此錄奏咨行前來查原奏內開他省所設法政學堂其詳細章程未經咨報者尙多容有彼此參差之處擬將京師法政學堂章程通咨各省遵辦庶幾課程等級不致歧出等語 臣查東省法政學堂自光緒三十二年開辦經升任撫 臣楊士驤奏咨有案自與原奏所謂他省未經咨報者不同惟當時肄業年限祇定爲一年半畢業迨三十四年正月前署撫布政使 臣吳廷斌始遵照憲政編查館奏定考驗外官章程增長期班以符館章長期三年速成一年半之規定此東省法政學堂歷來辦法情形也 臣履任以後察看各學堂情形以爲以少數之經費造多數之人才爲方今辦學第一要義况值九年預備之期審判獨立之際司法行政在在需人而考驗外官亦亟應將此項學堂釐正辦法以爲實行之預備節經與司道籌議並以從前奏派之該堂監督候補道方燕年另有差委復於今年四月間遴委郎中銜日本法政畢業附貢生雷光宇接充該堂監督該員學識明通辦事切實茲據會商藩學臬三司釐定辦法務期於節省無益之糜費以圖擴張增加

教員之薪水以選良師以符定章而宏造就各情詳請前來謹撮舉大要爲我 皇上縷陳之東省法政學堂開辦既久則從前一切習慣因仍之不可驟易之不能必比較其相異之點而馴致夫盡一之方如行路然無論高卑遐邇而所向不迷必有終達之一日 臣焦思殫慮如理棼絲至是始有端緒甘苦自嘗之境事後思之歷歷在目非特辦學然也相異之點何在一日年限查京師法政學堂有五年畢業者前二年習預科後三年習正科又分政治法律兩門有三年畢業者爲別科有三學期畢業者爲講習科東省前定之長期速成兩班雖與京師學堂年限相同而五年畢業之預科正科尙未開辦此一異也一日資格京師法政學堂預科畢業始准入學肄業者均稱學生東省則凡到省候補人員年在三十五歲以下正科則須預科畢業者亦均係有職之人其無職之生監不得投考故概稱學員京師學堂則惟講習科爲吏部新分發及裁缺人員而設肄業者亦稱學員然講習僅屬附設其立學總義實以造就完全法政通才爲宗旨卽別科之三年亦係另設以應要需與東省專教官吏期收速效者懸殊此二異也一日學費京師法政學堂預科別科學生每月繳學費銀二圓正科學生每月繳學費三圓在堂午膳者月繳膳費二圓五角概不住宿本堂學員多係候補無差之員非僅不收學費且經前升任撫 臣楊士驤奏明按官級的予津貼分別十五兩十兩六兩不等此在部章未經奏頒以前斟酌東省情形爲一時權宜之計此三異也有此三異乃生兩大弊學堂經費照章須以十成之六七聘教習方爲合法今該堂常年經費核計教員月薪不足十分之三其耗於津貼及一切費用轉居十之六七弊一學習法政與各種學校情勞較殊純在講師之口

授與私室之研究故每班人數無妨略多外國法政學校有合三四百人爲一班者該堂因校舍太小前此學生僅二百人而分爲五班以常年經費平均計算每學員一名竟費至二百一十餘兩糜多數之經費養少數之人才弊二欲去二弊乃有必不容緩之三法一修改教室該堂基址本狹只能將現在之監督提調職員各室改造洋式樓房兩座分爲四教室每教室足容學生二百人計修造添置用具各費除將歷來掙節之款動用仍不敷在四千兩上下然此爲擴充經一之基礎無論如何爲難必應有可居之肆而後有可成之事已飭藩運兩司籌解擇日開工一俟工竣另行咨報核銷此必不容緩者一也一擴充學額現在新政繁興需才甚衆即以審判一端而論東省百餘州縣計至宣統八年各級審判廳之推事檢察等員約需二千人內外而律師及公證書記人等尙不在內今該堂合官紳不過二百人至本學期講習科畢業之後合計不過百六十人且官額太多紳額太少既非普及之法更慮求過於供然欲開本科必先開預科東省中學畢業者寥寥無幾即盡致之亦難成一班況未必皆願來學也茲擬定本年添招別科一班講習科一班每班約在百二十人上下俟年內司法講習科第一班卒業後續招一班定額亦在百二十人以外俟明年暑假後司法講習科第二班畢業後即以其款開設預科爲設本科三階梯而計之以現在常年之經費論本年可加收學生二百四十人合之舊有學員爲四百人明年春季以司法講習科第一班之款又可新招百二十人秋季又可以司法講習科第二班之款新招百二十人至宣統三年又可以別科第一班及講習科第三班之款新招二百四十人分作兩班共計各班可定爲六百人矣以平均計算學生一人用費每年不過八十五兩有奇矣此必不容緩者二也一優待教員照章教員月薪應居全

堂經費十之六七以便遴選通才具有深意茲擬自監督以下之火食薪工及季考時向有之酒席等費可減者減可裁者裁其原有學員津貼概歸藩司酌量財力另行撥給至遲以舊班畢業時爲止預計宣統三年全體永遠停止津貼以騰出之款聘請教員則薪水可以加優通才不難招致並擬酌用日員以期學有專門共資深造聘請既有定章操縱無難由我此必不容緩者三也抑臣尤有慮者部章畫一辦法無非以節省虛糜造就真才爲宗旨以期費一錢得一錢之益教一人收一人之用今按之事實尙不盡然者何也考驗外官章程既除去正途出身及曾任要差各員人情趨易而避難則凡歷正途而任要差者誰肯投身於學問之途以淹滯其從政之歲月其非自正途出身及曾充要差者或中學淺陋或闕冗無能未必有能習法政之願力而紳士之足與法政之列者選錄之時亦必取其國文較有根柢此輩類多舉貢生員出身自停止科舉之

詔下議者或慮此輩坎坷終身殊失 朝廷嘉惠士林之意於是有意考職及加倍舉行優拔之舉今屆適在舉行之年於是紳士之可以習法政資格者亦相率趨易而避難不特後此新招人數尙無把握並有現在法政及自治各校所肄業而見異思遷者是雖有節省經費之計畫尙未必有多得人才之效果此事關繫全局恐尙不止山東一省爲然應如何爲根本上之整齊再求枝葉上之畫一一既有所見並請 旨敕下憲政編查館及學部從長核議以利施行之處出自 聖裁至於職員應一律正名學員宜一體相待在該堂範圍所應有亦部章繩尺所莫踰亦均次第施行漸臻畫一所有東省法政學堂遵章統籌辦法各緣由除分咨查照外竊等之見是否有當理合恭摺具陳伏乞 皇上聖鑒訓示謹 奏宣統元年六月初七日奉 硃批學部議奏欽此

山東巡撫袁樹勛奏創設簡易識字學塾等片

再據署提學使羅正鈞詳稱竊照欽奉 明詔限定九年將豫備立憲事宜次第興辦本年爲第二年期條款內列創設簡易識字學塾係本年應行籌辦之事自應遵限奉行勸求實際查國民程度取決於識字人數之多寡學堂課程繁重普及良未易言惟簡字學塾之設爲事易舉而收效亦速然非推暨於僻壤遐陬則立數不溥非先之於通都大邑則取法無由業經擬就簡字學堂試辦章程刊印多張札發各府州縣飭令分投勸辦先於省城設立十處以爲之倡已於本年五月初一日開學併附閱報所應需簡字課本擇其淺近簡明者約三千餘字暫備講授藉應急需俟學部頒布簡易識字國民必讀各課本再行遵用以歸一律查山東省城舊有官立初等小學堂及半日學堂各二十處前年以各初等小學堂教科未甚完備教習薪水亦廉當即改派師範畢業生分任教課酌加薪水學生應用教科書概行給發其半日學堂學生悉願終日上課因改設初等模範小學堂二處擇其年程合格者升入以資取法又於司署東偏設一高等模範小學堂定學額一百名以爲各初等小學堂學生畢業選升之地現計省城官立之小學堂有高等模範一處高等小學一處初等模範二處初等小學四十處其公立民立各學堂及以私塾改良者均不在此數而目前所注重者尤在乎整飭課法齊一學風現在每屆星期邀集各堂教習至署研究教授管理諸法惟形式具之章程而精神闕乎學術日本當日維新捐棄舊學輸入歐化其過渡階級實收西鄉隆盛諸人講學之效先儒論說窮年莫釋而教導童蒙之法尤莫善於王陽明之書其直捷指點足以激厲志氣即知即行不蹈虛偽即日本學界於王學亦極崇尚因於各堂教習聚會研究之餘特令討論王學每人

各給陽明集一部，以身體力行，隨時啟發良知，良能爲國民之所同具，初無貴賤貧富智愚賢不肖之分。童蒙多識一字，卽多一一致知之用；地方多一人識字，卽多一明理之人。豫備立憲第九年條款內載：人民識字義者，須得十分之一。果能遵照定限，切實推辦，民智之開通，當不難拭目而俟。各等情，並繕具章程詳請。奏咨立案。前來。覆核無異，除將章程清冊分咨憲政編查館、學部查照立案外，理合附片具陳伏乞 聖鑒訓示。謹 奏。宣統元年六月初七日奉 硃批該衙門知道欽此。

●又奏籌設模範監獄並設看守養成所片。再：於本年閏二月間奏請以新刑律實行之先，非有切實之籌備，則新刑律終不可得而施。擬在東省擇地先辦一寬大之監獄，爲新刑律實行之預備等情。奉 旨：欽遵。在案。惟是經營伊始，難在籌款；尤難在得人。蓋必須宅心公正，具有慈善之願力，而又樸實耐勞，有監獄之經驗，學識庶綜理其事不至視爲例差。有如傅舍、物色久之，查有試用道魏業銳、幹練周詳、熱誠奮發、經升任撫。楊士驥派赴日本調查監獄，頗有心得。此次復札派該道前往奉天、保定、天津等處調查各地模範監獄辦理情形，並攜帶委員分赴武昌、江甯、上海各處參觀，以資比較。兩月有餘，始據回省報告，舍短取長，大約保定習藝所之管理得宜，奉天習藝所之工業發達，皆足以資取法。東省籌辦伊始，固不必踵事增華，亦未可因陋就簡。構造一層尤宜注意，如監房則務求嚴整，工廠則必須寬宏，病室則尤宜高爽。其他辦公室及應用各室，祇須布置得宜，不必盡求華美。節經該道繪圖貼說，稟呈前來。詳加披閱，尙屬周妥。並度地省城南圩門內坐落星宿廟地基一區，計官地民地共三十餘畝，以之建造各屋，甚屬相宜。核實估計，小大房屋三百五十餘間，需銀五萬五千六百

餘兩地價銀二千兩開辦費四千兩常年費二萬四千八百餘兩較之他省有減無增惟茲事體大有形式尤貴有精神除典獄官非具專門科學不足勝任外其看守一職必先事預備東省此項人才尙虞缺乏擬先設看守養成所一處附設濟南習藝所內一面擇日開工一面招生入學先招五十人爲一班半年畢業俟後續招新班爲各屬分布之籌備凡茲計畫參稽各省慨念時艱經費務不虛糜辦事務求實際慘澹經營數月於茲始敢阻陳 聖鑒並與司道籌商亦以此事無論如何爲難爲當今必不容緩應需上項各費已撥藩運兩司分別籌撥所有東省鑄設模範監獄調查事竣派員擇日開工並設看守養成所各緣由除分咨查照外理合附片陳明伏乞 聖鑒訓示謹 奏宣統元年六月初七日奉 硃批該部知道欽此

●又奏已故道員戴宗騫專祠落成請列入祀典片 再已故統領綏馨等軍道員戴宗騫前因中東之役防守威海礮臺力竭身殉經前撫李秉衡於光緒二十一年三月間奏奉

諭旨准其建立專祠欽遵轉行在案茲據在籍紳士前刑部主事孫葆田等聯名呈稱該故道死事地方旋成租界故時逾一紀祠祀猶虛現由故道舊部集資在山東省垣西關建立專祠一所業已落成請具 奏前來 查該故道當日盡力臺防功深屏蔽其死事情形尤足爲士民觀感茲據捐資建祠省垣工已告竣相應懇 天恩俯賜敕部列入祀典春秋由地方官致祭俾彰忠蓋而垂久遠除咨部查照外理合附片具陳伏乞 聖鑒訓示謹 奏宣

統元年六月初七日奉 硃批允行該部知道欽此

山東巡撫袁樹勛奏保荐幕職沈同芳等並請調赴廣東差委片

再查光緒三十三年五月二十七日考察政治館王大臣具奏續訂直省官制一摺奉

旨欽遵並錄原奏清單咨行到東內開第五條督撫衙門幕職員數職掌由各督撫自行徵辟分別奏咨其辦事得力之員隨時切實保荐以備簡擢等語上年履任後正值憲政籌備

聖詔特頒查照期限清單第一二年頭緒尤繁責任綦重非遴選通才相助為理不足以

資任使而赴時機因於上年十月及本年二月先後奏報開辦東省諮議局之地方自治籌辦處摺內聲明加派素有經驗及嫻習法政人員前河南唐縣知縣翰林阮庶吉士沈同芳盧貢

生黃敦傑附生方表分充該處參議並將各員銜名分咨在案三月間遵章設立幕職又經

奏明將以上三員派充_臣衙門秘書參事各職照章分科辦事均奉 旨欽遵有案該員等

竭誠贊畫自去歲迄今東省各項新政均有端倪_臣前蒙 天語褒嘉悚惶無地竊以微長

見錄本非一手一足之勞相助有人具收小用小效之益現在東省選舉提早辦竣地方自治

籌有成規其他如改良巡警籌辦審判創設模範監獄清理財政畫一法政學堂辦法凡關係

憲政重要事件均經該員等兼顧並籌深資贊助自應遵照定章切實保荐查該員沈同芳文

章爾雅治理明通壯歲辭官志趣淡泊自非百里之才從前本以庶常散館擬請註銷知縣

賞給翰林院編修銜黃敦傑方表學有根柢識解宏通均在日本法政畢業以議論見諸事

實條理秩然再試之於煩劇之途益徵遠到擬請均以知縣分省補用出自 逾格鴻慈_臣

交卸在即粵省事務殷繁仍須得人而理以上三員擬均調往廣東俟將來派委職務再行分

別奏咨立案除分咨外理合附片陳明伏乞 聖鑒訓示謹 奏宣統元年六月初八日奉

硃批著照所請該部知道欽此

山東巡撫袁樹勛奏舉劾屬員摺

奏爲分別舉劾屬員恭摺具陳仰祈 聖鑒事竊臣自上年履任以來深維吏治之隆污悉視官長之賢否節經分別舉劾奉 旨欽遵在案况憲政當九年籌備之時齊魯仍一變從風之俗任使不拘夫一格好惡務取乎同民 朝廷以此爲勸懲人才視茲爲消長恭讀上年十一月二十三日認真考察秉公甄別之諭旨臣謹寄忝膺責無旁貸查有濟南府知府張學華器識因遠局度安并籌辦復選舉事宜據前布置爲各屬之表率因應咸宜署東昌府知府濟南府同知黃篤瓊學行俱優踐履篤實整躬率屬守正不阿濟甯直隸州知州丁兆德樞練周詳勤求治理辦理地方妥政措置有方准補郟城縣知縣賈景德學識堅定爲守俱俊應辦新政成效昭著著黃縣知縣補用知縣武晰辦事勤能循聲卓著歷任繁劇吏畏民懷試用知縣盧士葵襄辦鹽務力果心精綜核動明有裨實用以上六員臣詳加考核證以輿論均尚翕然應請 旨嘉獎以勸賢能仍當曲加訓勉以免始勤終怠署魚臺縣知縣補用知縣陳伯和藉案苛罰怨毒煩興上年捕蝗不力本年復多方掩飾幾釀蝗災實屬玩視民瘼試用知縣張春鏡於署黃縣任內虛商殃民聲名狼藉官親用事欺飾徇私邱縣知縣孫景先才庸職閑治盜無能圖冗病民有心諱飾署黃縣黃山館巡檢試用典史黃廷讓任意勒罰案誘沸騰魚肉鄉民被控有據清平縣典史吳起麟年老多病捕務廢弛均請一併革職陳伯和黃廷讓二員並應查明罰款按律究追又候補同知郭昂誠閑才庸候補同知梅光棠性情貪詐該二員應請一併革職八屆運河挑工異常卑劣又候補知縣林介策上年派修乾莊一帶河工糜費過甚頗滋物議應請一併革職仍查明有無浮冒侵蝕情弊再行核辦臣爲澄叙官方起見用敢據實陳請 旨欽遵辦理所有分別舉劾屬員各緣由是否有當理合恭摺具陳伏乞 皇上聖鑒訓示再所遺邱縣等缺東省現有應補人員應卽照章叙補合並聲明謹 奏宣統元年六月初八日奉 硃批另有旨欽此

山東巡撫袁樹勛奏故兩廣總督毛鴻賓勦勞卓著懇 恩開復並付史館立傳摺

奏為已故大員勦勞卓著事竊可傳據情額懇 天恩開復原官並 宣付史館立傳以彰忠蓋恭摺仰祈 聖鑒事竊 臣接據山東在籍紳士前任戶部左侍郎吳樹梅等稟稱已故降調兩廣總督毛鴻賓係山東歷城縣人山道光辛卯科舉人戊戌科進士翰林院編修改官御史外放道員洊升督撫數歷中外垂二十年後在兩廣總督任內因前任湖南巡撫時失

察藩司憚世臨委胡崧芬銘勦署理縣缺與例未符部議降一級調用不准抵銷遂罷官回籍值捻匪之亂以鄉紳辦團禦賊積勞成疾以同治七年歿於家綜論其一生行誼直已無愧純臣以視原任雲貴總督張亮基原任河南巡撫李鶴年猶或過之樹梅等生同里閭見聞較確今謹陳其略查已故總督毛鴻賓館選之年適與原任大學士曾國藩同列以學問相切劘至為莫逆其後傳補御史以致言稱粵逆初起督兵者強半偵事該故督洞悉全局抗疏論之侃侃數千言動中肯綮疏稿流傳一時爭誦咸豐三年存受 文宗顯皇帝特達之知以給

事中派往山東督辦團練時粵逆分股北竄山東處處嚴該故督簡練鄉團討求軍實事集而民不擾巡撫督兵在外省城時有訛言人心皇皇朝不保夕賴該故督拊循鎮定繼復督團進扼大清河省城賴以無恐五年拜湖北荆宜施道之 命未之任調安襄鄖荆道正捻

匪張落刑陳大喜等往來衝突土匪到處蠶起之時該故督抵任即練民勇設水師建礮樓修軍械建復樊城之圩牆擒斬土匪之頭目捻勢雖盛終始不敢入其境又以餘力講文學儲積儲如整頓鹿門書院擴充廣仁社倉之類凡有益於地方者無不盡心竭力為湖北巡撫胡林翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

翼賞識有敬舉賢才一疏稱該故督好善嫉惡居心公正又稱該故督有膽有識調度合宜在

任四年擒匪不敢入境由是上契 主知權皖臬督蘇藩並 賞戴花翎胡林翼因

防堵喫緊僅此威望素著之人均奏留未赴十一年四月 命署湖南巡撫旋即真除惟

時金陵久困安慶未復曾國藩曾國荃等治兵東下從事江皖該故督籌兵籌餉並籌軍火接

濟無誤論東南勘亂之功未有不念及東征局者實該故督有以主之也同治元年髮逆石達

開竄湖北據來鳳牽制我軍之追剿官兵屢攻不下該故督遣總兵周達武趙福元越魏克之

踞賊巢穴斬馘殆盡貴州苗匪姜映芳龔天柱銅仁等四府多為賊有該故督遣趙福元等越

境平之廣西巨賊張高友久踞蓮塘地險而賊狡師久無功該故督遣提督江忠義越境破之

江西賊蹤竄突無甯宇該故督遣道員席寶田赴援終克之其願大局類如此二年山東淄川

土匪劉德培叛據縣城全省騷動擒幅教諸匪所在紛起 命該故督妥籌勁旅保衛東

邦該故督即言長沙府知府丁寶楨才略俱優堪勝其任 穆宗毅皇帝用其言以丁寶

楨為山東臬司歷官至巡撫未嘗出東省俾得一意勦擒卒奏平定之功是夏該故督升督兩

廣抵任時粵匪陳金剛猶據信宜城高州客匪亦充斥陽山英德陽江間有巨寇鄧二尺七為

髮逆應援其勢甚張南韶一帶土客械鬥歷十年不已其禍較滇回為尤烈該故督調福建臬

司張運蘭總兵卓興等次第削平之是多石達開遣股匪李復猷等犯邊張運蘭等復擒斬無

遺孽該故督服官數省矢勤矢慎一乘至公故所至戰功卓著政蹟燦然生平持以人事君之

義其所保薦自丁寶楨外如原任兩廣總督李瀚章陝西巡撫劉蓉蔣志章廣東巡撫李福泰

浙江巡撫梅啟照順天府尹王榕吉廣東提督鄭紹忠類皆名臣碩將是其知人之明有足

多者迨因公獲咎解組歸田適在同治六年擒匪復犯山東之際撫藩出省防堵該故督身任

守城登陴固禦其見義勇爲始終如一無論遠近皆交口稱之歿之日奔走相告同聲悼嘆至今四十餘年鄉人士緬懷遺澤感念益深其謀國之忠推賢之誠治兵之精任事之勇卓然有古大臣風樹梅等恭讀光緒三十四年十一月二十二日 皇上登極恩詔凡文武四品以下降革留任處分准其開復並飭查中興立功大員政績及其後嗣等因欽此又恭閱邸鈔知已故河南巡撫李鶴年經東三省總督徐世昌 奏蒙 聖恩開復原官並將生平戰功事蹟 宣付史館立傳又原任雲貴總督張亮基亦復原官並有易名之 典該故督事同一律尙抱向隅稟乞據情奏懇 恩施等情 籍隸湖南習聞毛鴻賓兩湖政蹟並有及身親見者既至山東又知其有功鄉里吳樹梅等稟叙各節確係輿論之公 所聞見亦復相同伏念因公墜誤 朝廷多曲示優容如其緣事干連定例更許從寬宥僅此一階之降調獲咎甚輕已逢歷次之 恩綸論情得免茲據布政使朱其煊署提學使羅正鈞按察使胡建樞會詳請 奏前來 查毛鴻賓歷事 三朝立功四省其居心行事本在 聖明洞鑒之中其戰功政蹟多見章奏卓然可傳合無仰懇 天恩俯准飭銷該故督降調處分開復原官並將該故督生平事蹟 宣付史館立傳俾彰忠藎以勵其餘出自 逾格鴻慈爲此恭摺具陳伏乞 皇上聖鑒謹 奏宣統元年六月十三日奉 硃批毛鴻賓著加恩開復降調處分生平事蹟宣付國史館立傳該衙門知道欽此

署理山東巡撫孫寶琦署理兩廣總督山東巡撫袁樹勛奏籌辦憲政情形摺

奏爲遵 旨會奏籌辦憲政情形恭摺具陳仰祈 聖鑒事竊 等恭讀光緒三十四年

八月初一日 諭旨逐年應行籌備事宜必須秉公認真次第推行各部院領袖堂官各

督撫及府尹遇有交替後任人員應會同前任將前任辦理情形詳細奏明以期各有考成等

因欽遵在案 寶琦於本年六月初六日馳抵山東濟南省城業將接篆任事日期據實奏報

迭次會晤 樹勛商榷目前應行籌辦各事宜查據案卷證以事實復遵上年會同詳奏之

諭旨謹爲我 皇上繕陳之查原奏期限清單第一年期督撫所應辦者祇一項第二

年期督撫所應辦者共八項 樹勛於本年二月間遵照憲政編查館奏定考核科章程業將

第一年期所已籌辦及第二年期應籌辦而已預備者專摺奏陳奉 旨欽遵在案自茲以

後本年上半年截至六月爲止照章應俟八月內分別奏咨惟現當交替之時所有辦理詳細情

形 樹勛智慮多疏僅植初基於一篑 寶琦涓埃未報敢虛逝景於九年蒞事有後先而責

任無輕重此 意見所同上煩 聖明鑒擇者也查第二年期督撫應辦者八項一曰舉

行諮議局選舉東省於上年十一月派司選員分赴十府三直隸州先之以演講繼之以調查

又督飭各州縣分辦爲三期一爲選舉人名册告成之期二爲選舉人名經審查判定清册告

成之期三爲初選舉投票之期其間勸懲互施於急進之中尤以力除騷擾爲第一義四月初

一日初選舉一律告竣該處員紳以事機已熟復選舉事務較簡遂將原定六月復選之期提

前於五月初十日舉行亦一律告竣被舉議員照章山東一百名加駐防三名均經該處開單

詳送現正在照章造册分咨其諮議局所亦已開工並派在籍度支部主事石金聲監理工程

經曰樹勛附片奏明在案計至七月該局所即可工竣被舉議員尙可在局先期研究以資預備此籌辦已竣者一也一曰籌辦城鎮鄉地方自治設立自治研究所東省遵照定章此項籌備事宜卽飭由諮議局籌辦處兼理以資樽節又於省城設自治研究所本年二月初一日開課亦經曰樹勛奏明在案其時部章尙未頒行而該所所定年期及講習科目不無出入迭經曰樹勛咨商憲政編查館以期變通而裨事實如推廣省城研究所區域第二屆所應辦者分設於各府直隸州則造就多而經費少於定章無背於地方有益他如編制調查區域表編輯自治淺說廣設宣講社凡可以助進行者均督飭該處分別飭辦此遵章籌辦者二也一曰調查各省人戶總數查照部章本爲巡警道專責而期限清單則曰督撫同辦是督撫本有督催之責除已照章派巡警道爲調查總監督外並飭將章程告示通行各屬迭據詳稱各州縣均已劃定區域選派調查並擬有調查施行細則卽照部頒戶數口數定式分別刊發依期填註現在尙未屆期應由曰寶琦嚴查督催以免貽誤東省曹濟各屬向辦清鄉頗有成效調查戶口細按章程亦清鄉事宜內所必有以原有之習慣而行以劃一之章程與新政相輔而行有藉於清查戶口者關係甚大此遵章籌辦者三也一曰調查各省歲出入總數查東省清理財政局於閏二月間開局分派辦事員司亦經曰樹勛奏明有案嗣據該局詳擬章程以爲清理之次第先從調查入手自係不易之法已分擬冊表分行各屬局所飭令分造上年歲出入報告冊及本年出入月報冊節經各處造送一俟彙齊審定卽行分別咨部查核此事關係最重頭緒亦最繁曰樹勛於二月間奏陳東省財政困難大概情形以爲不能開源不能不從事於節流化無用爲有用移無益爲有益來日方長泉源苦竭清理者僅整頓財政入手一端究應

如何亟定幣制蘇息民艱。樹勛前曾兩次奏陳銅元流弊及治標數策居中央以定四方賴手足以扞頭目爲救時之要策亦理財之歸墟此遵章籌辦者四也。一曰籌辦省城商埠等處各級審判廳查司法獨立爲吾國現行財政一大變更自非通盤籌畫則事倍而功或不半財傷而民亦愈勞。樹勛業於本年五月內詳細奏陳以爲此項各級審判成立按照法院編制法所設各員每一州縣歲需俸薪一項已在三萬兩左右合全國各府廳州縣計歲費約五千萬兩建築尙不在內。國家無此財力且求之事實既慮事務簡而冗散轉多且恐機關紛而專權不一擬請於府直隸州設立地方審判廳一所而於有轄地之府及廳州縣設立之初級審判廳一所或二所似此量爲轉移事實固無窒礙且預算全國此項經費可銳減十分之九有奇而法院編制法初級審判止能審判二百兩以下之民事應改爲以五千兩以下爲限監禁一年以下之刑事應改爲以十年以下爲限斟酌變通按之吾國風俗習慣均尙相合庶司法獨立之實可以逐漸推行專關全國審判利害相權仍懇 敕下各部院衙門查照前摺核議以利施行至提綱挈領在省城設立審判籌辦處爲必不容緩五月間亦已開辦其審判人才之養成則於東省法政學堂附設法政講習科逐年增加爲審判官之預備均經另摺奏明在案至審判地所之分配審判經費之預備已一面派員分赴調查爲設置之計畫此遵章籌辦者五也。一曰創設廳州縣簡易識字學塾查此項學塾非推及於僻壤遐陬則立教不溥非先之於通都大邑則取法無由擬提學便詳稱先於省城設立十處以爲之倡本年五月開學並附設閱報所應需簡字課本擇淺近簡明者三千餘字暫備講授俟學部頒布簡易識字國民必讀各課本再行遵用以歸一律該司並於每星期邀集各堂教習至署

研究教授管理諸法並以日本當日維新首先提倡明儒王守仁良知之學特令各教習互相討論務期實踐不尙空談以之自勉勉人庶將來童蒙多識一字即多一致知之用地方多人識字即多一明理之人此遵章籌辦者六也一日廳州縣巡警年內粗具規模查東省於光緒二十九年前任撫臣周馥奏照直隸辦法開辦警務學堂奏咨有案三十二年又經前任撫臣楊士驥奏請於兗曹兩府分設巡警學堂一所奉部覆暫行試辦自上年到任後節經查照新章議飭改爲高等巡警學堂並在省城照章先設巡警教練所一處兗曹兩府巡警學堂擬俟學生畢業即行裁撤各等情均於本年二月間奏明在案惟東省巡警雖設專官各廳州縣亦經派有區巡等職遵章開辦歷有數年然形勢精神尙宜力求完備良以居此官者既用非所習奉斯職者輒見異思遷節經督飭巡警道擬定各項章程分別改良並派員分赴各屬調查以資考核應由寶琦按照期限切實督催爲警界放一綫之光明即地方受一分之公益此遵章籌辦者七也以上七項除諮議局選舉已按期辦竣外又資政院選舉尙未頒布不在此數其餘或已立基礎或甫在經營應辦者必辦不敢避急切之名未辦者當籌更非有遷延之見譬之羣川赴壑沮洳亦與同趨萬馬奔蹄駑駘因而策步所有樹勛交替以前遵照籌備清單辦理情形由寶琦會同詳奏各緣由是否有當理合恭摺具陳再此摺係樹勛主稿會同寶琦辦理樹勛並擬於本月十三日自省起程至青島候船航海南下紆道至江甯會晤調任兩江督張人駿面商一切再行赴粵合併聲明伏乞 皇上聖鑒謹奏宣統元年六月十六日奉 硃批該衙門知道欽此

署理兩廣總督袁樹勛奏接印日期謝 恩摺

奏為恭報 臣抵粵接印日期叩謝 天恩恭摺仰祈 聖鑒事竊 臣蒙 恩命署理兩廣總督並著

迅速赴任業將交卸山東撫篆及起程日期並紆道江甯會晤調任兩江督 臣張人駿籌商要公各等情先後

奏咨在案茲於本年七月十八日行抵廣東省城二十日准護督布政使 臣胡湘林委廣州府知府高觀昌署

督標中軍副將忠正將兩廣總督兼廣東巡撫事關防粵海太平關各關防鹽政印信及 王命旗牌文卷

等件竊送前來 臣當即恭設香案望 闕叩頭謝 恩祇領任事伏念 臣猥以軀材謬膺疆寄齊魯未嘗一

變常懷實心任事之 恩褒 絲綸特沛 九重有愧持節兼圻之重真際此時艱孔亟九年之籌備

方殷况復地處交通兩粵之機牙尤迫 聖命自天而下披嶺南草木以俱柔 臣遠海而來曠 日下

風雲而知懋興利必先去弊除舊始能布新惟有力矢慎勸用期仰答 高厚鴻慈於萬一所有 臣抵粵

接印日期並感激下忱謹繕摺叩謝 天恩伏乞 皇上聖鑒再 臣經過江蘇各屬陽雨應時民情安謐

堪以仰慰 宸廑合併陳明謹 奏宣統元年八月初九日奉 硃批知道了欽此

署理兩廣總督袁樹勛奏調道員吳錫永到粵接替籌辦新軍片

再粵省新軍事宜經前督 臣張人駿派委現署廣東勸業道韓國鈞次第籌辦節經 奏明在

案 臣接任以後疊准東三省總督 臣錫良電開准軍機處電奉 旨韓國鈞署理奉天交涉

使等因欽遵傳電到粵竊維粵省新軍籌辦事宜前任督 臣張人駿於五月間奏陳實在情形

備舉四難欽奉 硃批著袁樹勛認真籌辦奏明辦理欽此 臣維此項新軍粵省經營已不

遺餘力韓國鈞既奉 命升署奉天交涉使設非選擇賢員豫謀接替則前此之綱繆將成

虛費後來之策畫更慮兩歧且前督 臣原奏有依原定之期秋後先成一鎮之語韓國鈞接辦

已久條慮周詳秋後既爲日非遙成鎮庶收效可睹其接替之員臣查有候選道員吳錫永爲日本士官步科畢業生歷充南洋軍隊差使頗有經驗詢之韓國鈞亦以爲能稱斯職一俟該員到粵再行交替以資接洽而重軍政所有調員到粵接替籌辦新軍各緣由理合附片具陳伏乞 聖鑒訓示謹 奏宣統元年八月二十二日奉 硃批速調吳錫永接替併飭韓國鈞迅赴奉天署任欽此

署理兩廣總督袁樹勛奏廣東盜風尙熾請仍照歷年變通章程辦理摺

奏爲廣東盜風尙熾驟難規復舊制擬請仍照歷年變通章程就地正法以戢盜風恭摺仰祈 聖鑒事竊准法部咨內閣會議政務處核覆本處奏議御史吳緯炳奏尋常盜犯請一律照例解勘一摺宣統元年五月初九日具奏奉 諭旨著依議等因欽此刷印原奏咨行到粵原奏內稱就地正法章程本出一時權宜早經由部奏明通行停止茲據部奏稱除東三省根本重地現尙勦辦鬻匪以及各省實係土匪馬賊會匪遊勇嘯聚藪澤抗拒官兵形同叛逆者仍准照光緒三十四年通行暫准就地正法外其餘尋常盜案均應一律解由該管上司覆勘分別具奏等因當經前護督臣胡湘林轉行欽遵查照辦理伏查粵東盜風甲於天下自昔已然各州縣文牘大約報劫日必數起至二三十起不等而事主之未報劫者尙不與焉溯查光緒十二年經前督臣張之洞奏准嗣後廣東省拏獲持械夥劫兇暴衆著之各項盜匪無論水陸不分首從凡罪干斬梟斬決者均一體照土匪馬賊遊勇會匪章程先行懲辦迨二十四

年欽奉

懿旨規復舊制至二十六年復經前督

李鴻章奏准就地正法於是開設

各路行營並設立緝捕局凡附近營縣獲匪均解局訊辦各路獲匪則解行營審辦其後舉辦清鄉明定章程凡大股土匪抗拒官兵或著名劇盜人所共知當場擊獲搜出槍械等件實係決不待時之犯均准摘錄簡要供詞電稟請辦此外無論清鄉所獲及尋常擊獲一切盜匪均於訊供後或轉解覆訊錄取詳細供摺稟候電飭懲辦通飭遵照嗣以各屬辦理參差不一並有先辦後稟者亦有不應電稟而電稟者光緒三十四年四月間前督張人駿申明定章通飭除廉欽文武獲犯稟辦均由廉欽道核明報院電飭懲辦外其餘各屬文武員弁均應查照定章必實係大股土匪抗拒官兵或著名劇盜案據確鑿或拒捕傷斃事主鄉團及當場擊獲搜出槍械原贓決不待時者始准電稟請辦此外尋常盜犯或解道府覆勘或由道府委員覆審或解行營稟辦無論是否清鄉所獲一律詳錄供摺稟候核明電飭懲辦不准率用電稟尤不得先辦後稟蓋於變通辦理之中嚴防枉濫此前督臣等於辦理廣東盜匪固已體察情形慎之又慎矣此次部章各省除實係土匪屬賊會匪游勇嘯聚藪澤抗拒官兵形同叛逆者暫准就地正法外其餘尋常盜犯一律照例辦理由該管上司覆勘分別具奏不得先行處決自係爲慎重刑章起見殊不知粵東盜匪與他省情形迥不相同其醜類之多凡會匪土匪游勇無一不備近且有革黨竄入其中隱相勾串現正嚴飭緝捕辦理斷不宜鬆勁一經規復舊制則自州縣而府司自府司而院逐層審轉至接奉部覆正法總在半年之外遲之又久匪徒將何由知儆且近如豬頭山江浦高唐各行營盜犯每月營縣獲解多者二三百名少者數十名今盡歸地方官審轉既不免拘牽文法而又非數月之久不能懲辦一犯前者未辦後者復來

日積月增盜獄將無可容之地況此輩異常狡猾解勦時知非原審之員必多翻供駁回之後又須解審而能否懲辦尙不可知往返之間更恐疏虞滋事種種窒碍倘各牧令見辦理為難相率因循諱飾遇匪不拏獲犯不辦營員之認真緝捕者亦不免因之鬆懈於捕務深有關係至州縣糜費猶其餘事且粵東又有由香港澳門提回之犯為各省所無此事向多阻碍近有著名劇盜多以此兩處為遁逃藪洋官亦深慮害其治安凡此彼緝獲一有證人當堂指認即與提解回省其意亦深願我速為懲辦尤未便拘泥舊例致滋藉口固知天地好生豈敢恣言殺戮願粵省盜匪張伏莽未淨隱憂所在不能不稍事變通據廣東營務處兼緝捕局司道會同署按察使陳望曾詳請具奏前來臣覆加察核係屬實情相應籲懇天恩俯念廣東盜風尙熾審辦盜匪准予暫緩規復舊章仍照歷年變通章程凡盜匪之罪應立決與現定部章相符者一律就地正法免於先行奏咨其情有可原罪應軍流發遣者仍照例辦理俟將來盜風稍息再行奏明規復舊制以慎刑章謹恭摺具陳伏乞皇上聖鑒訓示謹

奏宣統元年十月初一日奉 硃批該部議奏欽此

署理兩廣總督袁樹勳奏查明道員沈世培被忝事實不符援案請 予恩施摺

奏為查明道員原委情節與事實不符謹援案請 旨量予恩施恭摺具陳仰祈 聖鑒事竊臣查接管案卷前督臣張人駿任內准兩江督臣端方咨開據江蘇在籍紳士四品卿銜翰林院編修繆荃孫聯名呈稱竊前署廣西右江道沈世培原籍江蘇元和縣寄籍湖南善化縣由光緒壬午科舉人揀選知縣指分廣西補授陸川縣調署宣化縣蒙前任廣西撫臣黃槐森以精明幹練勤政愛民查勘開設南甯口岸情形貫澈深諳事機可稱練達之才具摺奏保

奉 硃批著送部引見欽此旋升知府因在鬱林州克復泗城辦匪出力由知府保升道

員併案送部引 見並蒙 召見一次欽奉 特旨發往原省補用光緒二十

九年三月奉委署理右江道正值匪勢披猖地方糜爛該員戰守兼籌擒斬著名匪首章八等

多名地方漸就安輯在任甫逾三月忽奉前署督 岑春煊以據報肅清粉飾貽誤奏參革職

並請永不叙用於是年九月十九日奉 旨照准惟該革員到任委係在奏報肅清以後

並無諱飾情事應請俯賜昭雪等情咨請查明核辦等因是此案情節有無諱飾貽誤應以是

否據報肅清爲斷當經前督 張人駿檄飭廣西藩司查覆去後茲據署藩司王芝祥詳稱查

覈司卷及營務處卷前撫 王之春於光緒二十九年二月二十八日電奏泗城邊境肅清又

於三月十八日電奏與滇黔會剿游匪邊界一律肅清均請軍機處代奏刊稿札行司處有案

沈世培於是年四月初六日到右江署任係在前撫 王之春兩次奏報肅清之後旋於六月

十二日卸事連閏署期三月餘查司處案卷並無該革道咨報肅清文牘東蘭州失守該署州

陶其淦陣亡係閏五月初一日之事據署慶遠府知府濮賢恆於閏五月十三日通稟六月初

一日到司查無右江道咨司之文在卷惟該管府業已通稟有案沈世培亦無可諱匿所稱匪

蹤飄忽道路梗阻自係實情以上各節均經由司咨右江道及委員查覆並調司處卷宗逐一

查對亦屬相符理合據實詳覆核辦前來 查該革員沈世培既據廣西藩司王芝祥查明原

委據報肅清調閱司處案卷並無沈世培咨報肅清文牘所屬東蘭州失守該管府通稟在案

亦無所用其諱匿是原委各情形於事實均有未合遽挂彈章並置永廢未免可惜在岑春煊

激勵或行威克原期有濟而該革員驟遭淪棄論情似覺未平查前督 張人駿奏覆違

旨查明岑春煊奏劾各員急宜昭雪一摺曾將李家焯等各革員分別懇乞 恩施或銷去永不叙用字樣或開復原官原銜免繳捐復銀兩等情均奉 旨照准欽遵在案今該革員沈世培原系各節既出於一時之錯誤自與尋常獲咎人員在別案叙勞開復者不同較之李家焯等之棄瑕錄用情節尤為可恕合無仰懇 天恩俯准將已革前署廣西右江道候補道沈世培 量予恩施銷去永不叙用字樣並開復原官原銜之處出自逾格 鴻慈除咨部查照外所有查明道員被劾事實不符請 旨量予恩施各緣由謹恭摺具陳伏乞 皇上聖鑒訓示謹 奏宣統元年十月初一日奉 硃批沈世培著銷去永不叙用字樣該部知道欽此

●又奏沈同芳等留粵分充幕職片 再臣在山東巡撫任內奏設幕職分科辦事卸篆以前並遵奏定章程擇尤保獎並聲明沈同芳黃敦憐方表三員隨同赴粵先後奉 旨允准欽遵行知各在案 臣抵粵以來仍照章組織事之繁者則添派助理事之簡者則酌予歸併惟今日幕職事務綦繁情形與昔迥異古者以襄辦文書謂之入幕秦漢有曹掾之稱唐代士人更以受辟幕府為重主管性質或僅掌文牘或兼治民事查光緒三十三年五月間考察政治館王大臣奏訂新官制一摺單開督撫幕職章程有秘書參事等名目分掌章奏文牘並於設立幕職後各局所員委得酌量裁併各等語諒以幕職處於今日所主管各事務關繫九年籌備者為多苟非實地調查而心知其利弊則勞形案牘亦徒肆其吹求即如目前諮議局之開議照章應由督撫先期起草並派員到會陳述意見以及籌辦審判改良巡警創設模範監獄清理財政調查學堂在主管各科文牘之員非身臨其地而心知其意則終不免於事實上有扞

格之虞即於文字上有矜張之弊該員翰林院編修銜沈同芳分省補用知縣黃敦懌分省補用知縣方表前充山東幕職即務以言論與事實相副爲宗旨晝作夜思造車合轍仍由_臣督率進行以收尺寸之效粵省事務殷繁風尚殊異言論事實尤所兢兢茲派該員等分充_臣衙門秘書參事員各職而於應行起草及籌辦改良各要政仍令分別調查以裨事實除將_臣衙門幕職章程員名分咨查照外理合附片具 奏伏乞 聖鑒訓示謹 奏宣統元年十月初一日奉 硃批該衙門知道欽此

●又奏丁憂補用道施炳燮遵照新章派辦要政片 再查宣統元年三月間吏部奏准文職丁憂章程內載現在辦理新政各項學堂局所林立需材孔多嗣後滿漢人員丁憂離署後如有辦理學堂局所等事無容刻以相繩等語查有二品銜丁憂江蘇補用道施炳燮上年隨_臣在東撫任內派充幕職並襄辦各項要政於奏設幕職摺內聲明在案_臣抵粵後仍派該員掌理幕職參預交涉事宜及各項要政並以粵省財政頭緒紛繁而善後局款目尤多且歷屆奏充賭餉皆以該局爲之樞紐_臣抵任以來以官抽賭餉爲各國政體所無且當九年籌備之時而留此駝脯之根是不啻納諸罟獲陷阱之中而徒作攬轡澄清之想正在籌議方法責成該局爲節節限制之計以杜蔓延並統計歲出歲入何者開源何者節流爲實行籌抵之計實屬另案奏明辦理惟目前爬梳抉剔非得人而理則治絲易紛該員施炳燮前在兩江督_臣幕府垂三十年廉幹精強爲時推重現雖丁憂將次服滿而該員敦篤行本不願遽膺局差_臣惟財政爲各省之命脈賭禁尤東粵之要圖丁憂人員辦理局所等事既爲奏定章程所許爰派該員逐日到善後局切實調查並襄助一切以資得力而符定章理合附片具 奏伏乞 聖鑒訓示謹 奏宣統元年十月初一日奉 硃批知道了欽此

署兩廣總督袁樹勛奏訂購禮和洋行彈子合同請 敕部立案片

再准練兵處咨議定新章各省購辦槍砲應先將名稱口徑速率及應需價值公司名目一列情形詳細咨部核再訂合同購置又稅務處定章各省購運槍彈應先將定購名式件數電知陸軍部核准後一面電覆發給護照一面知照稅務處轉行稅關驗照方准起岸各等因遵照在案查粵省西江上年添設緝捕快輪四艘配用馬克森礮所需彈子經前督臣飭局向禮和洋行訂購因青島現存彈子先運來粵以應急需據該洋行開具合同底稿到局再四經屬核實計訂購七密里九尖頭彈子八千顆每千顆價銀九十一元七毫五仙共計七百三十四元除扣回五分公用銀三十六元七毫計實價洋六百九十七元三毫付價以元毫各半付給該彈子係青島現存之貨立合同後即可運省交納鈔錄合同底稿呈經核准飭行照辦茲據廣東海防善後局司道將所訂合同底稿造冊詳請 奏咨前來 覆核無異除冊咨部外謹附片具陳伏乞 聖鑒敕部立案施行謹 奏宣統元年十月初二日奉 硃批該部知道欽此

●又奏上年分購買槍礮軍火等費請 敕部立案片 再廣東省辦理邊防海防需用外洋槍礮藥彈等項價銀截至光緒三十三年年底止業經造冊 奏咨在案現在盜風尚未斂戢水陸各營巡防緝捕在在均需軍火應用茲查光緒三十四年分收買報効訂購各起外洋槍礮軍火藥彈用費價值共銀一十六萬八千三百餘兩據廣東海防善後局司道造冊詳請 奏咨前來 覆核無異除冊送部外理合附片具陳伏乞 聖鑒敕部立案施行謹 奏宣統元年十月初二日奉 硃批該衙門知道欽此

署理兩廣總督袁樹勛奏諮議局成立開會日期摺

奏爲具報廣東諮議局依限成立遵章開會日期恭摺仰祈 聖鑒事竊 臣伏讀光緒三十

四年六月二十四日 懿旨各省諮議局著各省督撫迅速舉辦實力奉行自奉到章程

之日起限一年內一律辦齊等因欽此並准憲政編查館將奏定章程咨行前來當經督 臣張

人駿於本年正月在廣東省城照章設立諮議局籌辦處一所彙將籌辦情形先後詳晰奏陳

會同 臣彙報成績在案旋屆九月初一日爲諮議局成立之期由 臣召集各屬舉定議員九十

一名加四駐防專類三名共九十四員全體到會惟時 臣親自督率恭行開會禮節宣布 朝

廷德意官紳士庶歡忭同深外國商民亦有來會觀禮者隨經各議員票舉戶部主事易學清

爲議長工部主事邱逢甲員外郎職銜舉人盧乃潼爲副議長均已隨時電咨憲政編查館備

案其常駐議員并如額選足會場秩序井然有條開會以後應提議案亦經 臣先期起草劃付

該局公同評議期於集思廣益折衷輿論審擇執行用以仰副 聖主視聽同民之至意除

咨憲政編查館查照外所有具報廣東諮議局成立開會日期緣由恭摺具陳伏乞 皇上

聖鑒 奏宣統元年十月二十五日奉 硃批該衙門知道欽此

署理兩廣總督袁樹勛奏續籌自來水公司辦法片

再光緒三十二年間廣東省城創設自來水公司經前署督 臣岑春煊籌撥官本銀六十萬兩

以爲之倡並由上海股實職商擔承招集商股銀六十萬兩以爲之助作爲官商合辦一面購

訂機器聘僱工師當經分別奏咨並聲明款項如有不足或添商股或撥官本一俟工竣後核

算再行詳晰 奏報各等情奉 旨欽遵在案當於三十二年六月陸續開工至三十四

年六月各工次第告成八月行開車試水禮各戶報裝食水者一洗從前藏納垢汙之苦更免

傳染疾疫之虞並由公司組織模範消防隊聞警馳救靈捷逾於常時紳民稱便此開辦自來水以來之成績也惟核算出入相準不敷已鉅因援照開辦 奏案續添商股銀三十萬兩內除食水認股銀六萬四千餘兩餘由董事公議照章老股分攤官商各半並以官股所得新股讓歸滬商其餘續訂各節務期官商兩得其平載入合同羣議允協而尤以擴充辦法撙節費用爲宗旨該公司締造艱難成效昭著以他省爲比例如漢口自來水公司成本較粵省爲鉅而管線不及粵省之長上海租界及內地自來水公司開辦數年始略有水資可收而粵省截至本年九月底已可月收銀一萬四千元此又開辦自來水以後之明效也並以公司性質無論官商各股同處股東地位而廣東自來水公司官爲提倡始而滬商擔承繼而粵商響應協力維持以有今日按照定律公司有盈餘不得移本作息然吾國風氣尙未開通各省商辦實業公司自入股之日起卽行給息以資激勵而廣招徠亦屬不得已之辦法廣東自來水公司開辦三年墊付股本官息爲數不貲現又公議以宣統元年以前爲創辦年分官股暫不支息宣統二年起官商一律照支此項暫不支息之官股俟公司獲有盈餘再勻作六年分還公家不加子息此則於商業整頓之中仍寓官力維持之意以期漸符定律無背商情此次滬粵各董開會商榷並經 派委該公司總理勸業道陳望曾預會其關繫較重者由該董等隨時稟謁指授機宜開誠布公畛域悉化自來官商合辦往往官或以意氣相凌而商或於規則條件稍稍隔闕亦且見病於官近者商智日進官亦兢兢以通商惠工爲務如廣東自來水公司三年之際艱苦經營亦頗賴陳望曾始終左右聯絡維持之力此尤不可沒者也除將公司及董事局辦事規條並增訂合同分咨查照外理合附片具陳伏乞 聖鑒訓示謹 奏宣統元年十月二十六日奉 硃批該部知道欽此

署理兩廣總督袁樹勛奏已故左江鎮總兵黃忠立請從優議卹摺

奏爲總兵在任積勞病故懇 恩敕部從優議卹恭摺具陳仰祈 聖鑒事竊查廣西左

江鎮總兵黃忠立於宣統元年正月初八日在任因病出缺經前督 張人駿 奏報在案茲

據廣西提督 龍濟光 咨稱查該總兵黃忠立於同治初年由勇目投効軍營隨勦宣賓橫永

各屬陣斬隆安首要羅金盛李卜瓊異常奮勇迭獲優獎繼隨前廣西提督 馮子材 出關勦

辦首擒悍黨多名嗣首匪吳終及越南黃崇英等股匪蕩平奉准自率一軍爲立字營旋因叛

將李揚才竄擾越南復隨提督 馮子材 出關生擒僞統領陳佐邦掃平巨寇叛將授首遞保

以副將用 賞給銳勇巴圖魯勇號光緒九年奉調督帶兩防分防越南宣光太原等省

是時法越構兵大軍未集南關失慎勢甚岌危該總兵親督所部獨當其衝復會同諸軍連宵

鏖戰短兵相接計不能收隊七晝夜卒克復諒山文淵重慶府等城擢總兵留桂補用撤師入

關歸前廣西提督 蘇元春 節制委充邊防營務處二十八年內地遊匪猖獗柳慶鎮總兵馬

盛治遇伏陣殞 各營歸該總兵接統是年七月蒙 簡授柳州鎮總兵復委署右江

鎮事務是時南太泗鎮各府遍地糜爛民匪不分劫掠頻仍該總兵督率所部周歷瘴鄉勦撫

兼施恩威並用分隊痛勦遊匪聞風散竄乘虛攻陷東蘭州城該總兵兼程越境跟蹤追勦克

復州城二十九年十月蒙 恩以提督記名簡放適柳州新撫匪首陸逆亞發叛陷郡城

竄匪與之合股分頭竄擾陷三防羅城懷遠大長安據梅寨是時提督 龍濟光 督率濟軍由

小長安黃村金城江直趨羅城三防次第收復該匪回竄思恩黃村一帶旋聚殲於官橋大股

潰敗陸逆亞發分幫竄慶遠府屬之五十二峒及四十八峒該處延袤數百里崎嶇險阻該總

兵隨同常備濟榮忠貴各軍分道兜截風餐露宿不辭艱險截擊至中渡斬獲盈千陸逆授首各响一律搗平三十年十一月 賞換伊圖渾巴圖魯勇號柳慶鎮本缺奉文裁撤復兼

簡授廣西左江鎮總兵嗣因柳廣地方肅清飭赴左江鎮本任上年革黨攻陷南關砲台該總兵奉調防邊愛店吉普土思州一帶人心惶惶民情震動該總兵外攘內安撫綏鎮攝匪徒不敢勾結狂逞該總兵之力為多合錄該故員生平戰蹟咨請核辦前來 查該總兵黃

忠立久任軍事卓著戰功實為桂省諸將之冠茲因病出缺追念前勞靡不同深惋惜合無仰懇 天恩俯准敕部將廣西左江鎮總兵黃忠立照軍營立功後積勞病故例從優議卹並將生平戰蹟宣付史館立傳以慰忠魂而彰戰績出自逾格 鴻施除飭取履歷咨部外謹會同廣西提督 龍濟光恭摺具陳伏乞 皇上聖鑒訓示謹 奏宣統元年十月二十七日奉 硃批著照所請該衙門知道欽此

署理兩廣總督袁樹勛奏粵省度支短絀籌辦情形摺

奏為粵省度支異常短絀新增各款措畫維艱請將目前籌辦大概情形恭摺仰祈 聖鑒事竊維周官冢宰之屬有內外府司會以分掌財用論者謂以三十年之通制國用苟無三年之蓄則日非其國也吾國古時之兢兢於財用與今東西各邦豫算決算用意頗相似 愚以

爲今日各省財用之竭蹶蓋不特無三年之蓄而已朝下一令曰籌款興辦夕下一令曰設法彌補其實應籌之款甚夥而可設之法將窮此臣於抵粵以後日擊度支短絀所爲焦思殫慮不能已於言者也查粵省度支自剛毅來粵清查後早已搜括無遺歷任督撫臣亦皆以入不敷出奏陳 天聽近則歲入雖有增加而歲出更不止倍蓰據各司道摺呈其類別有數端曰藩庫已裁之糧道庫屬焉爲藩司所專管除由關鹽釐各庫撥解不計外計歲入銀四百九十餘萬兩歲支出銀四百七十餘萬兩曰運庫爲運司所專管計歲入銀三百三十餘萬兩歲支銀則三百五十餘萬兩曰關庫自前督臣岑春煊接管粵海關監督後仍派司道爲總會辦較之未裁以前收數驟增計歲入關平銀六百五十餘萬兩又洋銀四十餘萬兩歲支出銀六百六十餘萬兩又洋銀四十餘萬兩曰釐金局亦派司道爲總會辦計歲入銀三百零三萬餘兩歲支出銀二百八十餘萬兩曰善後局亦派司道爲總會辦除由關釐兩庫撥收備解不計外歲入五百三十餘萬兩內賭餉占十分之八歲支出銀七百六十餘萬兩內以水陸防軍經費占多數又學務公所巡警勸業兩道除由各庫協撥外自籌用款歲約一百十餘萬兩通計歲入銀二千四百萬兩有奇而歲出銀已達二千六百萬兩以外出入相抵常年不敷約銀二百餘萬兩而新增之款如海軍開辦常年經費認解五十萬兩 陵工經費吉林邊防經費共攤解四十萬兩又照九年籌備清軍開辦諮議局建築經常各費開辦省城西埠審判廳及改良監獄經費推廣學堂擴充巡警各經費豫計常年不敷銀當在四百萬兩以外而善後局歷年積虧約銀四百萬兩尙不在內至於善後局入款本以賭餉爲大宗業經臣奏明籌抵減禁此事務在必行且前督臣張人駿覆奏摺內亦有無論籌得何款均先儘賭餉撥抵之語是

目前所籌之款須先撥抵賭餉銀四百餘萬兩而後可以彌補常年不敷之四百餘萬兩及善後局積虧之四百萬兩各項併計粵省負累已達一千三百萬兩左右臣撫衷竊計以為無論如何仍先從籌抵賭餉下手蓋賭餉猶鴆毒也既毒不去雖日醫以膏藥亦無救於饑渴所以不能遽予裁革者其款皆有指抵而水陸勇餉新軍經費為尤多現在行政費地方費尙未確定如近日兩湖督臣陳夔龍奏請以混成協餉銀由部籌撥經部臣覆奏仍令該省自行騰挪未能照准是行政經費不能遂由中央擔任之証法理上之研求與事實往往不能符合者此亦過渡時所無可如何者也臣接蒙兩月餘雖經嚴飭各署局裁汰冗糜現據陸續報告豫計截至明年正月以後每年節省銀可五十餘萬兩杯水車薪於事誠知無裨惕來日大難之至盡在我一分之心節流之計畫僅及於此此廣東目前財政困難之實在情形也抑臣尤有請者粵省各局所出納均屬正經款項惟善後局所收以賭餉為大宗腥羶相習輒為人所詬病然賭餉之減禁既視籌抵之有無而餉需之籌撥又以該局為樞紐臣審度再三就目前情形祇得將該局冗員糜費切實裁汰惟善後名義容有未符擬援山東成案改名籌餉局仍由藩司總理並派員會辦以昭周密庶符本年四月間臣諭旨各省財政由各督撫飭藩司等通盤籌畫認真整頓之至意目前新增各項或臣官府要款或新政急需歷經離認在先臣惟有督飭司道各矢公忠設法撥湊先其所急力求捐注斷不敢稍涉推諉但懇寬以期限或冀運以補綴並乞臣天恩逾格敕下部臣嗣後遇有京外用款暫免派撥俾得稍紓喘息以免貽誤感沐臣鴻慈實無涯涘所有粵省度支短絀籌辦各緣由理合恭摺具陳伏乞臣皇上聖鑒訓示謹臣奏宣統元年十一月初八日奉臣硃批度支部議奏片二件併發欽此

●又奏挪用扣平銀兩就款報銷片 再案查度支部咨行京外清理財政章程凡各省出入款項及旗綠營練兵餉凡向支庫平者每兩核扣六分勇餉開支庫平者核扣四分專款存儲候撥等因先經前督臣譚鍾麟飭局查明局庫需用銀兩向按庫平支發應支水陸防勇薪糧等項每兩扣平四分每年約可扣銀四萬餘兩又旗綠營洋操官兵薪餉及一切雜款每兩扣平六分每年約可扣銀三萬餘兩會同前撫臣許振禕附片 奏明在案厥後局庫每年支款日多扣平之數亦日增鉅統計應扣四分六分減平銀兩自光緒二十三年七月起截至三十四年年底止共扣存銀一百九十五萬二千四百九十八兩二錢六分零一毫六絲九忽內除查照部章提解過光緒二十三年起至三十二年各案報銷部飯銀五萬七千五百六十四兩五錢三分零八毫又光緒二十五年五月遵照部電撥解山東河工銀十萬兩另補水補平匯費等銀一萬三千一百兩又部撥抵補松滬貨釐銀一百二十萬兩案內分年撥交藩司彙解銀二十二萬兩外尙應存銀一百五十六萬一千八百三十三兩七錢二分九釐三毫六絲九忽原應遵照部行專款存儲候撥惟前將闈姓捐輸指還四國洋款歷年本不敷支嗣因科試停止闈捐更成無著加以粵省盜風素熾頻年添勇購械派員清鄉惠潮欽廉各屬相繼匪亂添募防營增設輪船舳板各口水軍添設巡勇加給津貼歲增款不少且奉行編練新軍開辦學堂遣派學生出洋游學需費尤鉅省城開辦巡警又須補助經費而奉撥解京各款如北洋練兵專使考求政治民政部學部大學堂旅學堂工藝廠鐵路公廠步軍統領衙門各項經費均近年陸續增支者益以臨時增支無定之費統計常年出款以視未奉核扣減平以前奚止倍蓰雖迭經飭令承餉各商增繳餉項而出入相衡仍屬不敷甚鉅勢不能不挪款支應以濟

急需此初次扣平銀兩早經挪用無存之實在情形也核計前項應存減平銀兩內實撥開捐解還四國洋款不敷銀七十五萬二千七百二十六兩九錢八分七釐四毛又因各項要需挪用光緒三十一二兩年海防善後局報銷案內報收銀三十六萬四千零零二兩九錢八分七釐零六絲九忽三十三四兩年海防善後案內收存銀四十四萬五千一百零三兩七錢五分四釐九毫所有前項應存平銀一百五十六萬餘兩業因要需挪用無存前據廣東善後局司道查明造冊詳請奏咨等情到前護督臣胡湘林未及核辦卸事移交到臣查減平一項原准部咨飭令專款存儲候撥洋款事關大局近年新政一切要需日益增多均不容稍涉延誤任挪移應付實屬萬不得已既屬以公濟公並無絲毫弊混現值整頓財政一切款目皆須核實清理前項挪用扣平銀兩若不據實陳明就款清結必致虛數徒存終成無著合無仰懇天恩俯念粵省財政支絀出款日增准將歷年因需挪用前項扣平銀兩就案報銷於清理財政不無裨益除列單咨部外謹附片具陳伏乞 聖鑒訓示並敕部立案施行謹 奏宣統元年十一月初八日奉 硃批覽欽此

●又奏欠解歷年匯豐鎊款歸入舊案結銷免予提解片 再粵省度支異常支絀情形業經專摺 奏陳在案續查接管案卷廣東善後局有匯豐鎊債一款每年應解銀四十萬兩歷年皆係先期解滬備還惟光緒二十九年分短解八萬兩三十年分短解一十萬兩三十一年分短解二十萬兩合共銀三十八萬兩此外舊欠銀兩疊奉部咨暨兩江督臣咨催均經前督臣將支絀為難情形咨覆查照 奏請免解未奉核准溯查善後局奉撥此項係於光緒二十五年間前大學士剛毅來粵籌餉截存局用銀四十萬兩即以之指撥歸還匯豐鎊款其後截

存各項均以陸續復回照舊開支以致積年短解鑄款價銀三十八萬兩無從措解迨至前督
臣岑春煊請將整頓關稅所得新增盈餘補撥此項鑄價始能按年照數解足原擬將三十一年以前短解銀兩設法騰挪勉爲籌補惟粵省頻年舉辦新政支用更繁至無餘力再行清解現值清理財政一切收支款用均從實報更無閒款可以挪移前准度支部電飭將欠解各洋款措解以維大局又經前督臣張人駿轉行司局設法籌解隨據廣東善後局司道詳稱前項匯豐鑄價光緒三十一年以前短解銀三十八萬兩實屬計窮羅掘無可補直請照清理財政部行章程歸入三十三年以前舊案例單結銷免予籌補詳請具奏等情前護督臣胡湘林未及核辦卸事移交到日覆查係屬實在情形合無仰懇天恩俯准將善後局庫欠解歷年匯豐鑄款銀三十八萬兩援照部行歸入舊案結銷免予提解此後每年應解賠款庶可應期解遞不致貽誤要需出自鴻施逾格除咨度支部查照外理合附片具奏伏乞聖鑒訓示謹奏宣統元年十一月初八日奉 硃批覽欽此

署兩廣總督袁樹勛奏警察新政各年用款咨部立案片

再准部咨嗣後凡有新添之款必須事前奏咨立案事後方准報銷等因歷經遵辦在案查粵省整頓警察情形先於光緒三十二年五月間經前署督臣岑春煊詳晰具陳嗣於三十四年六月間又經前督臣張人駿邊員奏請簡放廣東新設巡警道缺七月十四日內閣奉

上諭廣東巡警道員缺著王秉必補授欽此先後分行遵照飭赴新任查查粵省巡警初開辦於老城設立總局繼及於新城西關設立分局維時未設警缺未奉定章所有三十年以前總分各局支用各款經由廣東善後局按年造冊報銷嗣查各處警務逐漸擴充總局公事

日益紛繁隨時添派委員司事人等襄助爲理並添設暗查各員增給薪費以資辦公而期周密又東南關地當衝要煙戶繁雜良莠不齊河南與省會相望多爲紳富聚居辦理巡警均爲刻不容緩亦經次第增設又創辦之初各局警兵皆屬臨時招募未受學堂教育勢難盡諸義務挑選勇丁遴派教習訓練惟兵丁有教而員弁無教不足以資督率復飭令總分各局在事人員按時聚處講習討論並派選員弁學習以爲派往各屬協籌舉辦之資庶可通省普興共收實效復開警察學堂以資教育又衛生爲警察要務粵省頻年患疫固屬天災流行亦由渠巷積汚居處不潔所致於光緒三十一年間飭由各分局僱募清道夫逐日打掃免礙衛生又溝渠之通塞街道之曲直非胸有成竹不能布置咸宜爰飭實地測量列爲圖說庶可隨時稽

核督飭濬修局所分段既多巡兵人數亦衆往往此方革退彼復充補耳目易混流弊難防因令拍照留影以杜欺隱而重考察又總局輕罪人犯釋放後仍復游手滋事因就局內隙地設所教以工藝俾謀生計得以化莠爲良凡諸巡警新政於未奉定章以前均係因時制宜酌量辦理支銷一切均用元計並未扣平所有自光緒三十一年起至三十三年止各年用款除由善後局撥解外其餘不敷之數均係自行籌給並未動用正項以上支用各款查係新添之款據廣東巡警道王秉必列冊詳請 奏咨立案前來 覆核無異除分咨各部查照外謹附片具 奏伏乞 聖鑒敕部立案施行謹 奏宣統元年十二月十三日奉 硃批該部知道欽此

●又奏查明藍光第被系冤抑請開復原官等片 再查接管案卷前護督 臣胡湘林任內准都察院咨據已革廣東廣甯縣知縣藍光第以被系冤抑等情來院呈訴移咨確切查明如實

有冤抑卽聲叙實在冤情出具切實考語由該督奏明辦理仍咨覆備查等因計送副呈一件內開准補廣東廣甯縣知縣藍光第年四十六歲四川資陽縣人由優增生中式光緒十七年辛卯科本省鄉試舉人戊戌大挑知縣分發廣東二十九年准補廣甯縣知縣尙未赴任忽經前署總督岑春煊以性情陰險聲名惡劣考語奏參革職不得已去粵赴京恭逢

孝欽顯皇后七旬萬壽隨班祝賀蒙

恩賞還原銜三十一年投効黑龍江經前黑龍江

將軍程德全委充訥謨爾河墾務提調該荒放竣奏請開復原官仍留原省補用經都以非原案開復照例議駁原省並飭繳倍半捐復銀兩藍光第因官受累無力措辦難以赴引與革職廢員無異今瀝陳冤略懇予昭雪等情咨行到粵當經卷查藍光第係經前署督臣岑春煊於

甄別案內以其性情陰險聲名惡劣奏參光緒二十九年十二月初七日欽奉

上諭革

職轉行遵照今該革員以被參冤抑呈經都察院咨查行司確查未覆胡湘林旋值卸事移交到臣茲據署廣東布政使沈曾桐會同署提學使蔣式芬按察使趙瀆彥覆稱藍光第於光緒二十四年到省二十九年准補廣甯縣知縣尙未赴任奉委密拿已革夜護司巡檢甘怡查甘怡係於前署連平州吏目任內與知州徐仁傑等狼狽爲奸奏參革職議罪充軍飭令拿解官犯藍光第奉委馳往會縣拿獲解省銷差由司詳准記功此外曾充房捐文案並未當過要差所劾性情陰險聲名惡劣考語並無實在事迹可指疊經調查各處案卷及訪諸在粵宦僚尙無陰險惡劣確據均言藍光第昔年被參不免冤抑請予 奏明辦理等情前來臣查藍光第經前署督臣岑春煊以性情陰險聲名惡劣奏參革職並無實在事迹可指既經由司委查亦無陰險惡劣確據是原參不無冤抑該員先已蒙

恩賞還原銜並由前黑龍江將軍另

案奏請開復原官仍留原省補用惟部以非原案開復照例議駁原省並飭繳倍半捐復銀兩該員本屬寒儒無力措繳難以赴引仍與廢棄無異當此整飭吏治之際似未便任其永歎沈淪合無仰懇 天恩俯准將已革另案開復廣東廣甯縣知縣藍光第仍歸原案開復免繳捐復銀兩留原省原班序補該員係曾經赴引之員並請免予送部引 見以示體恤而昭公道除取該員履歷咨送吏部及咨覆都察院查照外謹附片具陳伏乞 聖鑒訓示謹奏宣統元年十二月十三日奉 硃批藍光第著開復原官該部知道欽此

署理兩廣總督袁樹勛奏九月雨糧及廣韶等屬被風被水分別賑撫情形摺

奏為查明九月分雨水田禾糧價及廣韶惠肇羅陽嘉等府州屬兩次被風被水分別賑撫情形恭摺仰祈 聖鑒事竊照廣東省宣統元年八月分雨水田禾糧價情形業經 臣 恭摺具 奏在案茲查廣東省城宣統元年九月份上旬初六七等日風雨驟作當經飛飭各屬查勘並飭司局派員乘輪馳收賑撫旋據各該地方官先後稟報廣州府屬之省河南海佛鎮東莞新甯增城三水嘉州府屬之歸善博羅河源羅定州屬之東安等縣或倒塌衙署民房傷斃人命或覆溺船隻塌卸城垣沖決基墜淹浸田禾災情輕重不等復經再飭司局撥款委員率同辦賑紳商分段施放急賑安置災民其餘廣惠各屬及西北兩江亦已飭令由局派員馳赴查勘賑撫業將大概情形電請軍機處代 奏旋於九月十八日欽奉 諭旨著該督督飭各該地方官妥為撫卹毋任失所其西北兩江著一併查明分別辦理欽此欽遵轉行遵照隨據廣州府屬之佛山新甯香山清遠從化惠州府屬之永安韶州府屬之翁源肇慶府屬之廣甯高明高要開平陽江州屬之恩平嘉應州屬之長樂等縣縣稟報或初六七或十二三等日先後同遭風災水患房屋船隻圍墜田禾人口均有倒塌沈溺沖決淹浸傷斃各情形又經 臣 飭行司局多派委員加撥銀米衣藥分投馳往勘賑並嚴飭各屬州縣將所報未能詳盡各實數逐一親勘明確據實詳稟容俟各印委一律勘報齊全再行詳晰具 奏至九月下旬得雨數次未經報災各州縣晚禾漸次成熟園蔬雜糧亦尚暢茂各屬稟報與省城大略相同糧價較上月

稍減民情靜謐堪以仰慰 聖懷所有宣統元年九月分雨水田禾及廣韶惠肇羅陽嘉等府州縣兩次被風被水分別賑撫情形合恭摺具陳並將各屬糧價另繕清單恭呈 御覽伏乞 皇上聖鑒 宣統元年十二月十三日奉 硃批知道了欽此

署兩廣總督袁樹勛奏考取己酉科優拔生摺 併單

奏為恭報宣統元年己酉科考取拔貢優貢姓名分繕清單恭摺仰祈 聖鑒事竊照前准禮部咨直隸總督袁世凱等奏停科舉摺內通籌士路一條聲明十年三科之內各省優貢照舊舉行己酉科拔貢亦照舊辦理皆仍於舊學生員中考取已入學堂者不准應考優貢額少請按省分酌加分別錄取等語查拔優貢向皆於優等生員取錄兼甄文行所得人才較多自

應量予加取以廣甄拔擬請己酉科舉行拔貢照向額加倍考取優貢照向額加四倍考取以惠寒峻均於壬子年考優後一律停止學堂學生仍照原奏不准與考等因奉 諭旨

通行欽遵各在案茲屆本年己酉科應行考取選拔優生飭據各屬切實保送先由署提學使蔣式芬分場屆試慎加遴選前來經 臣覆試嚴密甄別查照新章加倍取錄選拔生二百一十七名優生二十名業經先後銜定榜示曉諭並將試卷清冊咨送禮部及咨移吏學二部給事

中查照外理合分繕清單恭摺具 奏伏乞 皇上聖鑒再防城縣光緒十七年始行設學

丁酉科文生無多未予選拔本屆己酉科選拔之年查該縣學册列有生員六十三名自應援照禮部奏准成案取拔一名合併陳明謹 奏宣統元年十二月二十九日奉 硃批該部

知道單併發欽此

謹將宣統元年己酉科選拔各生姓名繕具清單恭呈 御覽 計開 肇慶府學附生周殿康 信宜縣學廩生張榮鈞 徐聞縣學附生趙鼎璜 南海縣學附生司徒學枚 東安縣學附生盛冕 新會縣學廩生梁之柱 廣州府學附生黃佛頤 嘉應州學廩生楊家鼐 徐聞縣學附生潭昌朝 化州學附生李照璠 肇慶府學廩生宋景祚 廣州府學附生戴壽年 高要縣學附生利若純 新興縣學附生顧錦泮 肇慶府學廩生孔昭浦 東安縣學廩生郭廷陽 新會縣學附生黎家麟 連平州學附生江恩舉 海豐縣學附生何彝泰 開平縣學增生麥廷愷 海豐縣學附生陳春熙 南海縣學附生劉錫忠 香山縣學附生陳濠 南雄州學廩生朱家毅 德慶州學附生戚焜 龍門縣學廩生李國璠 茂名縣學廩生梁鉅熙 花縣學附生湯秉鈞 萬縣學廩生文龍會 新安縣學廩生趙元豪 德慶州學增生聶全慶 歸善縣學附生黃紹裘 萬縣學廩生蔡鳳翔 惠州府學廩生張廷俊 廣州府學附生蘇維樑 惠州府學附生呂心焯 四會縣學廩生吳祖鑑 瓊州府學增生黃觀治 雷州府學廩生陳景鑒 順德縣學廩生周鈞濂 高明縣學廩生區汝芬 昌化縣學廩生鍾世瓊 順德縣學附生黎豫樟 龍川縣學廩生駱雲章 肇慶府學廩生洗杰元 增城縣學增生郭榮 高要縣學附生溫耀南 海陽縣學廩生賴家駒 番禺縣學附生沈傳霖 文昌縣學廩生黃河清 定安縣學附生王恩榮 鶴山縣學附生馮殿章 儋州學廩生陳有壯 澄海縣學附生李向高 文昌縣學附生馮官堯 廣甯縣學廩生王邦耀 龍川縣學廩生沙寶璜 陽春縣學附生李英元 博羅縣學廩生殷維崧 興甯縣學附生陳鵬雲 鶴山縣學廩生任超治 興甯縣學附生張其鐔 歸善縣學附生陳希哲 廣甯縣學廩生莫毓楨 封川縣學增生鍾應芹 旗籍附生正白旗漢軍白其焯 高州府學附生易浚明 連平州學附生顏壽澤 和平縣學廩生凌開先 潮陽縣學附生許與喬 封川縣學廩生吳桐芳 永安縣學廩生鄧續先 連山廳學附生虞先旺 大埔縣學附生楊紀清 東莞縣學附生張淦光 茂名縣學增生吳祖榮 臨高縣學附生王光謨 清遠縣學附生唐壽仁 西甯縣學廩生張炳瑚 旗籍廩生廂黃旗漢軍張慶典 韶州府學附生甘松生 曲江縣

生李家訓 崖州學廩生鄭允煊 遂溪縣學附生林萬年 仁化縣學廩生劉鳳章 連州學廩生馮祖堯
海康縣學附生馮啟元 感恩縣學廩生王道照 陽江州學廩生關祝齡 開建縣學廩生莫士瀛 電
白縣學附生楊福增 電白縣學廩生崔廷俊 遂溪縣學附生殷體仁 高州府學廩生鄧兆榮 恩平縣
學附生吳紹華 高州府學廩生謝寶瓊 仁化縣學附生李占元 防城縣學附生楊德明 瓊州府學附
生王朝楨 饒平縣學附生鄭景清 韶州府學廩生王會心 增城縣學廩生劉世昌 潮州府學廩生林
煥然 普甯縣學廩生方鑑猷 普甯縣學廩生方宗勳 澄海縣學附生林一鳴 海陽縣學附生楊敬師
長甯縣學附生羅振濠 海康縣學附生吳治河 香山縣學廩生韻榮桂 東莞縣學附生祁正 饒平
縣學附生唐樹聲 廣州府學附生黎慶恩 石城縣學附生龐苑輝 鎮平縣學附生楊鑑汀 樂會縣學
廩生林宴瓊 西甯縣學廩生黃翰元 番禺縣學附生姜福年 連山縣學廩生虞先隆 雷州府學廩生
楊允述 從化縣學附生張斗垣 平遠縣學廩生林成蔭 翁源縣學廩生李果珍 平遠縣學廩生姚宇
陶 合浦縣學廩生蘇乾初 吳川縣學附生吳堃靜 臨高縣學附生符夢卜 清遠縣學附生侯世藩
感恩縣學附生盧宗棠 揭陽縣學附生謝天垣 昌化縣學廩生任采芹 靈山縣學附生鄭承烈 長樂
縣學附生陳培琪 長樂縣學附生張養渠 揭陽縣學廩生黃鐘 潮陽縣學廩生林挺芝 樂昌縣學廩
生白錫英 陽江州學附生林應芬 鎮平縣學附生黃鳴謙 恩平縣學廩生伍瑤光 翁源縣學附生梁
作屏 英德縣學廩生胡耿東 英德縣學附生巫近仁 河源縣學附生馬兆麟 瓊州府學附生林大魁
韶州府學廩生許廣梅 新安縣學廩生劉彭齡 三水縣學附生馮煥光 會同縣學廩生楊祚汪 陽
春縣學附生梁榮樞 嘉應州學附生許騰驥 新甯縣學附生余觀光 石城縣學附生曹星照 澄邁縣
學附生曾德茂 陵水縣學附生胡鍾舜 乳源縣學廩生袁瑄 澄邁縣學廩生李標香 樂會縣學附生
翁衍振 鶴山縣學廩生楊仲修 樂昌縣學附生邱鑑澄 瓊州府學附生柯挺生 陽山縣學廩生何普
芬 合浦縣學廩生林汝廣 三水縣學附生金相 陵水縣學廩生劉瑞光 定安縣學附生莫伯英 始

興縣學廩生饒顯君 長甯縣學廩生潘沛霖 大埔縣學附生范郁文 宣統元年十二月二十九日奉

硃批覽欽此

謹將宣統元年己酉科考取優貢姓名繕具清單恭呈 御覽 計開 順海縣學附生馮美昌 南海縣學廩生余肇湘 順德縣學附生黃鳳蘇 高要縣學廩生黎錦文 東莞縣學附生倫邁 東莞縣學廩生曾宗敏 番禺縣學附生沈誦清 信宜縣學廩生林适 新會縣學附生潘金城 信宜縣學附生梁家駿 順德縣學附生黎溥 南海縣學廩生盧維嶽 新會縣學附生甘椿 南海縣學附生何寶琦 惠州府學廩生張勝鏞 香山縣學附生鄭人瑞 悉禺縣學廩生張樹棠 廣州府學附生張賜康 旗籍附生張廣源 信宜縣學廩生張祺 宣統元年十二月二十九日奉 硃批覽欽此

署理兩廣總督袁樹勳奏奏運司丁乃揚摺

奏為密陳監司大員不能稱職恭摺仰祈 聖鑒事竊查粵省向稱財賦之區論者多指鹽務為大宗鹽務之疲敝臣於改良鹽務摺內言之詳矣方今庶政日新而整飭鹽綱至上煩 聖慮詔示天下以興利除弊為要圖臣自履任以來即以清鹽盡禁賭禍為入手之政策非好為其難誠不得已也運司丁乃揚壯年廩仕素有才能際此整頓度支宜如何自矢公忠力圖振作數月以來臣與之開誠布公討論鹽務利弊深冀收指臂之效設法改良乃該員於贖贖之餘積為畏蕩敷衍所至流為因循不知鹽盡一日不清即賭禍一日不去况煙燴 諭旨注重鹽綱斷不容糾葛紛紜聽其疲敝臣既忝會辦鹽政之 命所屬屬僚稱職要策羣力相與有成似該員之進退務復既不肯破除情面將各項規費早日剔釐此後責任甚重事務尤繁輔助斷難得力合無仰懇 聖明將兩廣鹽運使丁乃揚即行開缺仍由臣澈查積弊分別辦理後再酌量送部引見並請另 簡廉正綜核之員補授俾得整飭鹽務以濟度支粵省幸甚 宣統元年十二月二十八日奉 硃批另有旨欽此

署理兩廣總督袁樹勳奏酌保查辦羅定州盜匪出力文武各員弁摺併單

奏為遵 旨酌保查辦羅定州屬盜匪在事尤為出力文武員弁繕單請獎恭摺仰祈 聖鑒事竊照廣東羅定州屬與西省接壤而肇屬之陽春陽江及高屬之信宜各處犬牙交錯頻年盜賊披擄士庶受害已久前督日張人駿調撥勇隊派委廣肇羅道蔣式芬親往督辦飭令各營分路搜勦匪黨或率衆拒敵或詐降圖逞情勢兇悍各營轉戰於帽子嶺石仔坑等處生擒擊斃收降共計數百名匪股殲除幾盡全境廓清所有在事出力員弁經張人駿奏懇釋尤酌保欽奉 硃批准其擇尤酌保數員欽此當經轉行欽遵查據廣東提學使廣肇羅道蔣式芬將在事尤為異常出力員弁開列稟請獎叙已飭據廣東營務處彙轉捕局司道核明與例章銜屬相符詳請具 奏給獎前來臣查羅定匪患之深由來已久此次張人駿派委廣肇羅道蔣式芬督軍查辦分路搜勦未出旬日生擒擊斃收降賊匪共數百名收效可謂神速在事員弁或追勦於險嶺深山或博命於槍林彈雨艱險不詳著有勞勩謹擇尤請獎繕具清單恭呈 御覽計文武酌保九員武職酌保五員業已再三核減實無冒濫合無仰懇 天恩俯准照擬給獎以示鼓勵除飭取各員履歷咨部外所有違 旨酌保查辦羅定州屬盜匪在事尤為出力文武員弁請獎緣由謹繕清單恭摺具 奏伏乞

皇上聖鑒訓示謹 奏宣統元年十二月二十九日奉 硃批該部議奏軍併發欽此
謹將查辦羅定州屬盜匪在事尤為出力文武員弁繕具清單恭呈 御覽 謹開 統帶右路巡防第八九十等營分省補用通判隆世儒擬請免補通判以直隸州知州分省補用 高肇羅清鄉行營差遣審案兼文案委員同知銜廣東試用知縣陳恩沛擬請免補知縣以直隸州知州仍留原省補用 高肇羅清鄉行營收發兼差遣委員准補定安縣太平司巡檢李少青擬請以縣丞在任候補 管帶新軍左營縣丞軍銜賀蕓珊擬請以縣丞歸部選用 西甯縣清鄉委員前恩平縣知縣陳清源擬請開復原官並免繳捐復銀兩 高肇羅清鄉行營差遣委員監生韓弼擬請以從九品歸部選用 高肇羅清鄉行營差遣委員府經歷甄銜姜春生姜逢源均擬請以府經歷歸部選用 高肇羅清鄉行營文案兼雜差委員湖北候補府經歷柳人嵩擬請俟補府經後以知縣補用 統帶右路巡防第十一營營新軍左右兩營儘先千總何元山擬請免補

千總以守備補用 管帶右路巡防隊第九營水師提標儘先千總李耀漢擬請免補千總以守備仍留原標儘先補用 管帶新軍前營水師提標中營補用都司李得發擬請免補都司以游擊仍歸原標儘先補用 管帶新軍右營拔補千總太永寬擬請免補千總以守備補用 管帶右路巡防隊第十營署肇慶協營東樓汛千總清遠營儘先千總邱可榮擬請免補外委把總仍以千總撥歸肇慶協儘先拔補奉 硃批覽欽此

●又奏羅定州勦匪出力之道員蔣式芬等分別請獎片 再廣東羅定州所轄地方內與本省之高肇兩府屬界連外與廣西梧州鬱林各屬交接山深藪密匪出入靡常近年盜患猖獗尤甚經前督臣張人駿派委廣肇羅道蔣式芬親往督辦分別勦撫計生擒擊斃收降各匪共數百名匪股殲除民稍安甯又經張人駿奏請將在事出力人員擇尤酌保欽奉 硃批准其擇尤酌保數員欽此 臣遵飭查明異常出力文武員弁繕單另摺請獎在案伏查此次清鄉勦撫兼施所有各營弁勇悉係該道蔣式芬督同親臨各屬調度勦辦不遺餘力當時尚有著匪陳孟要一名實為羅信一帶渠魁股首漏網潛逃經前督臣張人駿奏明有案該道蔣式芬在廣肇羅道任內雖一時未能弋獲惟於調署提學使司任後仍隨時傳見員弁暗購安線授以機宜隨據已革游擊鄧正彪密報偵悉首惡陳孟要蹤迹蔣式芬即會同水師提督臣李準熟商飭派統帶水師提標親軍前經奏保准補缺後以道員用補用知府吳宗禹已革游擊鄧正彪督同弁勇線人飛赴羅定州屬地方於七月十三夜在太平馬鞍山脚將巨擘陳孟要擒獲時有匪黨羣出圍奪幸該員等臨事見機糾同附近鄉團奮力擊散分逃即將匪首陳孟要當場槍斃並將犯屍護押羅定州飭紳驗明取結填格照相稟繳經臣核明飭查該匪原立花紅如數提給各勇示賞各在案查該道蔣式芬不分畛域統籌兼顧知府吳宗禹革員鄧正彪督師前往能於數日內誘擒首惡奮勇成擒為地方除一大害似宜酌加 賞資俾資鼓勵合無仰懇 天恩准將二品銜現署廣東提學使正任廣肇羅道蔣式芬 賞給頭品頂戴知府吳宗禹請俟過道員班後 賞給二品頂戴已革游擊鄧正彪請 准開復原官原銜仍以游擊留於廣東外海水師提標中營儘先補用並免繳捐復銀兩以示優獎出自 逾格鴻施除將該員等履歷咨部查照外理合附片具陳伏乞 聖鑒訓示謹 奏宣統元年十二月二十九日奉 硃批該部議奏欽此

署兩廣總督袁樹勛奏造具光緒三十四年教育統計表請立案片

再案准學部咨統計一項最關緊要而於教育尤甚各省先後齎到表冊辦理互異不合統計之用茲酌定表式通行填寫以歸畫一等因所有廣東省學堂光緒三十三年教育統計表經前督張人駿奏咨在案茲據署廣東提學使蔣式芬詳稱光緒三十四年統計督飭各員接續辦理惟各屬之表未能如期繳司疊次嚴催逾限仍未繳齊無憑核辦直至十月下旬將屆歲暮勢難懸案久待因飭統計處各員就各屬已繳到之表趕速分別編纂其未繳到者則旁稽案卷及他項報告表爲之補入至其他項報告表可稽者則暫從缺現已編纂告竣計專門學堂三所學生一千六百四十八人實業學堂十所學生八百八十二人優級師範學堂暨選科專修科三所學生五百四十七人初級師範學堂七所學生四百七十三人中學堂二十七所學生三千零五十八人高等小學堂一百三十六所學生七千九百七十三人兩等小學堂五百三十八所學生二萬七千二百四十六人初等小學堂七百零五所學生二萬五千七百九十六人蒙養院一所生徒八十八人女子師範學堂二所學生四百三十七人女子小學堂三所學生一百零二人統計全省各種學堂合共一千四百三十五所全省學生合共六萬八千二百四十二人此外未經稟報各校及雖稟報而未核准立案與已經立案而因事停辦者概行刪除不計據學務公所總務科統計處各員造具統計表詳請奏咨立案前來巨覆核無異除將表咨部立案外理合附片具陳伏乞 聖鑒謹 奏宣統二年正月初九日奉

硃批學部知道欽此

聖鑒謹

奏宣統二年正月初九日奉

署理兩廣總督袁樹勛奏舉勸屬員摺

奏為考察屬員實否據實舉劾以裨吏治恭摺具陳仰祈 聖鑒事竊維吏治之良窳與民生之休戚息息相通自臣視事以來接見屬僚採訪輿論並證以事實觀其人之賢否而知其政績之良窳夫材質以中人為最多激而揚之則有所動而可以與為善有所懲而不敢為非茲就考察所及分別賢否謹為我 皇上接陳之署廣州府知府正任韶州府知府嚴家熾才識明敏辦事精詳整率屬僚勸導民隱潮州府知府陳兆棠果敢有為勇於任事安民樂吏威愛兼施候補知府吳宗禹樸誠奮發任事實心勞怨不辭寬猛交濟前署化州知州候補知州朱紘興學勸工夙具毅力盡心民事成效可觀署東莞縣知縣試用知縣徐廣元履驗命案昭雪沉寃心細才明辦事核實長樂縣知縣調補新會縣知縣王景沂奮學新知理解實徹籌辦嬰政苦心經營署鹹平縣知縣試用知縣張廷慶裁革陋規創抵賭餉整躬率屬志趣卓然以上各員均請傳 旨嘉獎仍由臣隨時考察勉為循良以免始勤終怠候補道易鳳修聲名惡劣同寮不齒准補欽州直隸州知州番禺縣知縣周汝敦緝捕不力承審命案疲玩標糊德慶州知州張茂林才識昏庸不孚眾望聲名貪鄙控案甚多前署東莞縣知縣補用知縣李福湘驗案草率居心欺詐歷官所至民有怨聲順德縣知縣饒澤春審理命案諸多顛預勒繳花紅罔知政體前署英德縣知縣補用知縣劉培椿漠視劫案久匿不報形同聲貴心也糊塗信宜縣知縣黃炳文擅釋匪犯任意捏飾居心險狡欺罔行私署開平縣知縣大挑知縣馮秉經租吏殃民縱弁婪索被控有據怨詈繁興前署海康縣知縣補用知縣秦廣毅縱容差役苛擾病民漁利營私操守離信前署遂溪縣知縣試用通判范鼎得賄縱匪類滋物議前任三水縣知縣正任永安縣知縣洪錫嘯預因循玩視民瘼前署新甯縣知縣試用知縣倪祖培聲名卑劣輿論不孚試用知縣陸琦苛細病商惡聲載道藉口可輝擅離職守均請即行革職李福湘黃炳文馮秉經並應歸案查辦劉近光有縱米出洋情事應俟案結後遞回原籍交地方官管束候補道李光宇才識平庸操守離信升用道員前署番禺縣知縣劉慶釗小有才能遇

事取巧玩視命案延不詳報甯州府知府元瑞識剛才庸難資表率均請以同知降補嘉應州知州鄧曾祐性情偏執聽斷糊塗潮陽縣知縣崔炳炎短於吏才辦事操切惟文理尙優均請以教職歸部銓選增城縣知縣胡光鏞才具塌蹶人地未宜請開缺另補新甯縣知縣鍾蕓廣甯縣知縣張鼎勳報災情俱有不實均撤省察看巨爲澄叙官方起見所有考察屬員賢否分別舉劾請 旨辦理各緣由理合恭摺具陳伏乞 皇上聖鑒訓示謹 奏宣統元年十二月二十八日奉 硃批另有旨欽此

●又奏奏効武賦各員片 再粵省武營將弁習氣頗深口抵任以來隨時傳見詰誠務在整肅戎行茲詳察各員弁緝捕勦能力圖上進者固不乏人而營私執法者亦復不免查有現署水師右營游擊請補春山協副將黃占元縱容子姪兇暴傷人龍門協副將李慶雲約兵不嚴操守難信准補平海營參將施光廷前署新會營參將任內查辦關案縱弁妄爲現署潮州鎮中軍游擊准補新會營參將劉耀南聲名惡劣心地糊塗水師營儘先游擊吳祥光前在碣石右營都司任內遇事取巧緝捕不力營帶中路巡防第二十三營現署廣州協右營都司達濠營守備高厚慈聽任匪線妄拿良民營帶水師親軍左營千總淦雲欽朦混曠餉有心欺飾署開平縣城守把總李鈞藉案勒索多贓敢新營哨長六品軍功鄧思成隨同施光廷赴鄉辦案任勇搶掠毫無約束此等劣員未便稍示姑容相應請 旨將黃占元李慶雲施光廷劉耀南吳祥光高厚慈淦雲欽鄧思成即行革職高厚慈妄拿善良心尤狠毒並請永不叙用不准投赴各營効力淦雲欽應請發交該管營官確實曠餉分別究追鄧思成縱勇搶掠李鈞勒索多贓均被控告委查屬實應請一併歸案審辦以肅營伍而示儆懲又查記名提督總兵吳貴年實任崖州協副將王世明督標儘先副將劉先科海安營守備王本華均查無下落久已離省應請一併勒令休致理合附陳伏乞 聖鑒訓示謹 奏宣統元年十二月二十八日奉 硃批另有旨欽此

署兩廣總督袁樹勛奏粵省支過新增各款咨部立案片

再准部咨嗣後各省增裁款項均應隨時奏咨立案不得於奏銷後補報等因歷經遵辦在案查粵省前因籌辦新政需款浩繁於光緒三十一年十一月間委員設局辦理膏店牌費招商認餉分承其無商承之處則委員前往設局辦理經將委辦之南海縣屬佛山鎮及五斗黃鼎兩巡司屬督潮州府屬各分局月支薪費開辦經費支過銀數等款由善後局彙案列冊詳由前督臣張人駿 奏咨在案茲查順德縣並惠州府全屬南海縣屬之神安三江金利江浦四巡司屬新會縣清遠縣肇慶府全屬兼恩平陽春兩縣三水縣香山縣等屬膏店牌費各商人因嚴限禁煙生意日少牌費短收陸續稟請退辦接承無人於光緒三十三年三月間派員分往設局辦理計順德分局月需經費銀三百六十餘兩又開辦經費銀四百三十餘兩惠州分局及海豐分所共月需經費銀三百四十餘兩又開辦經費銀一百二十餘兩南海縣屬之神安三江金利江浦四巡司屬分局月需經費銀一百八十餘兩又開辦經費銀一百四十餘兩新會分局月需經費銀三百二十餘兩又開辦經費銀二百四十餘兩清遠分局月需經費銀二百餘兩又開辦經費銀一百三十餘兩肇慶分局並鶴山開平兩分所共月需經費銀三百七十餘兩又開辦經費銀三百九十餘兩三水分局月需經費銀三百八十餘兩又開辦經費銀三百三十餘兩香山分局月需經費銀三百六十餘兩又開辦經費銀二百四十餘兩又東莞廉州因禾稻歉收米價昂貴人心惶惑購米運往賑糶計東莞縣支過賑糶米價運費等款銀四千二百三十餘兩廉州平糶米除收回米價外計虧折銀八千一百六十餘兩又恭逢

萬壽聖節各國領事官商祝

暇情殷設筵宴會一切用款共支過銀五千六百一十

餘兩又各署局所因公發寄京外各處往來電報共支過電譯各費銀二萬三千餘兩又廉州
合浦縣民因米價騰漲聚衆滋事槍毀英德兩國教堂教會醫院物件議結賠償銀四千四百
四十餘兩又英商西南輪船劫案議結卹賞款連補平水共支過銀六萬三千零一十餘兩所
有以上支過銀數均係新增之款據廣東善後局署布政使沈曾桐等列冊詳請 奏咨前來
覆核無異除咨部查照外理合附片具陳伏乞 聖鑒敕部立案施行謹 奏宣統二年
正月初七日奉 硃批該部知道欽此

署理兩廣總督袁樹勛奏虎門電報等新添各款咨部立案片

再准部咨以後凡有新添之款必須事前奏咨立案事後方准報銷等因遵照在案茲查前署
廣東水陸提 臣秦炳直以電報軍情事關機要請將虎門電報房移入提署以期靈捷於光緒
三十三年八月間咨經前督 臣張人駿飭由虎門報房展纜接至提署於九月二十六日工竣
通報名曰虎門提署報房照章月支經費銀一十四兩四錢報生薪水銀二十一兩三錢一分
二釐經管纜路二里月支工糧銀二錢八分八釐共月支銀三十六兩此次展纜用過工料銀
兩爲數無多即在是年報銷冊內造報不另開支又佛山至陽江一路歷江門新昌海晏而至
陽江均爲商務繁盛之區飭展電纜於光緒三十三年九月初一日在佛山前站興工展纜至
陽江州城計纜路五百四十二里自佛山起展造至江門一百五十五里併飛纜五度在江門
設子局一所於十月初四日工竣通報派員經理名曰江門子局照章月支經費銀五十七兩
六錢報生薪水銀三十七兩四錢四分經管纜路一百五十五里月支工糧銀二十二兩三錢
二分飛纜五度月支工食銀三十二兩四錢共月支銀一百四十九兩七錢六分又由江門接

綫至新昌一百二十五里開設報房一所於十二月初一日工竣通報派報生兼理名曰新昌報房照章月支經費銀一十四兩四錢報生薪水銀二十兩零一錢六分經管綫路一百二十五里月支工糧銀一十八兩飛綫二度月支工食銀一十兩零八錢共月支銀六十三兩三錢六分又由新昌接綫至恩平一百二十二里開設報房一所於十二月十五日工竣通報派報生兼理名曰恩平報房照章月支經費銀一十四兩四錢報生薪水銀一十九兩四錢四分經管綫一百二十二里月支工糧銀一十七兩五錢六分八釐共月支銀五十一兩四錢零八釐又由恩平接綫至陽江州城一百四十里設子局一所於十二月二十八日工竣通報派員經理名曰陽江子局照章月支經費銀五十七兩六錢報生薪水銀三十三兩一錢二分經管綫路一百四十里月支工糧銀二十兩零一錢六分共月支銀一百一十兩零八錢八分又此案由佛山展綫造至陽江共五百四十二里連飛綫七度共支過工料等銀二萬七千九百九十八兩七錢二分二釐零零二忽又欽廉匪亂雖平而各軍駐辦清鄉善後搜捕餘孽文報遲滯飭行展設行軍電綫以通軍報在廉州行營設立報房一所由營委領班兼理於三十三年八月二十七日設機通報名曰廉州行營報房月支委員兼領班薪水銀三十六兩報生薪水銀一十四兩四錢工頭工食銀一十一兩五錢二分共月支銀六十一兩九錢二分計此次展設桿綫用過工料爲數無多即在是年報銷冊內造報不另開支又飭行展設陸屋至欽州行軍電綫由陸屋欽州興工兩路並舉計綫路一百五十里在那麗平吉兩處各設報房一所均由報生兼理一曰那麗報房於十月初五日開設通報照章月支經費銀一十四兩四錢報生薪水銀一十九兩四錢四分共月支銀三十三兩八錢四分一曰平吉報房於十一月初七日開

設通報照章月支經費銀一十四兩四錢報生薪水銀二十兩零一錢六分共月支銀三十四兩五錢六分綫路一百五十里於十一月初七日工竣由陸屋報房兼管月支工糧銀二十一兩六錢又此次展設陸屋至欽州行營電報桿綫一百五十里共支過工糧等銀三千三百零三兩五錢四分九釐七毫零二忽又飭行展設靈山至陸屋行軍電綫由靈山展綫至陸墟綫路九十里在陸屋墟設立報房一所名曰陸屋報房於十月十二日工竣通報派司事經理照章月支經費銀二十八兩八錢報生薪水月支銀二十五兩九錢二分經管綫路九十里月支工糧銀一十二兩九錢六分共月支銀六十七兩六錢八分又此次展設靈陸行軍靈綫九十里共支過工料等銀三千三百四十九兩七錢九分五釐三毫五絲四忽又飭行展設小董行軍電綫由平吉之牛岡墟展設至小董綫路四十五里在小董設報房一所名曰小董報房於十二月初一日工竣通報派報生兼理照章月支經費銀一十四兩四錢報生薪水月支銀二十一兩六錢經管綫路四十五里月支工糧銀六兩四錢八分共月支銀四十二兩四錢八分又此次展設小董行軍電綫四十五里共支過工料等銀一千六百五十四兩一錢五分八釐六毫零八忽又潮州黃岡匪亂飭行添設黃岡行營電綫由汕頭商電報房借接商綫展至黃岡設立報房一所名曰黃岡行營報房由商局兼理於光緒三十三年四月開辦至九月底裁撤共支過薪費料價等項銀三百五十四兩八錢四分五釐又瓊州海口至海安原設水綫年久壞爛傳遞不靈飭行改設無綫電機藉通消息計購買無綫電機二副安設海口海安兩處共支過價值連安設工程川資運費關稅洋工師查勘薪水川資等項銀一萬一千五百九十四兩二錢一分七釐二毫八絲又陽江至高州向無電綫原議創設無綫電機以通消息訂購

無綫電機八副分別安設嗣以陽江至高州地勢改有綫電報桿綫將購回無綫電機另行安設並開辦無綫電報學堂招募學生三十人延聘洋工師教授名曰無綫電報學堂於光緒三十三年四月二十一日開辦安設電機一副以資練習月支薪費等銀七百零六兩六錢又支開辦經費銀五百七十一兩五錢一分四釐四毫建造機器房工程銀六十八兩五錢二分二釐購買電料書籍等項銀一千二百九十六兩三錢八分九釐三毫六絲公費雜項銀三百三十九兩三錢二分至十月底該學堂學生畢業自十月初一日起月支薪費等項銀七百八十三兩四錢又在黃埔礮臺附近安設電機一副與學堂通報藉資測驗將來虎門再設一具則內與黃埔通報外與海軍兵輪消息相通實於海防大有裨益復在黃埔添設報房一所名曰黃埔無綫電報房於八月初八日開辦設機通報月支薪費等項銀九十五兩二錢八分又支過安設電機工程及購買物料等項銀一千二百四十九兩五錢五分四釐四毫三絲公費雜支銀一百二十三兩六錢四分五釐六毫至十月底學堂學生畢業自十一月初一日起加派畢業生二名裁去工生一名計每月加支薪水食銀五十一兩合計自十一月起每月額支經費銀一百四十六兩二錢八分又購買無綫電機八副共支過價值關稅連補水泔平等項銀四萬零五百五十七兩五錢三分五釐四毫九絲四忽以上支過各款銀數係屬新添之款據廣東善後局署布政使沈曾桐等列冊詳請 奏咨前來 覆核無異除分咨查照外謹附片具陳伏乞 聖鑒敕部立案施行謹 奏宣統二年正月初七日奉 硃批該部知道欽此

署兩廣總督袁樹勛奏粵省籌辦審判廳大概情形摺

聖鑒事竊照粵省籌

奏爲粵省籌辦審判廳具規模謹臚陳辦事大概情形恭摺仰祈
辦審判廳一事前於宣統元年六月間經前護督臣胡湘林將擬設籌辦處併酌計建築經費
及官吏俸薪各緣由分別奏咨并經臣到任時會同前督臣張人駿於會奏憲政成績案內報
明在案當經督飭所屬廣續進行適值臬司交替頻繁籌辦處雖經議有端倪迄未成立而造
就人才估計經費應行斟酌變通之處尙多臣電奏請調湖北候補道梅光毅專任籌辦
司法獨立事宜以輔主管衙門所不及該員旋於十一月間來粵當經臣酌定籌辦處簡章率
同開辦復飭據該司道等擬定辦事細則通飭所屬遵照辦理數月以來略有端緒謹將籌辦
情形爲我 皇上縷晰陳之一編制期限清單酌定省埠各級廳數併確計建築經費官吏
薪公也查審判廳之設由省城商埠以普及全省原有一定次第但造端伊始若不於綱要之
中析分子目則條理仍恐粗疏即措施必多凌躐爰自籌辦處開辦之日起豫計至宣統二年
十月省城商埠各廳一律成立之日止擬定期限刊發清單通飭照辦備計日以程功長官
及時而考績庶免因循錯迕之弊其本年應設各級廳數查照法部奏定章程計省城設高等
審判廳一地方審判廳一初級審判廳二新會三水合浦澄海瓊山五商埠各設地方審判廳
一初級審判廳一併各就本級附設檢察廳合計建築經費共需銀十一萬四千兩成立以後
官吏辦公人等年需薪水公費銀三十八萬餘兩以上兩項皆參考津奉成法斟酌粵省情形
核實規定尙無冗濫一造就各項司法人才也司法人才以推事檢察官爲最要蓋推事有完
全獨立之職權檢察官有事實調查之專責使非學識富則裁判無以持其平非經驗深則施

行無以妙其用查法部奏定籌辦事宜清單聲明推事檢察各員由督撫督同按察使或提法使認真遴選品秩相當之員或專門法政畢業者或舊係法曹出身者或曾任正印各官者或曾充刑幕者或指調部員俱咨部先行派署等語自爲慎重司法人才起見但粵省實缺候補各項人員中經詳加察看其能合此資格者爲數無多且值新舊接續之交例案熟者或新律未諳理論高者或經驗尙淺再四思維不得不豫籌教育當經督飭該司道等設立司法研究館卽派梅光燾爲監督并派衙門法科參事補用知縣黃敦懌爲教務長考選前項合格學員并推廣取錄正途出身及法政學堂畢業各員共計一百名教以中外各種法律學暫以八個月卒業計此班學員卒業之期適值省埠各廳一律成立屆時再於其中遴選成績最優之員咨請派署推事檢察等官以視未經研究者任事當較有把握此外司法警察檢驗吏典獄官典簿承發吏等項人員均在該館陸續分班研究以職務之輕重定畢業之遲速統以本年十月審判廳成立之日爲限以資練習而備任使一通籌改良全省監獄看守所也查法部咨行各省以審判廳設立之處卽爲改良監獄推行之處又省城模範監獄限宣統三年以前成立等語是籌辦改良監獄應屬併審判廳籌辦處辦理以免紛歧惟收留人犯之所分爲二種已定罪名者曰監獄未定罪名者曰看守所自應分別籌議於房舍之形式管理之精神逐加整頓省城爲全省觀瞻所繫規模未能過狹擬建築模範監獄一所需銀十萬兩各級審判廳成立民事刑事待質者多擬建築模範看守所一所需銀七萬兩五萬兩各設監獄看守所一處建築費共需銀十萬兩統限本年成立其各府州縣監獄俟推廣審判廳時再行議改惟看守所積弊甚深各該牧令稽察難周多派家丁管理以致需索虐待諸弊時有所聞現擬先

就省城考取曾經肄習監獄學科之畢業學生分途派往各屬充當看守所委員繁縣二人簡縣一人再酌招巡長巡兵以資管理計此項薪公每年需銀十四萬餘兩而全省看守所改良之計畫已得其大凡於 朝廷慎刑恤獄之意或不無裨補於萬一以上三端均屬提綱挈領之事經 督率主務各員統籌全局循序進行粵省財政艱難出入相衝不敷甚鉅現復驟增數十萬之款挹注誠屬不易惟司法獨立爲實行憲政之權輿一切新建解舍優給薪公均與斯事本原極有關繫固不敢鋪張以涉浮費亦不敢苟簡而昧遠圖惟有就粵省財力所及權衡緩急暫就司局各庫陸續籌挪核實動用以濟要需而免貽誤除將期限清單開辦常年經費豫算表及司法研究館各章程分咨憲政編查館法部度支部查核外所有粵省籌辦審判廳各緣由理合恭摺具陳伏乞 皇上聖鑒訓示再現奏教練官吏建築廳庠支給薪公各項辦法暨經費數目均係詳悉討論酌量改定與前護督 胡湘林原奏稍有不符應請以本屆奏咨之案爲定合併陳明謹 奏宣統二年三月初一日奉 硃批該衙門知道片併發 欽此

●又奏擬開律師研究班以資練習片 再各國法庭皆設律師爲兩造代理一切質問詰駁等事誠以恆人遭遇訟案對簿公庭外悚於官吏之尊嚴內迫於一身利害之關繫往往言語失措理雖直而情不伸有律師則據法律以爲辯護不獨保衛人民正當之利益且足防法官之專橫而劑其平用能民無隱情案成信讞法至美也查日本明治維新即首定代官人職制使有一定學識者從事斯業後復改爲辯護士法推行至今有利無弊我國雖無律師亦與審問之例現值改良審判之始似宜採用列邦通制以臻完善且近來通商各埠人民延請外國

律師辯案已成習慣將來收回領事裁判權之後國際私法之交涉日益繁多使非養成多數辯護之才尤恐相形見絀核閱現行部章於法制經畫已極詳明若再加入律師一門似較完備臣督同司法研究館司道遴選法政畢業生數十人專開律師研究班以資練習擬請

飭下法部悉心核議仿照日本辯護士法訂定律師專法頒行一面通飭各省審判廳准用律師參與審問似於司法前途不無裨補臣爲求通民隱補助法權起見是否有當除咨部查照外理合附片具陳伏乞 聖鑒訓示敕部核覆施行謹 奏宣統二年三月初一日奉

硃批覽欽此

●又奏新添巡警等費請立案片 再准部咨嗣後凡有新添之款必須事前奏咨立案事後方准報銷等因歷經遵照辦理粵省巡警總分各局光緒三十一二二三等年支用銀數業已遵章先行 奏咨並列冊報銷在案茲查光緒三十四年分巡警總局續改爲警務公所並老城西關東南關河南等處正分各局薪費購買千里馬鞋價以及各路巡視官潔淨所教練所警察學堂暗查員弁戒煙所等薪費共用銀七十三萬零九百三十七圓八毫四仙業造報告表冊送交清理財政局彙核辦理以上支過各數仍係新添之款據署廣東巡警道高觀昌照案列冊詳請 奏咨立案前來臣覆核無異除分別咨部查照外謹附片具陳伏乞 聖鑒敕部立案施行謹 奏宣統二年三月初一日奉 硃批該部知道欽此

署理兩廣總督袁樹勛奏統一財政依限成立籌辦情形摺

奏爲粵省遵

旨統一財政依限成立謹陳籌辦情形恭摺仰祈

聖鑒事宣統元年

四月初六日欽奉

上諭各省財政頭緒紛繁自非統一事權不足以資整理嗣後各省出

納款目除鹽糧關各司道經管各項按月造冊送藩司或度支使查核外其餘關涉財政一切局所著該督撫予限一年次第裁撤統歸藩司或度支使經管所有款項由司庫存儲分別支領卽由各督撫飭該司庫等將全省財政通盤籌畫認真整頓仍著度支部隨時考核分別懲勸以副綜核名實之至意欽此由度支部咨行到粵卽經前督臣欽遵轉行去後臣上年七月間到粵督飭前署藩司沈曾桐詳悉籌議以茲事體大頭緒紛繁先就該司署附設統一財政籌辦處通盤籌畫嗣正任藩司陳夔麟抵任臣復與該司悉心討論以爲財政一事爲預備立憲之本原行政經費界限不明則預算無由舉辦是故欲查已往之弊必從清理財政始欲除以後之弊必從統一財政始提綱挈領約有三端一設立公所藩司衙門爲用人行政之總樞既將財政一端特別注重必先組織一獨立機關方與庶政不相凌雜擬照新設司道建立公所成案於藩司衙門籌款擇地建築財政公所就粵省向來經管財賦事項酌定科目設置專員分司其事一曰裁撤局所財政權限既專各局所雖職掌攸異同屬研技無取多立名目自應一律裁併惟查各該所成立已久案牘紛繁款項輻輳若不加詳慎遽加改革掛漏必多似應酌量難易分別期限次第裁撤所裁等局用卽可撥充財政公所經費有盈無絀一曰實行統一各局所既經裁撤一切收入款項除鹽關兩庫外均歸公所委員經理存儲司庫絕不假手書吏嗣後各局署應支款項按月預算列表均赴司署請領下月決算列表報銷表册有一

定程式支領有一定時期其鹽關兩庫仍遵章按月造冊送核併彙核通省出入款目按季編造統計書以示整齊畫一之義當經飭據該司擬訂統一財政辦法暨財政公所分科辦事章程及職掌各條另冊咨部一面遴委諸曉財政人員優給薪公一切向有陋規悉數裁革卽於二月二十五日開辦其關涉財政之釐務清餉稅契善後等局統限四月初一日以前次第裁撤惟是款目出納專責固在藩司而簿籍鈎稽考成亦關疆吏且一省之內政外交關係財政有賴乎酌盈劑虛衷多益寡者正復不少查奏定九年籌備清軍調查歲出入應各督撫同辦是該公所成立以後既爲全省度支之淵匯臣署亦應時相接洽始有督率之方而免隔閡之慮擬仿照臣前在東撫任內辦理新政成案遠派諸習財政之幕職一員委充該所參議以備顧問而資籌畫毋庸開支薪水夫馬俾省糜費仍由臣懷遵 諭旨督飭該司將全省財政通盤籌畫認真整頓以仰副我 皇上綜核度支之至意所有粵省籌辦統一財政現已依限成立緣由除咨部查照外理合恭摺具陳伏乞 皇上聖鑒訓示謹 奏宣統二年三月十四日奉 硃批度支部知道欽此

署理兩廣總督袁樹勛奏請設廣東大學摺

奏爲造就憲政急需人才請設廣東大學恭摺具陳仰祈

聖鑒事竊維籌備憲政爲強國

之要圖自頒布九年清單以來內外臣工督責罔懈雖循序漸進規模已覺粗立而因事赴功精神總虞竭蹶者則以應用人才缺乏之故也夫大厦之成自樑棟以至榱桷有一不備則工

師束手室家之細自米鹽以至酒漿有一不給則巧婦斂袂治國之道何莫不然今計畫政中所應籌備者若司法若財政若巡警若地方自治諸要政任舉一項皆非具有完全法政之知識者不能洞澈本原見諸事實當草創之際節取而慎用之猶可言也然已患其不足自茲以往進行日遠則程度愈求其高範圍日寬則敷布愈求其衆藉非先事預籌必至臨渴而掘井抑或知難而退反將因噎而廢食此臣之所大慮也查現在養成法政人才之地京師各省均設有法政學堂然或限於經費未事擴張或狃於速成難資深造而學部定章私立學堂不能專習政治法律故亦無民間崛起之學堂補助官力之不足如日本之早稻田大學者去年學部籌設京師大學誠有鑑於人才消乏之故非組織完全之大學不足以宏造就而張遠謨也竊計中國幅員之廣政務之繁斷非一大學之人才所能舉於是有中央之大學爲之樞輪即不可無各省之大學爲之羽翼但各省財政之不齊地形之殊異亦斷不能均組織完全之大學於是有中央完全之大學爲之模範即不可無各省分設之大學爲之繼繩廣東錯處嶺海民情浮動靡常籌備憲政當較各省爲難而地便交通文明輸灌較早籌設大學似較各省稍易擬請查照學部奏定外省設立大學章程先辦法政分科大學以應憲政人才之急需俟該分科成立廣續開辦商科工科兩分科大學以符大學至少須置三科之制至大學組織之法除工商兩科外其法政一科雖本有部章可循惟部章係定永久之規模故限制不嫌稍密而粵省係應時事之必要故變通貴適其宜茲謹將廣東開辦法政分科大學其第一屆五年期內應行變通辦法各節爲我 皇上縷晰陳之一日不限於高等學堂畢業始許入學也現

在各省高等學堂畢業生寥寥無幾使必設此限制則學生實難其選故宜推廣範圍令舉貢

以上出身者或品秩在州縣以上者皆准令入學蓋此等人員或學有本原或富於經驗平日社會之信用既深將來疑難之解決較易且其憑藉已厚既必不能橫諸仕途之外孰若仍納諸陶冶之中此入學資格之應變通者一二曰宜以五年爲畢業期限也查大學畢業原定四年爲限惟此指曾在高等畢業升入大學者而言其非經高等畢業諸生程度或恐不足似不得不酌加修學一年使其程度足以相當其畢業獎勵請照定章酌量辦理此修學年限之應變通者二三日招取學生不拘省界也蓋籌辦大學經費浩繁各省或未能徧舉粵省既爲海陸交通之地閩桂雲貴等鄰近省分之學生皆可就近來粵附學仍按照名額多寡酌收學費以資彌補則所費者輕而所成者衆且定章本省人員不得爲本省八品以上官吏若准令外省人員就學畢業後得以筮仕在省裨益必多此不拘省界之應變通者三四曰教授不必外國文及限令直接聽講也查日本官立大學教科多採外國文原本其延用外國教習時亦令各生直接聽講此以施於曾經高等畢業者固所宜然若他項學生則程度恐未足語此不如或用中國教員以中國語言教授或用譯員繙譯教授較爲事半功倍自講授方法言之其領受雖得諸間接自修學期限言之其研究實較多一年彼此相衡學力當可相等此教授方法之應變通者四因此四端遂生七利以五年而養成大學畢業之人才可以急應時機之用一也成全已有基礎之人才二也甫經卒業學生經驗尙淺似不若曾歷仕途者既有平日之經驗復加五載之薰陶其成就更大三也此種人員平素爲一般社會所注意故一旦出而任事易於融洽四也各省皆可來粵就學費省而用宏五也與京師大學相輔並行互有比較進步自速六也籌備憲政全國需才當在數萬以上多一大學爲之培植不患無才七也至經費所

需專就法政一科計之開辦建築費約需銀十餘萬兩常年費約需銀數萬兩明知粵省財政拮据辦理不易然爲籌備憲政根本起見不敢不勉爲其難俟奉 旨俞允後再飭司庫竭力分籌以仰副 朝廷興學育才之至意所有造就憲政急需人才請設廣東大學各緣由是
否有當謹恭摺具陳伏乞 皇上聖鑒訓示謹 奏宣統二年四月初六日奉 硃批學部議奏欽此

署理兩廣總督袁樹勛奏已革上思廳同知蔡其銘故縱逆倫命犯並朦稟枉殺五命案
審擬摺

奏爲審明已革上思廳蔡其銘故縱逆倫重犯並朦稟枉殺五命按律議擬恭摺仰祈 聖鑒事竊照廣西上思廳民吳世統謀殺期親伯母吳謝氏及義兄吳世臣身死吳謝氏之子吳世元知情預謀並已革上思廳蔡其銘故縱吳世元復朦稟枉殺黃遠南等五命一案經廣西撫臣張鳴岐自行檢舉 奏奉 硃批此案著交張人駿提案訊辦張鳴岐著交部議處欽此經廣西臬司吳徵鼈將犯證卷宗委員押解來東當經前督臣張人駿飭委司道審辦先後提訊十餘堂檢核廣西卷宗比對供詞相符茲據廣東臬司趙濱彥會同前署藩司提學司沈曾桐勸業道陳望曾覆審解勘前來 臣親提研鞫緣吳世元籍隸廣西上思廳家住上畔村已革廣西知府前署上思廳同知蔡其銘籍隸江西樂平縣吳世元之父吳鳳典曾任廣東雷州

營恭將前妻黃氏生子世德早故一女嫁與廣西太平府恩州土知州黃篤培爲妻繼妻謝氏無出撫養異姓一子世臣娶媳莫氏吳鳳典復娶妾戴氏朱氏戴氏生子世元後卽故蔡其銘到任後適吳鳳典回籍已辦之吳世統係吳鳳典胞弟鳳新之子分居平隆村該處有吳鳳典自置田畝其租穀向交吳鳳新父子經理光緒三十三年六月吳鳳典病故吳鳳新父子同來弔喪吳謝氏向其索取歷年租穀不交屢次口角吳世統從此心懷忿恨九月中旬不記日期吳世統邀吳世元至橫廳樓上告以伯父在時原議家財三股均分伊父子得一今伯母謝氏欲全給養子世臣復向追取歷年租穀相待如此刻薄欲將謝氏與世臣一併謀死洩忿令其相幫吳世元以事情重大未敢應允惟答以決不向人告知各散九月二十一日吳世統邀同在逃之僱工黃四至吳謝氏家居住二十六日晚飯後吳世元前往族人吳蔚文家吸食洋煙將近二更吳世統走至喊令回家吳世元卽跟隨同回甫至家內見僱工章大等抬屍走出包以竹篋露出白色辦鞋當卽查問吳世統稱說已與黃四將世臣殺死並告以欲將吳謝氏一併謀害復屬相幫卽拉吳世元至廳門外吳世元令其先進伊隨後就來卽在廳門外站立吳世統遂獨自攜刀進廳吳世統如何下手將吳謝氏戮傷因有孝幔遮隔看不清楚惟聞吳謝氏喊救之聲心懷恐懼卽回身走出仍到吳蔚文家坐談吸煙未幾有族人吳泰先走至告以廳聞吳世元屋有人哭叫之聲吳世元伴作不知隨卽回家見吳謝氏已受傷殞命時吳世統卽由外擡棺進內將吳謝氏裝殮天將明時擡出掩埋吳世統卽回平隆村又與其父鳳新前來搬掠財物運回其家吳世統仍留住宿吳朱氏與吳莫氏見勢凶橫遂暗邀黃篤培與其妻黃吳氏同請人作詞赴廳報案蔡其銘卽派差勇將吳世統拿獲訊認謀殺吳謝氏吳世臣不

諱並供及吳世元知情經提吳世元對質不肯承認當照刦殺例將吳世元稟奉批行正法吳世元釋回吳朱氏等不服因吳鳳典與前南澳鎮劉永福誼屬連襟黃吳氏爲劉永福之姨甥女自幼撫養多年遂與黃吳氏往向劉永福投訴適劉永福正由欽州寄籍欲赴上思廳尋妻詢悉吳謝氏被害其子吳世元預謀情由卽先派舊時親兵黃遠南周雲廷潘兆山監景勝陳振山五人前往找尋吳世元意欲送廳究治時吳世元遷居城內黃遠南到時適已外出由吳朱氏等將吳世元尋獲交黃遠南等細縛拉至猪窟巷劉姓屋內擬俟劉永福到後再行送廳蔡其銘聞知遂將黃遠南等同吳世元一併帶回署內略訊黃遠南等五人供詞卽擬以白晝在城網拉平民形同盜匪電稟請示辦理電尙未發劉永福已親至廳署與蔡其銘面晤悉派人尋獲吳世元緣由迨劉永福走後蔡其銘仍以原擬之稿急電通稟時邊防喫緊風謠四起廣西撫_臣張鳴岐因而電飭將黃遠南等五人概行正法吳朱氏與劉永福隨先後控經批飭提道提省審辦旋經廣西撫_臣張鳴岐自行檢舉具 奏遵 旨將犯證人等解東審訊經_臣虛心研鞠據吳世元與蔡其銘各供認前情不諱傳詢劉永福據稱當時因恐吳世元走脫故派黃遠南等五人前往扭住看守候伊到時親自送廳請究所言似屬可信復詰蔡其銘黃遠南等無論有無別情既經就獲因何尙急電稟報據稱其時匪徒猖獗時有假冒官兵乘機圖擾之事黃遠南等並未告知地方官卽持槍擅自捉人電稟請示原爲慎重防務起見其後劉永福來署辯論而去時電稿先已擬定卽照發未及更改次日復將劉永福干預情形電稟奉廣西撫_臣張鳴岐兩次電示始將黃遠南等五人正法至吳世元統到案時原供吳世元知情因提吳世元質訊未認是以釋放今蒙訊明實係知情預謀當時未能訊出實情實係疏忽



並非有心故縱等語再三究鞠矢口不移應即分別擬辦查律載謀殺父母已行者預謀之子不分首從皆斬已殺者皆凌遲處死新章改爲斬立決又官司故出入人罪全出全入者以全罪論故出放而還獲准減一等各等語此案吳世元既知吳世統挾其繼母吳謝氏追取租穀之嫌意圖謀殺邀其相助並無一言勸阻迨吳世統已殺吳世臣之後復目擊吳世統進廳將吳謝氏殺害尙赴吳蔚文家伴作不知事後又不卽行控究實屬知情預謀查子於繼母有犯與親母同自應按律問擬吳世元合依謀殺父母已殺者預謀之子不分首從凌遲處死律擬凌遲處死遵照新章改爲斬決蔡其銘承審逆倫重案既據吳世統指稱吳世元知情並不切實根究因訊不承認輒行縱放檢查上思廳卷富吳謝氏吳世臣被殺後吳朱氏吳莫氏於光緒三十三年十月十八日以吳鳳典胞弟吳鳳新長子吳世統刺殺吳謝氏等二命等情台詞呈報是日蔡其銘拿獲吳世統訊認下手殺死吳謝氏等二命不諱並供吳世元知情經將吳世統收押乃十月二十三日據吳世元以吳世統作伴守喪蓄意刼殺等詞赴廳呈報則指吳鳳新爲其祖側室改醮黃姓所生之子冒作吳姓與其父認爲兄弟與吳朱氏等原報不符迨蔡其銘將吳世元收押是月二十八日族長吳欽和等具呈不稱吳世統爲吳鳳典胞姪並有獲犯吳世統吳世元等請嚴訊究辦之語二十九日又有吳欽和等一呈則改稱吳鳳新爲吳鳳典父妻改醮所生之子不提吳世元隻字而情節與吳世元呈同夫以同一具呈之人兩日之間前後聲叙迥異情弊不問可知乃其後蔡其銘訊辦吳世統卽以吳世元之呈稟報不提吳朱氏等之呈復抹殺服制重情作爲刼殺辦理而吳世元呈報則改爲十一月初六日拿獲吳世統又改爲十一月十一日種種荒謬皆爲開脫吳世元地步不得謂非有心故縱且吳世

元具呈在吳世統收押之後蔡其銘尙有飭緝吳世統務獲之批不知自相矛盾則此呈之爲偽造存案顯而易見迨吳世元釋放後劉永福派黃遠南等五人將其拿獲蔡其銘聞信前往一併帶廳訊供此固地方官應爲之事惟查其第一次電稟已明知劉永福欲來上思掃墓無難查問情由黃遠南等僅止五人業經就縛有何迫不及待且劉永福旋亦到廳會晤詳述前情彼時擬定之電稿譯而未發不難更正即使發出而劉永福來晤之後撫臣電示未到以前亦不妨加電詳晰聲明以重人命而成信讞乃仍照原擬加急譯發亦不再加電更正一則曰白晝在城網拉再則曰形同盜匪而逆倫之吳世元轉指爲平民曲加庇護其第二次電稟又稱劉永福謂吳鳳典借銀三千餘兩恐吳世元逃避先飭人緝縛再行送案訊追並請辦罪繼謂吳鳳典之妾朱氏與世元爭分家財求劉永福將世元處死迨第四次電覆廣西撫臣張鳴岐則惟稱劉永福與吳鳳典係連襟之誼見其家出劫殺之案疑族人與世元同謀欲將世元及族人治死不復提及劉永福追銀之事是可知借銀三千餘兩之說全屬子虛况蔡其銘已知黃遠南等所帶之槍借自廣東陸路提督臣秦炳直經已交還亦可見心本無他乃猶不請緩辦故作張皇以差弁拿人時城內商民警慌請其設法處治因令劉永福繳槍進城爲言試思黃遠南等已束手就擒商民亦何事驚慌按其用心無非欲以劉永福派人至城並非善意迴護前非不顧陷人大辟及奉廣西撫臣張鳴岐回電遂即將黃遠南等五人正法原電內有仍候督院核示之語竟置不理而其後第三電猶以劉永福所帶之人多係兇黨同一悍鷲請令前途一體攔截攔截種種蒙混狡詐自始至終無非因庇護吳世元一人所致卷宗具在豈能掩飾衡情定罪該革員故縱吳世元放而還獲律應照故出死罪減等係在輕罪不議之列

其諱稟枉殺黃遠南等實屬故入人罪五命已決按律應全科死罪惟該革員總藉口於原電請示辦理因奉廣西撫_臣張鳴岐兩次回電始行正法經_臣親提嚴鞫反復詰以上項不合各情該革員亦俯首無詞惟以原電請示辦理一語始終狡展搪塞不肯實供爲卸罪之計竊維此案先後提訊十餘堂檢核廣西卷宗供詞亦復相符似未便因該革員一人不肯實供懸案不結現在改良刑律如果衆証確鑿原不必僅據本人供詞以爲定讞况該員所狡展之處一經駁詰其說立窮其情顯露雖論其迹與由原問官司全入者微有不同論其心實罪無可遁案關五命情節至爲重大其應如何定擬之處_臣未敢擅便擬懇 敕部覆核具 奏請旨遵行又查劉永福以在籍武員率用親兵號衣復不告知地方官徑自派人捉拿吳世元事誠鹵莽惟係由吳朱氏等報訴而來戚誼相關意在送廳嚴懲逆子並非無端干涉且號衣有前福軍字樣黃遠南等所持之槍又係向廣東陸路提督_臣秦炳直營內借用防護尙無大過擬請免其置議屍親吳朱氏等及其餘人証案結分別釋回未到免提省累在逃之吳鳳新黃四飭緝獲日另結除將供招咨部外所有審明議擬緣由理合恭摺具陳伏乞 皇上聖鑒訓示謹 奏宣統二年四月初六日奉 硃批大理院覆判具奏欽此

署理兩廣總督袁樹勛奏太平關征稅年限請改照統計章程辦理摺
 奏爲粵省太平關征稅年限與現辦財政統計起截年月不同擬請改照統計章程辦理以免參差恭摺仰祈 聖鑒事竊照粵省太平關征稅年限自上年七月二十四日起截至本年七月二十三日止爲一屆按年截清數目造冊奏銷歷經接辦理在案茲據管關委員南韶連道左紹佐詳稱現准調查局移送統計表查填光緒三十三四兩年收支數目須自正月

初一日起至十二月底止起截年月既與關章不同征收支解之數自難符合如太平關自光緒三十三年七月二十四日起至三十四年七月二十三日止計十二個月一屆期滿共征稅銀一十四萬二千八百一十二兩二錢一分七釐而統計表自三十三年正月起到十二月底止共征銀一十四萬一千三十六兩四錢五分三釐計少銀一千七百七十五兩七錢六分四釐又自光緒三十四年七月二十四日起至宣統元年七月二十三日止連閏計十三個月一屆期滿共征稅銀一十四萬九千九百五十二兩四錢一分四釐而統計表自三十四年正月起到十二月底止共征銀一十三萬八千二百三十八兩九錢九分五釐計少銀一萬一千七百一十三兩四錢一分九釐雖年與屆同是一周並無出入而起止年月先後參差征收稅數即有多少之不同若統計與奏銷各歸各辦則一年而有兩數殊非整齊畫一之道際此清理財政之日自宜妥籌辦法俾昭核實擬請將太平關征稅年限改照統計章程自宣統二年起以正月至十二月爲一屆造冊奏銷其自宣統元年七月二十四日接上屆期滿後起至是年十二月底止計五個月零六日未滿一年所有征收支解各數另行造冊奏銷以清眉目而免轆轤等情詳請 奏咨前來 臣覆查太平關征稅年限既與統計表式不同自應將關期改照統計章程畫一辦理以免參差除擬飭遵照併咨明度支部查照立案外理合恭摺具陳伏乞 皇上聖鑒敕部立案施行謹 奏宣統二年四月初七日奉 硃批度支部知道欽此

署理兩廣總督袁樹勛奏特奏脫逃監犯之管獄官張興仁等摺

奏爲特奏疏脫監犯之管獄有獄各官請

旨交部議處恭摺仰祈

聖鑒事竊查接管卷內據前署順

德縣知縣厲式金稟稱宣統元年四月十六日酉刻時候縣監奉發降匪吳文五卽吳斌與弟吳文六倉猝起意號召同監各犯共三十二名各執菜刀柴刀反獄禁卒巡勇等聞聲趨視攔阻被各犯斬傷巡勇區源蕭灶何權等三名逃出監外擁入勇廠奪取洋槍復打毀羈所柵門喝令各押犯共四十二名同時逃跑知縣聞警

會同營弁督率典史協同團練當場追獲起意反獄首犯吳文六等二十六名槍斃吳文五等三名又於十八日獲回羈犯關亞耿等十三名槍斃脫逃監犯林申一名卷查已獲及格斃各犯內吳文五吳文六係降匪奉發監禁之犯未獲監犯二名內羅永亦係降匪投營奉發監禁霍亞潤係與無服族人霍子揚口角爭鬧致傷霍子揚身死審擬絞候奉文應准援免之犯餘均清鄉案內陸續拿獲分別羈押皆未認供定罪續獲羈犯梁林一名又擄獲格傷溺斃之羈犯歐陽欣屍身一具等情行提該縣刑禁人等解省發府訊無知情鬆刑賄縱情弊臣查此案管獄官順德縣典史張興仁專司獄務並不小心防範致被監犯反獄脫逃多名實非尋常疏忽可比有獄官署順德縣事俊貢知縣厲式金雖於事後獲回監羈逃犯三十九名格斃四名續又會同代理縣沈瑞忠獲回逃犯一名擄獲格傷溺斃屍身一具惟先事未能督飭預防亦難辭咎且尚有脫逃未定罪名之監犯羅永及續奉文行援免之霍亞潤二名另未定罪名押犯二十七名未獲自應按例叅處據藩臬兩司轉據該管道府查開職名會詳請叅前來除批飭勒限嚴緝並移行文武各衙門一體協拿逃犯羅永等務獲究辦外相應請 旨將疏脫監犯二名未獲之管獄官順德縣典史張興仁有獄官署順德縣事俊貢知縣厲式金交部議處謹恭摺具陳伏乞 皇上聖鑒訓示謹 奏宣統二年四月初六日奉 硃批著照所請該部知道欽此

●又奏廉欽獎案內之候補守夏文炳仍照原保給獎片 再廣東廉欽肅清在事出力各員經前督臣張人駿核實刪減隨摺列單保獎准吏部議覆分別准駁宣統元年十月二十九日具奏奉 旨依議欽此原奏清單內開隨摺列保各員內三品銜四川候補知府夏文炳請免補本班以道員留粵儘先補用免交留省銀兩並加二品頂戴查定章內開有省分人員不准於他省列保如經該督撫奏調咨調差委有案仍准列保又候補人員祇准保仍留原省補用不准保出力量省分各等語該員所保留粵補用兼保免交留省銀兩並請加銜均核與定章不符應令另核奏明請獎主該員係四川候補人員因何在廣東列保有無奏調咨調之案並令於另核請獎時隨案聲明再行核辦等因咨行到粵當經轉行遵照茲據指分四川候補知府夏文炳案

稱竊文炳係於光緒二十九年閏五月由川隨同前總督岑春煊督師赴粵派赴廣西前敵勸辦土遊各匪歷
充綏遠先鋒副中營左營管帶三十年十月在廣西南甯府四川賑捐分局由不論雙單月儘先選用通判違
例報摺指分四川試用隨征供差在前報摺指分四川在後並未到省毋庸奏調咨調嗣於勸辦廣西巨匪及
西省一律肅清案內蒙奏保同知直隸州涪保知府並加三品銜均聲明仍歸四川補用仍未到省領有部照
副中營歸併後隨同回東銷差復充廣東省河中路礮臺幫統廣安水軍統帶奏派欽防分統有案可稽查部
章未經到省人員亦准於他省列保懇請照原案奏保俾邀獎叙等情前來臣查核無異合無仰懇 天恩
俯准將廉欽肅清案內異常出力之三品銜指分四川候補知府夏文炳仍照原保給獎免補本班以道員留
粵儘先補用免交留省銀兩並 賞加二品頂戴惟該員已奉 命簡署雲南開化鎮總兵抑應如何獎
叙恭候 聖裁除咨部外謹附片具陳伏乞 聖鑒訓示謹 奏宣統二年四月初七日奉 硃批該
部議奏欽此

署理兩廣總督袁樹勛奏舉薦孝廉方正摺

奏為舉薦粵省各屬孝廉方正恭摺具陳仰祈 聖鑒事竊查接管卷內宣統元年 恩
詔條款內開每府州縣衛各舉孝廉方正暫賜六品頂戴榮身以備召用務期採訪真確毋得
濫舉欽此欽遵當經前督 張人駿轉行遵照茲據廣東布政使陳夔麟會同提學使沈曾桐
詳稱案奉前因遵查定例舉報孝廉方正令直省督撫轉飭地方正印各官採訪公評詳稽事
實其所舉或係生員會同該學教官查核造具事實清冊加結申詳該管上司逐細訪查督撫
核實保奏如模實拘謹無他技能不考試者給以六品頂戴榮身如其中果有德行才識兼優
堪備 召用者准該督撫出具切實考語破格保薦給咨赴部考驗考試帶領引 見候
旨簡用等因茲准署廣肇羅道易順鼎咨據肇慶府知府賴清健詳據鶴山縣知縣艾淮

詳准訓導呂兆璜牒保舉鶴山縣優廩貢生陳鸞詔陳鸞諤廩貢生古璽文又准惠潮嘉道吳煦咨據潮州府知府陳兆棠詳據潮陽縣知縣崔炳炎詳准教諭劉元善牒保舉潮陽縣學優廩生林挺芝又准南韶連道左紹佐咨據韶州府知府嚴家熾詳據署曲江縣知縣李繼堯詳准韶州府教授陳學海移保舉曲江縣廩貢生選用訓導許祖端共五名俱各性篤學優行端品正堪膺舉薦並造送事實冊結遞轉到司由司等覆查各該生孝行素著廉讓可風立品端方居心公正均堪保舉以備 召用等情詳送驗試前來 臣 驗試得鶴山縣優廩貢生陳鸞詔陳鸞諤廩貢生古璽文潮陽縣學優廩生林挺芝曲江縣廩貢生選用訓導許祖端等行誼既洽與評文章亦復爾雅宜邀 曠典用副 旁求除將冊結分咨吏禮二部並給事中查照外理合恭摺具陳伏乞 皇上聖鑒謹 奏宣統二年五月二十八日奉 硃批該部議奏欽此

署理兩廣總督袁樹勛奏督練公所核定章程請立案摺

奏為兩廣督練公所成立有年核定章程 奏明立案恭摺仰祈 聖鑒事竊查陸軍章制各省新軍練及一協以上者應於省會設立督練公所慎選兵學諳練事理精詳人員分任兵備參謀教練以為總匯之區粵省練兵之初先設參謀一處光緒三十二年前督 岑春煊就舊軍改練新操編足十營 奏明改為混成協因添設兵備教練二處岑春煊去任周馥繼之因成協之後進謀成鎮是年十月飭照定章設立督練公所委派道員沈桐謝汝欽姚鴻法分充公所參議暨兵備參謀教練三處總辦參仿南洋成案遴委人員分科治事核定條例章程詳准照辦在案三十三年秋間前督 張人駿到任以標營兵士疊經裁汰合計一協人數

僅止及半因 奏請更訂成鎮成協時期派員分路徵兵補足一協改派道員韓國鈞傅文通湖北武備畢業生李哲湘分充參議及二處總辦旋准部咨以此時尚未練成一協以上似應由兵備處兼攝參謀教練事務趕緊編練再行遴選知兵人員分別委充等因張人駿因軍事正在擴張贊助需人各員甫經委定督飭韓國鈞等趕緊編徵於三十四年三月先成一協宣統元年編立砲工輜重四營接編三標一營復成混成一協所有編練情形經張人駿於調任時 奏報在案惟督練公所開辦之初雖經參議道員沈桐等詳定分科治事條例章程迄未咨部立案迨上年混成協告成又以編練事繁未遑計及而韓國鈞調赴奉天吳錫永甫經接差致未詳辦此粵省設立督練公所歷年辦理暨未及咨報之實在情形也近准陸軍部通咨各省調查陸軍財政聲明該省已設督練公所尙未咨部者從速報部等因伏查粵省編練新軍混成早經成立設立督練公所亦逾三年本年春初兵變標營兵士雖有遣散現已剋期派員募兵儘年規復成協計畫籌備頭緒至繁與他省未經練成一協以上者情事迥殊所有公所三處自應照案設立以重軍政經 臣 飭據督練公所參議道吳錫永等參仿南北洋成案核定在事人員職掌辦事規則正雜經費擬訂章程詳請 奏咨前來 臣 覆核無異除鈔送章程分咨軍諮處度支部陸軍部查照外所有兩廣督練公所擬訂章程緣由理合恭摺具陳伏乞 皇上聖鑒敕部核明立案施行謹 奏宣統二年五月二十九日奉 硃批該衙門知道欽此

署理兩廣總督袁樹勛奏查明順德縣事主陳漸鴻家被劫及監犯越獄情形摺

奏爲遵

旨查明順德縣事主陳漸鴻家被劫焚斃及監犯越獄辦理情形恭摺覆陳仰祈

聖鑒事竊臣於宣統元年七月二十二日承准軍機大臣字寄宣統元年六月初三日奉

上諭有人奏廣東盜勢猖獗地方官養癰貽患請飭認真整頓嚴行叅處一摺著袁樹勛按照所奏各節確切查辦據實覆奏毋稍徇隱原摺著鈔給閱看等因欽此當即轉行按察司營務處欽遵辦理去後茲據廣東按察使趙瀆彥會同營務處兼緝捕局司道詳前據廣州府知府高觀昌詳稱查順德縣屬事主陳漸鴻家被匪焚劫致斃人命一案先經該前代理縣沈瑞忠訪聞會營勦緝拿獲本案匪犯陳玉生梁勳有簡亞娣三名續獲何遠陳澤二名格斃梁卓梁耀楊仰三名沈瑞忠旋值交卸接任縣饒澤春抵任照案催緝又獲犯蘇枝岑叶志胡祺卽大眼其梁亞耀卽孫指耀吳亞恩卽吳亞二等五名格斃梁大骨用一名胡祺因圍捕格傷旋卽身死計已獲首從案犯共十四名內訊明懲辦五名當場格斃四名捕獲後因傷身死一名其餘四名俟覆訊確供另行稟辦此營縣聞報往捕及先後獲犯訊辦之實在情形也至事主陳漸鴻家住桂洲大澳坊該處附近容奇地方會將練勇改爲巡警距失事處所約五里中隔一海當時聞警往救因衆寡不敵拒傷巡士徐錦一名汎弁聞報馳往救出屋內老婦女子幼孩四名口是汎警救護尙非不力原案所稱不聞救護不報警信營弁通匪等語係屬傳聞失實至原案未劫之先半月縣署白晝脫去大盜羅永等數十人自是順德一屬無夕不劫羅永係著名巨盜被逮後值前縣徐元英不理民事積囚至七百餘人遂成劫獄之案一節查宣統元年四月十六日酉刻順德縣監犯吳文五卽吳斌與弟吳文六倉卒起釐號召同監各犯共三十二名反獄逃出監外復打毀羈所柵門喝令各押犯共四十二名同時逃跑當經該前

署縣厲式金會營督率典史練勇即日追獲反獄首犯吳文六等二十六名槍斃吳文五等三名又於十八日獲回竊犯關亞耿等十三名格斃監犯林申一名厲式金及典史張興仁奉文撤任留緝代理縣沈瑞忠抵任會同厲式金等續獲竊犯梁林一名又撈獲格傷溺斃之竊犯歐陽欣屍身一具計前後獲回及格斃逃犯共四十五名已獲各犯業據沈瑞忠訊明將吳文六等十四名稟請懲辦其餘分別磔禁年限稟經前護督臣胡湘林批准辦理此監竊各犯脫逃已獲回首從各犯之實在情形也其在逃之羅永一名本係著匪投營贖罪隨同勦辦沙匪拿獲匪首林伯父有功保升千總並委代理順德協營甘竹汛把總汛務嗣因私離汛地慮復爲匪經水師提臣李準咨經前督臣張人駿將其斥革於光緒三十四年九月間發縣監禁十年其時徐元英先已交卸並非徐元英任內之事此次陳漸鴻家被劫所獲各犯據供係已獲正法之蘇枝格斃之梁耀及未獲之梁來黃順泰四人同謀剽劫並無供及羅永等剽邀行劫之事是陳漸鴻家劫案實與厲式金任內逃犯羅永等無涉更與徐元英無干自未便牽扯並論惟查順德縣屬桂洲一鄉分爲外村裏村附近皆係沙坦港徑分歧四通八達匪蹤出入靡常陳漸鴻家被劫後奉撥巡防新軍副中營馳往駐紮巡緝惟營勇勢難專駐一處第恐移營之後難保不潛回滋擾業經該前縣饒澤春督飭紳士募集鄉團擇要分駐輪值校巡以輔兵力之不及仍飭隨時會督營勇嚴密偵緝一面勒限各該族紳耆細交務將各案逆犯悉獲訊明究辦以靖地方該前署縣厲式金署順德協營江英守備羅壽崇各於失事後已獲首從各犯多名雖覺疏忽於前尚知愧奮於後已先後撤任並將厲式金與典史張興仁於反獄案內詳經臣奏系江英守備羅壽崇請免予懲處等情前來臣覆核無異除該前署順德縣知縣厲

式金與典史張興仁先已按例 奏系外台無仰懇 天恩俯准將前署順德協營江英守備羅壽崇免予懲處出自 逾格鴻施除飭將捕務認真整頓巡緝違卽叅辦並嚴定州縣積案處分不准稍延擱外所有遵 旨查明順德縣事王陳漸鴻家被劫焚斃及監犯越獄辦理情形理合恭摺覆陳伏乞 皇上聖鑒謹 奏宣統二年五月二十九日奉 硃批 著照所請欽此

署理兩廣總督袁樹勛奏廣東械鬪日熾分別治標治本辦法摺

奏爲廣東械鬪日熾隱患方深擬分別治標治本辦法以遏亂萌恭摺具陳仰祈 聖鑒事竊查粵東民俗强悍械鬪之風甲於天下睚眦細故動輒尋仇同族則以強房欺弱房異族則以大姓欺小姓弱房小姓不甘受其欺而又知力不能敵則結連外村以抵禦之於是招雇鬪匪購置槍械變連禍結殺掠相尋甚至蔓延數十村糾纏數十載擄掠生口發掘墳墓田園荒廢家室流離慘酷兇殘殆無人理其主謀者多鄉族管理祖嘗之人藉鬪開銷從中漁利幫鬪之匪事不干己肆行焚掠惠州府屬並有紅黑旗匪徒專以幫鬪爲事鬪釁一開聞風自至往往本村已知悔禍而幫鬪者未鑿所欲竟至欲罷不能地方文武官馳往彈壓理喻則違抗不遵勢禁則苦於兵力單薄迨稟請派撥營隊而鬪禍已不可收拾矣溯查光緒十二年已故大學士_臣張之洞前在兩廣總督任內以械鬪定例尙輕奏請照天津鍋匪辦理奉 旨交部議准凡僱募匪徒殺人放火擄生劫財兇暴昭著者不分首從一律就地正法迄今二十餘年此風未能止息推求其故蓋因鬪案多以罰款賠償了事並未深究主謀嚴懲幫鬪以致各鄉無所顧忌近如番禺縣所屬之橫沙茅岡及石牌洗村等鄉同時互鬪營縣前往彈壓胆敢

開槍向官兵轟擊順德縣所屬之南浦霞村兩鄉械鬪甚至傷斃弁勇兇橫若此非嚴行懲創貽患何可勝言況從前所謂鬪匪尙不過鹽梟盜賊湏迹其中近年情形迥非昔比三點會之外又有小刀會劍仔會諸名目醜類繁多遇事麇集並有革黨到處煽誘聯絡一氣其陰謀詭計防不勝防萬一借械鬪爲名乘機蠢動所關尤非淺鮮况現在粵漢廣九鐵路工程未竣一有鬪案動須停工行車尤虞危險是械鬪之風不止實爲粵東隱患臣與在省司道妥籌辦法據廣東按察使趙瀆彥會同營務處司道詳稱擬分別治標治本兩法所謂治標者當場嚴懲鬪匪不論本村外村之人凡持槍械在場鬪殺即屬土匪如官兵到村仍敢麇聚不散應由地方文武官察看情形何造不遵彈壓即准官兵向何造開槍格殺者照律勿論其止鬪之鄉及僅圖自衛並非有心逞兇者仍不准輕於開槍以示區別至主謀糾鬪之人實爲罪魁地方官查辦鬪案必責令交兇不知兩造對壘之時火器連轟本不能知何人致斃何人是勒交祗屬具文否亦不過賄買頂兇而已前督臣張之洞原奏有鬪匪但有得財之樂從無償命之苦二語實爲切要之論應責成地方官嗣後嚴究主謀拿獲到案無論能否交兇審實即按例擬抵使知償命之苦罪有所歸鄉族無主持之人聞風自可斂戢其槍械嚴行追繳不准稍有隱匿如敢抗違准該文武官督兵進村按戶搜檢除槍械外不准擅動民間一草一木違者以軍法從事此治標之法也所謂治本者州縣爲親民之官聽斷首宜勤慎粵民雖悍其械鬪多因尋常細故或爭田水或爭坟山果能裁判公平遇案速結何致釀成鬪釁間有橫蠻鄉族並不稟官恃強逞忿然當叢謀未定之時聞信即往解散保全必多應通飭各州縣嗣後倘有因控案久懸不結致成鬪案或聞報不速往查辦任意延玩一味敷衍搪塞者即由司處查明詳請嚴

系以儆玩泄至鬪鄉祠產前督_臣張之洞原奏查封入官蓋以一切鬪費皆取之祖嘗必使其無可開銷則此風不禁自絕_臣前於禁革花紅案內奏明將查封祠產一律禁革係就廣東緝匪之弊言之與查封鬪產不同擬嗣後互鬪及幫鬪鄉族均查明祖祠嘗產除酌留祭饗之需外其餘悉數提出爲舉辦該鄉小學堂及工藝廠之用以其祖若宗所遺之產還以教養其子孫財歸正用人漸馴良亦易俗移風之一道地方官倘有侵漁產價者卽行詳奏此治本之法也抑_臣更有請者現值豫備立憲民間講求自治此等惡習官與紳共負責任賞與罰尤貴並行擬請嗣後凡著名好鬪各州縣地方官果能勤於聽斷或遇民間鬪立卽解散弭患無形三年無械鬪者由司處詳請奏獎勵紳士中公正明白平日善於化導遇鬪勸息卓著成績者亦准本管州縣詳請獎勵以昭激勸_臣爲嚴懲兇頑禁遏亂萌起見是否有當伏乞 敕部覈明立案所有廣東械鬪日熾隱患方深擬分別治標治本兩法緣由據廣東按察使趙燏彥會同營務處司道詳請具 奏前來除咨部查照外謹具摺據實陳明伏乞 皇上聖鑒訓示 謹 奏宣統二年五月三十日奉 硃批該部知道片併發欽此

●又奏現辦會匪情形片 再粵東會匪向止三點會係於洪逆亂平之後其遺黨暗用洪字偏旁互相勾結蹤跡甚爲詭秘近年此風日熾膽敢設立堂名分派頭目到處剽劫不從者肆行逼脅開臺拜會夜聚曉散習以爲常爲首坐臺者曰東主曰老母轉糾夥黨者曰保母曰保舅贊助謀畫者曰白扇供奔走者曰鐵棍曰草鞋其資格較深者曰金花曰雙金花名目不一大抵初則惑衆斂錢繼則剝黨搶劫劫財不足復擄人勒贖計一省之中勾結日廣幾於無處蔑有而以惠潮高廉各屬爲最多近來附省之順德東莞新會等縣亦蔓延徧地此外有小刀

會劍仔會諸名目皆與三點會聯成一氣小刀會係各携一小刀以爲記號十餘年前惟惠潮等府有之劍仔會係以東洋小劍爲記於近數年始行發見並有革黨從中勾串一經刦得巨資購買洋槍甚爲便捷是以粵中盜匪無不身藏利器徒黨日繁一呼鬪集從前劫案夥黨不過一二十人近年刦匪動逾數百緝捕之難已較他省迥別捕獲之後訊辦稍遲往往乘機利黨越獄若別省之盜不過刦財粵東之盜多屬會匪實有滋蔓難圖之憂現在省城外隄岸修築完竣商賈雲集會匪亦多滯迹其中本年春間乘機聚衆縱火擲石不止一次業經捕獲數人酌擬監禁以示薄懲惟會匪日多若不及早翦除爲患實非淺鮮除飭廣東按察司營務處遵照法部奏准通行邊省盜匪凡係會匪馬賊攻撲城池抗拒官兵仍准就地正法章程審實係實在會匪卽行正法以杜後患外並飭巡警道及地方文武各員在隄岸一帶嚴密稽查實力偵緝並一面出示曉諭准已經入會並未從刦者自首註冊免罪以期解散脅從所有廣東會匪日衆現擬辦理情形理合附片陳明伏乞 聖鑒訓示謹 奏宣統二年五月三十日奉 硃批覽欽此

署理兩廣總督袁樹勛奏審明因瘋殺死義母重犯何亞瀆按律定擬摺

奏爲審明因瘋殺死義母重犯按照本律並新章問擬恭摺仰祈 聖鑒事竊據署香山縣知縣沈瑞忠詳報客民何亞瀆因瘋扎傷義母何鄭氏身死一案當以案情重大批飭提省審辦茲據署廣州府知府嚴家熾審明擬擬解由兼署臬司陳望曾覆審解勦前來且在病假期內飭委廣東藩司陳夔麟提犯研鞫何亞瀆原

籍羅定州寄居香山縣已死何鄭氏係該犯義母何亞瀆本係甘亞全之子其母黎氏均已身故該犯於十八歲時至寄居香山縣屬原籍恩平之何恩贊家傭工十九歲時經何恩贊與妻何鄭氏收為義子改從何姓娶妻馮氏平日孝順素無觸犯情事宣統二年二月間何亞瀆染患瘋病時意何恩贊因其並未滋事不願報官饋餉三月十八日午牌時候何亞瀆瘋病復發拾取柴刀走出村外跳舞何鄭氏與何馮氏先後趕出攔阻何亞瀆用刀扎傷何鄭氏左耳根倒地何馮氏喊救地保黃慎謙聞聲趨至牽落何亞瀆柴刀將其捆縛何恩贊在田工作亦聞聲趕回看視詎何鄭氏傷重旋即殞命正欲送案即經該縣訪聞查拿何恩贊等將該犯及兇刀交差解案報縣驗訊何亞瀆目眩神呆語無倫次帶案收禁醫局訊供通詳批飭解省發委廣州府審明繼據由臬司覆審解勘臣在病假期內飭委廣東藩司陳夔麟提訊據供前情不諱詰係瘋發無知將義母何鄭氏扎傷身死並無裝瘋捏飾及另有別情究極不移案無遁飾查律載子毆母殺者凌遲處死又例載子過房在十六歲以上配有室家者若於義父母有犯即同子孫取問如律通行斬立決又例載子孫誤傷祖父母父母致死律應凌遲處死者仍照本律定擬又光緒二十九年刑部奏准通行嗣後於因瘋設殺祖父母父母之案審明平日孝順實係瘋發無知即比照誤殺祖父母父母之例仍照本律定擬將可原情節於摺內聲敘請 旨改為斬立決又光緒三十二年刑部通行嗣後遇有瘋病殺人案件凡親屬鄰佑人等容隱不報致殺他人者均從寬一併免其照例治罪鄉約仍革役各等因此案何亞瀆因瘋扎傷義母何鄭氏身死自應按律問擬應如該司等所擬何亞瀆合依子毆母殺者凌遲處死律擬凌遲處死斬立決又例載決惟審明該犯平日孝順實係瘋發無知遵照專案通行比照誤殺父母例請 旨改為斬立決何恩贊應與鄰佑人等一併照章免其治罪地保黃慎謙仍照革役犯妻何馮氏救阻不及應毋庸議屍棺飭屬領埋兇刀案結銷燬何恩贊黃慎謙均發縣省釋本案兇犯係該縣訪聞查拿獲案職名應請免開除將供招分咨部院外所有審明擬擬緣由理合恭摺具陳伏乞 皇上聖鑒訓示謹 奏宣統二年九月十四日奉 硃批大理院覆判具奏欽此

署兩廣總督袁樹勛奏請以王秉恩調補瓊崖道摺

奏爲海疆道缺緊要遵 旨揀員調補以資治理恭摺仰祈 聖鑒事竊臣於宣統二年六月十八日接

准部咨奉 上諭廣東瓊崖道員缺緊要著該署督於通省道員內揀員調補所遺員缺著榮元補授欽此

伏查瓊崖道缺管轄一府一州十二州縣駐劄瓊州疊嶂層巒民黎雜處且四面環海道接外洋撫馭巡防均

關緊要非才識明練爲守兼優之員不足以資治理臣率同藩臬兩司於通省道員內逐加遴選非現居要缺

卽人地未宜惟查有調補高雷陽道王秉恩年六十三歲係四川華陽縣舉人投効黔營因攻拔興義各城肅

清案內出力保奏奉 旨以知縣簽掣省分歸候補班前先用補用道例捐指貴州光緒十一年奏調廣東

差委復報捐同知指分廣東試用嗣因攻克瓊州黎集客匪案內出力保准俟補缺後以知府仍歸原省補用

旋捐離任歸知府候補班序補引 見回省奏開復辦理洋務期滿保准俟補缺後以道員用二十年

報捐離任仍留廣東以道員歸候補班補用二十一年九月引 見二十二年二月領照回粵歷經前署

兩江總督湖廣督臣張之洞奏調江南湖北差委因辦理順直賑捐出力保加二品銜復保准送部引

見旋丁母憂服滿起復二十九年經前署督臣岑春煊等電奏委署廣東按察使旋署廣東督糧道兼署兩廣

鹽運使復經奏保人才奉 旨著交軍機處存記嗣於廣西土匪肅清案內奏准 賞加頭品頂戴

三十二年委署廉欽道五月到任六月二十七日奉 旨准補廉欽道缺三十三年五月交卸經前督臣

周馥奏委革職三十四年前督臣張人駿以被參屈抑奏請開復奉 旨王秉恩著開復原官宣統元年

二月奉 旨直隸熱河道員缺著王秉恩補授四月奏留在粵辦理要政五月奉 旨廣東高雷陽道著

王秉恩調補欽此二年正月委署廣東巡警道十九日到任三月初一日交卸該員識遠才長廉潔穩練以之

調補瓊崖道洵堪勝任該員係以簡缺調補邊要道缺雖尙未到高雷陽道本任惟在粵多年曾任廉欽道實

缺並歷署廣東按察使鹽運使督糧道巡警道等缺情形熟悉與初到省人員未經到本任者情事不同且查

同治五年間前高廉道林述訓九月到省卽奏調南韶連道缺奉准調補有案核與此案事同一律臣係爲地

擇人起見合無仰懇 天恩俯准以該員王秉恩調補瓊崖道缺實於海疆要缺有裨如蒙 俞允所遺

署兩廣總督袁樹勛奏裁汰書吏酌留分科改稱一二三等錄事等片

再臣讀光緒二十七年四月十六日 諭旨京外各衙門額設書吏均分別裁汰等因欽

此欽遵在案仰見 先朝滌除秕政咸與維新之至意顧各省除新設之學法交涉諸司

巡警勸業兩道均係僱用書記生或錄事供給繕寫外其原有大小各衙門尙不免因仍舊習

良由爲官者實缺署任皆有遷調之期入幕者大率隨官移易其勢不能持久不免視同傳舍

明知書吏之害姑念其熟悉成案亦遂憚於改作而若輩遂據衙署爲窟穴其實近年推行新

政多非尋常吏胥所能諳曉際此豫備立憲時期未便官民上下之間多此一重障礙亟應剔

釐弊竄廓而清之 履任之初即將舊時文案改爲幕職分科治事各專責成一切文牘電函

均由 董率幕僚手自撰擬署中書吏祇備鈔胥現復分別考核切實裁汰擇其勤慎趨公者

酌量留用分隸各科改稱一二三等錄事其月給廩餼以是爲差嚴定去留以免冗雜滋患又

廣東藩司衙門現因財政公所成立各房書吏亦即分科隸屬經該藩司陳夔麟甄別裁留統

照新設司道衙門改稱書記生及錄事以爲各府廳州縣先樹風聲除將詳細辦法分咨查照

外理合附片具陳伏乞 聖鑒謹 奏宣統二年十月十六日奉 硃批該部知道欽此

●又奏編纂教育統計表告竣請立案片 再案准學部咨統計一項最關緊要而於教育尤

甚各省先後齋到表冊辦理互異不合統計之用茲酌定表式通行填寫以歸畫一等因所有

廣東省學堂光緒三十四年教育統計表冊業經 奏咨在案茲據署廣東提學使沈曾桐詳

稱宣統元年教育統計表前經接續辦理現已編纂告竣計專門學堂五所學生一千七百三

十九人實業學堂十二所學生一千零六十三人優級師範學堂暨專修科二所學生三百二

十一人初級師範學堂七所學生六百八十二人中學堂二十九所學生三千一百二十二
人高等小學堂一百五十所學生一萬零二百九十八人兩等小學堂六百一十六所學生三萬
五千零八十四人初等小學堂八百六十二所學生三萬三千三百四十七人蒙養院一所生
徒六十六人女子師範學堂二所學生八十二人女子小學堂七所學生六百三十三人統計
全省各種學堂一千六百九十三所全省學生合共八萬六千四百三十七人此外未經稟報
各學堂及雖稟報而未核准立案與已經立案而因事停辦者概行刪除不計據學務公所總
務科統計處各員造具統計表詳請 奏咨立案前來 覆核無異除將表咨立案外理合附
片具陳伏乞 聖鑒謹 奏宣統二年十月十六日奉 硃批覽欽此

署理兩廣總督袁樹勛奏陸軍小學堂畢業酌保在事出力人員摺併單

奏為廣東陸軍小學堂兩班畢業遵照定章酌保在事出力人員繕具清單恭摺仰祈 聖鑒事竊查前練
兵處奏定陸軍小學堂章程每屆年滿按其成效由督撫將軍都統擇其尤為出力之員咨明練兵處兵部照
章請獎又查政務處奏定武備學堂請獎章程學生畢業成就在六七十人以上者准將在事人員請獎每案
不得過十六員之數其尤為出力之員准照異常勞績酌保二三員各等語近年各省陸軍小學堂已辦畢業
者均經照章請獎奉准有案廣東自光緒三十一年開辦陸軍小學堂以來分年陸續招收各班學生入堂繼
至光緒三十四年九月第一期生肄業期滿畢業五十五名宣統元年九月第二期生肄業期滿畢業七十四
名經前督臣張人駿及臣先後派員監試均升送中學堂覆試合格有案綜計兩班成就學生共一百二十九
名所有在堂教習執事各員五六年來經理有方教授得法寒暑無間昕夕不遑用能造就多材不無微勞足
錄自應照章請獎茲據兩廣督練公所教練處開單詳請具奏前來臣覆加查核計請獎異常勞績四員尋常

勞績二十一員核與請獎定章人數有減無增委無冒濫謹繕清單恭呈 御覽合無仰懇 天恩照獎給獎以資激勵除飭取各員履歷咨部查照外理合恭摺具陳伏乞 皇上聖鑒訓示謹 奏宣統二年十月十七日奉 硃批該部議奏單併發欽此

謹將酌保廣東陸軍小學堂在事出力人員繕具清單恭呈 御覽 計開 儘先選用知縣黃士龍擬請

免選本班以直隸州知州儘先選用 分部試用七品筆帖式續莊擬請免補本班以通判分省試用 貴州

補用知縣趙懿年擬請免補本班以直隸州知州仍留原省補用 通判職銜廖孔訓擬請以通判不論雙單

月選用 以上四員係照異常勞績請獎 分省補用知縣黃鳳銜擬請俟補缺後以直隸州知州在任候補

貴州候補班前補用縣丞陸榮榮擬請俟補缺後以知縣在任候補 州同職銜霍曾全林有志均擬請

以州同不論雙單月選用 附貢生縣丞職銜任樹柑增貢生縣丞職銜張鳳圖縣丞職銜何赤羅國彬李國

鈞蕭鵬舉鍾秀吳若許華煜均擬請以縣丞不論雙單月選用 附貢生楊瑞岐增貢生何樹棠均擬請以府

經歷不論雙單月選用 從九品職銜華義方北洋大學堂預科畢業生王履康廣東武備學堂畢業生蕭望

歲均擬請以從九品不論雙單月選用 五品銜廣東候補鹽知事秦湘擬請 賞給四品封典 廣東陸

軍速成學堂畢業生林伯榮廣東武備學堂畢業生李暉均擬請 賞給步隊協軍校銜 以上二十一員

係照尋常勞績請獎宣統二年十月十七日奉 硃批覽欽此

署理兩廣總督袁樹勛奏派委學務公所及省視學人員銜名摺併呈 聖鑒事竊照前准部頒各省學

務官制章程課長副長省視學及課員每年由督撫彙奏彙咨一次又准部咨各省學務公所科長副科長員

省視學等照章由提學使年前札委開具詳細履歷咨部備案各等因所有宣統元年派委學務人員彙經連

章彙報在案茲據署廣東提學使沈曾桐造具宣統二年派委各員銜名履歷清單詳請 奏咨前來臣覆核

無異除咨部外理合彙單恭摺具陳伏乞 皇上聖鑒謹 奏宣統二年十月十七日奉 硃批學部知

道單併發欽此

謹將宣統二年派委學務公所各科員及省視學各員遵章彙開清單恭呈 御覽 計開 總務科科長
 補用知縣況仕任副科長試用知縣俞安鳳科員候選知縣蔚德慶同知職銜姚禮備試用縣丞劉景棠 專
 門科科長分省補用知府沈毓嵩副科長江西試用知縣陳慶榮科員揀選直隸州州同濮鉅南 普通科科
 長試用知縣陳佩實副科長補用通判陳文雲科員補用知縣鄭祖仁補用通判顧立仁中書科中書吳燮梅
 實業科科長指分廣東試用知州陳濤副科長候選州判章晉福科員試用知縣林韓移委用知縣任重即
 用知縣宜勳 圖書科科長候選知縣范公議副科長內閣中書馮愿科員優貢知縣林惇燿試用從九品餘
 紹威候選訓導廖景曾 會計科科長丁慶候補知縣馮汝楨副科長試用通判周桂年科員補用知縣高紹
 舒試用縣丞鄒宜瑞 省視學揀發知縣汪佩聲試用縣丞薛裕昆前恩平縣知縣陳清源分省試用直隸州
 州判許之衡 宣統二年十月十七日奉 硃批覽欽此

署兩廣總督袁樹勛奏剿辦廉欽匪案出力之已革知府韓絳等仍請給獎片

再剿辦廉欽逆匪梁少庭案內在事出力之已革浙江候補知府韓絳廣東即用知縣高煥然浙江補用府經
 歷郭人瀚經臣於宣統二年三月二十八日奏請開復給獎在案七月二十六日准吏部咨單內開四月二十
 五日奉 硃批該部議奏欽此欽遵到部查原奏內稱在事出力之已革花翎鹽運使銜道員用浙江候補
 知府韓絳請開復原官升階銜翎留鄂補用並免繳捐復銀兩開復同知銜廣東即用知縣高煥然請免繳加
 倍半捐復銀兩仍留原省補用浙江補用府經歷郭人瀚請免補本班以知縣仍留原省補用懇 恩照准
 給獎等因竊查光緒三十三年五月初三日趙爾巽奏保駐紮西路各防軍出力人員請獎案內奉 上
 諭嗣後叅劾人員遇有勞績保獎著將被叅原案詳細聲敘另摺具奏不得籠統列單請獎等因欽此臣部定
 章各項應交銀兩不准聲請免交又有省分人員不准於他省列保又定例另案開復人員不准戴用原翎亦
 不准隨案聲請又私罪降革人員不准仍赴原省等語查韓絳並未聲敘被叅原案籠統請獎高煥然所請保

屬免交銀兩並請留原省郭人瀚係屬他省列保均核與例章不符應請 敕下該督另核奏明請獎以符定制而免冒濫等因准此當經轉飭遵照在案茲據署廉欽道郭人瀚稟稱遵查韓絳係由舉人報捐知府指分浙江候補因辦理文報海運各案內歷保二品頂戴鹽運使銜道員用於光緒三十二年九月在委辦蘭溪監局差內經浙江巡撫臣張曾歇奏泰以信任司巡聲名甚劣註考革職查其獲贖原案並無據商人控告實

犯贓私虧短公款等情且原案內亦無永不叙用字樣並非在不准開復之列嗣於光緒三十四年十二月來粵報効經前督臣張人駿札委欽州邊防對汛隨員旋兼幫辦邊防業經咨明吏部立案高煥然係由進士即用知縣分發廣東因事被議後咨調邊防派充前敵營務處於光緒三十四年稟准電調來粵前督臣張人駿札

旨開復原官郭人瀚係由監生報捐府經歷分發浙江於光緒三十四年稟准電調來粵前督臣張人駿札委欽防新練軍管帶有案可稽請將已革浙江知府韓絳改請開復原官升階升銜並留粵補用開復廣東即用知縣高煥然改請俟繳清捐復銀兩後以直隸州知州仍留原省補用郭人瀚雖係浙江候補人員先經調粵任差稟報有案仍請免補本班以知縣仍留原省補用該三員均在邊防供差有年此次緝獲逆匪梁少庭等深入異域於蠻煙瘴雨之中往返經年始克成功其堅忍勞苦與內地緝匪情形不同實屬異常出力委無絲毫冒濫非仍懇從優請獎不足以資鼓勵等情前來臣覆查逆匪梁少庭等竄逆越疆爲害甚烈經已革知府韓絳等緝獲正法邊境賴安實與內地尋常緝匪之案有別合無仰懇 天恩准照所請給獎之處出自逾格 鴻施臣爲鼓勵邊防人才起見謹附片具 奏伏乞 聖鑒訓示謹 奏宣統二年十月十七日

奉 硃批該部議奏欽此

●又奏請開復道員吳錫永降調處分片 再廣東督練公所參議道員吳錫永因本年春初新軍肇事經吏部議處奏奉 諭旨降一級調用公罪不准抵銷等因欽此欽遵咨行到粵伏查該員吳錫永係留學日本

士官學校畢業生歷充兩江標協統代理鎮統並兼謀處總辦學術優裕歷練甚深上年十月由臣奏調來粵委充督練公所兼議兼參謀處總辦蒞事未及三月卽值變亂事起獲逆票多紙思患豫防臨時復親赴標營拆散槍機收取子彈警兵滋事親往彈壓息事均經兩江督臣張人駿覆查奏報歷歷可稽自室吏譴愧奮異常督飭在事人員籌備規復成協悉心措置計畫周詳慎重軍需綜核精密維其始蒞事未久防範或有未周卒能奮勉圖功似尙足以補過現在新軍旣已如期成協未便沒其勤勞合無仰懇 天恩俯准開復該參議道員吳錫永降調處分以勵賢勞而資觀感出自 逾格鴻慈謹附片具 奏伏乞 聖鑒訓示 謹

奏宣統二年十月十七日奉 硃批該部議奏欽此

●又奏南洋僑商葉錫勳等捐助學款請准建坊片 再士民捐助義舉銀數至千兩以上者例得 奏請建坊南洋僑商較內地民人微有不同前此粵商羅榮光閩商李金龍暨吳錦源羅奇生等先後報効學費銀各一千元經前任督臣岑春煊張人駿具 奏奉 准給獎有案茲查南洋僑商歸善縣花翎道銜監生葉錫勳同知職銜監生葉茂球葉志廷葉兆發州同職銜監生黃桂綬從九職銜黃銘昇因惠州府中學堂經費各細各捐銀一千元儲爲該學堂生息以充常年經費熱心興學嘉惠梓桑洵屬不可多得據惠州府稟請署廣東提學使沈曾桐具詳援案請獎前來臣查各紳商僑居南洋不忘祖國銳意興學慨捐鉅資實屬深明大義雖銀數未及千兩核與建坊之例稍有未符惟前此從寬優獎僑商歷經辦有成案似應一律援案請獎以示優異合無仰懇 天恩俯准葉錫勳葉茂球葉志廷葉兆發黃桂綬黃銘昇等各在本籍建立專坊給予愈公興學字樣以昭激勸出自 逾格鴻施再前奉部定新章各省報効學費銀兩須交大清銀行上兌等因此次該商等報効時保在未奉到新章以前且外洋情形與內地不同請毋庸按照新章辦理合併聲明除咨部外謹附片具陳伏乞 聖鑒訓示謹 奏宣統二年十月十七日奉 硃批允行該部知道欽此

署理兩廣總督袁樹勛奏新軍規復混成一協點驗成軍摺

奏爲新軍規復混成一協點驗成軍恭摺仰祈 聖鑒事竊照廣東編練新軍先經編足步隊兩標六營三標第一營砲隊兩營工程輜重各一營共計十一營本年正月因兵警交關釀變分別遣散僅存四營前經籌議辦法擬年內補募七營明年再行添募展至宣統四年先成一鎮曾於二月間奏陳新軍善後事宜摺內奏奉議准在案隨即督飭督練公所所在事人員悉心計畫次第進行並經飭訂募兵章程於七月間設立募兵總局以代理廣東混成協統領任福黎委充總理會同督練公所參議道員吳錫永等協力籌辦擇定民情樸實各府州縣畫分區域派員前往募集以肇慶爲第一路羅定爲第二路高州陽江爲第三路雷州爲第四路每路各設分局嗣以高陽兩屬區域較廣於高州陽江各設一分局每局委派募兵官帶同員弁分路勸募並不沿用徵兵虛名飾詞歆動所招但取年力精壯土著確有身家之人開募時明告以優待新軍章程仍與前此徵兵無異各員弁辦理得法民人踴躍應招以高州爲最肇慶陽江次之羅定雷州又次之新兵到省由總局派員覆驗如不合格即時剔退現已選募足額即將各分局次第撤回陸續編立步隊一標一二營就原有之三標一營改爲一標一營作爲步隊第一協第一標砲隊編足三營合爲一標工程輜重各編一營合之舊存二標三營仍符原有十一營之數據督練公所參議兼參謀處總辦道員吳錫永兵備處總辦廣東高雷陽道王秉恩教練處總辦吳晉會同代理廣東混成協統領任福黎詳請具奏前來 臣維廣東籌辦新軍屢經挫折自春初遣散七營後忱於已事之難深恐軍情渙散規復無期幸賴在事諸員規畫周詳先時籌備一切謀定後動計自七月開募以迄撤局計時不過兩月所至區域民情

鼓舞異常其應募而來者均經按格挑選類皆精壯可用似此措置得宜剋期成協以後廣續辦理應無扞格之虞殊非始願所及經臣檄委廣東提法使俞鍾穎按照名冊點驗成軍分別遴委統帶教練管帶各官均係確有學識經驗之員其原派募兵人員亦經量材任使委充各級官長以期情誼相聯毋稍隔闕仍由臣隨時督飭標營官長協力同心認真訓練勛以忠義勉爲干城冀收禦侮折衝之效除造冊分咨查照外所有招募新軍規復成協緣由理合恭摺具陳伏乞 皇上聖鑒訓示謹 奏宣統二年十月十七日奉 硃批該衙門知道欽此

按：抑戒老人於清光緒三十四年戊申三月任山東巡撫，宣統元年己酉五月，升署兩廣總督，翌年庚戌九月，以病免。其撫粵督粵之章奏，散見於政治官報者不少，特爲剪輯景印，彙爲一編，以見其政績之大凡，倘亦

帥南先生之所許可歟。

中華民國六十四年乙卯九月識於台北後野史亭。

新政條議 抑戒齋奏牘輯存 刊誤表

| | |
|--------|---------|
| 二頁六行 | 母誤母 |
| 七頁二行 | 鳴誤鳴 |
| 七頁九行 | 母誤母 |
| 同頁十行 | 母誤母 |
| 二〇頁十四行 | 瞻狗 瞻誤瞻 |
| 同頁同行 | 瞻臣工 瞻誤瞻 |
| 三〇頁十三行 | 母誤母 |
| 三五頁八行 | 災誤炎 |
| 同頁十一行 | 沐誤洩 |
| 四二頁十三行 | 多字側誤植一。 |
| 四九頁八行 | 干誤千 |
| 五三頁十四行 | 搏誤搏 |

五四頁四行

耽誤耽

同頁五行

韌誤韌

五五頁九行

朝誤朝

五八頁十一行

祈誤祈

六二頁六行

主字側誤植一。

六三頁三行

觀字側脫一。

六四頁一行

肯誤肯

六九頁三行

某承乏 某誤其

同頁八行

訶誤訶

七〇頁七行

宮誤宮

七二頁十二行

卹誤卹

七五頁五行

弊誤弊

同頁八行

賭誤賭

八二頁七行

限字側脫一。

- 一〇一頁十行 闕誤闌
- 一一一頁六行 行省下誤多一
- 一二二頁一行 廢封建。誤廢封建
- 同頁九行 第一字「諸」衍文
- 同頁十行 第一字「度」下脫「諸」字
- 一二七頁三行 各誤名
- 一二八頁九行 天誤大
- 同頁十一行 間誤間
- 一三〇頁九行 外誤限
- 一三二頁六行 輪誤論
- 一四〇頁六行 咨飭事理。誤咨飭事理
- 同頁十二行 恣誤恣
- 一五五頁二行 日誤月